



古典文獻研究輯刊

四編

潘美月・杜潔祥 主編

第 13 冊《後漢書》引《尙書》考辨

蔡根祥 著

國家圖書館出版品預行編目資料

《後漢書》引《尚書》考辦/蔡禄祥著 -- 初版 -- 台北縣永和市:

花木蘭文化出版社,2007 (民96)

序 2+ 目 2+176 面: 19×26 公分

(古典文獻研究輯刊 四編;第13 册) ISBN:978-986-6831-23-2(全套精裝)

ISBN: 978-986-6831-06-5(精裝)

1. 後漢書 - 研究與考訂 2. 尚書 - 研究與考訂

622.201

96004369



古典文獻研究輯刊

四 編 第十三冊

ISBN: 978-986-6831-06-5

《後漢書》引《尙書》考辨

作 省 蔡根祥

主 編 潘美月 杜潔祥

企劃出版 北京大學文化資源研究中心

出 版 花木蘭文化出版社

發 行 所 花木蘭文化出版社

發 行 人 高小娟

聯絡地址 台北縣永和市中正路五九五號七樓之三

電話:02-2923-1455/傳真:02-2923-1452

電子信箱 sut81518@ms59.hinet.net

初 版 2007年3月

定 價 四編 30 冊 (精業) 新台幣 46,500 元

版權所有·請勿翻印

《後漢書》引《尙書》考辨

蔡根祥 著

作者簡介

蔡根祥字本善,號社松,廣東中山人。民國四十五年生於澳門。高中畢業後來台升學,以第一志願就讀國立台灣師範大學國文系。修業完成,獲分發台北市蘭雅國中任教。考上師大國文研究所碩士班,以論文〈《後漢書》引《尚書》考辨〉完成碩士學位。經陳新雄老師推薦,應聘赴韓國釜山東亞大學校中語中文系。返台攻讀台灣師大國文研究所博士學位。以〈宋代《尚書》學案〉論文畢業。先後任教於崇佑企業專科學校、台北工專,再轉任高雄師大國文系,復改任經學研究所副教授迄今。曾受聘為國立編譯館國中國文教科書編審委員,對中學國文教材有所鑽研。除《尚書》之外,對群經、諸子、文字學、聲韻學、訓詁學、語言學、方言(粵語)、書法等皆有涉獵研究,現在所任教之課目亦與前述專長相同。曾發表相關論文數十篇。

提 要

本論文乃根據東晉末、南朝劉末間范曄所著《後漢書》,以書中所引用有關《尚書》之文辭 語句,以考辨其中所顯示《尚書》之種種情形。文中除分別註明、考辨《尚書》文句字形、意義、 說法、家派等之外,尚有主要考辨之論題三:

其一:可以據此考辨范曄所用之《尚書》學,其文本及其《尚書》學淵源與家派。根據本論文之考辨,范曄之《尚書》學,承其祖范寧之學,主用鄭玄之說。

其二:可藉《後漢書》所引《尚書》文辭語句,對應《後漢書》成書之時間,以考傷《古文尚書》之出世年代。蓋范氏大儒,《後漢》巨著,若其中引《尚書》之文,未見偽古文之跡,則偽古文其時尚或未成;抑或有之,亦必不為學者所信也。今考《後漢》全書確未見偽《古文尚書》文句與學說,以此知其時偽古文尚未顯於世而為學者所用也。

其三:可考束漢《尚書》學之情狀及傳授源流,並《尚書》之相關著述。

自序

昔讀韓愈〈進學解〉,謂「周誥殷盤,詰屈聱牙」,初不明所云,及披閱《尚書》經文,始知言之非虛。夫《尚書》之所以難通者,在歷劫諸多故也。蓋《尚書》有七難:秦之火一也;漢博士之抑古文二也;馬、鄭不注古文逸篇三也;魏晉之有僞古文四也;唐《正義》不用馬鄭用僞孔五也;天寶之改字六也;宋開寶之改《釋文》七也。(語出段玉裁《古文尚書撰異序》)七劫之中,又以《僞古文》之影響爲最鉅,歷代學者,均奉僞本以爲典正,於史於文,其失彌遠。本篇之作,即據《後漢書》引《尚書》之文,一以證《僞孔本》出世之較確切年代,再則理明范氏《尚書》學之所從出入,俾爲研考《尚書》者之一助也。嘗聞之師謂:學問之研究,若機械之運旋;而機旋之轉則賴各零件之配合,失一則運轉不得其正矣;故爲學初不求務遠,當實事而求是。本文倘能爲《尚書》學中之一零件,亦所堂也。

幼僑居澳門,未識國粹。弱冠負笈蓬萊,就讀師範大學,受業於諸先生門下,始略通一二焉。駟隙四載,出為人師,深感教然後知不足,古人誠不我欺,乃復發憤進研究所深造,冀一窺宮室之富焉。平居常以「觀五千年歷史長流,遂樂中國;效七十歲從心所欲,仰止先賢」自許,雖志大材疏,然不敢以鷖資自棄也。而《尚書》之學,實極難通,幸蒙 許師勉誨諄諄,提示大綱,曉諭宏旨,察疏補漏,方勉成斯文爾。雖然,猶恐學植孤陋,疏失罨漏之處,尚不克免。補舊出新,敢俟來者;弘識君子,幸指教焉。

七十三年六月 蔡根祥謹識於 國立臺灣師範大學國文研究所

凡例

- 一、本篇所引《後漢書》文句,據虛受堂刊《後漢書》集解本。
- 二、本篇分立各條,首錄《後漢書》引《尚書》之文,以粗體字書之;次附按語, 以中明體書之。
- 二、本篇各條按語所引《尚書》原文,據《十三經注疏本》。
- 四、本篇每條引句,依《後漢書》原文之先後爲序。
- 五、本篇所引《尚書》之文,包括今文二十九篇、〈今文泰誓〉、逸《書》、《尚書 大傳》,及《洪範五行傳》。
- 六、本篇《尚書》篇目名稱,仍二十九篇之舊。
- 七、司馬彪《續漢志》引《尙書》文、附錄篇末。
- 八、本篇有關假借字聲韻之考訂,古聲以蘄春黃季剛先生古本聲十九紐爲準。古 韻分部,則依段玉裁古音上七部諧聲表爲準。



錄

自	序									
凡	例									
第一	-章	導	言	· /		· · · · · · · · · · · · · · · · · · ·	• • • • • • • • • • • • • • • • • • • •			1
第二	.章	《後	漢書	·紀》	引	《尚書》	考辨			·· 19
第三	章	《後	漢書	・傳》	引	《尚書》	考辨	(上)		·· 55
第四	章	《後	漢書	・傳》	引	《尚書》	考辨	(中)	********	. 77
第王	Ĺ章	《後	漢書	・傳》	引	《尚書》	考辨	(下)	**>/^*	109
第六	章	結	論	-1-*****					····	151
附翁	青	馬虎	《續	漢志》	引	《尚書》	考辨		******	157
重要	多考	書日								173

第一章 導 言

(一)《後漢書》與《續漢志》

《後漢書》,宋范曄撰。曄字蔚宗,順陽人,車騎將軍泰少子也。少好學,博涉經史,善屬文,能隸書,曉音律。初爲彭城王義康冠軍參軍,嗣爲尚書吏部郎,後因忤義康,左遷宣城太守。不得志,乃廣集學徒,窮覽舊籍,刪眾家之《後漢書》爲一家之作。累遷太子左衛將軍,掌禁旅,參機密,後因彭城王義康被黜事,與魯國孔熙先謀,欲傾宋室,事發伏誅,年僅四十八。(詳見《宋書》本傳)

後漢之名,范氏所自命,《宋書》本傳載其〈獄中與甥姪書〉云:「既造後漢,轉得統緒。」范曄於獄中書嘗敘其作《後漢書》之大略曰:「詳觀古文著述,殆少可意者。班氏最有高名,既任情無例,不可甲乙辨,後贊於理近無所得,唯志可推耳。博贍不可及之,整理未必愧也。吾雜傳論,皆有精意深旨,既有裁味,故約其詞句。至於循吏以下及六夷諸序論,筆勢縱放,實天下之奇作;其中合者,往往不減〈過秦〉篇。嘗共比方班氏所作,非但不愧之而已。欲偏作諸志,《前漢》所有者悉令備;雖事不必多,且使見文得盡;又欲因事就卷內發論,以正一代得失,意復未果。贊自是吾文之傑思,殆無一字空設,奇變不窮,同含異體,乃自不知所以稱之。此書行,故應有賞音者。記傳例爲舉其大略耳,諸細意甚多。自古體大而思精,未有此也。」其言自負特甚,然一代史才,爲後世所論定;梁剡令劉昭《後漢書》注〈補志序〉云「范曄《後漢》,良誠跨眾氏」,劉知幾《史通》雖嘗指摘一二,然亦有「簡而且周,疏而不漏」之稱,王應麟嘗歎曰「史裁如范,千古能有幾人」,蓋皆有識之言也。

范曄獄中書云「本未關史書,政恒覺其不可解矣」,其著《後漢書》,始于左遷 宣城太守時。〈本傳〉云:「元嘉九年冬,彭城太妃薨,將葬,祖夕,僚故並集東府。 曄弟廣淵時爲司徒祭酒,其日在直,曄與司徒左西屬王深宿廣淵許,夜中酣飲,開 北牖,聽挽歌爲樂。義康大怒,左遷曄宣城太守。不得志,乃刪眾家《後漢書》爲 一家之作。」是其爲《後漢》始于元嘉九年(432)。〈本傳〉又云:「二十二年(445) 九月,征北將軍衡陽王義季,右將軍南平王鑠出鎮,上於武帳岡祖道。曄等期以其 日爲亂,而差互不得發。」於其年十一月徐湛之上表發其事,上捕之入獄,經二旬 而戮於市;自元嘉九年至元嘉二十二年,前後十三載,即《後漢書》著述之期限也。

《史通·古今正史篇》云:「至宋宣城太守,乃廣集學徒,窮覽舊籍,刪煩補略,作《後漢書》,凡十紀、十志、八十列傳,合爲百篇。會曄以罪被收,其十志亦未成而死。」以是而言,曄卒時其書未成也,其未成者,志也。至於紀傳則先成矣,紀傳之贊即爲明證。范氏獄中書未言志有十,今史通以爲十者,考獄中書云「嘗共比方班氏」,又曰「前漢所有者悉令備」,且言多以班書爲據;班書百篇,而范氏紀傳共九十,其志十,合成百篇之數,與前漢相應,亦或然也,且李賢注〈帝后紀〉十皇女下云:「沈約、謝儼傳,范所撰十志,一皆託儼搜撰。」此言今《宋書》雖不載,要之亦可佐證。范氏嘗爲《後漢書》作志,今可考見者有五:〈百官志〉見《後漢書・皇后紀》,〈禮樂志〉、〈輿服志〉見〈東平王蒼傳〉,〈五行志〉、〈天文志〉見〈蔡邕傳〉,又《南齊書·文學傳》「檀超掌史職,議立十志,百官依范曄合州郡」,是范氏作志之明證。

今本《後漢書》有八志三十卷,乃梁剡令劉昭,取司馬彪《續漢志》補之。補志序云:「迺借舊志,注以補之。」又曰:「分爲三十卷,以合范史。」唐章懷太子李賢,注《後漢書·紀·傳》,而〈志〉仍用劉昭注。宋眞宗乾興元年(1022),孫與奏請合刻云:「伏見《晉》、《宋書》等,例各有志,獨茲《後漢》,有所未全,其《後漢·志》三十卷,欲望聖慈許令校勘雕印。」自是以後,刊刻《後漢書》者皆奉以爲式,遂成今本《後漢書》。本文就范曄《後漢書》所引《尚書》之文加以考辨,而司馬彪《續漢志》三十卷中所引《尚書》文辭之考辨,置之附錄。

(二) 范曄之《尙書》學

范曄《後漢書》引《尚書》之文,其可考辨者,約有三端:其一,可以考范曄所用《尚書》之本及其《尚書》學;其二,可借《後漢書》所引《尚書》及《後漢書》著成時間,以考《僞古文尚書》之出世年代;其三,可考東漢《尚書》學之情狀,及《尚書》之傳授源流。此三者,著作斯篇之要旨也。茲先述范曄之《尚書》學。

《宋書‧范曄傳》云:「少好學,博涉經史,善屬文。」於其《尙書》所學,究

主誰家,並無說明;歷代先儒前輩,亦無論及者。《晉書·荀崧傳》云:「時方修學校,簡省博士,置《周易》王氏,《尚書》鄭氏,《古文尚書》孔氏……乃上疏之『……世祖武皇帝應運登隆,崇儒興學,經始明堂,營建辟雍,鄉飲大射,西閣東序,河圖祕書禁籍,臺省有宗廟太府金鏞故事,太學有石經古文,先儒典訓,賈、馬、鄭、杜、服、孔、王、何、顏、于之徒,章句傳注眾家之學,置博士十九人……』。」又《隋書·經籍志》載永嘉以後,今文歐陽、大小夏侯《尚書》並亡。以此考之,東晉《尚書》之學,乃仍西晉之舊,三家今文並亡,所存唯鄭氏與古文孔氏耳。其所謂古文孔氏,非今之僞孔傳本,即劉師培所謂曹魏中葉所出之僞《尚書》孔傳也。(見《劉申叔全書》〈《尚書》源流考〉一文)。

今考范曄論贊及序所引《尚書》之文,其義多與鄭玄《尚書》說合。今舉數例, 以見一斑。

(1)〈袁紹·劉表列傳〉贊曰:「闚圖訊鼎,禋天類社。」

按:〈堯典〉云:「肆類于上帝,禋于六宗。」此云「禋天社類」者,即檃括〈堯典〉之文。考「禋于六宗」之說,眾家紛紜:伏生《大傳》云「萬物非天不生,非地不載,非春不動,非夏不長,非秋不收,非冬不藏,禋于六宗,此之謂也」;《漢書·郊祀志》引歐陽、大小夏侯說云:「六宗者,上不謂天,下不謂地,旁不謂四方,在六者之間,助陰陽變化,實一而名六。」《續漢志》劉昭注引賈逵曰:「六宗謂日宗、月宗、星宗、岱宗、河宗、海宗」;〈堯典〉釋文引馬融曰:「萬物非天不覆,非地不載,非春不生,非夏不長,非秋不收,非冬不藏,此其謂六也」;《周禮·大宗伯疏》引鄭玄云:「六宗禋與祭天同名,則六者皆天神,謂星、辰、司中、司命、風伯、兩師也」;今本僞孔傳曰:「所尊祭者其祀有六,謂四時也、寒暑也、日也、月也、星也,水旱也」。綜考諸說,《大傳》、馬融以爲六宗爲天地四時,三家今文以爲在天地四方之中,實一而名六;賈逵以爲三辰河海岱,僞孔用〈祭法〉之說,以爲天文氣候水旱之屬,皆非所謂天也;惟鄭玄以爲「六者皆天神」,即所謂「禋天」之義。此云「禋天」,即用鄭康成說。

(2)〈南蠻列傳序〉云:「其在唐虞,與之要質,故曰要服。」

按:〈禹貢〉云:「五百里要服,三百里夷,二百里蔡。」此所云「與之要質,故 日要服」者,即解〈禹貢〉要服之義也。考《史記·集解》引馬融曰:「蔡,法 也;受王者刑法而已。」又《尚書·釋文》引馬云「夷,易也」。《詩·齊譜正義》 引鄭玄云:「要服於周爲蠻服,其此當夷服,在四千里之內。」《尚書正義》引鄭 玄曰「蔡之言殺,減殺其賦」。考今僞孔傳云「綏服外五百里,要東以文教」,又曰「守平常之教事王者而已」,又曰「蔡,法也」,則明用馬融之說。而此文以「要服」置於〈南蠻西南夷列傳〉中,與康成云「要服於周爲蠻服」同義,是即用鄭玄之說也。

(3)〈西羌傳〉云:「西羌之本,出於三苗,羌姓之別也;其國近南岳。及舜 流四凶,徙之三危,河關之西南羌地是也。」

按:〈堯典〉云:「竄三苗于三危。」此云「舜流四凶,徙之三危」者,即用〈堯典〉之義也。考《尚書正義·禹貢》「三苗丕敘」下鄭玄引《地記書》曰:「三危之山,在鳥鼠之西,南當岷山,則在積石之西南。」又《禹貢·釋文》引馬融曰:「析支在河關西。」今范曄云「三危」在「河關之西南羌地」,又曰「濱於賜支,賜支即〈禹貢〉之析支」,則所謂「河關西南」即三危所在,亦即與鄭玄之「鳥鼠之西,南當岷山,則在積石之西南」同地,然則范氏用馬融、鄭玄說可知矣。

(4)〈梁冀傳〉:「論曰……何救阻飢之危。」

按:〈堯典〉云:「棄,黎民阻飢,汝后稷,播時百穀。」考《史記·五帝本紀》云:「棄,黎民始飢,汝后稷,播時百穀。」〈周本紀〉云:「弃,黎民始饑,爾后稷,播時百穀。」徐廣曰:「今文《尚書》云『祖饑』,故作始饑;祖,始也。」《詩·釋文》引馬融曰:「祖,始也。」《詩·周頌·思文正義》引鄭注曰:「俎讀曰阻,阻也。時,讀曰蒔。始者洪水時,眾民戹于飢。」徐廣明言今文作祖,故《史記》以詁訓代經字作始,馬融亦用今文解,而鄭注以俎讀曰阻,解作戹。此云「阻飢之戹」者,即明爲鄭玄之說也。

且〈鄭玄傳〉論曰:「自秦焚六經,聖文埃滅。漢興,諸儒頗修藝文;及東京,學者亦各名家。而守文之徒,滯固所稟,異端紛紜,互相詭激,遂令經有數說,章句多者或乃百餘萬言,學徒勞而少功,後生疑而莫正。鄭玄括囊大典,網羅眾家,刪裁繁誣,刊改漏失,自是學者略知所歸。王父豫章君每考先儒經訓,而長於玄,常以爲仲尼之門不能過也。及傳生徒,並專以鄭氏家法云。」考其對康成推崇備至,以爲「學者所歸」;又其祖范甯專以鄭氏家法傳授生徒,家學相傳必矣;范甯卒於晉安帝隆安五年,時曄年僅三歲,然范甯之子,曄之父范泰,卒於元嘉五年,且曾任太學博士、國子祭酒(見《宋書》本傳),當承其家學;曄幼受庭訓,傳其家學理所當然,故其學亦宗鄭氏。由是而言,范曄《尚書》學

說所據,必爲鄭玄《尙書》說矣。

(三) 今本《僞古文尚書》出世之年代

《偽古文尚書》出世之年代,歷來眾說紛紜;今欲以《後漢書》引《尚書》之 文以證其出世之年代;若《後漢書》果及引二十九篇以外二十五篇偽作之文,則《偽 古文尚書》當較《後漢》成書爲早,或有同時,如此則《後漢書》著述之時間,即 爲《偽古文尚書》出世之下限;若未引及,則《後漢》成書當較《偽古文尚書》爲 早,或有同時,如此即可據以定《偽古文尚書》出世年代之上限也。前輩諸儒,於 此略有數說,今臚列其端,然後分別辨之:

(1) 王肅說

丁晏《尚書餘論》一卷,力主其說,並廣搜證據以論之。丁氏云:「王肅《家 語》後序云:『孔安國字子國,天漢後,魯恭王壞夫子故宅,得壁中《詩》《書》, 悉以歸子國。子國乃考論古今文字,撰眾師之義,爲《古文論語訓》十一篇,《孝 經》傳二篇,《尚書》傳五十八篇,皆所得壁中科斗本也。』又載孔衍上書云:『魯 恭王壞孔了故宅,得古文科斗《尚書》《孝經》《論語》,世人莫有能言者。安國爲 之今文讀而訓傳其義,又撰《孔子家語》。既畢,會值巫蠱事起,遂各廢不行。光 祿大夫向以爲其時所未施行之故,《尚書》則不記於別錄,《論語》則不使名家也。』 《尚書・孔安國序》亦言孔壁古文書及傳《論語》《孝經》,皆科斗文字,承詔作 傳,定五十八篇。朱子嘗謂大序不類西京文字,亦不是孔安國作,真不刊之論。 其言受詔作古文書傳,乃子虛烏有子談,正與後序一類。因悟《古文書傳》與安 國《論語注》、《孝經傳》,俱係一手偽書,特于《家語》後序著其篇目,又偽造《尙 書》孔序,彼此牽綴,以實其言,冀取後人之信。《家語》本肅所偽撰,則此《古 文書傳》,亦肅所私造,而托名安國者也。」(見《古文尚書孔傳》始見於王肅《家 語》後序爲一手僞書節〉丁氏並詳舉王肅注書多同《孔傳》之實例,見「王肅注 書多同《孔傳》,始見於唐《陸氏釋文》」,「王肅注書多同《孔傳》,再見于唐《孔 氏正義》」,「王肅私造古文以難鄭君,並《論語》《孔注》,皆肅一手僞書」,「古文 《尙書傳》與王肅注多同,唐孔穎達實親見之,備載於疏,足徵《書傳》爲王肅 私造」,「古文書皆綴集而成,非王肅不能作,肅注自《釋文》《正義》外見於他書 所引者,多與孔傳同,明爲一手綴輯」,「王肅注《尚書》皆今文無古文,然肅注 實有涉及古文者,共詳其說」諸節。又云:「晚出古文皆綴集逸書而成,其文雅密, 非梅氏所能爲也。微肅之學非而博,未易構此。肅注《尚書》,又與之合,故知出 于肅手無疑也。」(以上均見《尚書餘論》)

丁晏之外,惠棟、王鳴盛亦疑之。惠棟《古文尚書·考五子之歌》「亂其紀綱,乃底滅亡」下注云:「哀六年,〈夏書〉曰:『惟彼陶唐,帥彼天常,有此冀方,今失其行,亂其紀綱,乃底滅亡。』《正義》曰:『賈逵以爲逸書,解爲夏桀之時。』賈傳古文而言如此,則梅頤之誕可知。……王肅注《家語》,亦以「今失厥道」,當夏太康時。又《左傳·正義》曰:『案王肅注《尚書》,其言多是《孔傳》,疑肅見古文,匿之而不言。』《經典序錄》云:『肅注今文,而解大與古文相類,或肅私見孔傳而匿之。』據此二說,故棟嘗疑《僞尚書》王肅撰也。」王鳴盛《尚書後案》〈後辨・辨陸德明釋文〉條下云:「王肅注全本,德明時尚在,彼實親見之,故所解大與古文相類。即今日予輩從群書采得之王注,亦皆與僞古文相表裏。然則不知是王肅僞造二十五篇,合三十三篇爲之傳,而又別自注二十九篇,以掩其迹耶?抑皇甫謐竊取王注以造僞孔傳,又于《世紀》自引之以實其言耶?二者必居一于此矣。」

(2) 鄭沖說

章太炎主其說。章氏與吳承仕論《尚書·古今文書》第二書云:「所論僞孔傳作於何人?昔人或疑爲鄭沖,或曰王肅。肅之說與僞孔既有異同;沖在魏世,與何晏同纂《論語集解》,而孔氏《論語訓說》,世所不傳,獨於斯時見之,疑《論語訓說》與《尚書傳》皆沖所託也。沖年最老壽,逮晉世爲三公:三體石經之立,正沖所親見者,其多所采摭亦宜。肅卒於甘露元年,亦在石經立後;《論語集解》引肅說已多,肅之視沖則行輩爲先,故僞傳亦多取肅義。肅善賈馬而薄鄭氏,今僞書文字顧有異於馬同於鄭者,宜必沖所定也。」

(3)皇甫謐說

梅驚《尚書考異》首發其端。《尚書考異》卷一云:「論其時歲,則先漢之古文,實爲安國之家傳;而東晉之古文,乃自皇甫謐而突出。何者?前乎謐而授之者,曰鄭沖、曰蘇愉、曰梁柳,而他無所徵也。沖又受授之何人哉?沖、愉等有片言隻字可考證哉?此可知其書之杜撰于謐而非異人一也。後乎謐而上之者曰梅頤,而頤乃得之梁柳,柳即謐之外兄,此亦可知謐之假手于柳以傳,而非異人二也。至其作《帝王世紀》也,凡《尚書》之言,多創一紀以實之;此其用心將以羽翼是書,而使之可以傳遠,則其情狀不可掩矣,尚何疑哉?」閻若璩《尚書古文疏證》第十七條云:「愚嘗以梅氏晚出書,自東晉迄今歲次壬子,千三百五十六年,而屹與聖賢傳並立學官,家傳人誦,莫能以易焉者,其故有三焉:皇甫謐高名宿學,左思〈三都〉經其片語,遂競相讚述。況渠實得孔書,載于世紀,有不因之而重者乎?」雖未言僞作之人,然以僞孔本始見皇甫謐也。又王鳴盛亦以爲僞書非王肅即皇甫謐作(說見(1)條)

(4)梅頤說

惠棟《古文尚書考》主其說。《古文尚書考》卷首云:「今世所謂古文者,乃梅頤之書,非壁中之文也。頤采摭傳記,作爲古文,以紿後世。」又《辨正義四條》云:「迄乎永嘉,師資道喪,二京逸典,咸就滅亡,于是梅頤之徒,奮其私智,造爲古文,傳記逸書,掎摭殆盡,若拾遺秉而作飯,集狐腋以爲裘,雖於大義無乖,然合之鄭氏逸篇,不異百兩之與中書矣。蓋孔氏既有古文,而梅復造之,鄭自與梅異,非與孔異也。」又劉師培《尚書源流考》云:「《尚書》傳者蓋亦有兩僞本,東晉梅頤所獻《孔傳》,非即《家語後序》所稱之《孔傳》也。」彼雖不言今本僞孔作者爲何人,然以今本繫之梅頤,是其以僞孔本出現于梅氏也。

(5) 晉宋之間說

主此說者爲崔述。其《古文尚書辨僞》卷一云:「至其撰書之人,則梅鷟、李巨來皆以爲皇甫謐所作。以余觀之,不然。西晉之時,今文古文並存於世,安能指古文爲今文,而別撰一古文書《尚書》以欺當世。況謐果注此書,必已行世,何以蔚宗猶不之知?又何以江左盛行而中原反無之?然則此書乃南渡以後,晉宋之間,宗王肅者之所僞撰,以駁鄭義而伸肅說者耳。何以言之?《左傳》『亂其紀綱』,舊說以爲夏桀之時,而肅以爲太康之世;〈無逸〉『其在祖甲』,馬鄭以爲武丁之子,而肅以爲太甲之事。今僞經以『亂其紀綱』入〈五子之歌〉,僞傳以祖甲爲太甲,明明祖述肅說,暗攻先儒,其爲宗肅學者之所僞撰,毫無疑義。蓋漢末說經者皆宗康成;逮王肅起,恃其門閥,始好與鄭爲難;其說不無一二之勝於鄭,而荒唐悖謬者實多;但肅父爲魏三公,女爲晉太后,以故其徒遂盛,其說大行。天下之說經者,分爲二派,一宗鄭學,一宗王肅;宗鄭學者黜王,宗王學者駁鄭。適值永嘉之亂,今文失傳,江左學者,目不之見,耳不之聞;又其時俊傑之材,非務清談,即殫心於詩賦筆札,經術之士絕少,但見馬鄭所傳,與今文篇數同,遂誤以爲今文,由是宗肅學者,得以僞撰此書,以攻鄭氏。書既撰於晉宋之間,故至齊梁之際,始行於當世也。」近人戴君仁先生〈古文《尚書》作者研究〉一文,其結論亦以爲出晉宋之間。

(6) 宋元嘉以後說

作此說者爲程廷祚。其《晚書訂疑》卷上「晚書見于宋元嘉以後」節云:「然則晚書之出,果何世乎?曰:江左之初,所得者二十九篇之僞傳也,以李顒《尚書集解》知之。五十七篇與傳,不出於梅頤所獻。又嘗自晉大興四年,歷百三十餘年,至宋元嘉之末考而知之。范蔚宗撰《後漢書》,論贊極多,未見有引用晚書者;其〈西羌傳〉中言舜竄三苗,而不言禹征苗事。徐廣《史記音義》釋所載《尚書》,常引皇甫謐之語,而不及孔傳。又裴松之注《三國》,於其文用《尚書》者,率援鄭注爲訓,

間引馬氏,而亦不及孔傳。使其時孔書已出,不容於不見;若見之而不以爲據,則 其不信于孔,有必然矣。此三君者,皆終于元嘉之世者也。至松之子駰,爲《史記》 集解,則居然引用安國之說,其後屬辭之家辭,稍稍徵引……而晚書之出于元嘉, 相與刊削其始末。」

又近代劉師培著《尚書源流考》(《劉申叔先生遺書》),以爲僞孔傳有二,一 作干魏中葉,一即東晉梅頤所獻,二者經傳不同(詳見劉氏本文);且云:「凡梅 本孔傳與王同說者,均梅襲王,非王同孔;其與王注互異,則係轉襲他書。近儒 所疑,說均未當。」其言後出轉精,逾乎前修。吳承仕嘗爲〈尚書傳王孔異同考〉 一文云:「大凡王孔異者一百二十五事,同者一百八事,孔無明文者二十三事,王 說不可審知者十八事。」若今本《尚書・孔傳》果眞王肅所僞作,其注說與《孔 傳》本何以異者多於同者,此其非王肅所爲之明證。劉師培氏以爲前一僞本出於 魏中葉,由是推之,前一偽本當爲王肅之徒所偽作,藉以攻鄭玄之說也。今偽本 於前一僞本之說亦多所採襲,亦理然,故其說與王肅同者差半矣。其主鄭沖、皇 甫謐、梅頤說者,乃據《正義》引《晉書》曰:「晉太保公鄭沖,以古文授扶風蘇 愉,愉字休預;預授天水梁柳,柳字洪季,即謐之外弟也;季授城陽臧曹,曹字 **彦始;始授郡寸子汝南梅頤字仲眞,又爲豫章內史,遂於前晉奏上其書而施行焉。」** 考今本《晉書·鄭沖皇甫謐傳》,無片言隻字及之,且《正義》所引古文傳授之迹, 亦不載於今之《晉書》,孤文片語,實未足爲據;又《晉書‧荀崧傳》之東晉元帝 時立古文孔氏,又云晉武帝有孔氏之學,是東晉立學,實沿西晉之舊也;即令有 古文之傳授,亦劉師培氏所謂前一偽傳本,而非今本偽孔《尚書》及傳也。復以 程廷祚《晚書訂疑》卷上「東晉不見有晚書節」云:「二十五篇與二十八篇之傳, 皆非東晉所得有也;何以言之?東晉有李顒撰《集解尚書》十一卷,其書所解乃 漢之〈偽泰譬〉,又每引孔安國注,此見穎達疏中;若謂渡江之初,孔書已出,則 顒爲《集解》時,必無取于〈偽泰誓〉。安國既爲二十五篇作傳,何由復有〈偽泰 誓〉之注?此東晉不見僞書與傳之確證也。」其證歷歷,塙然無可疑,實較意太 炎鄭沖說,梅驚皇甫謐說,惠棟梅頤說爲可信也。

今《後漢書》引《尚書》之文,於〈董卓列傳〉論曰:「董卓初以虓闞爲情, 因遭崩制之勢,故得蹈藉彝倫,毀裂畿服。夫以刳肝斮趾之性,則群生不足以厭 其快;然猶折意縉紳,遲疑凌奪,尚有盜竊之道焉。及殘寇乘之,倒山傾海,崑 岡之火,自茲而焚,〈版〉、〈蕩〉之篇,於焉而極。」其云「刳肝斮趾」之事。「崑 岡之火,自茲而焚」之句見於今《僞孔尚書》,似范曄引《書》時,實見《僞孔尚 書》者;其實不然,分述如下: 《偽孔尚書·泰誓》下云:「朝涉之脛,剖賢人之心。」范論云「刳肝斮趾」, 與之同事。王鳴盛《尚書後案》云:「斮脛剖心事,古書每與刳孕婦連言。」今古書 之述及其事者:

《韓非子》卷十五〈難一篇〉:「昔者紂爲炮烙崇侯惡來;又曰:『斮涉者之脛。』」 又卷二十云:「王子比干諫而紂剖其心。」

《韓詩外傳》:「昔殷紂殘賊百姓,絕逆天道,至斮朝涉,刳孕婦。」

《春秋繁露》卷四〈王道篇〉:「殺聖賢而剖其心,生燔人聞其嗅,剔婦孕見其化, 前期涉之是察其拇。」

《淮南子·淑真訓》:「剖賢人之心。」〈主術訓〉:「斮朝涉者之脛而萬民叛。」 桓寬《鹽鐵論》卷二〈非鞅篇〉:「文學曰:『比干剖心。』」

劉向《說苑》卷十三〈權謀篇〉:「紂焚聖人,剖王子比干之心。」卷十七〈雜言篇〉:「比干盡忠,剖心而死。」

王符《潛夫論》卷一〈賢難篇〉:「比干所以剖心,箕子所以爲奴。」

《史記‧龜策列傳‧褚少孫補傳》云:「聖人剖其心,壯士斬其胻。」

《後漢書‧孔融傳》:「紂斬朝涉之脛,天下謂之爲無道。」

葛洪《抱朴子・外》篇卷一〈君道篇〉:「殷紂剖比干之心而四海疾其虐。」

《論語・微子》篇云:「微子去之,箕子爲之奴,比干諫之死。」則比干剖心之說,自古即有之。上述諸條,自戰國韓非至於晉之葛洪,引文皆未稱「《書》曰」。考之諸條文辭,一書中二事均有之者,韓非、淮南;而一文二事連屬者,《春秋繁露》,《史記》補傳;則二事連屬成文,不始於僞孔。又諸條引文中,「剖心」事多作「剖比于之心」,《史記》補傳作「聖人」,《春秋繁露》作「聖賢」,惟淮南與《僞孔本》同;而「斮脛」條,《春秋繁露》作「足」,《史記》作「胻」,韓非無「朝」字,雖同引一事,而文辭互差者,乃其說未有明文故也。若范曄引文爲據《尙書》,明文確句,則必不改「剖心」作「刳肝」,「斮脛」作「斮趾」,可知范氏引文,與前述諸條相若,以其未有明文可據故也。總此數端,范氏所引「刳肝斮趾」非出《僞孔尙書》可知矣。

又《僞孔尚書·胤征》云:「火炎崑岡,玉石俱焚。天吏逸德,烈于猛火。」范論云「崑岡之火,自茲而焚」,有與之似者。梅騖《古文尚書考異》卷二云:「《晉書·袁宏傳·三國名臣贊》云:『滄海橫流,玉石同碎。』又劉琨傳:『火炎崑岡。』(按琨傳今無此語)可見是晉人語。又漢〈董卓傳論〉曰:『崑岡之火,自茲而焚。』」閻若璩《尚書古文疏證》卷四第六十四條云:「司馬法曰:『入罪人之地,見其老弱,奉歸無傷;雖遇壯者,不校勿敵;敵若傷之,藥醫歸之。其以仁爲本如此,安得有

『火炎崑岡,玉石俱焚』,如後世檄文,以兵威恐敵之事?既讀陳琳集,有〈檄吳將 土校部曲〉文,末云:『大兵一放,玉石俱碎。雖欲救之,亦無及已。』《三國志· 鍾會傳》,會移檄蜀將士吏民曰:『大兵一發,玉石俱碎;雖欲欲悔之,亦無及矣。』 會與琳不相遠,辭語並同,足見其時自有此等語。而偽作者偶忘爲三代王者之師, 不覺闌入筆端。』惠棟《古文尚書攷》:「《周書・世俘》篇云:『焚玉四千。』」故知 《僞孔》古文云「火炎崑岡,玉石俱焚」一語,實魏晉間檄文常用之辭,梅、閻之 說,既論定矣。又考《山海經・大荒西經》曰:「崑崙之丘,其下有弱水之淵環之, 外有炎火之山,投物輒然。」是崑岡炎火之說,自古有之。復以三國名臣贊以「滄 海横流,玉石俱碎」喻兵戰,則范曄以「崑岡之火」爲喻,理亦宜焉,與古者言兵 戰曰「兵燹」「戰火」蓋相切合;而偽孔傳以「火炎崑岡,玉石俱焚」以喻「天吏逸 德之烈」,義與范曄所引不同,范義近魏晉檄文常語,僞孔則近《山海經》文;重以 《後漢書》凡引《尙書》文,謂《書》曰者,未見於《僞古文尙書》,其在伏牛二十 九篇中者,文辭、義訓、句讀,亦與僞孔《尙書》經傳不同者頗多(詳見本論文第 二章至第五章中)。以是觀之,不惟「崑山之火,自茲而焚」一句非出於《僞孔書傳》, 亦可見范曄著《後漢書》時,未見《僞孔尚書》也,誠如程廷祚《晚書訂疑》之說 (見前) 也。

又范曄《後漢書》載諸家文辭,其中引《尙書》之文,雖多仍其師說,不改其字;然范曄刪削眾家《後漢》,獨成一家之言,其於文句之間,亦容或有以己意變易者焉。若范曄曾見《僞古文尙書》,則于載籍中有與之矛盾、參差之處,或未容不加更動,以求順適。今尋《後漢書》引《尙書》之義,非惟未引僞占文二十五篇中語,其於今文二十九篇之分篇情狀,亦與今本僞古文不同:

〈朱浮傳〉載長水校尉備言於帝曰:「唐堯大聖,兆民獲所,尚優遊四凶之獄, 厭服海內之心,使天下咸知,然後殛罰。……」

〈張純傳〉云:「遵唐帝之典,繼孝武之業,以二月,東巡狩,封于岱宗。」

〈陳寵傳〉寵上疏曰:「故唐堯著典,『貴灾肆赦』;周公作戒,『勿誤庶獄』;伯 夷之典,『惟敬五刑,以成三德』。」

〈馬融傳・廣成頌〉云:「故戛擊鳴球,載於虞〈謨〉。」

考偽古文五十八篇,除去偽造之二十五篇外,即取今文二十九篇,加以離析爲三十三,以合五十八之數,其中〈堯典〉自「愼徽五典」以下,分出〈舜典〉,〈皋陶謨〉自「帝曰來禹」以下,析爲〈益稷〉,除去〈今文泰誓〉,復分〈顧命〉、〈康王之誥〉爲二,成三十三篇。今〈朱浮傳〉長水校尉之言,以四罪之事,歸于唐堯,,四罪之事於今本《尚書》在〈舜典〉也;〈張純傳〉中明言「二月東巡狩」事在「唐

帝之典」,即〈堯典〉,今巡狩事在〈舜典〉;〈陳寵傳〉以「眚灾肆赦」爲〈堯典〉之文,今此句亦在〈舜典〉;而馬融〈廣成頌〉以「戛擊鳴球」爲虞〈謨〉;虞〈謨〉即〈虞書〉之〈謨〉也;今〈虞書〉有〈大禹〉、〈皋陶〉二〈謨〉;今此句不在二〈謨〉之中,而屬之〈益稷篇〉,〈益稷〉古本合〈皋陶謨〉爲一篇,至僞孔始分爲二,是知此「戛擊鳴球」一句,入〈虞書・皋陶謨〉,凡此諸條,其篇目均與今文二十九篇合,而與《僞古文尚書》不同,此不獨可明東漢時書篇分合之情狀,以證僞孔之乖謬,亦爲范曄未見《僞孔古文尚書》之佐證。

總而論之,范曄著《後漢書》,《尚書》雖循家學,用鄭氏之說,然若其時眞有今之《僞孔尚書》,范氏亦無由不取,其〈西羌傳〉中亦必採「大禹征苗」事爲說;今遍考《後漢》引《尚書》文,一無蛛迹可尋(如前述),則可推定其時《僞孔古文尚書》未出也。程氏復舉裴松之《三國志注》,徐廣《史記音義》爲佐,其證益明矣。據此則主王肅、鄭沖、皇甫謐、梅頤、晉宋之間諸說,均未允。要之,《僞古文尚書》出于宋元嘉二十二年(445)以後,於理有據。南朝劉宋元嘉二十二年,即《僞古文尚書》出現年代之上限也。

(四) 東漢《尙書》學傳授源流

《後漢書·儒林傳》論云:「自光武中年以後,干戈稍戢,專事經學,自是其 風世篤焉。其服儒衣,稱先王,遊庠序,聚橫塾者,蓋布之於邦域矣。若乃經生 所處,不遠萬里之路,精鷹暫建,贏糧動有千百;其耆名高義,開門受徒者,編 牒不下萬人,皆專相傳祖,莫或訛雜。至有分爭王庭,樹朋私里,繁其章條,穿 求崖穴,以合一家之說。」可見東漢經學之盛矣。〈徐防傳〉防上疏曰:「臣聞詩 書禮樂,定自孔子;發明章句,始于子夏;其後分析,各有異說。漢承秦亂,經 典廢絕,本文略存,或無章句,收拾缺遺,建立明經,博徵儒術,開置太學。孔 聖既遠,微旨將絕,故立博土十四家,設甲乙之科,以勉勸學者,所以示人好惡, 改敝就善也。專精務本,儒學所先;博士及甲乙科,宜從其家章句,開五十難以 試之,解釋多者爲上第,引文明者爲高說;若不依先師,義有相伐,皆正以爲非。 五經各取上第六人,《論語》不宜射策;雖有所失,或久差可矯革。」是知東漢雖 盛,所盛者多爲章句之學也;夫利祿所在,爭相趨赴。桓榮嘗云:「今日所蒙,稽 古之力也,可不勉哉!」(見本傳)正其明證。既以章句師法爲科第,遂使各家師 說,時相攻訐,至有博士試甲乙第,爭第高下,更相告言,而至有行賂定蘭臺漆 **書經字,以合其私文者**(見〈宦者列傳〉)。於是平有石經之立,以爲準則,而各 家學者,亦多有考訂之作,如賈逵受詔撰〈歐陽、大小夏侯尚書古文同異〉之卷;


劉陶推三家《尚書》及古文是正文字三百餘事,名曰《中文尚書》;荀爽《尚書正經》。然章句之學,破壞大體,通人或鄙其固,亦多有兼通者,若賈逵家學古文,而以大夏侯教授(本傳),尹敏少習歐陽,後受古文(本傳),許叔重號稱五經無雙(見〈儒林傳〉)鄭玄兼注今古文是也。

《後漢書·儒林傳》云:「中興,北海牟融習大夏侯《尚書》,東海王良習小夏侯《尚書》,沛國桓榮習歐陽《尚書》。榮世習相傳授,東京最盛,扶風杜林傳《古文尚書》,林同郡賈逵爲之作訓,馬融作傳,鄭玄注解,由是《古文尚書》遂顯于世。」此東漢《尚書》學之大較也。考東漢諸帝,莫非桓榮之學,榮親授明帝,桓郁授章帝、和帝,桓爲授安帝、順帝,楊秉授桓帝,楊賜授靈帝,代爲帝師,恩隆有加,是以東京最盛。東漢《尚學》學之一特徵,即是古文之與起,蓋今文章句學之反動也。《漢書·藝文志》云:「古之學者耕且養,三年而通一藝,存其大體,玩經文而已,是以用日少而蓄多,三十而五經立也,後世經傳既已乖離,博學者又不思多聞闕疑之義,而務碎義逃難,便辭巧說,破壞形體,五字之文,至於二三萬言,後進彌以馳逐。」桓譚《新論》云:「秦延君能說〈堯典〉篇目兩字之說,至十餘萬言,但說曰若稽古三萬言。」《漢書·儒林傳》云:「(孫)元故善修章句,爲廣陵大傳,守小夏侯說文,恭(秦廷君)師法至百萬言。」此今文破壞大體,繁詞冗說之證也。東漢古文諸家,多爲精研小學文字之士,(見王國維《魏堂集林》〈兩漢古文學家多小學家說〉),蓋彼等以古文字學之識見,以解《古文尚書》,實事求是,以革今文浮詞妄說之弊也。

西漢元帝時嘗立《古文尚書》(見《漢書·儒林傳》),然旋立旋廢,未能盛行; 及東漢章帝詔令群儒選高才生受《古文尚書》,以扶微學,廣異義(見〈章帝紀〉) 並詔賈逵撰三家、古文同異,此在上者所提倡也。而杜林得漆書《古文尚書》,常寶 愛之,雖遭難困,握持不離身,嘗謂「古文雖不合時務,然願諸生無悔所學。」此 處下者之精研也。縱觀東漢一代,歐陽桓氏章句行於朝,而古文之學感於野也。

今據《後漢書》所載,兼考其他《後漢》諸史(如《東魏漢記》七家《後漢書》 及《李賢注》所引)並本論文考辨之論,分列古文及三家傳授源流表如下,其不可 表列者條敘之。

(1)《古文尚書》



賈逵〈本傳〉云:「父徽,從劉歆受《左氏春秋》,兼通《國語》、《周官》,又受《古文尚書》于涂惲……逵悉傳父業。」

杜林一衛宏一徐巡:〈儒林傳〉云:「(宏)從司空杜林更受《古文尚書》,爲作 訓旨。時濟南徐巡師事宏,後從林受學。」

杜林···賈逵···馬融一鄭玄:〈儒林傳〉云:「扶風杜林傳《古文尚書》,林同郡賈逵爲之作訓,馬融作傳,鄭玄注解。」

賈逵一許慎:〈說文敘〉云:「書孔氏……皆古文也。」許沖〈上說文〉表云:「慎本從逵受古學。」

馬融一鄭玄、盧植:〈盧植傳〉云:「少與鄭玄俱事馬融,能通古今學。」

張恭祖一鄭玄:〈鄭玄傳〉:「從東郡張恭祖受《古文尚書》。」

孔安國:孔僖、孔長彥、孔季彥:〈儒林傳〉:「自安國以下,世傳《古文尚書》、 《毛詩》。」又曰:「長彥好章句學,季彥守其家業。」

張楷:〈張楷傳〉:「通《嚴氏春秋》、《古文尚書》。」

周磐:〈周磐傳〉:「磐少游京師,學《古文尚書》。」

劉祐:本傳注引《謝承書》:「少備操行,學《嚴氏春秋》、《小戴禮》、《古文尚書》。」

孔喬:〈方術傳〉注引《謝承書》:「學《古文尚書》、《春秋左氏傳》。」


尹敏:〈儒林傳〉:「少爲諸生,初習《歐陽尙書》,後受古文。」

蓋豫-周防:〈儒林傳〉:「師事徐州刺史蓋豫,受《占文尚書》。」

丁鴻-楊倫:〈儒林傳〉:「少爲諸生,師事司徒丁鴻,習《古文尚書》。」

孫期:〈儒林傳〉:「少爲諸生,習《京氏易》、《古文尚書》。」

(2)《歐陽尚書》



伏湛系:〈伏湛傳〉:「九世祖勝,字子賤,所謂濟南伏生也。高祖父孺,武帝時客授東武,因家焉。父理,爲當世名儒……湛少傳父業,教授數百人。……二子隆、翕;翕嗣爵,卒,子光嗣;光卒,子晨嗣;……卒,子無忌嗣,亦傳家學……,子質嗣;……卒,子完嗣。初自伏生以後,世傳經學。」又曰:「隆字伯父,少有節操……以子瑗爲郎。」

歐陽歙:曹曾、禮震、高獲-曹祉:〈儒林傳〉云:「自歐陽生傳伏生《尙書》, 至歙八世,皆爲博士。」又云「平原禮震,年十七。」(震爲諸生)又云:「濟陰曹 曾字伯山,從歙受《尚書》。……子祉,河南尹,傳父業教授。」〈方術傳〉云:「(高 獲)少遊學京師,與光武有舊,師事歐陽歙。」

鮑宣-鮑永-鮑昱:〈鮑永傳〉云:「父宣,哀帝時任司隸校尉,爲王莽所殺。 永少有志操,習《歐陽尚書》。(鮑宣見《漢書·儒林傳》)……病卒,子昱;昱少傳 父學,客授於東平。」

朱普-桓榮、彭閎、皋宏:〈桓榮傳〉云:「少學長安,習《歐陽尚書》,事博士 九江朱普。……臣經術淺薄,不如同門生郎中彭閎,揚州從事皋宏。」

桓榮一丁鴻、何湯、張禹、桓郎、鮑駿、明帝、張酺:〈丁鴻傳〉云:「鴻初與 九江人鮑駿,同事桓榮。」〈桓榮傳〉云:「時顯宗(明帝)始立爲皇太子,選求明 經,迺擢榮弟子豫章何湯,爲虎賁中郎將,以《尚書》授皇太子。世祖從容問湯本 師爲誰。湯對曰:『事沛國桓榮。』帝即命榮令說《尚書》,甚善之,拜爲議郎,入 使授太子。」《東觀記》曰:「禹好學,習《歐陽尚書》,事太常桓榮。」〈張酺傳〉: 「又事太常桓榮。」

丁鴻一陳弇、朱倀、巴茂、楊倫、劉愷:〈儒林傳〉云:「陳留陳弇,字叔明,亦受《歐陽尚書》於司徒丁鴻。」〈丁鴻傳〉云:「門下由是益盛,遠方至者數千人,彭城劉愷,北海巴茂,九江朱倀,皆至公卿。」

桓郁一桓焉、和帝、章帝、朱寵、楊震:〈郁桓傳〉云:「郁字仲恩,少以父任爲郎,敦厚篤學,傳父業,以《尚書》教授。……永平十五年,入授皇太子(章帝)。……和帝即位,富於春秋,侍中竇憲以外戚之重,欲令少主頗涉經學……宜令郁入授。……郁教授二帝,恩寵甚篤。門人楊震,朱寵,皆至三公。」

張充一張酺、張蕃:〈張酺傳〉:「張酺字孟侯,汝南細陽人也。少從祖父充受《尚書》,能傳其業。……子蕃,以即侍講。」

桓焉一黃瓊、桓典、順帝、安帝:〈桓焉傳〉:「焉字叔元,以父任爲郎,明經篤行,有名稱。永初元年,入授安帝。……永甯中,順帝立爲皇太子,以焉爲太子少傅。……順帝即位,拜太傅,錄《尚書》事,復入授經禁中。……弟子傳業者數百人,黃瓊、楊賜最爲顯貴;焉孫典,傳其家業。」

朱龍一張奐-張芝:〈張奐傳〉:「師事太尉朱龍,學《歐陽尚書》。……長子芝, 字伯英,最知名。」

楊震-楊秉:〈楊震傳〉云:「震少好學,受《歐陽尚書》於太常桓郁。」〈楊秉傳〉:「震中子秉,字叔節;少傳父業。」

楊秉-楊賜、桓帝:〈楊賜傳〉:「賜少傳家學,篤志博聞。」〈楊秉傳〉:「桓帝 即位,以明《尚書》徵入勸講。」 楊賜一楊彪、靈帝:〈楊賜傳〉:「建寧初,靈帝常當受學,詔太傅三公選通《尚書》桓君章句,宿有重名者;三公舉賜,乃侍講於華光殿中。」〈楊彪傳〉:「彪字文 先,少傳家學。」

牟長-牟紆:〈儒林傳〉:「長少習《歐陽尚書》……著《尚書》章句,皆本之歐陽,俗號爲《牟氏章句》。……子紆,又以隱居教授。」

宋登:〈儒林傳〉:「登少傳《歐陽尚書》,教授數千人。」

尹敏:〈儒林傳〉:「少爲諸生。初習《歐陽尚書》,後受古文。」

鄧宏:〈鄧訓傳〉:「鄧訓子宏,少治《歐陽尚書》。」

劉寬-傅變:《謝承書》曰:「寬少學《歐陽尚書》。」《後漢·傅變》:「少師事太尉劉寬。」

徐稺:《謝承書》曰:「稺少爲諸生,學《嚴氏春秋》、《京氏易》、《歐陽尚書》。」 廖扶一謁煥:〈方術傳〉:「廖扶字文起,汝南平輿人也。習《韓詩》、《歐陽尚書》, 教授常數百人。……太守謁煥,先爲諸生,從扶學。」

宗資:《謝承書》曰:「宗資字叔都,南陽安眾人也。少在京師,學《孟氏易》、 《歐陽尙書》。」

杜喬:《續漢書》曰:「喬少好學,治《韓詩》、《京氏易》、《歐陽尙書》。」

東漢

(3)《大夏侯尚書》

西漢

孔霸……孔昱:〈孔昱傳〉:「孔昱字元世,魯國魯人也,七世祖霸,成帝時歷九卿,封褒成侯。自霸至昱,爵位相系……昱少習家學。」《漢書·儒林傳》:「周堪字少卿,齊人也。與孔霸俱事大夏侯勝。」

張馴:〈儒林傳〉:「張馴字子儁,濟南定陶人也。少遊太學,能誦《春秋左氏傳》, 以《大夏侯尚書》教授。」

牟融:〈儒林傳〉:「中興,北海牟融習《大夏侯尚書》。」

吳良:《東觀記》曰:「吳良習《大夏侯尚書》。」

宋京-宋意:〈宋意傳〉:「宋意字伯意,南陽安眾人也。父京以《大夏侯尚書》

教授。」

(4)《小夏侯尚書》

王良:〈王良傳〉:「王良字仲子,東海蘭陵人也。少好學,習《小夏侯尚書》, 教授諸生千餘人。」

班固:其著《漢書》用《小夏侯尚書》。(說見師大碩士論文〈《漢書》《尚書》 說考徵〉, 駱文琦)

蔡邕:〈蔡邕傳〉:「邕乃自書冊於碑,使工鐫刻,立於太學門外;於是後儒晚學 咸取正焉。」屈萬里先生著〈漢石經《尚書》殘字集證〉,證明石經爲小夏侯之學, 則蔡邕學小夏侯可推知矣。

班昭:〈列女傳·曹世叔妻傳〉曰:「昭因上疏曰:『……關四門而開四聰。』」 此爲《夏侯》之學(說見第三章 29.條)。而班昭爲班固之娣,當亦習《小夏侯尚書》。 附《夏侯尚書》

楊春卿-楊統-楊厚:〈楊厚傳〉:「楊厚字仲桓,廣漢新都人也。祖父春卿,善 圖讖學。臨命戒子統曰……厚少學統業。」陳壽《三國志,益都耆德傳》:「楊統字 仲通……代修儒學,以《夏侯尚書》相傳。」

魯丕:〈魯丕傳〉:「陛下既廣納謇謇,以開四聰。」此爲《夏侯》之學也(說見 第三章 29.條)又曰:「兼通五經,以《魯詩》、《尚書》教授。」

何敞:〈何敞傳〉:「敞字文高,扶風平陵人也。其先家於汝陰,六世祖比干,學《尚書》於晁錯……敞通經傳。」又〈郅壽傳〉何敞上疏理之曰:「臣聞聖王關四門,開四聰。」此亦《夏侯》之學也〈說見第三章 29.條〉

劉毅:〈皇后紀〉劉毅上書安帝曰:「覽總大麓,經營天物。」以「大麓」作總 攬萬機解,是《夏侯》之學也。(說見第二章 73 條)

周防:立為博士,則習今文之學,然不知其爲何家派。

《後漢書》無〈藝文志〉,於《尚書》之著錄不詳,今就其書著錄及他書中可考者,列之於下:

《桓君大小太常章句》,桓榮、桓郁(見〈桓榮傳〉)。

《牟氏尚書章句》, 牟長(見〈儒林傳〉)。

《尚書雜記》,周防(見〈儒林傳〉)。

《漆書古文尚書》,杜林(見〈杜林傳〉)

《歐陽、大小夏侯尚書古文同異三卷》,賈逵(見〈賈逵傳〉)。

《古文尚書訓》,賈逵(見〈儒林傳〉)。

《尙書訓旨》,衛宏(見〈儒林傳〉)。

《中文尚書》,劉陶(見〈劉陶傳〉)。

《尙書注》,馬融(見〈儒林傳〉)。

《尙書記難》,張奐(見〈張桑傳〉)。

《车氏尚書章句刪本》,張奐(見〈張桑傳〉)。

《尙書注》,鄭玄(見〈儒林傳〉、〈隋志〉)。

《尙書大傳注》,鄭玄(見〈隋志〉)。

《尙書章句》,盧植(見〈盧植傳〉)。

《尚書正經》,荀爽(見〈荀爽傳〉)。

《石經尚書》,蔡邕、馬日磾等(見〈蔡邕傳〉)。

《尙書注》,張楷(見〈張霸傳〉)。

《蘭臺漆書尚書》(見〈宦者列傳〉)。

第二章 《後漢書・紀》引《尙書》考辨

1. 所到部縣,輒見二千石、長吏、三老官屬,下至佐吏,考察黜陟,如州牧 行部事。(〈光武帝紀〉)

按:〈堯典〉云:「三載考績,三考,黜陟幽明。」此云「考察黜陟」,即櫽括〈堯典〉之文。

考《尙書大傳》云:「《書》曰:三歲考績,三考,黜陟幽明。其訓曰:三歲 而小考者,正職而行事也;九歲而大考者,黜無職而賞有功也。」又「三年一使, 三公絀陟。」《史記‧五帝本紀》:「舜曰:嗟!女二十有二人,敬哉!惟時相天 事,三歲一考功,三考絀陟,遠近眾功咸興。」《漢書‧食貨志》云:「三載考績。 孔子曰:苟有用我者,期月而已可矣,三年有成。成此功也。三載黜陟。」《漢 書‧谷永傳》:「經曰:三載考績,三考黜陟幽明。」《漢書‧李尋傳》:「三載考 續,三考黜陟。」《潛夫論‧治期》篇:「上古黜陟明考功,據有功而加賞,按無 功而施罰。」《史記》以「遠近」訓「幽明」,而屬之於「庶續咸熙」,是以「三 考黜陟」絕句,此歐陽學如此也。《漢書・谷永傳》以「三考黜陟幽明」爲句, 與《史記》不同;《漢書・食貨志》、〈李尋傳〉引作「三載考績」絕句,與《史 記》同;李尋師事張山拊,攻小夏侯之學,班固《漢書》、《白虎通》亦用小夏侯, 則小夏侯本當作「三載考績」絕句也;然則〈谷永傳〉所引,必《大夏侯》之學 無疑矣;《尚書大傳》出伏生,伏生爲《今文尚書》之祖,今《大夏侯》絕句與 《大傳》同,是《今文》之正本如此。而史公與班固、李尋之小夏侯,則與《大 傳》不同。武億《經讀考異》云:「太史公屬讀,必有所自,故漢魏人多祖述之。」 孫星衍《尚書今古文注疏》以爲史公以「三考黜陟」絕句,乃孔安國古文之說也。 考孔安國爲武帝時博士,教兒寬,則其與歐陽和伯相去不遠(見《漢書‧儒林傳‧

兒寬傳》),時書博士惟伏生《今文》所傳之說,則孔安國必通《今文》,後得孔壁書,始治古文,並以《今文》讀之,遂有古文之學,則安國古文之句讀,仍多承《今文》,如此則其讀句當與歐陽同,以其時書惟歐陽之學故也。史遷嘗從安國問故,其句讀與《大傳》不同,蓋得之於安國者,然非古文必如此,孫星衍之說未允。又《公羊‧隱八年‧何休解詁疏》引《書傳》云:「三年一使,三公絀陟」,其文字及絕句,正與《史記》相當,疑伏生傳時本有二說未定,歐陽、張生各從所取,故有三家歧異也。小夏侯旁採別說,故與歐陽同。

又:《僞孔本》以「三考黜陟幽明」爲句,而《訓義》亦同《大傳》;今此引云「考察黜陟」,其句讀實如此,與僞孔不同。

2. 群臣因復奏曰:受命之符,人應為大。萬里合信,不議同情,周之白魚, 曷足比焉。(〈光武帝紀〉)

(1) 周之白魚

按:《尚書大傳》云:「太子發升于舟,中流,白魚入于舟,王跪取出俟以燎。羣公咸曰:休哉。」(《太平御覽》卷一百四十六)《史記·周本紀》:「武王渡河,中流,白魚躍入王舟中,武王俯取以祭。」《漢書·董仲舒傳》載董氏對策引:「《書》曰:白魚入于王舟,有火復于王屋,流爲鳥。」師古注:「《今文尚書·泰誓》之辭也。」《尚書序·正義》云:「書傳有八百諸侯,俱至孟津,白魚入舟之事,與泰誓事同。」

此乃躁括〈今文泰誓〉之辭。考《書傳》、《史記》皆有白魚之事,《漢書》 董氏對策引稱《書》曰,而師古即以爲〈今文泰誓〉之辭,《正義》亦以白魚之 事爲書傳本有,而與〈泰誓〉事同,其所言則亦指〈今文泰誓〉也。復考〈泰 誓〉之篇,本先秦固有,先秦典籍多引其文,即其明證。戰國中葉,其書已亡, 故《呂覽》、《韓非》等戰國末年之書,多引《尚書》,獨未引〈泰誓〉之文。又 《國語》《周語》下引曰〈大誓故〉,乃〈大誓〉之故訓,非〈大誓〉本經、故 知其時當有說〈大誓〉之文,類乎後世書序、書傳之體;而〈大誓〉既亡,說 〈大智〉之書仍流傳民間;及漢興,此等說書之作或流傳未亡,故伏生取以爲 《大傳》,史遷攬入《史記》,各以其見取捨,是以兩者所載不盡同辭。漢武末, 有好事者,取先秦述太誓之語,更益杜譔之辭,託諸河間女子以售其欺,此即 所謂後得〈泰誓〉,今稱〈今文泰誓〉者也(說詳本師〈今文泰誓疏證〉六十五 葉,見《高郵高仲華先生七秩華誕特刊》)。師古所謂〈今文泰誓〉、《正義》所 謂〈泰誓〉事,即指斯篇。此文唐初猶存,故二人皆能徵引。劉歆〈移太常博 士書〉云:「〈泰誓〉後得,博士集而讀之。」劉向《別錄》云:「武帝末,民有得〈泰誓〉于壁中者,獻之,與博士使讀說之,數月皆起,傳以教人。」(見《尚書·泰誓序·正義引》)而劉歆《七略》又云:「孝武皇帝末,有人得〈泰誓〉書于壁中者,獻之,與博士使讚說之,因傳以教。」(《文選》移《太常博士書·李善注引》)則〈今文泰誓〉出于漢武帝末,未幾即充于學官,於是歐陽、大小夏侯皆取以入《尚書》,傳以教人。然則武帝末以前,引其事者必不本〈今文泰誓〉,以其未出而充學故也。然《漢書》董仲舒對策引稱《書》曰,似爲董氏之時〈今文泰誓〉既成書篇者,實則此乃班固據後出〈今文泰誓〉改之耳。陳夢家:「此蓋班固所改,《春秋繁露》引作《尚書》傳,可以爲證。」(《尚書通論》五十六葉〉其說是也。由是知之,《大傳》、《史記》皆據先秦說〈大誓〉之書爲說,董氏對策本之書傳,蓋皆在武帝末以前,時〈今文泰誓〉未出也。今此引「周之白魚」事,在新莽、東漢之間,則〈今文泰誓〉既立于太學,故知所引當爲櫽括〈今文泰誓〉之辭矣。

(2)萬里合信,不議同情。

《史記‧殷本紀》曰:「周武王之東伐,至盟津,諸侯叛殷,會者八百諸侯。」〈齊世家〉云:「諸侯不期而會者八百諸侯。諸侯皆曰:『紂可伐也。』武王曰:『未可。』還師,與太公作此〈太誓〉。」《索隱》云:「此文上下並〈今文泰誓〉。」《論衡》云:「與八百諸侯咸同此盟,《尚書》所謂不謀同辭也。」(《水經‧河水注》引,今本《論衡》佚此節)馬融云:「〈大誓〉云:『八百諸侯不召自來,不期同時,不謀同辭。』」(《尚書‧泰誓序‧正義引》)按《史記》載武王伐紂,八百諸侯會於盟津,《索隱》以爲〈今文泰誓〉之辭;又《論衡》引「不謀同辭」,以爲《尚書》之語;馬融則稱〈大誓〉,則此云「萬里合信,不議同情」者,乃檃括〈今文泰誓〉之義也。

3. 其祝文曰:「皇天上帝,后土祇眷顧,屬秀黎元,為人父母;秀不敢當, 羣下百辟,不謀同辭。……秀猶固辭,至于再,至于三。」(〈光武帝紀〉)

(1) 為人父母

按:〈洪範〉云:「曰天子作民父母,以爲天下王。」此云「爲人父母」者,即檃 括〈洪範〉之文。

(2) 不謀同辭

按:此引〈今文泰誓〉之辭也。(說詳本章第2.條)

(3) 至于再,至于三

按:多方云:「我惟時其教告之,我惟時其戰要囚之,至于再,至于三,乃有不 用我降爾命。」此云「至于再,至于三」者,即引多方之文。

考《漢書·文三王傳》:「《書》曰:至于再三,有不用我降爾命。」師古曰: 「此《周書·多方》篇之辭也。」《論衡·諡告》篇云:「管蔡纂畔,周公告教之, 至于再三。」並作「至于再三」與〈多方〉文異,段玉裁《古文尚書撰異》云: 「此少『至于』字、『乃』字,蓋今文《尚書》本然。」,段氏之說可信。此引作 「至于再,至于三」,與今《僞孔本》同,當是《古文尚書》如此。

4. 六月已未,即皇帝位,燔燎告天,禋于六宗,望於羣神。(〈光武帝紀〉) 按:〈堯典〉云:「肆類于上帝,禋于六宗,望于山川,徧于羣神。」此「禋于六宗,望於墓神」乃約引〈堯典〉之文也。

考《尙書大傳》曰:「故《書》曰:禋于六宗,此之謂也。」《史記・五帝 本紀》:「遂類于上帝,禋于六宗,望于山川,辯于羣神。」《史記・封禪書》:「《尙 書》曰:遂類于上帝,禋于六宗,望山川,徧墓神。」劉向《說苑・辨物》篇: 「《書》曰:禋于六宗,望秩于山川,徧于羣神。」《漢書·王莽傳》:「遂類于 上帝,禋于六宗,望秩于山川,徧于羣神。」《漢書‧郊祀志》:「〈虞書〉曰: 遂類于上帝,禋于六宗,望秩于山川,徧于羣神。」《論衡・祭意》篇:「《尚書》 曰:肆類于上帝,禋于六宗,望于山川,徧于墓神。」《尚書·大傳·鄭玄注》 云:「煙,祭也,字當爲禋。」又云:「經曰:『肆類于上帝,禋于六宗,望秩于 山川,徧于〈墓神。』《大傳》作「煙」,鄭注曰「祭也」,則今文本作「煙」,然 《史記》、《說苑》、《漢書》、《論衡》及鄭注引經,均作禋,則是伏生以後《尙 書》今古本均作禋。又《漢書》、《說苑》作「望秩」,《史記》兩引均無「秩」 字,而鄭康成引經亦作「望秩」,鄭康成注古文,則古文當有「秩」字;《史記》 無「秩」字,蓋用歐陽本如此。《論衡》同。今僞孔本亦無,而與鄭玄所本異者 不可得知。班固學用小夏侯,則是小夏侯亦作「望秩」,與鄭注古文同,或小夏 侯旁採古文也。此引作「望於羣神」者,實合二句爲之,其中有無「秩」字, 蓋不可考。作「於」者,後世所改。

又:《國語·周語》內史過曰:「精意以享,禋也。」《尚書,堯典釋文》引馬融曰:「精意以享也。」《說文》一篇上:「禋,絜祀也。一曰精意以享。」鄭康成《周禮·大宗伯注》:「禋之言煙,周人尙煙,氣之臭聞者也。」考《國語》、《左傳》,同屬古文之學,馬融爲《古文尚書》作傳,許叔重多據古文,則精意以享訓禋,實古文之說。鄭玄以「煙燎祭」訓禋,蓋兼取伏生今文之說,不與馬同。

今僞孔傳曰:「精意以享謂之禋。」與馬說合,則是用古文說也,此引「禋于六宗」句上有「燔燎告天」語,則其用鄭氏煙祭之說矣,與僞孔傳不同。

- 5. 下詔曰:「人情得足,苦於放縱,快須臾之欲,忘慎罰之義。」(〈光武帝紀〉) 按:〈康誥〉云:「惟乃丕顯考文王,克明德慎罰,不敢侮鰥寡。」〈多方〉云:「至 于帝乙,罔不明德慎罰,亦克用勸。」此云「忘慎罰之義」者,即引〈康誥〉、〈多 方〉之文。
- 6. 詔曰:「比陰陽錯繆,日月薄食,百姓有過,在予一人,大赦天下。」(〈光 武帝紀〉)

按:《論語·堯曰》篇云:「雖有周親,不如仁人,百姓有過,在予一人。」《墨子·兼愛》中云:「傳曰:『泰山,有道曾孫周王有事,大事既獲,仁人尚作;以 祗商夏,蠻夷醜貉。雖有周親,不若仁人,萬方有罪,維予一人。』此言武王之事,吾今行兼矣。」《說苑·君道》篇引《書》曰:「百姓有罪,在予一人。」又 《貴德》篇云:「無變舊新,惟仁是親;百姓有過,在予一人。」

江聲《尚書集注音疏》曰:「《論語·堯曰》篇不稱《書》曰,據《墨子》、《說苑》,皆《尚書》文矣。」江說是也。考《論語》、《墨子》與《說苑》所引,事同而文稍異,而《墨子》云「周王有事」,又曰「此言武王之事」,則其文當屬〈周書〉。屈萬里先生《尚書釋義》收入〈附錄一〉,列於《周書逸文》,其說可信。然則此所云「百姓有過,在予一人」者,文字與《論語》全同,當爲引《論語》之《周書逸文》也。今本僞古文〈泰誓〉中云「百姓有過,在予一人」者,乃襲取《論語》引〈周書〉逸文爲之。

7. 太常登等議書:「……陛下德橫天地,興復宗統,褒德賞勳,親睦九族…… 今皇子賴天,能勝依趨拜,陛下恭謙克讓,抑而未議……」(〈光武帝紀〉) (1)德福天地

按:〈堯典〉云:「允恭克讓,光被四表,格于上下。」此云「德橫天地」者,引「光被四表」之義也。考《漢書·宣帝紀》、〈蕭望之傳〉,並載黃霸子定國等議曰:「聖德充塞天地,光被四表。」《漢書》王褒〈聖主得賢臣頌〉曰:「化溢四表,橫被無窮。」《漢書·王莽傳》:「昔唐堯橫被四表。」《後漢書》班固〈典引〉:「光被六幽。」蔡邕〈釋誨〉:「舒之足以光四表。」《後漢書·馮異傳》安帝詔:「昔我光武受命,橫被四表。」《後漢書·崔駰傳》崔篆〈慰志賦〉:「聖德滂而橫被兮。」《後漢書·班固傳》〈西都賦〉:「是故橫被六合。」《周頌·噫嘻正義》

鄭箋引曰:「光被四表,格于上下。」

陳喬樅《今文尚書經說考》云:「《後漢書・桓焉傳》云:焉傳《歐陽尚書》。永初元年,入授安帝。又〈鄧宏傳〉云:宏少治《歐陽尚書》,授帝禁中。是安帝於《尚書》習歐陽氏之學也。作橫被者,當爲歐陽今文本。其作光被者,乃大小夏侯之異文。黃霸從夏侯勝學《尚書》,故引〈堯典〉文作光被也。」段玉裁《古文尚書撰異》云:「《古文尚書》作光,今文《尚書》作橫。鄭君〈周頌〉箋引光被四表,格于上下,此用《古文尚書》也。」考鄭玄注《古文尚書》,箋引作「光被四表,格于上下」,而「格」今文皆作「假」,然則古文作「光」,段說可從。陳氏謂黃霸等議作「光被四表」,黃霸學於夏侯勝,則大夏侯之本作「光」,與古文同。班固習小夏侯之學,而〈典引〉引作「光被六幽」,於〈西都賦〉作「橫被六合」,蔡邕丹書石經亦用小夏侯本(說見屈萬里〈漢石經《尚書》爰字集證〉卷一、四十葉),作「光四表」,則是小夏侯本作「光」也,〈西都賦〉作「橫」,蓋漢時光、橫二字通用,故偶用之耳。然則段氏強分古文作「光」,今文作「橫」者,其說未允。陳氏之說,塙然可信。

《禮緯·含文嘉》云「堯廣被四表」、《漢書·禮樂志》平當〈正雅樂議〉曰:「況於聖主廣被之資。」〈咸陽靈臺碑〉云:「爰生聖堯,名蓋世兮,廣被之恩,流荒外兮。」樊毅〈復華下民租田口算碑〉:「廣被四表。」則漢儒亦有作「廣被」者。皮錫瑞《今文尚書考》辨證以爲亦今文《尚書》之異文。

今考《爾雅》、《說文》皆有「桄」字,訓「充也」,鄭注《禮記》〈孔子閒居〉「以橫於天下」曰:「橫充也。」今本僞孔傳云:「光,充也。」段玉裁《說文》注「桄」字下云:「桄之字古多假橫爲之。且部曰:『从几足有二橫。』橫即桄字。」蓋橫字从黃聲,黃字从古文光聲,則「橫」「桄」古音相同,故可通用。〈堯典〉「光被四表」,字本當作「桄」,義謂堯德充廣四表;其作「光」「橫」者,皆假借字也。鄭康成云:「言堯德光耀及四海之外」者(《詩·周頌·噫嘻正義》引)以光之本義釋之,未允:作「廣」者,此以訓詁字代之。此引作「橫」者,用《歐陽尚書》也。

(2) 親睦九族

按:〈堯典〉云:「克明俊德,以親九族;九族既睦,平章百姓。」此云「親睦九族」者,即檃括〈堯典〉之文。

(3) 恭謙克讓

按:〈堯典〉云:「允恭克讓。」此云「恭謙克讓」者,即檃括〈堯典〉之文也。

8. 五月丁丑,詔曰:「昔契作司徒,禹作司空,皆無大名,其令三府去大。」 (〈光武帝紀〉)

按:〈堯典〉云:「舜曰:咨!四岳,有能奮庸,熙帝之載,使宅百揆,亮采惠疇? 愈曰:伯禹作司空。」又曰:「帝曰:契,百姓不親,五品不遜,汝作司徒,敬 敷五教,在寬。」此云「契作司徒,禹作司空」,即檃括〈堯典〉之文也。

9. 每旦親朝,日仄乃罷。(〈光武帝紀〉)

按:〈無逸〉篇云:「自朝至于日中昊,不遑暇食。」此云「日仄乃罷」即約引〈無逸〉之文也。

考《國語·楚語》左相倚相引〈周書〉曰:「文王至于日中昊,不皇暇食。」 章昭注:「日昊,日昳。」《史記·周本紀》:「文王日中昃,不暇食。」《漢書· 董仲舒傳》曰:「周文王至于日昃,不暇食。」師古注:「昃亦昊字。」《風俗通· 過譽》篇:「文王日昃,不暇食。」《釋文》曰:「昊,本亦作仄。」

10. 故能明慎政體,總攬權綱。(〈光武帝紀〉)

按:〈康誥〉云:「惟乃丕顯考文王克明德慎罰,不敢侮鰥寡。」又〈多方〉云: 「以至于帝乙,罔不明德慎罰,亦克用勸。」「明慎政體」之政體,即取義於「德」 「罰」也。故此即櫽括〈康誥〉、〈多方〉之文義。

11. 贊曰:炎正中微,大盜移國,九縣飆回,三精霧塞……炎武誕命,靈貺自甄,沈幾先物,深略緯文。尋、邑百萬,貔虎為羣,長轂雷野,高鋒彗雲,英威既振,新都自焚,虔劉庸、代,紛紜梁、趙,三河未澄,四關重擾,神旌乃顧,遞行天討。(〈光武帝紀〉)

(1)炎武誕命

按:〈康誥〉云:「天乃大命文王,殪戎殷,誕受厥命。」此云:「光武誕命。」 即約引〈康誥〉之文。

(2) 貔虎為羣

按:〈牧誓〉云:「勗哉夫子,尚桓桓,如虎如貔,如熊如羆,于商郊。」此云:「貔虎爲羣」,即約引〈牧誓〉之文。

考《史記・周本紀》云「如虎如羆,如豺如離。」《漢書・敘傳・翟方進傳》 云:「義得其勇,如虎如貔。」班固〈十八侯銘〉曰:「休休將軍,如虎如羆。」 班固〈典引〉曰:「虎離其師。」《後漢書‧杜篤傳》〈論郡賦〉曰:「虓怒之旅, 如虎如螭。」《說文・豸部》:「貔,豹屬,出貉國。从豸毘聲。《詩》曰:『獻其 貔皮』,〈周書〉曰:『如虎如貔』」。《禮記・曲禮》:「前有蟄獸則載貔貅」鄭注 引《尚書》曰:「如虎如貔。」《說文·內部》曰:「蠃,山神獸也。从禽頭从內 从屮。歐陽喬說『萬,猛獸也。』」李善《文選‧西都賦》注《歐陽尙書》說曰: 「螭,猛獸也。」《說文・豸部》引〈周書〉作「如虎如貔」,訓爲猛獸,而内 部又引歐陽喬說「歶,猛獸也」,歐陽喬即《歐陽尚書》始祖和伯之曾孫,名髙 字子陽,爲博士,繇是《尚書》有歐陽氏之學。蓋喬、高二字形相似而音義亦 相近,二字古得通用。李善注《文選・西都賦》正與此合,《尚書》與《說文》 同,而鄭玄注《古文尚書》,蓋可證古文作「如虎如貔」矣。史公時《尚書》唯 有歐陽氏學,則作「如虎如羆,如豺如離」者乃《歐陽尚書》,亦與《說文》引 歐陽喬說合。班固〈十八侯銘〉、〈典引〉、〈燕然山銘〉,杜篤〈論都賦〉等,或 虎與羆連用,或虎與螭連用,其序似有不同,然彼等皆驟括之辭,不嫌有異。 班固習小夏侯《尚書》,上述所引,亦多有「離」「螭」字,與《歐陽尚書》同; 然則「貔」、「菌」二字,實占今文分歧之明徵。《漢書敘傳・翟方進傳》作「如 虎如貔」,似班氏亦用古文,然此亦櫽括之辭,且貔字非《尚書》所獨有,《詩》、 《禮》俱有之,而班氏偶用古文,亦無不可,故不必遽據云夏侯有別本也。又 「禼」、「螭」、「離」三字,禼爲猛獸;螭,說文云「若龍而黃也。一臼無角曰 螭」;離,《說文》云:「離黃,倉庚也。」三字雖同音通用,然以「禼」爲正字。 今本《尚書》與許慎所引〈周書〉同,爲古文之舊。此所引「總虎爲羣」 者,當據古文、鄭氏也。

(3) 遞行天討

按:〈皋陶謨〉曰:「天討有罪,五刑五用哉。」此云「遞行天討」,即用〈皋陶 謨〉之文。

12. 詔曰:「予末小子,奉承聖業, 夙夜震畏, 不敢荒寧; 德伏帝王, 協和萬邦, 假於上下, 懷柔百神, 惠於鰥寡; 朕承大運, 繼體守文, 不知稼穡

之艱難,懼有廢疾……」((孝明帝紀))

(1) 予末小子

按:〈顧命〉曰:「眇眇予末小子。」此云「予末小子」,即引〈顧命〉之文。

(2) 夙夜震畏,不敢荒寧

按:〈無逸〉云:「嚴恭寅畏,天命自度,治民祇懼,不敢荒寧。」此云「夙夜 震畏,不敢荒寧」,即引〈無逸〉文也。

(3)協和萬邦

按:〈堯典〉云:「百姓昭明,協和萬邦,黎民於變時雍。」此云「協和萬邦」, 引〈堯典〉文也。

(4) 假于上下

按:〈堯典〉云:「格于上下。」此云「假於上下」,即引〈堯典〉文。

考《漢書·王莽傳》:「咸有聖德,假于皇天。」《後漢書·順帝紀》:「丕顯之德,假于上下。」《後漢書·陳寵傳》曰:「假于上下。」《後漢書,馮異傳》安帝詔:「昭假上下。」《說文解字》「假」下引〈虞書〉曰:「假于上下。」王逸〈招魂〉注曰:「假,至也。《書》曰:假于上下。」鄭玄《詩·噫嘻箋》引:「光被四表,格子上下。」蔡邕〈典引〉注:「格于上下。」

《漢書》、《後漢書》引文均作假,漢儒引經,用立學官之今文,則今文作假也。鄭玄《周頌》引作「光被四表,格于上下」,鄭玄注《古文尚書》,則作「格」者爲《古文尚書》,段玉裁以爲古文作「格」是也。蔡邕丹書石經雖用小夏侯(說見虽萬里〈漢石經《尚書》發字集證〉)然其時古文已行(蔡邕與馬融之子馬日磾同訂五經文字),故〈典引〉注作「格」,偶用古文耳。皮錫瑞以爲假、格通用,三家異文有作格者,其說未允。

考《爾雅·釋詁》云:「格,至也。」《說文》:「假,至也。」假,古書多作假。格、假二字同見紐,古音在五部,故可通用。然其字本當作「各」。〈頌設〉:「旦,王各大室。」〈師虎設〉:「各于大室。」〈揚設〉:「百,各大室。」〈均見《三代吉金文存》卷九〉其字形作「台」「台」,从止向下之圍,所以至其處,故各有「至」義,从彳旁者爲繁文。《爾雅》及《書》作「格」,即用「各」之同音叚借字,作假者亦叚借字也。說文之假字,即「各」之後造形聲字。凡今本《尚書》作「格」字者如「格于藝祖」、「惟先格王正厥事」、「格于文祖」、「祖考來格」,《史記》、《漢書》引用皆作「假」,漢儒引用亦如之,然則三家《尚書》皆作「假」也。今以金文作「各」「洛」觀之,作「格」爲近古,蓋形近而訛變也。今本《尚書》作「格」,乃緣古文之舊。

顯宗受《尙書》於桓榮(見《後漢書·孝明帝紀》),桓榮從朱普習《歐陽 尙書》(見《後漢書·桓榮傳》),此引作「假」者,《歐陽尙書》也。

(5) 惠於鰥寡

按:〈無逸〉云:「懷保小民,惠鮮鰥寡。」此云「惠於鰥寡」者,即引〈無逸〉 之文。

考《國語·楚語上》引〈周書〉曰:「文王至于日中昊,不皇暇食,惠于小民,唯政之恭。」《漢書·谷永傳》:「懷保小人,惠于鰥寡。」《漢書·景十三王傳》:「惠于鰥寡。」《漢石經》:「惠于矜(下缺)」今孔傳本作「惠鮮鰥寡」。 僞孔傳云:「又加惠鮮乏鰥寡之人。」《國語·楚語》引〈周書〉之文,雖爲櫽括之辭,然作「惠于」,與《漢書》、《漢石經》之今文合。段玉裁《古文尚書撰異》云:「惠鮮恐是惠于之誤,于字與羊字略相似,又因下文鰥字魚旁誤增之也。」 俞曲園《羣經平議》以爲鮮當讀爲賜,而朱駿聲《尚書》便讀以爲「鮮,善也; 猶親也。」《爾雅·釋詁》:「鮮,善也。」似亦有據;屈萬里先生亦從其說。而 僞孔傳曰「鮮乏」,則其所據本作鮮。今馬、鄭之本雖不可考,然以《國語》、《漢 書》、《石經》考較之,則此本當作「于」字,且其前文有「能保惠于庶民」句, 蓋可證之。今本作鮮字者,因羊、于二字形近,又涉下鰥字之魚旁而增者也。

《石經》作「矜寡」、《說文·鰥》下云:「鰥魚也。」《段注》曰:「鰥多叚借爲鰥寡字,鰥寡字蓋古祇作矜,矜即憐之假借。」矜,鰥古多通用,《禮記·禮運》篇云「矜寡孤獨」是也。段氏以矜當作从令聲,入十三部與鰥同,又同屬見紐,則音同故相通用。此引作「鰥」爲歐陽本,《石經》用夏侯本作矜,此三家異文。

(6) 不知稼穡之艱難

按:〈無逸〉云:「厥子乃不知稼穡之艱難。」此云「不知稼穡之艱難」者,引 〈無逸〉文。

- 13. 詔曰:「……方今上無天子,下無方伯,若涉淵水而無舟楫。夫萬乘至重 而壯者慮輕,實賴有德,左右小子。」(〈孝明帝紀〉)
 - **案:**〈大誥〉云:「予惟小子,若涉淵水,予惟往求朕攸濟。」此云「若涉淵水 而無舟楫」者,則檃括〈大誥〉文義也。
- 14. 詔驃騎將軍、三公曰:「·····班時令, 勑羣后······百僚師尹, 其勉修厥職, 順行時令, 敬若昊夭, 以綏兆人。」(〈孝明帝紀〉)

(1) 班時令, 勑羣后

按:〈堯典〉曰:「韓五瑞,既月乃日,觀四岳羣牧,班瑞于羣后。歲二月,東 巡守,至于岱宗,柴;望秩于山川。肆觀東后。協時,月,正日;同律、度、 量、衡。修五禮、五玉、三帛、二生、一死贄。如五器,卒乃復。」此云「班 時令,勑羣后」者,即隱括〈堯典〉文義也。

(2)百僚師尹

按:〈皋陶謨〉曰:「百僚師師。」〈洪範〉云:「師尹惟日。」此云「百僚師尹」者,即檃括〈皋陶〉、〈洪範〉之文。

(3)順行時令,敬若昊天,以綏兆人

按:〈堯典〉云:「乃命羲和,欽若昊天;歷象日月星辰,敬授人時。」此云「順行時令,敬若昊天,以綏兆人」者,即檃括〈堯典〉文也。作「敬」者,以訓詁字代經字。

15. 詔曰:「······眇眇小子,屬當聖業。」(〈孝明帝紀〉)

按:〈顧命〉曰:「答曰:眇眇予末小子,其能而亂四方,以敬忌天威。」此云 「眇眇小子」,即躁括〈顧命〉之文。

16. 詔曰:「朕奉郊祀,登靈臺,見史官,正儀度。……詳刑慎罰,明察單辭, **夙夜匪懈,以稱朕意。**」(〈孝明帝紀〉)

(1)正儀度

按:〈堯典〉云:「歲二月,東巡守,至于代宗,柴;望秩于山川。肆覲東后。 協時、月、正日;同律、度、量、衡。修五禮、五玉、三帛、二生、一死、贄。」 此云「正儀度」者,即隱括〈堯典〉文也。

(2) 詳刑慎罰

按:〈呂刑〉云:「王曰:吁!來!有邦有土,告爾祥刑。」又曰:「受王嘉師, 監于茲祥刑。」此引作「詳刑」者,即引〈呂刑〉之文。

考《漢書敘傳》:「季世不詳,背本爭末。」師古注:「不詳謂不盡用刑之理。〈周書〉曰:告爾詳刑。」《周禮·大宰職注》:「《書》曰:度作詳刑以誥四方。」《周禮·大司寇》鄭注:「《書》曰:王旄荒,度作詳刑以誥四方。」正義注皆作「詳審」。《後漢書·劉愷傳》:「非先王詳刑之意也。」李賢注:「《尚書》曰:有邦有土,告爾詳刑。鄭玄注云:詳,審察之也。」王仲宣〈從軍詩〉:「司典告詳刑。」李善注引《尚書》「王曰:有邦有土,告爾詳刑。」段玉裁

《古文尚書撰異》云:「合數條觀之,知古文今文,鄭本孔本,皆作从言之詳, 顏籀、李善之注可證也。古祥、詳多通用,蓋僞孔本亦作詳而讀爲祥,後徑改 作祥,如鳥讀爲島,後徑改作島,非也。又按《史記·周本紀》作祥者,淺人 所改也。」是古文今文均本作「詳」,而詳、祥多通用,如《易·履卦》「視履 考祥」,《釋文》曰「祥本亦作詳」:《荀子·成相》篇「百家之說誠不詳」,注 曰「詳或爲祥」,是二字古多通用之證。今僞孔傳云:「告汝以善用刑之道。」 以善訓祥,是以詳讀爲祥也,後世遂據改詳爲祥,並據改《史記》,段氏之說 是也。

此引作詳,與漢魏以來之本同。而下與「愼」相對,又云「明察」,則當訓作「審察」,與鄭云「審察之也」,師古訓「盡」,義亦相合。然則「詳」之訓「審察」,亦古誼矣。

又:〈康誥〉云:「惟乃丕顯考文王,克明德慎罰。」此云「慎罰」,即引〈康誥〉 之文。

(3) 明察單辭

按:〈呂刑〉云:「今天相民,作配在下,明清于單辭。」此云「明察單辭」,即 躁括〈呂刑〉之文。

- 17. 詔曰:「······永思厥咎,在予一人······飛蓬隨風,微子所歎。」(〈孝明帝 紀〉)
 - (1) 永思厥咎,在予一人

按:此引〈周書〉逸文也。(說見本章 6.條)

(2) 飛蓬隨風,微子所歎

按:〈微子〉云:「今殷其喪,若涉大水,其無津涯。殷遂喪,越至于今。」此云「飛蓬隨風,微子所歎」者,即檃括〈微子〉之義。考《管子》云:「無儀法程式,飛搖而無所定,謂之飛蓬。」此引微子所歎者,即指殷邦淪亂而無儀法程式也。

- 18. 詔曰:「……東過洛汭,歎禹之績。今五土之宜,反其正色,濱渠下田, 賦與貧人。」(〈孝明帝紀〉)
 - (1) 東過洛汭, 歎禹之績

按:〈禹貢〉云:「又東至于孟津;東過洛汭,至于大伾。」此云「東過洛汭, 歎禹之績」,即引〈禹貢〉之文。 (2) 五土之宜,反其正色,濱渠下田,賦與貧人

按:〈禹貢·冀州〉云:「厥土惟白壤,厥賦惟上上錯,厥田惟中中。」又〈兗州〉曰:「厥土黑墳……厥田惟中下,厥賦貞。」又〈青州〉:「厥土白墳,海濱廣斥。厥田惟上下,厥賦中上。」又〈徐州〉:「厥土赤埴墳,草木漸包。厥田惟上中,厥賦中中。」又〈梁州〉:「厥土青黎,厥田惟上下,厥賦惟上中三錯。」此云「五土之宜,反其正色,濱渠下田,賦與貧人」,即臻括〈禹貢〉之義也。

19. 贊曰:顯宗丕承,業業兢兢。(〈孝明帝紀〉)

按:〈皋陶謨〉云:「兢兢業業,一日二日萬幾。」此云「業業兢兢」者,即引 〈皋陶謨〉之文也。此引作「業業兢兢」者,倒其文以求叶韻也。

20. 贊曰: ……永懷廢典, 下身遵道。(〈孝明帝紀〉)

按:〈洪範〉云:「無偏無陂,遵王之義;無有作好,遵王之道。」此云「下身 遵道」者,即引〈洪範〉之文。

21. 贊曰: ……懋惟帝績。(〈孝明帝紀〉)

按:〈堯典〉云:「帝曰:『俞,咨禹,汝平水土』,又云:『庶績咸熙。』惟時懋哉!」又云:「庶績咸熙。」此云「懋惟帝績」,即引櫽括〈堯典〉之文。段玉裁《古文尚書撰異》云:「《說文》十篇〈心部〉曰『懋,勉也。从心楙聲。〈虞書〉曰「時惟懋哉」』。玉裁按大小徐本及《玉》篇皆作『時惟』,與《尚書》異。本篇又云『惟時亮天工』,〈五帝本紀〉作『維是勉哉』,則今文《尚書》亦作『維時』矣。古懋與茂通用;茂之義近美,故馬云『美也』。《爾雅・釋詁》云『茂,勉也』。董仲舒《對策》,郭璞注《爾雅》皆引《書》曰『茂哉義哉』;董用《今文尚書》者,郭用《古文尚書》者,是則今古文皆一作『茂』可證也。」此引作「惟」者,與《說文》同,是用《古文尚書》也;又倒文作「懋惟」者,行文之便耳。

- 22. 詔曰:「朕以眇身,託于王侯之上,統理萬機,懼失厥中,兢兢業業,未知所濟。」(《孝章帝紀》)
 - (1) 朕以眇身

按:〈顧命〉云:「眇眇予末少子。」此云「朕以眇身」者,即躁括〈顧命〉之 文。 (2) 統理萬機,懼失厥中,兢兢業業。

按:〈皋陶謨〉云:「兢兢業業,一日二日萬幾。」此云「統理萬機,兢兢業業」者,即引〈皋陶謨〉之文。此引作「機」者,考《漢書百官公卿表》云:「相國丞相,助理萬機。」〈王嘉傳〉嘉奏封事曰:「臣聞咎繇戒帝舜曰:『亡敖佚欲有國,兢兢業業,一日二日萬機。』師占曰:「〈虞書・咎繇謨〉之辭也。言有國之人,不可傲慢逸欲,但當戒慎危懼以理萬事之機也。」又〈漢太尉劉寬碑〉:「訓導萬機。」班固〈典引〉李善注引《尚書》作「一日二日萬機。」是此自漢魏以來,均作「機」,从木旁,而不作「幾」也。陳喬樅《今文尚書經說考》云:「幾者機之省文。機謂發動所由也。」然考《說文》四篇下公部曰:「幾,微也,殆也。」段注引《易・繫辭傳》曰:「幾者動之微,吉凶之先見也。」又《說文·木部》機字下云:「主發爲之機。从木幾聲。」是「幾」之與「機」,義本有異。僞古文孔傳訓幾爲微,則其所據本作幾無疑,非機之省文也,陳說未允。今此作「機」,蓋漢魏本如此,而與僞孔本異。

(3) 未知所濟

按:〈大誥〉云:「予惟小子,若涉淵水,予惟求朕攸濟。」此云「未知所濟」, 即檃括〈大誥〉之文。《爾雅·釋詁》云「攸、所也」,此作「所」,以訓詁字代 之也。

- 23. 詔曰:「······予違汝弼,汝無面從,股肱之正義也。」(《孝章帝紀》) 按:〈皋陶謨〉云:「帝曰:臣作朕股肱耳目······予違,汝弼,汝無面從,退有 後言。」此引〈皋陶謨〉之文也。
- 24. 有司奏言:「孝明皇帝聖德淳茂,劬勞日昊,身御浣衣,食無兼珍,澤臻四表,遂人慕化。」(〈孝章帝紀〉)

按:〈無逸〉云:「自朝至于日中昊,不遑暇食。」此云「劬勞日昊」者,即檃括〈無逸〉之文。

又:〈堯典〉云:「光被四表,格于上下。」此云「澤臻四表」,即櫽括〈堯典〉 之文。

25. 「······功烈光於四海,仁風行於千載。」(〈孝章帝紀〉) 按:〈堯典〉云:「光被四表,格于上下。」此云「光於四海」,即檃括〈堯典〉 之義。 26. 「……陛下至孝烝烝,奉順聖德。」((孝章帝紀))

按:〈堯典〉云:「克諧以孝,烝烝乂,不格姦。」此云「至孝烝烝」者,即檃括〈堯典〉之義。

考今本《孔傳》云:「言能以至孝和諧頑嚚昏傲,使進進以善治,不至於 姦惡。」則是以「克諧以孝」為句,「烝烝乂」為句,「不格姦」為句也。然考 之漢魏諸書及碑記則不然。王引之《經義述聞》云:「訓烝爲進,雖本《爾雅》, 然以烝烝乂訓進進治,則不辭甚矣。三復經文,當讀克諧爲句,以孝烝烝爲句, 乂不格姦爲句。《列女傳》曰:『舜夫頑母囂,父號瞽叟,弟曰象,敖遊於嫚, 舜能諧柔之,承事瞽叟以孝。』蔡邕〈九疑山碑〉曰:『逮于虞舜,聖德克明, 克諧頑傲,以孝烝烝。』陶潛〈天子孝傳讚〉:『虞舜父頑母囂,事之於畎畝之 間,以孝烝烝。』是讀克諧爲句,以孝烝烝爲句也。」又曰:「經言以孝烝烝, 即是孝德之形容,故漢魏人多以烝烝爲孝者。」 今考《後漢紀‧靈帝紀》曰「崇 有虞之孝、昭蒸蒸之仁」、《後漢書・和熹鄧后紀》曰:「以崇陛下烝烝之孝。」、 〈宋意傳〉云:「陛下至孝烝烝」、〈張禹傳〉云:「陛下體烝烝之至孝。」、〈馬 融傳‧廣成頌〉云:「陛下履有虞烝烝之孝」,〈袁紹傳〉云:「伏惟將軍,至孝 蒸蒸」,〈巴郡太守張納碑〉云:「脩烝烝之孝友」,〈高陽令楊著碑〉:「孝烝內 發。」又曰:「烝烝其孝。」蔡邕〈胡公碑〉曰:「蒸蒸至孝」,《魏志・文昭甄 后傳》注引三公奏曰:「陛下至孝烝烝」,曹植〈鼙舞歌〉曰:「盡孝於田職, 烝烝不違仁」;《家語·六本》篇云「而舜不失烝烝之孝」,是則自漢魏至晉, 古今文諸家皆以克諧爲句,以孝烝烝爲句,王說甚塙。然皮錫瑞《漢碑引經考》 云:「(〈楊孟文石門頌〉『烝烝艾寍』) 據此頌以烝烝艾爲句,則漢人亦有以艾 字連上烝烝爲義,如《孔傳》之句讀者,不得拘一說也。」然此「烝烝艾鵉」 一句,實以「以孝烝烝,乂不格姦」二句合而爲一;烝烝,孝也;艾寍者,即 乂不格姦,寍即不格姦也,是此句之艾,實與不格姦連屬,而非與烝烝相屬, 皮氏之說蓋誤碑文之意矣。今本僞孔傳句讀如此,蓋亦誤讀而誤解也。此引「至 孝烝烝」,句讀仍緣漢魏之書,故與偽古文異。

27.詔曰:「方春東作,宜及時務。……五教在寬,帝典所美。」(〈孝章帝紀〉)

(1)方春東作

按:〈堯典〉云:「寅賓日出,平秩東作。」此云「方春東作」,即檃括〈堯典〉 文義。

(2) 五教在寬,帝典所美

按:〈堯典〉云:「汝作司徒,敬敷五教,在寬。」此云「五教在寬」,即引〈堯典〉之文。

考《史記·五帝本紀》:「舜曰:契,百姓不親,五品不馴,汝爲司徒而敬 敷五教,在寬。」《史記・殷本紀》:「舜乃命契曰:百姓不親,不品不訓,汝 爲司徒而敬敷五教,五教在寬。」《續漢書・禮儀志》劉昭注引〈丁孚漢儀有 夏勸策文〉曰:「往率舊職,敬敷五教,五教在寬。」《後漢書・和帝紀》永和 七年詔曰:「深惟庶事,五教在寬。」《後漢書,王暢傳,功曹張敞奏記諫》曰: 「五教在寬,著之經典。」又〈寇榮傳〉:「思帝堯五教在寬之德。」鄭玄〈商 頌譜〉引《書》曰:「敬敷五教,五教在寬。」《後漢紀》三十:「敬敷五教, 五教在寬。」或重「五教」二字,或「五教在寬」連續與今本不同。考漢明帝 顯宗從桓榮受《尚書》,和帝從桓郁受《尚書》,二者皆習歐陽氏之學;又〈鄧 禹傳〉言孫宏少治《歐陽尚書》,授帝禁中,諸儒多歸附之,時帝爲安帝,則 安帝拜鄧禹爲人司徒之策,亦爲《歐陽尚書》,以此而知《歐陽尚書》重「五 教」字;史公用歐陽本,當重「五教」二字,《殷本紀》重之,是也;而〈五 帝本紀〉不重者,皮錫瑞以爲後人所刪,是也。段玉裁《古文尚書撰異》云: 「唐《石經》五教之下,疊五教二字,字形隱隱可辨,後乃摩去重刻;然則唐 時本有作『敬敷五教,五教在寬』者,與《殷本紀》合。」則是古今文皆重「五 教」二字,今僞孔本不重者,後人誤刪。蓋古人重字,輒於字下加「=」爲記, 後人傳鈔時多奪之。

- 28. 詔曰:「朕以無德,奉承大業,夙夜慄慄,不敢荒寧。……敷奏以言,則 文章可採,明試以功,則政有異迹。」(〈孝章帝紀〉)
 - (1) 夙夜慄慄,不敢荒寧

按:〈無逸〉篇云:「嚴恭寅畏,天命自度,治民祇懼,不敢荒寧。」此云「夙 夜慄慄,不敢荒寧」者,即引〈無逸〉之文。

(2) 敷奏以言,則文章可採,明試以功,則政有異逸

按:〈堯典〉云:「敷奏以言,明試以功,車服以庸。」此云「敷奏以言」、「明 試以功」,即引〈堯典〉文也。

考《史記·五帝本紀》:「五歲一巡守,羣后四朝,徧告以言,明試以功,車服以庸。」《漢書·王莽傳》:「莽下書曰:巡狩四嶽,羣后四朝,敷奏以言,明試以功。」《漢書·宣帝紀》:「傅奏其言,考試功能。」師古曰:「傅、讀日敷。」《後漢書·梁統傳》:「謹表其尤害於體者,傅奏於左。」陳喬樅《今文尚

書經說考》云:「案傅、敷古相通用,〈禹貢〉『禹敷土』,《大戴禮》作『傅土』, 《史記·夏本紀》亦作『傅土』可證也。〈宣帝紀〉敷奏作傅奏,蓋三家《尚書》 之異文。」陳說是也。敷、傅並从甫聲,古音相同,故相通作。

- 29. 詔曰:「……朕在弱冠,未知稼穡之艱難。」(〈孝章帝紀〉) 按:〈無逸〉云:「自時厥後,後王生則逸,生則逸,不知稼穡之艱難。」此云 「未知稼穡之艱難」,即引〈無逸〉文。作「未」者,此以訓故字代經字。
- 30. 詔曰:「……前代聖君,博思咨諏,雖降災咎,輒有開匱、反風之應,今 予小子,徒慘慘而矣。其令二千石理冤獄,錄輕繫,禱五嶽四瀆,及名 山能興雲致雨者,冀蒙不崇朝徧雨天下之報。」(〈孝章帝紀〉)
 - (1) 輒有開價反風之應

按:〈金縢〉云:「秋,大熟,未穫,天大雷電以風,禾盡偃,大木斯拔;邦人大恐。王與大夫盡弁,以啓金縢之書,乃得周公所自以爲功,代武王之說。…… 王出郊,天乃雨。反風,禾則盡起。」此云「開匱反風之應」,即檃括〈金縢〉 之文義。

(2) 不崇朝而徧雨天下

按:李賢注引《尚書大傳》曰:「五嶽皆觸石出雲,膚寸而合,不崇朝而雨天下。」 陳壽祺輯《大傳》文曰:「《藝文類聚》卷一〈天部上〉,《文選》應休璉〈與從 弟君苗君胄書〉注。」則此爲《大傳》文無疑也。

- 31. 詔曰:「……一歲且多於斷獄,甚非為人父母之意也。」(〈孝章帝紀〉) 按:〈洪範〉云:「曰天子作民父母,以爲天下王。」此云「爲人父母」者,即 躁括〈洪範〉之文。李賢注引《書》曰:「元后作人父母。」乃涉爲古文〈泰誓〉 而誤引也。
- 32. 夏五月亥,詔曰:「······建武詔書又曰:堯試臣以職,不直以言語筆札。」 (〈孝章帝紀〉)

按:〈堯典〉云:「岳曰:异哉。試可,乃已。帝曰:往,欽哉。九載,續用弗成。」又曰:「帝曰:我其試哉。女于時,觀厥刑于二女。釐降二女子嬀汭,嬪于虞。帝曰:欽哉。愼徽五典,五典克從;納于百揆,百揆時敘;賓于四門,四門穆穆;納于大麓,烈風雷雨弗迷。曰:格汝舜!詢事考言,乃言底可續。又曰:「明試以功。」此云「堯試臣以職」,即檃括〈堯典〉文義。

- 33. 詔曰:「《書》云:『祖考來假』,明哲之祀。予末小子,質又菲薄,仰惟 先帝烝烝之情,前修禘祭,以盡孝敬。……」(〈孝章帝紀〉)
 - (1) 書云「祖考來假」

按:〈皋陶謨〉曰:「夔曰:戛擊鳴球,搏拊琴瑟以詠,祖考來格。」此云「《書》曰:祖考來假。」即引〈皋陶謨〉之文也。此引作「假」者,乃《今文尚書》之文;詔書引文,當依立官之學,故必爲《今文尚書》之文。(詳見本章第 12. 條之(4))

(2) 仰惟先帝烝烝之情,前修禘祭,以盡孝敬

按:〈堯典〉云:「岳曰:瞽子;父頑、母嚚、象傲,克諧以孝,烝烝乂,不格 姦。」此云「烝烝之情」,即檃括〈堯典〉文也。又此云「烝烝之情,前修禘祭, 以盡孝敬」,釋「烝烝」爲「孝德之盛」,則是以「以孝烝烝」斷句,與僞孔傳 訓「進進治」,而以「烝烝乂」絕句不同,此乃漢儒之句讀本如是。(詳見本章 第 26.條)

- 34. 詔曰:「王者八政,以食為本。」(〈孝章帝紀〉) 按:〈洪範〉云:「三、八政:一曰食,二曰貨,三曰祀。」此云「王者八政,以食爲本」,即檃括〈洪範〉之文。
- 35. 詔曰:「······《書》曰:『鞭作官刑』,豈云若此?」(〈孝章帝紀〉) 按:〈堯典〉云:「鞭作官刑,扑作教刑,金作贖刑。」此稱《書》云者,即〈堯 典〉 文也。
- 36. 詔曰:「《書》云:『父不慈,子不祗,兄不友,弟不恭,不相及也。』」(〈孝章帝紀〉)

按:《左傳·僖公三十三年》:「〈康誥〉曰:『父不慈,子不祗,兄不友,弟不恭,不相及也。』文與此正相同;而今本〈康誥〉曰:「子弗祗服厥父事,大傷厥考心;于父不能字厥子,乃疾厥子;于弟弗念天顯,乃弗克恭厥兄;兄亦不念鞠子哀,大不友于弟。惟弔茲,不于我政人得罪。」其文辭與《左傳》所引不盡同;江聲《尚書集注音疏》,王鳴盛《尚書後案》,並以爲〈康誥〉逸文非櫽括其文義云云。許師錟輝論以爲其證有三;《左傳》引書以直引原文者爲正例,櫽括文義者,其例極少,此不可以爲引〈康誥〉之意者一也;《左傳》引《書》,文辭意雖與今本〈康誥〉有近似處,然《左傳》引文有「不相及也」四字,與〈康誥〉「惟弔茲,不于我政人得罪」句,義不相涉,此不可以爲引〈康誥〉之

意者二也;陳夢家《尚書通論》144葉云:「《左傳·昭二十年》曰:『在〈康誥〉曰:「父子兄弟,罪不相及。」」,漢本無之。〈秦本紀·文公二十年〉:『法初有三族之罪』,集解曰:『張晏曰:「父母兄弟妻子也」,《左傳》引〈康誥〉語,與秦法抵觸,故去之。』其說可信;此不可以爲引〈康誥〉之意者三也〈說詳〈先秦典籍引《尚書》考〉九十三葉〉。是則《左傳》所引爲〈康誥〉逸文。此處所引下有「一人犯罪,禁至三族」,義與《左傳》同,當是用《左傳》所引〈康誥〉逸文,而非今本〈康誥〉語;其不稱〈康誥〉而云「《書》曰」者,蓋漢時其文雖已不在《尚書·康誥》篇中,然據《左傳》知其本爲《尚書》之文,故易稱「《書》曰」也。

37. 詔曰:「今山川鬼神應禮者,尚未咸秩。」(〈孝章帝紀〉)

按:〈洛誥〉曰:「周公曰:王肇稱殷禮,祀于新邑,咸秩無文。」此云「咸秩」者,即引〈洛誥〉文也。

38. 詔曰:「朕巡狩岱宗, 柴望山川, 先祀明堂, 以章先勳。」(〈孝章帝紀〉) 按:〈堯典〉云:「歲二月, 東巡守, 至于岱宗, 柴; 望秩于山川。」此云「巡 狩岱宗, 柴望山川」, 即檃括〈堯典〉文。

考《孟子·梁惠王下》四章:「晏子對曰:善哉問也。天子適諸侯曰巡狩。 巡狩者,巡所守也。」《禮記·王制》:「東巡守,至于岱宗,柴而望祀山川。」 《史記·五帝本紀》:「歲二月,東巡狩,至於岱宗,柴;望秩於山川。」《漢書·郊祀志》:「歲二月,東巡狩,至于岱宗。」師古曰:「狩者守也。諸侯爲天子守土,故巡行。」《白虎通·巡狩》篇:「王者所以巡狩者何?巡者循也;狩者牧也。爲天下巡行守牧民也。」《公羊傳·隱八年疏》引鄭注云:「巡守者,行視所守也。」鄭注、《禮記·王制》、《孟子》並作「守」,則是古文作「守」,今僞孔本同。而《漢書》引〈虞書〉、《白虎通》、《史記》,皆用《今文尚書》,作「狩」。 符,守古多通用,孟子或作巡狩,或作巡守,《釋文》云:「守或作狩」,師古亦以守訓狩,是其證。守、狩音同,義亦近似,故相通用。此引作「狩」者,用《今文尚書》,蓋章帝乃學歐陽之學也。

- 39. 詔曰:「······伯父伯兄,仲叔季弟,幼子童孫,百僚從臣,宗室眾子,要 荒四裔。」(〈孝章帝紀〉)
 - (1)伯父伯兄、仲叔季弟、幼子童孫

按:(呂刑)云:「王曰:嗚呼,念之哉!伯父、伯兄、仲叔、季弟、幼子、童

孫,皆聽朕言,庶有格命。」此正引〈呂刑〉之文。

(2)百僚從臣,宗室眾子,要荒四裔

按:〈皋陶謨〉云:「百僚師師,百工惟時。」又〈禹貢〉云:「五百里要服;三百里夷、二百里蔡。百百里荒服;三百里蠻、二百里流。」又〈堯典〉云:「流共工于幽洲,放驩兜于崇山,竄三苗于三危危,殛鯀于羽山;四罪而天下威服。」按《左傳·文公十年》曰:「舜臣堯,賓于四門,流四凶族,渾敦、窮奇、檮杌、饕餮,投諸四裔,以禦螭魅。」所言即〈堯典〉事,是流四凶事即流四凶於「四裔」也。此云「百僚從臣」、「要荒四裔」,即綜引〈皋陶謨〉、〈禹貢〉、〈堯典〉之文。

40. 假于祖黼(〈孝章帝紀〉)

按:〈堯典〉云:「歸,格于藝祖,用特。」此云「假于祖禰」者,即引〈堯典〉之文也。考《尚書大傳》:「歸,假于禰祖,用特。」《史記·五帝本紀》:「假于祖禰。」《禮記·王制》篇:「假于祖禰。」《白虎通·三軍》篇:「《尚書》曰:歸,假于禰祖。」《說苑·修文》篇:「假于祖禰。」《後漢書·肅宗紀》:「假于祖禰。」此均作「假」者,用《今文尚書》。(詳見本章第13,條之(4))

又:此引作「祖禰」者,俞樾《羣經平議》云:「藝讀爲警,暬从執聲,古藝字止作執,《漢書·楚元王傳》注曰:『執古蓺』、〈司馬遷傳〉注曰:『蓺,古藝字』,蓋古作執,後作蓺,又作藝,轉相加而愈非古也。是故以藝爲暬,實以執爲暬,古文以聲爲主,省不从曰,亦猶以哥爲歌,以臤爲賢之例也。……《說文》無禰字,字亦通作呢,〈高宗肜日〉篇『典祀無豐于呢』、《釋文》引馬曰:「昵,考也,謂禰廟也」,然則以暬爲禰,猶以昵爲禰。昵即匿之或體,暱與暬並在說文日部,其說解曰『暱,日近也』,暬曰『狎近相慢也』,二字之義相近。考廟最親,有狎近之義,故或謂之暬,或謂之呢,實一義也。」于省吾《尚書新證》「大命不摯」條云:「藝,金文作娶或對。毛公鼎『嫢小大楚賦』,番生段『鬉遠能對』即柔遠能邇。藝邇同音。〈堯典〉『歸、格于藝祖』,藝,《尚書大傳》作禰」蓋「藝」字从執聲,古音在十五部,禰从爾聲,古音在十五部,高宗肜日之昵,即暱之或體,古音在十五部,故藝、禰古音相同通用,藝爲假借字,禰爲後起形聲字也。俞樾、于省吾之說可從。

又:此作「祖禰」,而《大傳》、《白虎通·三軍》篇作「禰祖」者,皮錫瑞《今 文尚書考證》云:「或作禰祖,或作祖禰者,蓋傳本偶異而今文義不異,故《白 虎通》引《書》一作祖禰,一作禰祖。《禮記·曾子問》曰『諸侯適天子,必告于祖,奠于禰』,又曰『天子諸侯將出,必以幣帛皮圭告于祖禰』;〈王制〉亦曰『天子將出,造乎禰』,義雖不備,而與《大傳》、《白虎通》說同。《禮記》與《夏侯尚書》同一師承,班氏亦習《夏侯尚書》,故《白虎通》兩引《書》文。」段玉裁《古文尚書撰異》云:「《古文尚書》作藝祖,鄭訓爲文祖;馬王皆云『藝,禰也』,此據今文以釋古文也。」然則作「禰祖」或「祖禰」者,蓋《今文尚書》也。作「藝祖」者,《古文尚書》也。蓋金文既以「對」「製」爲「邇」義,則作「藝」雖字形有譌變,而其基形「埶」實同金文,是古文原應作「藝」。又〈立政〉云:「大都、小伯、藝人。」魏三體石經作「類人」,亦可證古文「類」後訛變爲「藝」也。皮、段之說皆可從。

- 41. 詔曰:「蓋君人者,視民如父母。」(〈孝章帝紀〉)
 - 按:〈洪範〉云:「天子作民父母,以爲天下王。」又〈康誥〉云:「若保赤子,惟民其康文。」此云「視民如父母」者,即躁括〈洪範〉、〈康誥〉之文義。
- 42. 告常山、魏郡、清河、鉅鹿、平厚、東平郡太守、相曰:「……追惟先帝勤人之德, 底績遠圖, 復禹弘業, 聖迹滂流, 至于海表。不克堂桓, 朕甚慙焉。」(〈孝章帝紀〉)
 - (1) 底績遠圖,復禹弘業,聖迹滂流,至于海表

按:〈禹貢〉云:「覃懷厎績。」「和夷厎績。」〈立政〉云:「其克詰爾戎兵,以 陟禹之迹;方行天下,至于海表。」此云「厎績遠圖,復禹弘業,聖迹滂流, 至于海表」者,即檃括〈禹貢〉、〈立政〉之文也。

考《漢書·地理志》:「昔在黃帝,作舟車以濟不通,旁行天下。」師古曰:「旁行謂四出而行之。」張衡〈東巡誥〉曰:「旁行海表。」江聲《尚書集注音疏》云:「方當爲旁之壞字也者,《說文》引《書》曰『旁逑孱功』,《白虎通》引《書》『旁施象刑,維明』,《論衡》引〈甫刑〉『庶僇旁告无辜于天帝』,諸旁字僞古文皆作匸,《正義》皆改作方。」皮錫瑞《今文尚書考證》據《漢書·地理志》與張衡〈東巡誥〉,以爲《今文尚書》作「旁」,古文作「方」。江氏所引諸旁字,可證皮氏說可信;惟江氏以方乃旁之壞字,未見明證。考敦煌本伯三三一五《尚書·堯典》釋文殘卷,「方鳩」作「為救」,「方命」作「為命」,注曰:「馬云:方、放也。」是「為」爲隸古定字形,馬融已釋爲「方」字,此爲古文《尚書》原形。蓋「為」字其實乃「旁」字之異體;《說文》旁字作「例」,

「**少**」字即「**房**」字省去「方」聲所餘「**戶**」部分,而後隸定作「**少**」。漢代以來,誤以此爲「方」字爾。雖然,作「方」實源出孔壁古文「**少**」形,可見其爲源本古文也。此云「滂流」即「方行天下」之義,作「滂」者,蓋亦《今文尚書》之異文。滂,从旁聲,古音同,故可通用。

(2) 不克堂桓

按:〈大誥〉云:「若考作室,既底法,厥子乃弗肯堂,矧肯構。」此云「不克堂桓」,即檃括〈大誥〉文義。

考《漢書·翟義傳》〈莽誥〉曰:「予思若考作室,厥子堂而構之。」〈漢魯峻碑〉云:「承堂弗構。」蔡邕〈祖德頌〉:「克構其堂。」〈司空文烈侯楊公碑〉:「克不堂構。」〈陳留太守胡公碑〉:「克構克堂。」章帝學《歐陽尚書》、蔡邕書《石經》用小夏侯本,則此諸碑所用,當爲夏侯本,則《今文尚書》中「肯」並作「克」也。此引作「不克堂桓」,注云:「厥子乃不肯堂,矧肯桓。」亦作「桓」者,乃宋人避高宗諱改之,非《今文尚書》之異文也,〈莽誥〉、蔡邕書諸碑作構可證。又今僞孔本《尚書》作「弗」,〈魯峻碑〉亦作「弗」,而此作「不」者,考《詩·大雅·文王有聲》鄭箋引《書》曰:「我有後,弗弁基。」《詩·正義》引鄭《書》注曰:「我有後子孫不廢弃我基業乎?」由是考之,作「弗」字爲《古文尚書》,作「不」者,或爲今文本,鄭玄以今文釋古文也。不、弗二字廣韻同在入聲物韻,同分勿切;不,段氏入一部,弗入十五部,段注「不」字云:「義之殊,則不輕弗重,如嘉肴弗食,不知其旨;至道弗學,不知其善之類可見。」然考二字或韻部不同,而聲紐則古同屬幫紐,義不盡同而亦相近,《公羊傳》『弗者,不之深也』,即其明證;故二字古多通作。

- 43. 壬戌,詔曰:「朕聞明君之德,啟迪鴻化,緝熙康乂,光照六幽;訖惟人面,靡不率俾,仁風翔于海表,威霆行乎鬼區;然後敬恭明祀,膺五福之慶,獲來儀之貺。」(〈孝章帝紀〉)
 - (1) 緝熙康乂

按:〈康誥〉云:「若保赤子,惟民其康乂。」此云「康乂」者,即引〈康誥〉 之文。

(2)靡不率俾

按:〈君奭〉云:「丕冒海隅日出, 罔不率俾。」此云「靡不率俾」, 即引〈君奭〉 之文。作「靡」者, 「罔」、「靡」同屬明紐, 義亦相近, 故相通作。

(3) 仁風翔于海表

按:〈立政〉云:「方行天下,至于海表。」此云「仁風翔于海表」即引〈立政〉 之文。

(4) 鷹五福之慶

按:〈洪範〉云:「次九、日饗用五福,威用六極。」又曰:「九、五福:一曰壽、二日富、三曰康寧、四曰攸好德、五曰考終命。」此云「膺五福之慶」,即用〈洪範〉之文義。

(5)獲來儀之貺

按:〈皋陶謨〉云:「簫韶九成,鳳凰來儀。」此云「獲來儀之貺」者,即引〈皋陶謨〉之文。

44. 平傜簡賦,而人賴其慶。(〈孝章帝紀〉)

按:〈呂刑〉云:「一人有慶,兆民賴之。」此云「人賴其慶」者,即檃括〈呂 刑〉之文也。

45. 故乃蕃輔克諧,羣后德讓。(〈孝章帝紀〉)

按:〈堯典〉云:「瞽子。父頑、母嚚、象傲,克諧以孝,烝烝乂,不格姦。」此云「蕃輔克諧」者,即引〈堯典〉「克諧以孝」之文也。偽孔傳云:「言能以至孝和諧頑體昏傲,使進進以善自治,不至於姦惡。」則是以「克諧以孝」爲句。然考之漢魏諸書史及碑銘,皆以「克諧」爲句,「以孝烝烝」爲句(說見本章 27.條),故此云「蕃輔克諧」,其句讀即不與偽孔本同。況就義而言,蕃輔亦不應以孝和諧之,蓋孝者奉親老,蕃輔非親老也。據此為證偽孔本之誤矣。

又:〈皋陶謨〉云:「虞賓在位,羣后德讓。」此云「羣后德讓」者,正引〈皋 陶謨〉之文。

46. 閏月丙子,詔曰:「·····非朕小子眇身所能克堪。有司其案舊典,告類薦功,以章休烈。」(〈孝和帝紀〉)

按:〈顧命〉曰:「王再拜興,答曰:『眇眇予末小子,其能而亂四方,以敬忌天 威』。」此云「小子眇身」即櫽括〈顧命〉之文。

又:〈堯典〉云:「肆類于上帝。」此云「告類」即引〈堯典〉之文。

47. 詔曰:「……豈非祖宗迪哲重光之鴻烈歟?」(〈孝和帝紀〉)

按:〈無逸〉云:「自殷王中宗,及高宗及祖甲,及我周文王,茲四人迪哲。」 此云「迪哲」即引〈無逸〉文。 又:〈顧命〉云:「昔君文王、武王,宣重光。」此云「重光」即引〈顧命〉文。

48. 詔曰:「朕以眇末,承奉鴻烈。陰陽不和,水旱違度,濟河之域,凶饉流亡。……惟官人不得於上,黎民不安于下。」(〈孝和帝紀〉)

按:〈顧命〉云:「眇眇予末小子。」此云「朕以眇末」,即檃括〈顧命〉之文。

又:〈禹貢〉云:「濟河惟兗州。」此云「濟河之域」即引〈禹貢〉之文。

又:〈皋陶謨〉云:「知人則哲,能官人;安民則惠,黎民懷之。」此云「官人不得於上,黎民不安于下」者,即檃括〈皋陶謨〉之義。

49. 詔曰:「元首不明,化流無良,政失於民,譴見于天。深惟庶事,五教在 寬。」(〈孝和帝紀〉)。

按:〈皋陶謨〉云:「元首明哉,股肱良哉,庶事康哉。」此云「元首不明」,即 躁括〈皋陶謨〉之文。

又:〈堯典〉云:「汝作司徒,敬敷五教,在寬。」此云「五教在寬」者,即引〈堯典〉之文也。此引「五教」與「在寬」句讀連屬,與今僞孔本不同,蓋今本「五教」二字爲後人所斂奪,唐初以前古今文本均重「五教」二字也。(詳見本章第27.條之(2))

- 50. 詔曰:「蝗蟲之異,殆不虚生;萬方有罪,在予一人,而言事者專咎自下, 非助我者也。朕寤寐恫矜,思弭憂釁。昔楚嚴無灾而懼,成王出郊而反 風。」(〈孝和帝紀〉)
 - (1)萬方有罪,在予一人

按:《墨子·兼愛中》引傳曰:「雖有周親,不若仁人,萬方有罪,在予一人。」 所引爲〈周書〉逸文,而《論語》亦引之;此云「萬方有罪,在予一人」者, 即〈周書〉逸文也。(說見本章 6.條)

(2) 朕寤寐恫矜

按:〈康誥〉云:「王曰:『嗚呼,小子封,恫瘵乃身。』」此云「恫矜」者,即引〈康誥〉文。

考《書》正義引鄭注曰:「恫瘵乃身,刑罰及己爲痛病。」章懷太子注曰:「《尚書》曰:『恫矜乃身』。孔安國注曰:『恫,痛也;矜,病也;言如痛病在身,欲除之也。』」段玉裁《古文尚書撰異》云:「據《後漢書》注蓋唐初本尚作矜,古書鰥字多作矜,可證隳之爲俗字矣。或疑郭注引《書》已作隳,玉裁以爲郭注隳字恐是俗改,本當作鰥也。」王鳴盛《尚書後案》云:「鄭以恫爲

痛者,〈釋言〉文;又以壞爲病者,鄭本必作鰥也。釋詁『鰥,病也』,與鰥寡字同从魚,不从疒,後人以其訓病,故从疒。」王氏據《爾雅》謂鄭本作鰥,其說可信;是古文本作鰥,作瘶者後人所改。又此引作「矜」者,蓋《今文尚書》如此,和帝學歐陽《尚書》,故此用今文;且其下云「恤鰥寡,矜孤弱」,鰥與矜二字之用法,顯明有異,並未混用,可證此作矜非通用之例。又李賢注作「矜」,乃順《後漢書》文耳。古文本作「鰥」,變作「惌」,無由作矜者。今本號稱古文,必不作「矜」可知。段氏據李注言唐初本尚作矜,其說未允。(3)成王出郊而反風

按:〈金縢〉云:「王出郊,天乃雨。反風,禾則盡起。」此云「成王出郊而反 風」,即引〈金縢〉之文。

- 51. 詔曰:「······朕痛心疾首,靡知所濟。」(〈孝和帝紀〉) 按:〈大誥〉曰:「予惟小子,若涉淵水,予惟往求朕攸濟。」此云「靡知所濟」, 即躁括〈大誥〉之文。
- 52. 皇太后詔曰:「皇帝幼沖,承統鴻業,朕且權佐助聽政,兢兢寅畏,不知 所濟。」(〈孝屬帝紀〉)

按:〈皋陶謨〉云:「兢兢業業,一日二日萬幾。」又〈無逸〉云:「嚴恭寅畏。」, 此云「兢兢寅畏」,即引〈皋陶謨〉、〈無逸〉之文。

又:〈大誥〉云:「予惟小子,若涉淵水,予惟往求朕攸濟。」此云「不知所濟」者,即櫽括〈大誥〉之文。

53. 又作策命曰:「……其審君漢國,允執其中。一人有慶,萬民賴之。皇帝 其勉之哉。」(〈孝安帝紀〉)

按:〈呂刑〉曰:「一人有慶,兆民賴之。」此云「一人有慶,萬民賴之」者, 即引〈呂刑〉之文。

考《大戴·保傅》篇:「《書》曰:『一人有慶,萬民賴之』」《禮記·緇衣》:「〈甫刑〉曰:『一人有慶,兆民賴之』」《左傳·襄公十三年》:「《書》曰:『一人有慶, 人有慶,兆民賴之,其寧惟永。』」《淮南子·主術訓》:「《書》曰:『一人有慶, 萬民賴之。』」《漢書·刑法志》曰:「所謂一人有慶,萬民賴之者也。」《漢書· 賈誼傳》:「《書》曰:『一人有慶,兆民賴之。』」《三國志·王朗傳》:「《易》稱 敕法,《書》著祥刑,一人有慶,兆民賴之,愼法獄之謂也。」《左傳》引作「兆 民」,與今本同,則古文當作「兆」矣。王朗受歐陽之學,作「兆」,班問用小 夏侯之學於刑法志作「萬」,而於賈誼傳作「兆」,可見《今文尚書》「兆」、「萬」, 時多互用,或三家異文。《左傳·閔公元年》傳曰:「天子曰兆民,諸侯曰萬民。」 是二字對文則有異,而散文則可通也。

54. 詔曰:「昔在帝王,承天理民,莫不據琁璣玉衡,以齊七政。」(〈孝安帝 紀〉)

按:〈堯典〉云:「在璿璣玉衡,以齊七政。」此云「莫不據琁機玉衡,以齊七政」,即引〈堯典〉之文也。其引璿作琁,二字於說文爲重文,古音同在十四部,故通用。又引作機者,段玉裁《古文尚書撰異》云:「機,唐石經已下皆作璣,此因上璿從玉旁而誤也。《釋文》於璿曰『音琁』,並無璣音機之文,而〈禹貢〉璣字則詳釋之,可知陸德明本作機,人所共識,故不爲音也。鄭注曰『轉運者爲機,持正者爲衡』,馬融曰『旋機,渾天儀,可轉旋』,爲孔曰『機衡,王者正天文之器,可運轉者』,諸家皆無『璣讀爲機』爲語,可知璣者誤字耳。又《爾雅·釋詁》郭注『《書》曰「在璿機玉衡」』,《釋文》『璿音琁,又作璇』,玉裁按璣字無音者,蓋陸本作機也。」然則作「機」者乃《尚書》之本然,今本作璣乃後人涉上璿字玉旁而誤,段說可從。

- 55. 詔曰:「……灾異蜂起,寇賊縱橫,夷狄猾夏,戎事不息。」(〈孝安帝紀〉) 按:〈堯典〉云:「蠻夷猾夏,寇賊姦宄。」此云「夷狄猾夏」者,即引〈堯典〉 之文;而作「夷狄」者,蓋蠻夷戎狄皆外族之通稱,故通用。
- 56. 夏四月乙丑, 車駕入宮, 假于祖禰。(〈孝安帝紀〉) 按:〈堯典〉云:「歸,格于藝祖,用特。」此作「假于祖禰」者,用《今文尚書》也。(說見本章第40條)
- 57. 庚申、幸宛、帝不豫。(〈孝安帝紀〉)

按:〈金縢〉云:「既克商二年,王有疾、弗豫。」此云「帝不豫」,即引〈金縢〉之文。此引作「不」者,皮錫瑞《今文尚書考證》云:「今文弗作不。《史記·晉世家》曰:『武王克殷二年,天下未集,武王有疾,不豫。』錫瑞按:史公以為十一年紂殷,則克商二年為十三年,即王訪箕子之歲也。《今文尚書》作『不豫。』《論衡·死偽》篇、〈卜筮篇〉、〈知實篇〉引經與《史記》同,《漢書·韋元成傳》匡衡禱高祖等廟曰:『今皇帝有疾不豫。』《白虎通》、《續漢書·禮儀志》皆云『不豫』;蔡邕〈和熹鄧后謚議〉曰:『遭疾不豫。』」段玉裁《古文尚

書撰異》曰:「弗,《史記·魯周公世家》作不,《論衡·死偽》篇亦作不,司馬彪《禮儀志》亦作『不豫』,是《今文尚書》作不也。而《釋文》云:『書序武王有疾』,馬本作『有疾不豫』,《說文》引〈周書〉『有疾不念』,是《古文尚書》亦作「不」也。蓋『弗』、『不』二字淆亂者多矣。」段說是也。皮氏未取古文,遂遽論定,致有是誤。

58. 論曰: ……既云哲婦,亦惟家之索矣。(〈孝安帝紀〉)

按:〈牧誓〉云:「古人有言曰:『牝鷄無晨。牝鷄之晨,惟家之索。』」此云「亦惟家之索」者,正引〈牧誓〉之文也。

59. 詔曰:「《書》稱『安民則惠』」(〈孝順帝紀〉)

按:〈皋陶謨〉云:「安民則惠,黎民懷之」此引《書》稱者,即〈皋陶謨〉文。 李賢注引《尚書》曰:「安人則惠,黎人懷之。」作「人」者,避太宗諱而改。

60. 詔曰:「······ 《書》歌股肱 · 《詩》刺三事。 (〈孝順帝紀〉)

按:〈皋陶謨〉曰:「乃歌曰:『股肱喜哉!元首起哉!百工熙哉!』」又「乃賡載歌曰:『元首明哉!股肱良哉!庶事康哉!』又歌曰:『元首叢脞哉!股肱惰哉!萬事墮哉!』」此云「《書》歌股肱」,即檃括〈皋陶謨〉其文。

61. 制詔曰:「昔我太宗,丕顯之德,假于上下;儉以恤民,政致康乂。」(〈孝順帝紀〉)

按:〈堯典〉云:「光被四表,格于上下。」此云「假于上下」,即引〈堯典〉之 文。而作「假」者,用《今文尚書》如此。(說見本章第12.條之(4))

又:〈康誥〉云:「若保赤子,惟民其康乂。」此云「政致康乂」者,即引〈康 誥〉之文。

- 62. 詔曰:「昔堯命四子,以欽天道;鴻範九疇,休咎有象。……《書》云: 『明德慎罰』方春東作,育微敬始。其勑有司,罪非殊死,且勿案驗, 以崇在寬。」(〈孝質帝紀〉)
 - (1) 堯命四子,以欽天道

按:〈堯典〉曰:「乃命羲、和,欽若昊天,曆象日月星晨,敬授人時。」而〈堯典〉後文有「分命羲仲」、「申命羲叔」、「方命和仲」、「申命和叔」,是合共有四人也。此云「堯命四子,以欽天道」者,即檃括〈堯典〉之文。

(2)鴻範九疇,休咎有象

按:〈洪範〉曰:「天乃錫禹〈洪範〉九疇,彝倫攸敘。」又云:「日休徵:曰肅, 時雨若;曰乂,時暘若;曰哲,時燠若;曰謀,時寒若;曰聖,時風若。曰咎 徵:曰狂,恒雨若;曰僭,恒暘若;曰豫,恒燠若;曰急,恒寒若;曰蒙,恒 風若。」此云「〈洪範〉九疇,休咎有象」者,即檃括〈洪範〉之文。

(3)《書》云「明德慎罰」

按:〈康誥〉云:「惟乃丕顯考文王,克明德愼罰。」此稱《書》云者,即爲〈康 誥〉之文。

(4)方春東作

按:〈堯典〉云:「寅賓出日,平秩東作。」此云「方春東作」者,即引〈堯典〉 之文。

(5)以崇在寬

按:〈堯典〉云:「汝作司徒,敬敷五教,在寬。」此云「以崇在寬」,即引〈堯典〉之文。

63. 詔曰:「……遠覽『復子明辟』之義。」(〈孝桓帝紀〉)

按:〈洛誥〉云:「周公拜手稽首,曰:『朕復子明辟。』」此云「復子明辟」者,即〈洛誥〉之文。

64. 詔曰:「……政亂在予,仍獲咎徵。」(〈孝桓帝紀〉)

按:〈洪範〉云:「日咎徵:日狂,恒雨若;日僭,恒暘若;曰豫,恒燠若;日急,恒寒若;曰蒙,恒風若。」此云「咎徵」者,即引用〈洪範〉之文。

65. 贊曰: ……徵亡備兆。(〈孝靈帝紀〉)

按:〈洪範〉曰:「次八,曰念用庶徵。」又曰:「一極備凶。」此云「徵亡備兆」者,即檃括〈洪範〉之義也。

66. 復〈禹貢〉九州。(〈孝獻帝紀〉)

按:〈禹貢〉篇中有九州,即冀州、兗州、青州、徐州、揚州、荊州、豫州、梁州、雍州。又曰:「九州攸同」,即此也。

67. 贊曰:獻生不辰,身播國屯。終我四百,永作虞賓。(〈孝獻帝紀〉)

按:〈皋陶謨〉云:「虞賓在位,羣后德讓。」虞賓謂嶤之子丹朱,於虞舜在位

時,處於賓位也。此云「永作虞賓」,即引〈皋陶謨〉之文。

68. 「婦人雖無從死之義,然周公身請武王之命,越姬心誓必死之分。」(〈皇后紀〉)

按:〈金縢〉云:「公乃自以爲功,爲三壇同墠,爲壇於南方北面,周公立焉。 植璧秉珪,乃告太王、王季、文王。史乃冊祝曰:『惟爾元孫某,遘厲虐疾,若爾三王,是有丕子之責于天,以旦代某之身。』」此云「周公身請武王之命」者, 即櫽括〈金縢〉之義也。

69. 太后諒闇既終。(〈皇后紀〉)

按:〈無逸〉云:「其在高宗,時舊勞于外,爰暨小人,作其即位,乃或亮陰, 三年不言。」此云「諒闇」者,即〈無逸〉之文也。

考《論語・憲問》: 「子張曰:『《書》云:「高宗諒陰,三年不言。」何謂 也?』」《集解》引孔曰:「諒,信也;陰猶默也。」《禮記・喪服四制》:「《書》 云:『高宗諒闇,三年不言。』善之也。」鄭注:「諒古作梁,楣謂之梁;闇 讀如鶉鶴之鶴,謂廬也。」《尚書大傳》云:「《書》曰:『高宗梁闇,三年不 言。』何謂梁闇也?傳曰:高宗居倚廬,三年不言,百官總己以聽於冢宰而 莫之違,此之謂梁闇。」《史記·魯世家》:「作其即位,乃有亮闇。」《淮南· 泰族訓》:「高宗諒陰,三年不言。」《白虎通,爵》篇:「《尚書》曰:『高宗 亮闇,三年。』」《論衡·儒增》篇:「孔子曰:『言不文,或時不言,高宗諒 陰三年,三年不言,尊爲天子。』」《漢書·元后傳》:「思慕諒闇」。又云:「諒 闇已畢」。又〈師丹傳〉:「諒闇不言」。《王吉傳》:「臣聞高宗諒闇,三年不言」。 《漢書·五行志》:「殷道既衰,高宗承敝而起,盡涼陰之哀,天下應之。」《詩· 商頌譜正義》引鄭康成注〈無逸〉云:「諒闇轉作梁闇,楣謂之梁;闇,廬也。 小乙崩,武丁立,憂喪三年之禮,居倚廬柱楣,不言政事。」段玉裁《古文 尚書撰異》云:「諒、涼、亮、梁,古四字同音,不分平仄也。闇、陰古二字 同音,在侵韻,不分侵覃也。《大傳》釋梁習爲居廬;鄭注閱讀如鶉鷂之鷂, 謂廬也,其注《禮記》《尚書》皆用《大傳》說。上字讀爲梁,讀爲者易其字 也;下字讀如鶴,讀如者釋其音也。〈大雅〉「涼彼武王」,《韓詩》作「亮」。 《白虎通》〈釋禪〉於梁甫之義云:『梁,信也。』然則古同音通用之法可見 矣。」亮、諒、涼、梁均爲來紐,第十部:陰、闍同屬於紐七部,故占同音 通用,段說可從。

班固習《小夏侯尚書》,而《禮記》與《夏侯尚書》同出夏侯始昌,是以《漢書》、《白虎通》並作「諒闇」,與〈喪服四制〉同,則夏侯本作「諒闇」也;而〈五行傳〉作「涼陰」,師古曰:「涼,讀曰諒,一說涼陰謂居喪之廬。」則夏侯本一作「涼陰」。

《史記・魯世家》作「亮闇」,史遷撰述多用《歐陽尚書》,則《歐陽尚書》 作「亮闇」。而《後漢書·張禹傳》引禹上書云:「方諒闇密辭之時。」作「諒 闇」,《東觀漢記》云:「禹好學,習《歐陽尚書》。」則歐陽本一作「諒闇」, 與夏侯同,《論衡》作「諒陰」,皮錫瑞《今文尚書考證》以爲王充習《歐陽尙 書》,則歐陽本一作「諒陰」。《論語・憲問》引《書》作「諒陰」,孔安國注云 「諒、信;陰猶默也。」則是《古文尚書》作「諒陰」。《公羊傳・文公九年》 注:「子張曰:『《書》云:高宗諒闇。』」《後漢書・張禹傳》注引鄭玄《論語》 注:「諒闇謂凶廬也。」皆引《論語》之文而字異者,考張禹編次《論語》,本 之《魯論》,兼考齊、古,今本作「諒陰」既爲古文,則作「諒闇」者必爲今 文《魯論》也。且一九七三年大陸定州八角廊漢墓出土竹簡《論語》,經研究 其爲西漢中山懷王劉脩墓中所有,其本屬《魯論語》系,其中有「書云:□□ 三音」--句,作「音」字,應爲「闇」字之同音通用或省寫,可見《魯論語》 本作「闇」也。《大傳》引《書》作「梁闇」,又云:「高宗居倚廬,三年不言。」 則《今文尙書》一作「梁闇」,解作「凶廬」。考《爾雅・釋宮》云:「楣謂之 梁。」《儀禮‧喪服傳》曰:「居倚廬,寢苫枕堤。」《左傳‧襄公十七年》曰: 「齊晏桓子卒,晏嬰麤縗斬,苴絰帶,杖菅屨,食鬻,居倚廬,寢苫枕草。」 則倚廬居喪,古制如此,《大傳》之說,蓋本古義也。《白虎通・喪服》云:「所 以必居倚廬何?孝子哀,不欲聞人之聲,又不欲居故處,居中門之外,倚木爲 廬,質反古也。」惠棟《禮說》引葛洪曰:「長梁謂之柱楣,楣亦名梁,既葬 泥之,障以蔽風。」鄭注〈喪服四制〉:「楣謂之梁;闇,謂廬也。」則以楣訓 梁,以廬訓闇,爲漢人舊說,皆源《大傳》古義也。《大傳》作「梁闇」,用其 本字,作諒、涼、亮,陰者,均借字也。鄭注〈無逸〉及〈喪服四制〉,皆以 「諒闍」爲凶廬,與《大傳》說同,則鄭氏用今文之說也。

今本《尚書》作「亮陰」,王先謙《尚書孔傳參正》卷二十四:「〈魯世家〉 集解引馬云:『亮、信也,陰、默也。爲聽於冢宰,信默而不言。』」今本《集 解》未見此語,孫星衍《尚書今古文注疏》謂馬注見《春秋左傳》隱元年疏, 今左隱元年疏但云《尚書傳》,則孫氏以爲此乃馬融《尚書傳》。《史記·夏本紀》 引馬融注《尚書·皋陶謨》「亮采有邦」曰:「亮,信;采事也。」則馬融訓「亮」 爲「信」,誠爲事實。又考《晉書》卷二十·志第十·〈禮中〉所載晉泰始十年, 尚事杜預造議,奏曰:「……易曰『上古之世喪期無數』,〈虞書〉稱『三載,四 海遏密八音』,其後無文。至周公旦,乃稱『殷之高宗諒閣,三年不言』。其傳 曰:『諒,信也;閣,默也』。下逮五百餘歲,而子張疑之,以問仲尼。仲尼答 云:『何必高宗,古之人皆然,君薨,百官總己以聽於僴宰三年。』周景王有后、 世子之喪,既葬除喪而樂。晉叔嚮畿之曰:「三年之喪,雖貴遂服,禮也。王雖 弗遂,宴樂已早,亦非禮也。」此皆天子喪事見於古文者也。稱高宗不云服喪 三年,而云諒閤三年,此釋服心喪之文也。」

而《通典·禮典》卷八十〈凶禮二·總論喪期〉載晉博士段暢重申杜元凱議曰:「《尚書·毋逸》云:『高宗亮陰,三年不言』。諸儒皆云『亮陰,默也』。唯鄭玄獨以亮闇爲凶廬。今據諸儒爲正,明高宗既卒哭,即位之後,除線麻,躬行信默,聽於僴宰,以終三年也。言即位,以明免喪之後,素服心喪,謂之諒闇,故杜議曰『天子居喪,齊斬之情,菲杖經帶,當其遂服,葬而除服,諒闇以終三年也』。《國語·楚語》及《論語》、《禮記·坊記》、〈喪服四制〉,皆說高宗之義,大體無異。唯《尚書大傳》以諒闇爲凶廬,蓋東海伏生所說,鄭玄之所依,博而考之,義既不通;據經所言,是唯天子居凶廬,豈合禮制?代俗皆謂大祥後禫時爲諒闇,《漢記》稱和熹鄧皇后居母喪,縞素,不食肉,亦曰『諒闇』,此乃古今之通言,信默者爲得之也。」

杜預所云「傳曰」,按應非今日所謂僞孔傳,《尚書大傳》、鄭玄既解做「梁閣」,則最可能主此說者,當爲馬融。蓋馬融解《尚書·無逸》「亮陰」,取孔安國所注《論語》之說也。故馬本《尚書》作「亮陰」,文字雖與孔安國注《古論》不同,然解說則一,今僞孔本作「亮陰」,當爲據馬本古文之說。

王先謙《尚書孔傳參正》云:「梁闍者,倚廬而柱楣者也。父母之喪,無 貴賤一也。蓋天子至士,喪禮皆同其制,漢人舊說皆以梁闍爲居喪,馬解爲信 默,則認叚借之字爲本字矣。」其說至允。今此引作「諒闍」,與《禮記》、《漢 書》、《鄭注本》同,而亦作居喪解,則是用今文之說,與馬融注古文及僞孔本 不同也。

70. 平望侯劉毅以太后多德政,欲令早有注記,上書安帝曰:「……孝悌慈仁, 允恭節約,杜絕奢望之源,防抑逸欲之兆。」(〈皇后紀〉)

按:〈堯典〉云:「允恭克讓。」此云「允恭」者,即引〈堯典〉之文。

又:〈皋陶謨〉云:「無教逸欲有邦。」此云「逸欲」者,即引〈皋陶謨〉之文。

- 71. 「······惻隱之恩,猶視赤子,克己引衍,顯揚仄陋,崇晏晏之政,敷在 寬之教。」(〈皇后紀〉)
 - (1) 猶視赤子

按:〈康誥〉曰:「若保赤子,惟民其康乂。」此云「猶視赤子」者,即檃括〈康 誥〉之文。

(2)顯揚仄陋

按:〈堯典〉云:「明明揚側陋。」此云「顯揚仄陋」者,即檃括〈堯典〉之文。 側,仄同阳力切,古音同義近,故可通用。

(3) 崇晏晏之政

按:〈堯典〉云:「曰若稽古帝堯,曰放勳,欽、明、文、思、安安。」此云「崇 晏晏」者,即引〈堯典〉之文。

考《後漢書·馮衍傳》〈顯志賦〉曰:「思唐虞之晏晏。」注引《尙書·考靈耀》云:「放勛、欽、明、文、思、晏晏。」《後漢書·第五倫傳》曰:「體晏晏之姿。」注引《尙書·考靈耀》曰:「堯文寒晏晏。」又〈陳寵傳〉曰:「宏崇晏晏。」注引《尙書·考靈耀》曰:「堯聰、明、文、寒、晏晏。」又〈郅惲子壽附傳〉,何敞上疏曰:「誠不欲聖朝行誹謗之誅,以傷寒晏之化。」注引鄭玄注《尙書·考靈耀》云:「道德純備謂之寒,寬容覆載謂之晏。」崔瑗〈司隸校尉箴〉曰:「昔唐虞晏晏,庶績以熙。」蔡邕《司空袁逢碑》:「其惠和也晏晏然。」《論衡·恢國》篇:「唐之晏晏。」漢儒所引,並作晏晏,緯書乃今文之學,《考靈耀》作「晏」,則作「晏晏」者《今文尙書》也。晏从安聲,古音同,故相通用。漢書古今人表晏孺子,即《左傳》之安孺子,是其證。《爾雅·釋訓》無「安安」一詞,而有「晏晏」,訓爲「柔也」,或《爾雅》成書時未見古文《尙書》也。

(4) 敷在寬之教

按:〈堯典〉云:「敬敷五教,在寬。」此云「敷在寬之教」者,即檃括〈堯典〉 之文。

- 72. 「······若善政不述,細異輒書,是為堯湯負洪水大旱之責,而無咸熙假 天之美;高宗成王有雉雊迅風之變,而無中興康寧之功。上考詩書,有 虞二妃。」(〈皇后紀〉)
 - (1) 堯湯負洪水大旱之責,無咸熙假天之美

按:〈堯典〉云:「帝曰:『咨,四岳,湯湯洪水方割,蕩蕩懷山襄陵,浩浩滔天。』」,

又云:「三載考績,三考黜陟幽明,庶績咸熙。」〈君奭〉云:「我聞在昔成湯既 受命,時則有若伊尹,格于皇天。」此云「堯湯負洪水大旱之責,而無咸熙假 天之美」者,即檃括〈堯典〉、〈君奭〉之義。此引作「假天」者,用《今文尚 書》。(詳見本章第12.條之(4))

(2) 高宗成王有雊雉迅風之變

按:〈高宗肜日〉云:「〈高宗肜日〉,越有雊雉。」又〈金縢〉云:「秋大熟,未獲,天大雷電以風。禾盡偃,大木斯拔。」此云「雊雉迅風」者,即躁括〈高宗肜日〉、〈金縢〉之義也。此以高宗之雊雉與成王迅風對舉,則是以雊雉之變生於高宗之時。《尚書大傳》云:「武丁祭成湯,有飛雉升鼎耳而雊,武丁問諸祖己,祖己曰:『雉者野鳥也,不當升鼎,今升鼎者欲爲用也。遠方將有來朝者乎?』故武丁內反諸己,以思先王之道。」《史記·殷本紀》亦云:「帝武丁祭成湯,明日有飛雉升鼎耳而呴」,書序之說略同,則是漢儒皆以「雊雉」在高宗之時也。近人王國維著〈高宗肜日說〉以爲「雉雊」乃祖庚祭高宗之廟時事,其說至允。(凡《魏堂集林》卷15頁)

(3)有虞二妃

按:〈堯典〉云:「帝曰:『我其試哉!』女于時,觀厥刑于二女。釐降二女于嬀 汭,嬪于虞。」此云「有虞二妃」,蓋櫽括〈堯典〉之文。

73. 「未有內遇家難,外遇灾害,覽總大麓,經營天物……。」(〈皇后紀〉) 按:〈堯典〉云:「納于大麓,烈風雷雨弗迷。」此云「大麓」者,即引〈堯典〉 之文。

考《尙書大傳》云:「堯推尊舜,屬諸侯焉,致天下爲大麓之野。」鄭注云:「山足曰麓。麓者錄也,古者天子命大事、命諸侯,則爲壇國之外;堯聚諸侯,命舜陟位居攝,致天下之事,使大錄之」《史記·五帝本紀》:「堯使舜入山林川澤,暴風雷雨,舜行不迷,堯以爲聖。」又曰:「舜入於大麓,烈風雷雨不迷,堯乃知舜之足授天下。」《漢書·王莽傳》:「予前在麓,至於攝假。」又曰:「張竦草奏莽曰:『秉冢宰職,愼安國家,四海輻湊,靡不得所,《書》曰:「納于大麓,烈風雷雨不迷。」公之謂也。』」《漢書·于定國傳》:「上(元帝)報定國曰:「萬方之事,大麓于君。」《後漢書·竇憲傳》班固〈燕然山銘〉:「納于大麓,維清緝熙。」《後漢書·劉愷傳》陳忠上疏薦愷曰:「臣聞三公上則台階,下象山岳,股肱元首,鼎足居職,協和陰陽,調和五品,考力量才,以序庶僚,遭烈風不迷,遇迅雨不惑,位莫重焉。」《論衡·吉驗篇》:「使入大麓之野,虎

狼不搏,蝮蛇不噬,逢烈風疾雨,行不迷惑。」《論衡‧正說篇》:「又曰:賓于 四門,四門穆穆,入于大麓,烈風雷雨不迷,言大麓三公之位也,居一公之位, 大總錄二公之事,眾多並告,若疾風大雨。夫聖人才高,未必相知也。聖成事, 舜難知佞,使皋陶陳知人之法,佞難知,聖亦難別,堯之才猶舜之知也。舜知 佞,堯知聖;堯聞舜賢,四嶽舉之,心知其奇而未必知其能,故言我其試哉! 試之於職,妻以二女,觀其夫婦之法,職治修而不廢,夫道正而不僻,復令入 大麓之野,而觀其聖,逢烈風疾雨,終不迷惑,堯乃知其聖,授以天下。夫文 言觀試,觀試其才也,說家以爲譬喻增飾,使事失正,是皆失實之說也。」桓 譚《新論》曰:「昔堯試舜於大麓者,領錄天下事,如今《尚書》官矣。」蔡邕 〈太尉汝南李公碑〉曰:「外則折衝,內則大麓。」《尚書·堯典釋文》云:「麓, 音鹿,王云:錄也。馬鄭云:「山足也。」《風俗通・山澤》篇:「麓,諽案《尙 書》堯禪舜,納于大麓,麓、林屬於山者也。」並說此事,綜而言之,蓋有二 說:其一以爲山足,其二以爲總錄萬機。大傳以爲「致天下之於大麓之野」,此 「總錄萬機」之說,伏生爲今文之祖,三家說書當同之,然《史記》以「大麓」 爲山林川澤,史公時《尚書》唯有歐陽氏學,然史公嘗從孔安國問《古文尚書》, 故山林川澤之說,未必出於今文;且伏生既授歐陽生,歐陽生授兒寬,寬又從 孔安國授業,以授歐陽生之子,是歐陽氏之學中,或安國之古文說存焉,《論衡. 吉駿篇》、《正說篇》之說與史公同,《論衡・書解篇》於《書》家獨舉歐陽公孫, 是其治《歐陽尚書》之明證,於正說篇中更力攻大麓爲三公位之說,以爲「辟 喻增飾,使事失正」,則可見歐陽氏之說與史公所說同。且馬鄭沣《古文尚書》 均以「山足」解之。合而推之,則歐陽氏之說「大麓」,乃旁取安國古文爲之, 故與古文同也。

《漢書·于定國傳·元帝報定國書》云「大錄于君」,則元帝用「總錄萬機」 之說;考《漢書·儒林傳》,周堪與孔霸俱事夏侯勝,霸爲博士,論於石渠,後 以大中大夫授太子,太子即元帝也,是元帝所學爲《大夏侯尚書》可知,時于 定國爲丞相,凡三公丞相,皆可云大錄。

桓譚《新論》以試爲大麓爲領錄《尚書》事,《新論》稱秦延君能說〈堯典〉, 延君固從張山拊受《小夏侯尚書》,則是新論本者爲小夏侯之論也;且班孟堅、 蔡伯偕皆用小夏侯而亦作「大錄萬機」解,更可見小夏侯本如此,與大夏侯同。 考《論衡》用歐陽而攻異說,此異者必爲博士今文家言,歐陽之外唯大小夏侯 矣,是則大小夏侯說同也。

鄭注《尚書》解爲「山足」,注《書》序〈舜典〉云:「入麓伐木。」,而

注《大傳》則先曰「山足曰麓」,後更言「致天下事,使大錄之」,二者前後相反,段玉裁以爲鄭玄注《大傳》皆用今文家說,且以此文推之,則是鄭意以爲本當作山足解,而《大傳》爲今文,故旁取今文說解之,俾與注文相合。王肅注《古文尚書》云「麓,錄也」,肅好與鄭立異,故不與鄭君山足之說而訓爲「大錄」也。

今僞孔傳云「麓,錄也,納舜使大錄萬機之政」,則是用夏侯今文之說,其 號稱古文而用今文,自顯其失也。衡乎二說,以古文「山足」之訓爲長。段大 今《古文尚書撰異》云:「此二句亦歷試之一事,見其勤勞,櫛風沐雨,俗儒必 欲例上文三事而更上之,則訓爲大錄萬機,烈風雷雨乃成謎語。」可謂一針見 血之論;《論衡》以爲「譬喻增飾,使事失正」者,良有已也。然則此云「覽總 大麓」,正用伏生夏侯之說。

- 74. 「……勒勳金石,縣之日月,據之罔極,以崇陛下烝烝之孝。」(〈皇后紀〉) 按:〈堯典〉云:「克諧以孝,烝烝乂,不格姦。」此云「烝烝之孝」者,即躁 括〈堯典〉文。此以烝與孝連屬,與今僞孔本句讀不同,乃先秦漢魏相傳如此, 僞孔本誤讀妄訓也。(詳見本章第 26.條)
- 75. 論曰:「鄧后稱制終身,號令自出,術謝前政之良,身闕明辟之義。」(〈皇后紀〉)

按:〈洛誥〉云:「周公拜稽首曰:『朕復子明辟。』」此云「身闕明辟之義」者,即引〈洛誥〉「復子明辟」之文也。

76. 后忿恚詈言曰:「汝今輈張,怙汝兄耶?」(〈皇后紀〉)

按:〈無逸〉云:「民無或胥譸張爲幻,此厥不聽,人乃訓之。」此云「輈張」 者,即〈無逸〉之「譸張」也。

考《玉海·音樂類》引《尚書大傳》云:「樂曰:舟張辟雍,鶬鶬相從,八風回回,鳳皇喈喈。」《說文·言部》講字云:「講,訓也。从言壽聲,讀若oodanga (周書)『無或講張爲幻。』」又予部內字云:「為,相詐惑也。从反予。〈周書〉曰:『無或講張爲幻。』」《爾雅·釋訓》:「佛張,誑也。」郭注:「《書》曰『無或佛張爲幻。』」《尚書·釋文》云:「講,馬本作輈。」《詩·陳風》「誰佛予美」鄭箋云:「誰佛張誑斯我所美之人乎?」《文選·揚雄三老箴》:「姦寇侏張。」李善注:「輈與侏古字通。」《說文》兩引其文,皆作「講」,所據爲《古文尚書》也。《玉海》引《大傳》作「舟」、《爾雅》及郭注及鄭箋作「佛」、

馬融作「輈」,並承《大傳》而來,皆《今文尚書》三家之異文也。而揚雄作 侏者,音近相假也,侏在四部,照紐,古端紐,舟在三部照紐,三、四部相近, 故相通作,李善注即據馬本讀侏爲輈字。又輈、侜、舟、譸同在三部,知紐, 古屬端,故相通假。《說文·侜字》云:「有雍蔽也。」是雍蔽爲侜之本義,《大 傳》之雍即壅字,辟雍蓋由壅蔽得名,舟張辟雍者謂其有壅蔽而張大也;凡有 壅蔽則多欺誑,故侜張《爾雅·釋訓》爲誑也。是侜爲本字,舟、輈、譸,侏 皆同音借字耳。則此作「輈張」,爲《今文尚書》也。

77. **帝後夢桓帝怒曰:「……上帝震怒,罪在難救**。」(〈皇后紀〉) 按:〈洪範〉云:「我聞在昔,鯀陻洪水,汩陳其五行,帝乃震怒,不畀〈洪範〉 九疇,彝倫攸斁。」此云「上帝震怒」者,即引〈洪範〉之文。

第三章 《後漢書·傳》引《尚書》考辨(上)

1. 豫章李淑上書諫曰:「······夫三公上應台宿,九卿下括河海,故天工人其代之。」(〈劉玄傳〉)

按:〈皋陶謨〉云:「無曠庶官,天工人其代之。」此云「天工人其代之」,正引 〈皋陶謨〉文。

考《尚書大傳》曰:「《書》稱天工人其代之。夫成天地之功者,未嘗不蕃昌也。」《漢書·律歷志》曰:「人者繼天順地,序氣成物,以終天地之功。《書》曰:天功人其代之。」《後漢書·馬嚴傳》曰:「《書》稱無曠庶官,天工人其代之。言王者代天官人也。」《潛夫論·貴忠》篇曰:「《書》稱天工人其代之,王者法天而建官,自公卿至于小司,莫非天官。」又〈本訓篇〉:「天呈其兆,人序其勳。《書》故曰:天工人其代之。」《書·正義》引王肅云:「天不自下治之,故人代天居之,不可不得其人也。」漢儒之說,多用今文,而皆以「法天建官」「代天官人」爲義,由《大傳》一脈而來,則爲今文說無疑。王肅雖善賈、馬之學,然其父朗師事楊賜,習《歐陽尚書》,則其說亦用今文說也。

2. 論曰:周武王觀兵孟津,退而還師,以為紂未可伐,斯時有未至者也。(〈劉玄傳〉)

按:《史記·殷本紀》:「周武王之東伐,至盟津,諸侯叛殷,會周者八百,諸侯皆曰:紂可伐矣。武王曰:爾未知天命。乃復歸。」〈周本紀〉:「是時諸侯不期而會盟津者八百諸侯。諸侯皆曰:紂可伐矣。武王曰:女未知天命,未可也。乃還師。」〈秦楚之際月表〉:「不期而會盟津八百諸侯,猶以爲未可,其後乃放弑。」〈齊世家〉:「諸侯不期而會者八百諸侯。諸侯皆曰:紂可伐也。武王曰:未可。還師,與太公作此〈太誓〉。」《索隱》:「此文上下並〈今文泰誓〉。」《漢書‧婁

敬傳》:「武王伐紂,不期而會孟津上八百諸侯,遂滅殷。」《春秋繁露·王道》篇:「周發兵,不期而會孟津之上者八百諸侯,共誅紂,大亡天下。」《漢書·律歷志》:「太誓八百諸侯會,還歸二年,乃遂伐紂克殷。」考《史記·齊世家》云「與太公作此〈太誓〉」,《索引》云「此文上下並〈今文泰誓〉」,又《漢書·律歷志》亦稱〈太誓〉,則此文必爲〈今文泰誓〉之辭也。然史公、婁敬、《春秋繁露》所引,在武帝末以前,時〈今文泰誓〉未出,所引當本乎先秦釋〈大誓〉之遺書。而《漢書·律歷志》引文在武帝末之後,其時〈今文泰誓〉已出,且歐陽,大小夏侯三官立官之學,均已採入《尚書》中,傳以教人,則其所據必爲〈今文泰誓〉也。此段論曰所云,亦係據〈今文泰誓〉也。(參見第二章第2.條)

- 3. 「矯託天命,偽作符書,欺惑眾庶,震怒上帝。」(〈隗囂傳〉) 按:〈洪範〉云:「我聞在昔,鯀陻洪水,汩陳其五行,帝乃震怒,不畀〈洪範〉 九疇。」此云「震怒上帝」者,即檃括〈洪範〉文義。
- 4. 博士吳柱曰:「昔武王伐殷,先觀兵孟津,八百諸侯不期同辭,然猶還師 以待天命。」(〈公孫述傳〉)

按:此云觀兵還師之事,引〈今文泰誓〉之詞。

考《史記·殷本記》:「周武王之東伐,至盟津,諸侯叛殷,會周者八百。諸侯皆曰:『紂可伐矣。』武王曰:『爾未知天命。』乃復歸。」又〈周本紀〉:「是時諸侯不期而會盟津者八百諸侯。諸侯皆曰:『紂可伐也』。武王曰:『女未知天命,未可也。』乃還師。」又〈齊世家〉:「諸侯不期而會者八百諸侯。諸侯皆曰:『紂可伐也。』武王曰:『未可。』還師,與太公作此〈太智〉。」《索隱》云:「此文上下並〈今文泰誓〉。」《漢書·婁敬傳》:「武王伐紂,不期而會孟津上八百諸侯,遂滅殷。」《漢書·律歷志》:「太誓八百諸侯會,還歸二年,乃遂伐紂克殷。」《後漢書·鄭興傳》:「及武王即位,八百諸侯不謀同會,皆曰:『伐可伐矣。』武王以未知天命,還兵待時。」《尚書·泰誓序正義》引馬融《書》序云:「〈大誓〉云:『八百諸侯不召自來,不期同時,不謀同辭。』、《論衡》:「與八百諸侯咸同此盟,《尚書》所謂不謀同辭也。」(《水經·河水注》引,今《論衡》無此節。)

夫〈今文泰誓〉出於武帝末,《史記》及《漢書·婁敬傳》所引,在漢武末 以前,時漢〈太誓〉未立太學,所引當係先秦釋〈太誓〉之書。《漢書·律歷志》、 《後漢書》、《馬融序書》、《論衡》等所引,在武帝末以後,時〈太誓〉已立太學, 歐陽夏侯已收入《尚書》中,故稱《尚書》或〈太誓〉也。此吳柱所引,本乎〈今文泰誓〉也。(詳參第二章第 2.條)

5. 下詔曰:「······〈甫刑〉三千,莫大不孝。」(〈宗室四王三侯傳〉) 按:〈呂刑〉云:「五刑之屬三千。」此云「〈甫刑〉三千」者,即檃括〈呂刑〉 文義也。

考《大傳》曰:「〈甫刑〉可以觀誠。」《孝經》引「一人有慶」二句,《禮記》引「苗民弗用命」二句,又「播刑之迪」句,又「敬忌」句,又引「德威」句皆作〈甫刑〉。〈書序〉云:「呂命,穆王訓夏贖刑,作〈呂刑〉。」《史記·周本紀》曰:「甫侯言於王,作修刑辟。」《集解》曰:『《書》說周穆王以甫侯爲相。』《漢書·刑法志》:「周道既衰,穆王眊荒,命甫侯度時作刑以誥四方。」又〈匈奴傳〉:「穆王作〈呂刑〉之辟」陳喬縱《今文經說考》云:「僞孔傳本〈甫刑〉作〈呂刑〉。考《說文·呂部》云:『呂,脊骨,象形。昔太嶽爲禹心呂之臣,故封呂侯。』諸書所引皆作〈甫刑〉,惟《墨子》作〈呂刑〉;然則作〈呂刑〉者,《古文尚書》也。馬鄭本當是作「呂」,故孔承用之。《正義》引鄭云:『呂侯受王命入爲三公』可證也。《漢書·匈奴傳》云『穆王作〈呂刑〉之辟』,此或兼採《古文尚書》,故與〈刑法志〉所引不同,或後人據今文《尚書》改之,未可知也。」陳氏以「呂」爲占文,「甫」爲今文,其說可信。然鄭玄注《大傳》作「一人俱罪,甫係之說刑」也〈《太平御覽》〉,及《史記集解》引鄭說,《詩·大雅·崧高》鄭箋「甫侯相穆王,訓夏贖刑」皆作「甫」,蓋鄭玄兼取古今《尚書》說也。

作呂,作甫者,蓋二字同屬五部,古音疊韻通用。《國語‧周語》云:「申、 呂雖衰,齊、許猶立。」《詩·大雅·崧高》云:「生甫及申。」則二字通用可知 矣。今此引作「〈甫刑〉」,與僞孔傳異。而與漢魏、鄭玄之說同。

- 6. 「……夫民所怨者,天所去也;民所思者,天所與也。」(〈王常傳〉) 按:《左傳·襄公三十一年》,昭公元年,《國語·鄭語》、《周語》中均曰:「在〈太誓〉曰:『民之所欲,天必從之。』」此段所引即檃括《左傳》《國語》所引先秦〈大誓〉之文義。又今本僞孔《尚書·泰誓》上篇亦有此語,則襲取《左傳》、《國語》所引爲之。
- 7. (光武) 策曰:「······百姓不親,五品不訓,汝作司徒,敬敷五教,五教在 寬。」(〈鄭禹傳〉)

按:〈堯典〉云:「百姓不親,五品不遜,汝作司徒,敬敷五教,在寬。」此文所

引即〈堯典〉之文也。

考《尚書大傳‧夏傳》云「百姓不親,五品不訓,則責之司徒。」(見《御 覽》二百七〈職官部〉)《史記・五帝本紀》云:「百姓不親,五品不馴,汝爲司 徒而敬敷五教,在寬。」又《殷本紀》:「百姓不親,五品不訓,汝爲司徒而敬 敷五教,五教在寬。」《漢書・韋元成傳》:「元成作詩曰:『五品以訓。』」《漢 書‧王莽傳》云:「司徒主司人道,五教是輔,帥民承上,宣美風俗,五品乃訓。」 《後漢書·陳蕃傳》:「蕃上疏曰:『齊七政,訓五典。』」又〈周舉傳〉:「策問: 『五品不訓,王澤未流。夫五品不訓,責在司徒。』」又〈謝夷吾傳〉:「班固見 夷吾曰:『……下使五品咸訓於嘉時。』」又〈劉愷傳〉載陳忠疏曰:「調訓五品。」 《說文解字‧心部》愻云:「愻,順也。以心孫聲。《唐書》曰:『五品不愻』」 《潛夫論‧五德志》篇:「親百姓,順五品。」《說苑‧貴德》篇:「百姓不親, 五品不遜。」《周禮·地官序官》注:「教所以親百姓,訓五品。」《說文·心部》 引《唐書》作「孫」,許氏見壁中書,所據當爲古文,今僞孔《尚書》作遜,而 號爲古文,可見其演化之迹。段氏《撰異》曰:「今本古文作遜,未審衛包所改, 抑衛包以前已然。」然其源於古文,則可確言也。又《大傳》作「訓」,兩漢諸 儒多用立官之今文,作「訓」「馴」者,皆爲《今文尚書》之異文。訓與馴皆從 川聲,音同義近,故通用。《漢書‧孝文帝本紀》云:「列侯亦無由教馴其民。」 教馴即教訓,《史記‧五帝紀》索隱云「史記馴字,徐廣皆讀曰訓。」是其明證 者也。《說苑》作「不遜」,疑後人依僞孔本所改。考《禮記‧學記》云「不陵 節而施之謂遜」,《說苑》作「學不陵節而施之曰馴」,遜作馴,可爲佐證。又鄭 康成注《周禮》作「訓」,乃兼用《今文尚書》。今此引作「訓」者,是用《今 文尚書》也。又此引重「五教」字,與《今文尚書》不同者,蓋《尚書》古文 今文皆本重五教字,至唐重刻石經始爲斂奪。(詳見第二章第27.條之(2))

8. 朱龍上疏追訟騭曰:「······當享積善履謙之祐,而橫為宮人單辭所陷。」 (〈鄧禹傳〉)

按:〈呂刑〉云:「明清於單辭」。此引曰「單辭」者,即引〈呂刑〉文也。

按:〈堯典〉云:「汝作司徒,敬敷五教,在寬。」此引「帝堯五教在寬」者,即引〈堯典〉之文也。此「五教在寬」四字連屬,蓋唐以前,〈堯典〉皆作「敬敷

五教,五教在寬」,重「五教」字,實《尚書》之原本,唐以後奪「五教」二字。 (詳見第二章第27.條之(2))

10. 贊曰:元侯淵謨,乃作司徒。(〈寇恂傳〉)

按:〈鄧禹傳〉云:「光武即位於鄗,使使者持節拜禹爲大司徒」並策曰「百姓 不親,五品不訓,汝爲司徒」,是「乃作司徒」,即引〈堯典〉文也。

11. 安帝下詔曰:「·······昔我光武受命中興,依弘聖緒,橫被四表,昭假上下。」 (〈馮異傳〉)

按:〈堯典〉云:「光被四表,格于上下。」此云「橫被四表,昭假上下」者,即引〈堯典〉文也。此引作「橫被四表」者,乃用《歐陽尚書》也。《後漢書·桓焉傳》言永初元年焉入授安帝,桓焉即桓榮之孫桓郁之子,世傳家學習《歐陽尚書》者也,則安帝所用爲《歐陽尚書》。古文及《夏侯尚書》則作光。此詔書下又引作「昭假上下」者,稍變其文,行文之便而已,作「假」者,《今文尚書》也。(詳見第二章第7.條及40條)

- 12. **詔報曰:「……負海猾夏,盜賊之處。……」**(〈陳俊傳〉) **按:**〈堯典〉云:「蠻夷猾夏,寇賊姦宄。」此云「猾夏」者,即引〈堯典〉文也。
- 13. **霸謝曰:「此明公至德,神靈之祐,雖武王白魚之應,無以加此。**」(〈王 霸傳〉)

按:此云「武王白魚之應」者,乃檃括〈今文泰誓〉文義也。〈今文泰誓〉出於 武帝末年,而此所引文在武帝末之後,歐陽、夏侯既取入《尚書》中,所引當 爲〈今文泰誓〉。(詳見第二章第2.條)

14. 和帝即位,大將軍竇憲秉權,專作威福。(〈任應傳〉)

按:〈洪範〉云:「臣之有作福、作威、玉食。」此云,「專作威福」者,即骤括 〈洪範〉之文。考《史記·宋世家》云:「維辟作福,維辟作威,維辟玉食。臣 毋有作福、作威、玉食;臣有作福、作威、玉食,其害于而家,凶于而國。」《漢 書·王嘉傳》引嘉奏封事曰:「臣聞箕子戒武王曰:『臣亡有作威,作福,亡有 玉食,臣之有作威、作福、玉食,害于而家,凶于而國。』《漢書·楚元王傳》 引劉向上封事極諫曰:「《書》曰臣之有作威作福,害于而家,凶于而國。」《漢

書,武于子傳》引廣陵厲王胥賜策曰:「《書》云臣不作福,不作威,靡有後羞。」 《後漢書·荀爽傳》引〈洪範〉曰:「惟辟作威,惟辟作福,惟辟玉食。」又〈張 衡傳〉引衡上疏曰:「〈洪範〉曰:『臣有作威、作福、玉食,害于而家,凶于而 國。』」又第五倫傳引倫上疏曰:「《書》曰:『臣無有作威,作福,其害于而家, 凶于而國。』又〈楊震傳〉引震上疏曰:「《書》曰:『臣無有作威、作福、玉食。』」 《戰國策‧齊策》高誘注引《書》曰:「天有作威、作福。」《公羊傳‧成元年 疏》引鄭玄注云:「作福專爵賞也,作威專刑罰也。」《漢書・王嘉傳》、《楚元 王傳》、《後漢書・荀爽傳》、〈張衡傳〉、〈第五倫傳〉、〈楊震傳〉、《戰國策・高 誘注》諸條,皆先威後福,漢多用立官之《今文尚書》,楊震即傳歐陽之學,可 知先威後福者爲《今文尚書》。史公時《尚書》雖唯有歐陽,然史公嘗從孔安國 問故,故〈宋世家〉作先福後威者,乃得之孔安國之《古文尚書》;《公羊・成 元年疏》引鄭注先福後威,康成注古文,可證古文先福後威,與三家《尚書》 異。今本《尚書》先福後威,即緣古文之舊也。惟《漢書・武王子傳》作「不 作福,不作威」,先福後威者,段玉裁《撰異》之:「策文引《今文尚書》,乃櫽 括之詞,不嫌或異。」段說是也。今此云「專作威福」,先威後福者,亦櫽括之 辭,不可據定師家。

15. 贊曰:「帝續思乂,庸功是存。」(〈馬武傳〉)

按:〈堯典〉曰:「咨,四岳,湯湯洪水方割,蕩蕩懷山襄陵,浩浩滔天,下民 其咨,有能俾乂。」此帝堯思欲治之也。故此云「帝績思乂」者,即檃括〈堯 典〉「有能俾乂」之義也。

考《尚書大傳》〈洪範〉云:「從作艾。」鄭玄注曰:「艾,治也。」《史記· 五帝本紀》:「下民其憂,有能使治者?」《漢書·地理志》引〈禹貢〉「蒙羽其 乂」,「雲夢土作乂」;〈五行傳〉、〈王莽傳〉引〈洪範〉:「從作艾。」《詩·小雅· 小旼》「或哲或謀,或肅或艾」鄭箋作「艾」《說文》辟部云:「躄,治也。从辟 乂聲。〈虞書〉曰:『有能俾嬖。』」《石經》:「艾用三德。」吳九眞〈太守谷朗 碑〉:「帝思俾乂。」《續漢書·五行傳》志:「從作艾。」

《大傳》出於伏生,爲今文之祖,作艾,而班固學出小夏侯《漢書·王莽傳》、〈五行傳〉作「艾」、《石經》亦作「艾」,是今文學作「艾」也。《史記》以作「使治」,是以訓詁字作經字。《爾雅·釋詁》云:「乂,治也。」又「艾、相也。」史遷以「治」爲訓,則字當作「乂」;《說文》作「嬖」,段玉裁以爲此真壁中古文,孔安國以今文讀之,易爲乂,以漢時「乂」訓「治」,而嬖字不行

故也,段說可信。史公時《尚書》惟歐陽今文之學,而司馬遷嘗從安國問故, 以治爲訓,則字作「乂」更明矣。鄭康成《詩》箋作「艾」,而注《大傳》則訓 治,是兼取今文,且以古文訓今文,則古文作「乂」可知。又《漢書·地理志》 作「乂」,吳九眞〈太守碑〉亦作「乂」,則是今文家亦有作「乂」者。由是知 之,今文有作「艾」,又有作「乂」,而古文僅作「乂」而已。皮錫瑞《今文尚 書攷證》云:「乂,今文當作艾。」其說未允。

王國維《觀堂集林》卷六〈釋辭〉上云:「說文: 變,治也。從辟乂聲。〈虞書〉曰:有能俾嬖。是經典乂字,壁中古文作變。此嬖字蓋辭字之譌:初以形近譌爲辟,後人因辟與辪讀不同,故又加乂爲聲。《經典》作乂作艾,亦辭之假借。《書·君奭》之『用乂厥辟』,即毛公鼎之『吟辞厥辟』也。〈康誥〉之『用保乂民』,〈多士〉、〈君奭〉之『保乂有殷』,〈康王之誥〉之『保乂王家』,《詩·小雅》之『保艾爾後』,即克鼎、宗婦敦、晉邦盦之『保辪』也。」其說可從。

又:按〈堯典〉云:「明試以功,車服以庸。」此云「庸功」者,即約引〈堯典〉 之文。

16. 令班固作銘曰:「······寅亮聖明,登翼王室,納于大麓,惟清緝熙。」(〈賓 ⑤傳〉)

按:〈堯典〉曰:「夙夜惟寅。」又曰:「時亮天功。」此「寅亮聖明」即檃括爲文也。〈堯典〉云:「納于大麓,烈風雷雨弗迷。」此云「納于大麓」,即引〈堯典〉之文。此引「大麓」,乃「大錄萬機」之義,據其前後文「登翼王室」「惟清緝熙」可知。班固著《漢書》用小夏侯說,則此「納于大麓」亦《小夏侯尚書》之說也。(詳見第二章第73條)

17. 「……鷹揚之校,螭虎之士。」(〈竇憲傳〉)

按:〈牧誓〉云:「勗哉夫子,尚桓桓,如虎如貔,如熊如羆,于商郊。」此云「螭虎之士」,則引〈牧誓〉之文。引作「螭」者,用《今文尚書》也。班固習小夏侯,故作「螭」。(説見第二章第11.條之(2))

18. 「……封神丘兮建隆嵑,熙帝載兮振萬世。」(〈竇憲傳〉)

按:〈堯典〉云:「舜曰:『咨四岳,有能奮庸熙帝之載。』」此云「熙帝載」者,即引〈堯典〉之文。

19. 論曰:「······夫二三子得之不過房幄之間,非復搜揚仄陋,選舉而登也。」 (〈賽章傳〉)

按:〈堯典〉云「曰:明明揚側陋。」此云「搜揚仄陋」,即約引〈堯典〉之文。 考《史記·五帝本紀》:「堯曰:悉舉貴戚及疏遠隱匿者。」《漢書循吏傳》: 「至孝宣繇仄陋而登至尊。」班固〈北征頌〉:「拔所用於仄陋。」**《**文選·張 衝玄思賦》:「幽獨守此仄陋兮。」李善注曰:「帝曰:明明敭仄陋。」《漢郯令 景君碑》:「明明側陋。」(《漢碑引經考》)蔡邕〈琅琊王傅蔡公碑〉:「揚明德 於側陋。」(周上)〈三公山碑〉:「口陵側陋。」(周上)《後漢書・皇后氏》劉 毅論鄧太后注記疏:「顯揚仄陋。」邊讓〈章華賦〉:「舉英奇於仄陋。」《文選・ 沈休文宋書恩倖傳論》:「明敭仄陋。」李善注引《尙書》曰:「明明敭仄陋。」 司馬貞《五帝本紀》習作「敭仄陋」。班固《漢書》用小夏侯本作「仄」,而漢 碑多作側,蔡邕丹書石經,用小夏侯本,是小夏侯本亦作「側」,是「仄」「側」 漢時已通用,《說文》九篇下:「仄,側傾也。」八篇下:「側,旁也。」同阻 力切,二字義近音同,故多通用。又〈蔡公碑〉、劉毅〈疏〉作揚,沈休文〈論〉, 李善《文選注》,司馬貞〈五帝本紀贊〉作「敭」;段玉裁《古文尚書撰異》云: 「李(善)時《尚書》作敭仄。假令同今本作揚側,則李作注之例,必引《書》 而申之曰: 數古揚字, 仄同側。用此知衛包改敭作揚, 仄作側。 李昉等又刪《釋 文》敭仄字音釋也。而師古注《漢書》云:『仄,古側字。』此衛包所由改仄 爲側也。」是唐初時《尙書》本作「敭仄」,李善注,司馬貞贊爲明證,段說 成理,可從。然作「揚側」者,亦漢時已有之,揚敭字从手从攴,含義不異, 故通用。而敦煌《尚書・釋文》〈堯典〉殘本即作「敭」,亦有力證。

又:《史記·五帝本紀》作「悉舉貴戚及疏遠匿者」,段氏《古文尚書撰異》云:「悉舉訓明揚,貴戚訓明,疏遠匿訓側陋。是蓋《今文尚書》作明揚明側陋。」考蔡邕〈琅琊王傅蔡公碑〉作「揚明德於側陋」,邊讓〈章華賦〉「舉英奇於仄陋」,皆與段說相近,則歐陽,夏侯今文家作「明揚明側陋」,實爲可能,段說可從。而史公以貴戚與疏遠陋匿者對舉,則是「明」與「側陋」皆指有明德之人;蔡邕、邊讓則以「仄陋」爲「明」之處所補語,義非對舉,則是「明」與「側陋」皆指有明德之人;蔡邕、邊讓則以「仄陋」爲「明」之處所補語,義非對舉,又《漢書》班固所引諸條,亦均作處所補語或地點指示,與史公不同,此蓋歐陽、小夏侯義訓不同也。

又:偽孔本「明明揚側陋」傳曰:「明舉明人在側陋者。」其取小夏侯說以訓古文也。今此引「搜揚仄陋」,蓋用古文。

20. 嚴上封事曰:「臣聞日者眾陽之長,食者陰侵之徵。《書》曰『無曠庶官,天工人其代之』,言王者代天官人也,故考續黜陟,以明褒貶。」(〈馬嚴傳〉)

按:〈皋陶謨〉云:「無曠庶官,天工人其代之。」此引《書》曰者,正〈皋陶 謨〉之辭。此以「代天官人」解之,所用爲《今文尚書》。(詳見本章第1條) 又:按〈堯典〉云:「三載考績,三考黜陟幽明。」此云「考績黜陟」者,即約 引〈堯典〉之文。此引文「黜陟」不與「幽明」連屬,則是以黜陟絕句,與歐陽、小夏侯同也。(詳見第二章第1條)

- 21. **乃下詔曰:「……故武王誅紂,封比干之墓,表商容之閭。**」(〈卓茂傳〉) 按:《後漢書·郎顗傳》注引《尚書大傳》云:「遂入殷,封比干之墓,表商容 之閭,發鉅橋之粟,散鹿臺之財,歸傾宮之女。」此所引者,即《尚書大傳》 之文。陳壽祺輯錄《大傳》,以爲〈大戰篇〉文,是也。
- 22. 論曰: ……卓茂斷斷小宰,無它庸能。(〈卓茂傳〉)

按:〈秦誓〉曰:「如有一介臣,斷斷猗,無他技。」此云「斷斷小宰,無它庸能」者,即檃括〈秦誓〉之文。此引作「它」者釋文云:「他,本亦作它。」文十二年《公羊傳》作「它」。陳喬樅《今文尚書經說考》云:「它即佗字。《說文》它部云『上古艸居患它,故相問無它乎?』或假借佗字,作他,俗字。說文人部無「他」字,今本〈大學〉作「無他」,然《釋文》云『無它音他』,則是陸德明所見〈大學〉,尚作它。」陳說是也。今本作他,乃俗改之耳。

- 23. 恭上疏諫曰:「陛下親勞聖恩,日**吳不食。**」(〈魯恭傳〉) 按:〈無逸〉云:「文王自朝至于日中昊,不遑暇食。」此云「日昊不食」者, 即檃括〈無逸〉文。
- 24. 「……盡諒陰三年,聽於冢宰。」(〈魯恭傳〉)

按:〈無逸〉云:「其在高宗,時舊勞于外,爰暨小人,作其即位,乃或亮陰, 三年不言。」此云「諒陰三年,聽于冢宰」,即爲〈無逸〉之文。《論語‧憲問》 篇子張曰:「《書》云:『高宗諒陰,三年不言』,何謂也?子曰:『何必高宗, 古之人皆然。君薨,百官總己,以聽於冢宰,三年。』」《集解》引孔安國注曰: 「諒,信也;陰猶默也。」則《論語》之作「諒陰」,實爲《古文尚書》。此引 作「諒陰」,而下有「聽於冢宰」句,則是據《論語》爲言,而與《古文尚書》 同。(詳亦見第二章第69條)

25. 恭上疏諫曰:「臣伏見詔書,敬若天時……。」(〈魯恭傳〉)

按:〈堯典〉云:「乃命羲和,欽若昊天,……敬授民時。」此云「敬若天時」者,即檃括〈堯典〉之文。

26. 恭議奏曰:「……順物性命,以致時雍。」

按:〈堯典〉云:「黎民於變時雍。」此云「以致時雍」者,即引〈堯典〉之文。

27. **孳孳不倦。**(〈魯丕傳〉)

按:〈皋陶謨〉云:「予何言,予思日孜孜。」此云「孳孳」者,即引〈皋陶謨〉 之文。

考《史記·夏本紀》:「禹拜曰:『於,予何言?予思日孳孳。』《漢書·蕭何傳》:「尚復孳孳得民和。」師古注云:「孳與孜同。」《說文》孜字下云:「汲汲也。〈周書〉曰『孜孜無怠』。」又孳字下云:「汲汲生也。」〈漢酸棗令劉熊碑〉:「孜孜之踰。」

《說文》引〈周書〉作「孜」,而今本亦作「孜」,蓋作「孜」者乃古文也。《史記》作「孳」,蓋《歐陽尚書》;《漢書》作「孳」者,《夏侯尚書》也,然則三家今文作「孳」字矣。《說文》「孜」「孳」義訓相近,古音同在一部,師古注云「孳與孜同」,可見二字古多通用,乃同音通借也。范曄引作「孳」,用《今文尚書》字,與今本作「孜」不同。

28. 丕上疏曰:「······明舜、禹、皋陶之相戒,顯周公、箕子之所陳。觀乎人文、化成天下。」(〈魯恭傳〉)

按:此云「舜、禹、皋陶之相戒」者,即檃括〈皋陶謨〉全篇之義而言。又云「周公、箕子之所陳」者,其中「周公所陳」實指〈無逸〉、〈立政〉二篇,蓋二篇皆周公所陳之言;又「箕子所陳」,即指〈洪範〉篇而言;〈洪範〉云:「惟十有三祀,王訪于箕子。王乃言曰:『嗚呼!箕子。惟天陰騭下民,相協厥民,我不知其彝偏攸敘。』箕子乃言曰:『我聞在昔,鯀陻洪水,汨陳其五行,帝乃震怒,不畀洪範九疇,彝偏攸敘。』」是知箕子所陳乃指〈洪範〉也。

29. 陛下廣納謇謇以開四聰。(〈魯丕傳〉)

按:〈堯典〉云:「詢于四岳,闢四門,明四目,達四聰。」此云「開四聰」者,

即引〈堯典〉之文。考《史記·五帝本紀》:「舜乃至于文祖,謀于四嶽,辟四門,明通四方耳目。」《漢書·王莽傳》:「虞帝闢四門,達四聰。」《後漢書·鄧壽傳》何敞上疏理壽曰:「臣聞聖王闢四門,開四聰。」又〈班昭傳〉昭上疏曰:「隆唐虞之政,闢四門而開四聰。」《潛夫論·明闇》篇:「夫堯舜之治,關四門,明四目,達四聰。」《左傳》文十八年杜預注曰:「闢四門,達四窻。」《風俗通·十反》篇:「蓋人君者闢門開窻,號咷博求。」

《史記》以「通」訓達,以「耳」訓聰,則是以關四門為手段方法,以明四日,達四聰為目標,史公用歐陽之學,則《歐陽尚書》作「達四聰」。陳喬樅《今文尚書經說考》云「《尚書·釋文》無聰字音義,亦不言馬、鄭本同異,則《古文尚書》作聰可知也。」其說可從,是《古文尚書》亦必作「達四聰」,文義與歐陽說同。《風俗通》、《左傳》杜預注引作「窻」,窻即窗之俗體字,以此二條相較,可見三事:二者均無「明四目」句,一也;如此則門與窗含義正相應,二也;一作開,一作達,而義不異,則二字不同非異文,乃訓詁字,三也。驗之《後漢書·郅壽傳》,〈班昭傳〉所引,正與此合。若以聰訓耳,則達不可訓開,以聰通窗,則達訓開爲宜;然則上有開字者,其下聰字必訓爲窗,始能順義。今歐陽、古文既以「通」訓達,以耳訓聰,則開窗之說必爲夏侯之說,其有作窻字者亦夏侯之異本矣;且班昭爲班固之姊,習夏侯之說與其兄同,固所宜也,此亦可爲上論之佐證。如此則魯丕云「開四聰」,是用《夏侯尚書》。

30. 湛上疏諫曰:「臣聞文王受命而征伐五國,必先詢之同姓,然後謀於群臣, 加占蓍龜,以定行事。」(〈伏湛傳〉)。

按:〈大誥〉云:「寧王惟卜用,克綏受茲命。」又〈洪範〉云:「汝則有大疑, 謀乃及心,謀及卿士,謀及庶人,謀及卜筮。」伏湛所陳實檃括〈大誥〉、〈洪 範〉之義也。

31. 杜詩上疏薦湛曰:「臣聞唐、虞以股肱康,文王以多士寧;是故《詩》稱 濟濟,《書》曰良哉。」(〈伏湛傳〉)

按:〈皋陶謨〉云:「乃賡載歌曰:『元首明哉;股肱良哉;庶事康哉。』」此云「唐、虞以股肱康」「《書》曰良哉」者,即檃括〈皋陶謨〉文。

32. 「……宜居輔弼。」(〈佚湛傳〉)

按:《尚書大傳》云:「古者天子必有四鄰:前曰疑,後曰丞,左曰輔,右曰弼。」 此引「輔弼」者,當爲引《大傳》之文。

- 33. **乃上書曰:「……誠宜夙興夜寐,雖休勿休。……」**(〈蔡茂傳〉) **按:**〈呂刑〉云:「雖畏勿畏,雖休勿休。」此云「雖休勿休」,即引〈呂刑〉之文。
- 34. **賜霸璽書曰:「崇山、幽都何可偶,黃鉞一下無處所。……」**(〈馮勤傳〉) **按:**〈堯典〉云:「流共工于幽州,放驩兜于崇山,竄三苗于三厄,殛鯀于羽山,四罪而天下咸服。」此云「崇山、幽都」者,即檃括堯典之義也。

又:此「黃鉞」一辭,實引〈今文泰誓〉之文。考《史記·齊世家》:「師行,師尚父左杖黃鉞,右把白旄,以誓:『蒼兕、蒼兕。總爾眾庶,與爾舟楫,後至者斬。』」《索隱》云:「此文上下並〈今文泰誓〉。」《淮南子・覽冥訓》:「武王伐紂。渡孟津。陽侯之波逆流而擊,疾風晦冥,人馬不相見。王左操黃鉞,右秉白旄,瞋目而撝之曰:『余在,天下誰敢害吾意者。』於是風濟而波罷。」《水經·河水注》引《論衡》:「武王伐紂,升舟,陽侯波起,疾風逆流。武王操黃鉞而麾之,風波畢除。」《周禮·秋官伊者氏疏》:「〈今文泰誓〉『師尚父左杖黄鉞,右把白旄。』」〈今文泰誓〉出於漢武末,其後歐陽、大小夏侯三家採入《尚書》。《史記·齊世家索隱》云:「〈今文泰誓〉」,則《史記》所引與〈今文泰誓〉同,而《史記》書成在武帝末前,所據當爲先秦釋〈泰誓〉之文,司馬貞《索隱》據後出之〈今文泰誓〉而言,未允。《淮南子》亦出武帝末以前,則所引武王事,亦本於先秦所遺說〈大誓〉之書。《論衡》所引,在武帝末以後,〈今文泰誓〉已充學,所引當係〈今文泰誓〉。〈今文泰誓〉,唐初猶存,故賈公彥疏《周禮》得以用之。此云光武鄭書所引必爲〈今文泰誓〉也。

又:〈牧誓〉篇亦云:「王左杖黃鉞,右秉白旄以麾。」亦與漢〈泰誓〉同,蓋 皆武王伐紂誓師之事故也。

35. 是時顯宗方勤萬機。(〈牟融傳〉)

按:〈皋陶謨〉云:「兢兢業業,一日二日萬幾。」此云「方勤萬機」者,即引〈皋陶謨〉之文也。此引作「機」與今本《尚書》作「幾」不同者,僞《古文尚書》作「幾」乃孔傳所改,故與漢魏相傳本作「機」異。(說見第二章第 22. 條之(2))

36. 豹曰:「犬馬齒衰,旅力已劣。……」(〈韋彪傳〉)

按:〈秦誓〉云:「尚猷詢茲黃髮,則罔所愆,番番良士,旅力既愆,我尚有之。」 此云「旅力已劣」,即櫽括〈秦誓〉文義也。 37. 數上書順帝,陳宜依古典,考功黜陟。(〈韋義傳〉)

按:〈堯典〉曰:「三載考績,三考黜陟幽明。」此約引〈堯典〉文也。《爾雅·釋詁》云:「績、勳、功也。」此引作「功」者,以訓詁字代之。〈參見第二章第1條〉

38. 及卒,三縣吏民為義舉哀,若喪考妣。((韋義傳))

按:〈堯典〉曰:「二十八載,帝乃殂落,百姓如喪考妣。」此引〈堯典〉之文也。「如」作「若」者,《廣雅,釋言》,「如、若也。」即以詁訓字代之。

39. 贊曰:湛、霸奮庸,維寧兩邦。(〈韋義傳〉)

按:〈堯典〉云:「舜曰:『咨,四岳,有能奮庸,熙帝之載。』」此云「奮庸」 者,引〈堯典〉之文。

- 40. **林奏曰:「……周之五刑,不過三千。……**」(〈杜林傳〉) **按:**〈呂刑〉云:「五刑之屬三千。」此云「周之五刑,不過三千」者,即檃括 〈呂刑〉之文。
- 41. 詔告廬江太守,東平相曰:「……《書》不云乎:『章厥有常,吉哉。』」 (〈鄭均傳〉)

按:〈皋陶謨〉云:「彰厥有常,吉哉。」此所引《書》云者即〈皋陶謨〉之文也。考《史記・夏本紀》:「章其有常,吉哉。」李賢注云:「章,明也。吉,善也。言爲天子明顯其有常德者,優其稟餼,則政之善也。」僞孔傳云「彰,明;吉,善也。明九德之常,以擇人而官之,則政之善。」李賢注與僞孔傳用義相若,蓋其注解雖依前後文意,然實本之僞孔傳也。李注云「章,明也」與今本不同者,蓋李注順《後漢書》之文云然。《說文》:「章,樂竟爲一章。从音十;十數之終也。」又「彰,珳彰也。从彡章,章亦聲。」段注云:「《尚書》某氏傳,《呂覽注》、《淮南注》、《廣雅》皆曰:『彰,明也。』通作章。」章與彰,古音相同,故通。

42. 衍因說丹曰:「……人所歌舞,天必從之。」(〈馮衍傳〉)

按:《左傳·襄公三十一年》曰:「在〈太誓〉曰:『民之所欲,天必從之。』」 此《左傳》引先秦〈太誓〉之辭也。而此云「人所歌舞,天必從之」者,即檃 括《左傳》所引先秦〈太誓〉之辭。

- 43. 衍因以計說永曰:「·······忠臣不顧爭引之患,以達萬機之變。」(〈馮衍傳〉) 按:〈皋陶謨〉云:「兢兢業業,一日二日萬幾。」此云「萬機」者,即引〈皋 陶謨〉文。此引作機者,漢、魏時《尚書》本如此,因偽孔本作「幾」者異。(說 見第二章第 22.條之(2))
- 44. 衍不得志,退而作賦,又自論曰:「……思唐虞之晏晏兮,揖稷契與為朋。」 (〈為衍傳〉)

按:〈堯典〉云:「曰若稽古帝堯,曰放勳。欽、明、文、思、安安。」此云「唐 虞之晏晏」,即檃括〈堯典〉文。此作「晏晏」者,用《今文尚書》也。(詳見 第二章第71條之(3))

- 45. 因對策曰:「……關四門之路,明四目之義也。臣聞成王幼少,周公攝政, 聽言下賢,均權布寵,無舊無新,唯仁是親,動順天地,舉措不失。然 近則召公不悅,遠則四國流言。……」(〈申屠剛傳〉)
 - (1) 闢四門之路,明四目之義也。

按:〈堯典〉云:「闢四門,明四日,達四聰。」此云「闢四門之路,明四日之義」者,即隱括〈堯典〉文義也。

(2)無舊無新,唯仁是親

按:李賢注引《尚書大傳》云:「武王入殷。周公曰:『各安其宅,各田其田; 無故無新,唯仁之親。』者,當爲《大傳》之文。《大傳》於唐初尚未亡,李賢 注引之可證。

(3) 近則召公不悅

按:今〈書序〉云:「召公爲保,周公爲師,相成王爲左右,召公不說。周公作〈君奭〉。」《史記·燕召公世家》亦云:「成王既幼,周公攝政,當國踐阼,召公疑之;作〈君奭〉。」《漢書·孫寶傳》:「周公上聖,召公大賢,尚猶不相說,著於經典,兩不相損。」《漢書·王莽傳》群臣奏言曰:「周公服天子之晚,南面而朝群臣,發號施令,常稱王命,召公賢人,不知聖人之意,故不說也。」《史記·集解》引馬融曰:「召公以周公既攝政,致太平,功配文武,不宜復列在臣位,故不說。」《尚書正義》引鄭注云:「召公以周公既攝王政,不宜復列於官職,故不說。」

考〈書序〉之作,多有疑問,《史記·三代世表序》,云:「至於序《尚書》, 則略無年月,或頗有,然多闕,不可錄。」〈孔子世家〉曰:「序《書》傳,上 記唐虞之際,下至秦繆,編次其事。」《漢書·藝文志》曰:「孔子纂焉,上斷于堯,下訖于秦,凡百篇而爲之序,言其作意。」劉歆《移太常博士書》曰:「孔子序書。」馬、鄭亦以爲〈書序〉爲孔子所作。《史記》、《漢書》、劉歆、馬、鄭,一皆肯定孔子與〈書序〉有關,然史公所謂「序《尚書》」「序《書》傳」者,「序」,乃編輯排列之謂,非所謂「言其作意」之序也。其證有三:〈孔子世家〉下有「編次其事」句,一也;〈三代世表〉及〈世家〉之序字,在《尚書》、《書傳》之前,依文法而論,當爲動詞,二也;〈世表〉、〈世家〉述孔子於《尚書》之功,主在於斷限及年月之編次,並無所謂「述作意」之意,三也。則史公未以〈書序〉爲孔子作也。及班固乃云「言其作意」,以爲〈書序〉孔子所作,後世相沿用之。雖〈書序〉之作者及創作時代不能明知,然西漢時必已有相當之著述存焉,則可定言。考太史公作《史記》,臚舉《尚書》作意者,與今本書序十同八九,可證漢時〈書序〉之說盛行,不俟孔安國也。若〈書序〉出孔壁,民間絕無,則亦猶逸篇十六卷,絕無師說耳,馬、班安能采錄,馬、鄭安能作注,張霸亦不可據以成百兩篇矣。今申屠剛對策在東漢,〈書序〉已行,所引當爲〈書序〉。

又:《史記·燕世家》云云以爲〈君奭〉之作,在攝政之時,而其意以爲召公之所以不悅者,在疑問公有踐阼之嫌。此與《漢書·王莽傳》群臣奏言,及本文申屠剛對策之說相同。《史記·集解》引馬融說以爲〈君奭〉之作,在致政之後,並以不宜復列臣位解所以不悅之故,《尚書正義》引鄭注與馬融同,與《史》、《漢》之說大異。蓋史公用歐陽之說,漢時諸儒用今文家言,與馬、鄭之古文說不同也。段玉裁《古文尚書撰異·書序》云:「書序亦有古文今文之殊。」信有徵矣。(4)遠則四國流言

按:〈金縢〉云:「武王既喪,管叔及其群弟,乃流言於國,曰『公將不利於孺子』。」此云「遠則四國流言」者,即檃括〈金縢〉之文也。

46. 「……國家微弱,姦謀不禁,六極之效,危於累卵。……」(〈申屠剛傳〉) 按:〈洪範〉曰:「六極:一曰凶短折,二曰疾,三曰憂,四曰貧,五曰惡,六 曰弱。」漢人每以天人相應之觀念,視國家政治之盛衰與天文、自然現象相比 況,遂連類於〈港範〉九疇中五行、五事、皇極、庶徵、稽疑、五福六極諸疇, 以成《洪範五行傳》。《洪範五行傳》云:「一曰貌,貌之不恭,是謂不肅,厥咎 狂,厥罰常雨, 厥極惡。……次二事曰言,言之不從,是謂不艾,厥咎僭,厥 罰常陽,厥極憂。……次三事曰視,視之不明,是謂不悊,厥咎荼,厥罰常奧, 厥極疾。……次四事曰聽,聽之不聰,是謂不謀,厥咎急,厥罰常寒,厥極貧。…… 次五事曰思,心思,心之不容,是謂不聖,厥咎霧,厥罰常風,厥極凶短折。…… 王之不極,是謂不建,厥咎瞀,厥罰常陰,厥極弱。」(見陳壽祺輯《大傳》) 此所謂「六極」者,即檃括《洪範五行傳》之文義也。

- 47. 「······差五品之屬,納至親之序。······」(〈申屬剛傳〉) 按:〈堯典〉云:「百姓不親,五品不遜。」此云「五品」「至親」者,即檃括〈堯典〉文也。
- 48. 剛說之曰:「······伏念本朝躬聖德,舉義兵,龔行天罰,所當必摧。」(〈申 屠剛傳〉)

按:〈甘誓〉云:「天用勦絕其命,今予惟恭行天之罰。」〈牧誓〉云:「今予發,惟恭行天之罰。」此云「襲行夭罰」者,正引〈甘誓〉、〈牧誓〉之文。

考《墨子・明鬼下篇》引〈夏書・禹蓍〉曰:「予共行天之罰也。」《史記・ 殷本紀》:「今予維共行天之罰。」《漢書・王莽傳》:「共行天罰。」〈翟方進傳〉: 「共行天罰。」《白虎通・三軍》篇:「《尚書》曰:『今予惟恭行天之罰。』」 《漢書‧敘傳》:「龔行天罰,赫赫明明。」《文選‧鍾會檄罰文》「命受六師, 龔行天罰」李注:「《尚書》曰「予惟龔行天之罰。」《後漢書》班固〈東都賦〉 「龔行天罰,應天順人」李善注云:「《尚書》武王曰「今予惟襲行天之罰。」 《文選》班固〈東都賦〉「襲行天罰」李賢注:「《尚書》武王曰「今予惟襲行 天之罰」。段玉裁《古文尚書撰異》云:「《尚書》恭敬字不作共,如允恭、象 恭、同寅協恭,兒曰恭,乃弗克恭厥兄,惟御事厥棐有恭、惟恭,奉幣作周恭 先、嚴恭寅畏,罔不惟正之恭,皆是也。共奉之字不作恭,如〈甘誓〉共行天 罰,不共命,〈幋庚上〉各共爾事,〈盤庚中〉『顚越不共』,〈盤庚下〉『共承民 命』,『敢共生生』,〈牧誓〉『今予發惟共行天之罰』,〈召誥〉『用共王能祈天永 命』、〈無逸〉『微柔懿共』、『以庶邦惟正之共』、〈君奭〉『大弗克共上下』『嗣 前人共明德』、〈粊書〉『無敢不共』、孔傳皆訓爲奉或供侍皆是也。漢石經之存 於今者,〈無逸〉一篇中『嚴恭』作『恭』,『懿共』『惟正之共』皆作『共』, 可知二字之不相混儻。《古文尚書》經文本作『各恭爾事』,『恭行天之罰』之 類,何必紆回訓爲奉乎;《尚書》全經言恭者何以不皆訓爲奉乎?……衛包誤 認共恭爲古今字,遂改《尙書》訓奉之共悉爲恭。又按《史記》一書如『似恭 漫天』,『貌臼恭』『嚴恭寅畏』,皆作恭,不作共,而〈甘誓〉〈牧誓〉『共行天 之罰』『女不共命』皆作共,不作恭,可見自古分別,《今文尚書》、《古文尚書》 所同也。」段君以共奉字與恭敬字《尚書》古不相混,確爲明見。

《墨子》作「共」則古文作「共」無疑;《史記》多用《歐陽尚書》,作「共」, 《漢石注》亦作「共」則夏侯經亦如此,是今古文家皆作共也。又班固《漢書、 敘傳》作「龔」,〈東都賦〉亦作「龔」,則作「龔」者爲三家異文也。

《說文》三篇共部曰「共,同也」,「龔,給也」,八篇人部「供,設也。一曰供給也」,是則供龔相通,古已有之,蓋二字音訓皆同也。而古經假「共」爲「龔」皆从共聲故得假之。作「龔」爲本字。僞孔本爲衛包所改,未知本作何字。

49. 「為國立功·可以永年。……」((申屠剛傳))

按:此云「爲國立功,可以永年」者,蓋櫽括〈今文泰誓〉之辭也。考《漢書‧郊祀志》:「〈太誓〉曰:『正稽古立功之事,可台永年,丕天之大律。』」師古曰:「〈今文泰誓〉,〈周書〉也。」又〈平當傳〉:「《書》云:『正稽古立功之事,可台永年,傳於亡窮。』」師古曰:「〈今文泰誓〉之辭。」又〈刑法志〉:「《書》曰:『立功之事,可以永年。』」師古曰:「〈今文泰誓〉之辭也。」《後漢書‧班固傳》注:「《今文尚書‧泰誓》篇曰:『立功之事,可以永年,丕天之大律。』」本文注云:「《今文尚書》曰:『立功立事,可以永年。』」《漢書‧平當傳》、〈刑法志〉、〈郊祀志〉引《書》曰,皆在武帝末以後,其時〈今文泰誓〉已出,歐陽、夏侯已收入《尚書》,所引書係〈今文太誓〉文。本傳所引,亦係〈今文泰誓〉文,李賢注云「《今文尚書》」者,即指〈今文泰誓〉而言也。

50. 惲不謁,曰:「昔文王拔呂尚於渭濱,高宗禮傅說於巖築。……」(〈郅渾傳〉)

按:〈書序〉云:「高宗夢得說,使百工營求諸野,得諸傅巖,作〈說命〉三篇。」 又《孟子告子下》曰:「傅說舉於版築之間。」此云「高宗禮傅說於巖築」者, 乃櫽括〈書序〉之辭,參之《孟子》也。

- 51. 惲乃免冠謝曰:「昔虞舜輔堯,四罪咸服,讒言弗庸,孔任不行,故能作 股肱,帝用有歌。……」(〈郅惲傳〉)
 - (1) 虞舜輔堯,四罪咸服

按:〈堯典〉云:「流共工于幽州,放驩兜于崇山, 簋三苗于三危, 殛鯀于羽山, 四罪而天下咸服。」此云「四罪咸服」者, 乃隱括〈堯典〉之辭。

(2) 讒言弗用,孔任不行

按:〈皋陶謨〉云:「何憂乎驩兜?何遷乎有苗?何畏乎巧言令色孔壬。」此云 「讒言」「孔任」者,即檃括〈皋陶謨〉之辭。任、壬,同音相通。

(3) 故能作股肱,帝用有歌

按:〈皋陶謨〉云:「帝庸作歌曰:『勑天之命,惟時惟幾。』乃歌曰:『殷肱喜哉!元首起哉!百工熙哉!』」此云「能作殷肱,帝用有歌」者,即檃括〈皋陶謨〉文辭也。《史記·五帝本紀》:「帝用此作歌。」庸作用者,以訓詁字代經字也。《說文》:「庸,用也。从用从庚;庚,更事也。」《廣雅·釋訓》云:「庸者,用也。」此作「用」,亦以訓詁字代經字。

52. **惲上書諫曰:「昔文王不敢槃于游田,以萬人惟憂。……」**(〈郅惲傳〉) **按:**〈無逸〉云:「文王不敢盤于遊田,以庶邦惟正之供。文王受命惟中身,厥 享國五十年。周公曰:『嗚呼!繼自今嗣王,則其無淫于觀于逸,于遊于田,以 萬民惟正之供。』」此云「文王不敢槃于游田」者,即引〈無逸〉文。此引作「槃」 作「游」者,蓋三家異文也。(詳第四章 57.條)。

又:此下文云「以萬人惟憂」,李賢注引「以萬人惟政之共」解之,似以「以萬人惟憂」句爲《尚書》之異文。考漢儒多習《今文尚書》,上郅惲上書陳諫,所用亦必爲今文;隸釋載《漢石經殘碑》作「酒毋劮于遊田維口口共」,《漢書・谷永傳》對災異引經作「繼自今嗣王,其毋淫于酒,毋逸于遊田,惟正之共」,與石經正合,則《今文尚書》無「以萬人」三字矣,郅惲上書既用《今文尚書》,當無「以萬人」句。皮錫瑞《今文尚書攷證》卷二十云:「君章(郅怿字)云以萬人爲憂者,乃釋經言文王不敢盤游之意,非謂經有『萬人爲憂』之文也。若注所引乃下文周公戒嗣王語,非謂文王。且君章所據是今文,《今文尚書》並下文亦無『以萬民』三字。《東觀漢記》惲上書曰『昔文王不敢盤于遊田,以萬民爲憂』,與《後漢書》同,蓋《後漢書》又改民爲人以避唐諱也。」皮氏謂「以萬人爲憂」句爲釋經之辭,非經書本文,其說可信。且〈無逸〉篇前有云:「文王卑服,即康功田功,徽柔懿恭懷保小民,惠鮮鰥寡;自朝至于日中昊,不遑暇食,用咸和萬民。」惲所上書,蓋回應上文「用咸和萬民」之意爾;則「以萬人爲憂」,非《尚書》文也。

53. 侍御史何敞上疏理之曰:「臣聞聖王闢四門,開四聰。誠不欲聖朝行誹謗 之誅,以傷晏晏之化。……」(〈郅壽傳〉)

按:〈堯典〉云:「闢四門,明四目,達四聰。」此云「闢四門,開四聰」者,即

引〈堯典〉文也。此引作「開四聰」者,用《夏侯尚書》也。(說見本章第29.條) 又:〈堯典〉云:「欽、明、文、思、安安。」此云「晏晏」之化者,即引〈堯典〉之文。此引作「晏」者,用《今文尚書》。(詳見第二章第71條之(3))

54. 竟時在南陽·與龔書曉之曰:「······故武王將伐紂,上祭于畢,求助天也。·····」(〈蘇竟傳〉)

按:此云「武王將伐紂,上祭于畢」者,《詩‧周頌‧思文正義》:「〈大誓〉云:『惟四月,太子發上祭於畢,下至於孟津之上。』《尚書》傳、《史記》所引, 在武帝末以前,當係本乎先秦所遺說〈太誓〉之書,桓譚《新論》雖未稱《書》 日,未舉篇名,其書在武帝末之後,所據當係〈今文泰誓〉。《詩‧周頌‧思文 正義》稱〈大誓〉日,則爲〈今文大誓〉文,此引文在武帝末後,當亦係〈今 文泰誓〉文也。(參見第二章第2條)

- 55. **顗乃詣闕拜章曰:「……伏惟陛下躬日昊之聽,……」**(〈郎顗傳〉) **按:**〈無逸〉篇云:「文王至于日中昊,不遑暇食。」此云「日昊」者,即檃括〈無逸〉之文也。
- 56. 「·······昔盤庚遷殷,去奢即儉。······」(〈邱顗傳〉) 按:〈盤庚上〉篇云:「盤庚遷于殷,民不適有居。」此云「盤庚遷殷,去奢即 儉」者,即檃括〈盤庚上〉篇之文義也。
- 57. 「……股肱良哉,著於虞典。……」(〈郎顗傳〉) 按:〈皋陶謨〉云:「乃賡載歌曰:『元首明哉!股肱良哉!庶事康哉!』」此云 「股肱良哉」,即引〈皋陶謨〉之辭。此稱虞典者,即〈虞書〉之謂也。
- 58. 「……昔武王下車,出傾宮之女,表商容之閭。……」(〈郎顗傳〉) 按:李賢注引《大傳》云:「武入殷,表商容之閭,歸傾宮之女。」《通鑑前編·武王十三年》引:「遂入殷,封比干之墓,表商容之闆,發鉅橋之粟,散應臺之財,歸傾宮之女。」則此云「武王下車」事,乃《大傳》之文。唐時《大傳》猶未亡,故李賢得而引之。李注引文與《通鑑》前編所引詳略不同,蓋李注乃節引之也。
- 59. 「……宜豫宣告諸郡,使敬授人時。……」(〈郎顗傳〉) 按:〈堯典〉云:「乃命羲和,欽若昊天,曆象日月星辰,敬授人時。」此云「敬

授人時」者,正引〈堯典〉之文。「人」字本作「民」字。段玉裁《古文尚書撰 異》云:「民時自來《尚書》無作人時者,即以注疏本證之,〈洪範〉孔傳,〈皋 陶謨〉正義,皆云『敬授民時』,唐初本不誤也。自唐孝明天寶三載,始命衛包 改《古文尚書》。包以民時字在卷首,非他民字可比,乃竟改爲人時,而古人引 用如鄭注《尚書大傳》,徐氏偉長《中論·厤數》篇,韋氏注〈鄭語〉皆引『敬 授民時』,皆治《古文尚書》者也。《史記·五帝本紀》、《漢書·律曆志》、〈食 貨志〉、〈藝文志〉、〈李尋傳〉、〈王莽傳〉,及〈漢孫叔敖碑〉,皆引『敬授民時』, 皆治《今文尚書》者也。」段氏之說證據灼然可見,其言可信。今〈郎顗傳〉 引作「人」者,蓋亦避唐諱而爲後人所改也。

60. 「……機衡之政,除煩為簡。……」(〈郎顯傳〉)

按:〈堯典〉云:「在璿璣玉衡,以齊七政。」此云「機衡之政」者,則櫽括〈堯典〉之辭。此引作「機」與《今本尚書》作「璣」不同,蓋《今本尚書》本作「機」,後人涉上「璇」「璿」之玉旁而誤改也。(詳見第二章第54.條)

61. 顕對曰:「方春東作, ······。又今選舉皆歸三司, 非有周、召之才, 而當則哲之重。···。」(〈郎顕傳〉)

按:〈堯典〉云:「寅賓出日,平秩東作,日中,星鳥,以殷仲春。」此云「方春東作」,即檃括〈堯典〉之文。

又:〈皋陶謨〉云:「咸若時,惟帝其難之。知人則哲,能官人。」此云「則哲」者,乃櫽括〈皋陶謨〉之辭。

- 62. 「……豈獨陛下倦於萬機,帷幄之政有所闕歟?何天戒之數具也。臣願陛下發揚乾剛,援引賢能,勤求機衡之寄,以獲斷金之利。」(〈郎類傳〉)按:〈皋陶謨〉云:「兢兢業業,一日二日萬幾。」此云「萬機」者,即引〈皋陶謨〉文。引作「機」者,蓋漢魏《尚書》之本然。(詳見第二章第22.條之(2))又:〈堯典〉云:「在璿璣玉衡,以齊七政。」此云「機衡」者,即櫽括〈堯典〉文。引作「機」與僞孔傳本作「璣」不同,蓋今僞孔本涉上璿之玉旁而誤改也。作機者爲漢、魏、晉、唐初之本然。(說見第二章第54.條)
- 63. 「……琁璣動作,與天相應。……」(〈郎顗傳〉)

按:〈堯典〉云:「在璿璣玉衡,以齊七政。」此云「琁璣動作」者,即檃括〈堯典〉之辭。此引作「琁」者,蓋「琁」爲「璿」之重文,可互相爲用。又此作

「璣」,不作木旁之機者,乃後人據今本僞孔《尙書》改之。

64. 「······《尚書·洪範》記曰:『月行中道,移節應期,德厚受福,重華留之。』(〈郎顯傳〉)

按:此所謂《尚書·洪範記》者,即《漢書·藝文志》所謂「劉向《五行傳記》十一卷」,亦《漢書·劉向傳》所謂「洪範五行傳論」也。其書今亡,詳不可考。《漢書·藝文志》王先謙補注云:「王應麟曰:『本傳云《洪範五行傳論》。沈約云「伏生創紀《大傳》,五行之體始詳,劉向廣演〈洪範〉,休咎之文益備」』沈欽韓曰『隋志伏生之傳,惟劉向父子所著五行是其本法,而又多乖戾』,其卷數與此同。《後漢書·郎顗傳》奏便宜四事引《尚書·洪範記》。」王氏以爲此云《尚書·洪範記》即劉向《五行傳記》十一卷中文,是也。

65. 楷自家詣闕上疏曰:「臣聞皇天不言,以文象設教。堯舜雖聖,必歷象日 月星辰,察五緯五在,故能享百年之壽,為萬世之法。……」(〈襄楷傳〉) 按:〈堯典〉云:「乃命羲、和,欽若昊天,曆象日月星辰,敬授人時。」此云 「歷象日月星辰」者,即引〈堯典〉之文。引作「歷」者,蓋同音通用也。

《史記·五帝本紀》以爲堯在位七十年,二十年而老,又八年而崩。徐廣 謂堯在位九十八年,與《史記》合。《堯典正義》云:「徧檢書傳,無帝堯即位 之年。」《論語・泰伯》篇「大哉堯之爲君也」章疏引《書》傳云:「堯年十六, 以唐侯升爲天子,遂以爲號。」然驗之《堯典正義》之言,則此所引《書》傳, 蓋亦《書》緯之言。即依其說則堯年百一十七年,否則唯以在位年計之,亦差 可謂之百年矣。又〈堯典〉云:「舜生三十登庸,三十在位,五十載陟方乃死。」 僞孔傳云:「三十徵庸,三十在位,服喪三年,其一在三十之數,爲天子五十 年,凡壽百一十二歲。」此一說也。《史記》謂「舜年二十,以孝聞。年三十, 堯舉之。年五十,攝行天子事。年五十八,堯崩。年六十一,代堯踐帝位。踐 帝位三十九年,南巡狩,崩於蒼梧之野。」是謂舜年百歲也,此又一說。《堯 典正義》引鄭玄讀此經云:「舜生三十,謂生三十年也。登庸二十,謂歷試二 十年。在位五十載,陟方乃死,謂攝位至死爲五十年,舜年一百歲也。」此說 與《史記》同。考《孟子》謂:「舜相堯二十有八載。」《史記‧五帝本紀》:「堯 立七十年,得舜,二十年而老令舜攝行天子之政,薦之於天,堯辟位,凡二十 八年而崩。」與孟子說合。《大戴禮‧五帝德》篇:「舜之少也惡顇勞苦,二十 以孝聞乎天下,三十在位,嗣帝所五十乃死。」其數亦恰百歲也。《孟子‧萬

章》篇:「五十而慕者,予於大舜見之矣。」趙岐注曰:「《書》曰:『舜生三十登庸,二十在位時尚慕,故言五十也。』其說亦百歲。《論衡·氣壽》篇:「〈堯典〉曰:『舜生三十徵用,二十在位,五十載陟方乃死。』適百歲矣。」如此而言,舜百年之說,實爲《今文尚書》說,鄭玄讀此經乃以今文讀古文也。此云「享百年之壽」者,當係用今文家說也。劉恕《通鑑外記》引王肅注云:「歷試三載,其一在徵用之年,其餘二載,與攝位二十八年,凡三十歲。」則僞孔傳之說,其來有自,爲馬、王古文家說也。

66. 「······自春夏以來,連有霜雹及大雨,而臣作威作福,刑罰急刻之所感也。」(〈襄楷傳〉)

按:〈洪範〉云:「臣之有作福、作威、玉食,其害于而家,凶于而國。」此云「臣作威作福」者,即檃括〈洪範〉文義也。此引「作威」于「作福」之先, 乃用《今文尚書》。(詳見本章第14.條)

第四章 《後漢書·傳》引《尙書》考辨(中)

1. 乃上疏曰:「陛下亮成天工,克濟大業。……」(〈杜詩傳〉)

按:〈堯典〉云:「欽哉。惟時亮天功。」此云「亮成天工」者即檃括〈堯典〉之文也。此引作「工」者,考《史記·五帝本紀》曰:「敬哉!維時相天事。」又〈夏本紀〉云:「非其人,居其官,是謂亂天事。」《伏生大傳》云:「《書》稱天工人其代之。夫成天地之功者,未嘗不著昌也。」《漢書·律曆志》:「人者繼天順地,序氣成物、以終天地之功。《書》曰:『天功人其代之。』」師古注:「言聖人稟天造化之功,代而行之。」《漢書·王莽傳》:「《書》不云乎,『天工人其代之』。」《集解》曰:「馬融曰:『稷、契、皋陶,皆居官久,有成功,但述而美之,無所復敕。』」漢石經殘字作「工」,蔡邕〈橋公廟碑〉:「時亮天工。」〈陳太邱碑〉:「惟亮天工。」丁孚〈漢儀夏勤策文〉曰:「時亮天工。」

諸家引文,太史公均作「天事」是《史記》所據《尚書》作「天工」,蔡邕書石經及漢碑,亦作「天工」,《漢書》或作「天功」、或作「天工」,伏生《大傳》引《書》作「天工」,而傳稱「成天地之功」則是以「功」訓「工」也,則是《今文尚書》皆作「天工」,其作「天功」者,或以訓代經也。夫「工」與「功」,皆以「工」爲聲,古音相同,且爲事工則有功,是「工」爲因,「功」爲果,一體分二,二實爲一,義相同也。此云「天工」者即用今文家之說也。陳喬樅《今文尚書經說攷》云:「漢儒說此經,皆以王者之代天官人爲義,此今文家說也。《書・正義》引王肅之:『天不自下治之,故人代天居之,不可不得其人。』是王注亦用今文家說也。」又段玉裁《古文尚書撰異》云:「功,蓋《今文尚書》作工,故〈五帝本紀〉於此曰:『相天事』,於〈皋陶謨〉『天工人其代之』,亦詁以天事,古者工有事訓。」陳、段之說是也。

又: 偽孔傳「惟時亮天功」訓作「惟是乃能信立天下之功」;於「天工人其代之」 則訓作「言人代天理官,不可以天官私非其才」;「天下之功」者即人間事,「代 天理官」者則爲上天之事。「天功」「天工」,義訓不同,前句或取義於馬融,後 句則取漢儒相傳之說。段玉裁《古文尚書撰異》云:「姚方興於亮采及此,皆訓 信,按《說文》『諒,信也』,『亮、明也』,是假亮爲諒也。假借無礙於經說,然 曰『信立其功』曰『信立天下之大功』不亦拙乎。」段氏評言,至爲中綮。

- 2. 「……臣詩伏自惟忖,本以史吏一介之才。……」(〈杜詩傳〉) 按:〈秦督〉云:「如有一介臣,斷斷猗,無他技。」此云「…介之才」者,即隱 括〈秦誓〉之辭。
- 3. **贊曰: ……堂任良肱。**(〈陸康傳〉) **按:**〈皋陶謨〉云:「乃賡載歌曰:『元首明哉,股肱良哉。』」此云「良肱」即約 引〈皋陶謨〉之文。
- 4. 準乃上疏曰:「······庶政萬機,無不簡心。······故朝多皤皤之良、華首之老······」(〈樊宏傳〉)
 - (1) 庶政萬機

按:〈皋陶謨〉云:「兢兢業業,一日二日萬幾。」此云「萬機」者,即引〈皋陶 謨〉文。作「機」者,蓋漢、魏本作機,僞孔本改作幾。(詳見第二章第22條之 (2))

(2) 故朝多皤皤之良,華首之老

按:〈秦誓〉云:「尚猷詢茲黃髮,則罔所愆。番番良士,旅力既愆,我尚有之。」此云「皤皤之良」者,即檃括〈秦誓〉之文也。考《史記·秦本紀》云:「古之人謀黃髮番番,則無所過。」張守節《正義》云:「番番當作皤皤,白頭貌。」《史記》以番番屬之黃髮,爲老人狀貌,故番字當爲皤字之省借。《說文·白部》云:「皤,老人髮白貌。以白番聲。」是其誼也。僞孔傳訓「番番良士」爲「勇武番番之良士」,以番番爲勇武兒,大誤。此引作「皤皤」者,用其本字;其下與「蕹苗」相對,則是作老人髮白兒解,與《史記》同,是《今文尚書》之說如此。李賢注引《書》曰「皤皤良士」,則唐時《尚書》一本作「皤」也。

5. 浮因上疏曰:「······五典紀國家之政,鴻範別災異之文。······然以堯舜之盛,猶加三考。·····」(〈朱浮傳〉)

(1)〈堯典〉云:「慎徽五典,五典克從。」

按:此文云「五典紀國家之政」者,即引〈堯典〉之文也。

(2) (鴻範) 別災異之文

按:此云「鴻範」者即檃括〈洪範〉全篇文義也。考《尚書大傳》云:「鴻範可以觀度。」《史記·宋世家》:「箕子曰:『在昔縣陻鴻水,汩陳其五行。』」又「帝乃震怒,不從鴻範九等,常倫所斁。」班固《漢書·律曆志》:「〈洪範〉篇曰:『惟有三祀,王訪于箕子。』又〈五行志〉:「禹治洪水,賜洛書法而陳之,〈洪範〉是也。」又曰「箕子迺言曰:『我聞在昔,鯀陻洪水,汩陳其五行。』」熹平石經:「口伊鴻水,曰陳其五行。」《論衡・正說》篇曰:「禹之時,得洛書。書從洛水中出,〈洪範〉九章是也。」《大傳》作鴻,《史記》、熹平石經與《大傳》同,而《漢書》引文作「洪」,則《今文尚書》作「鴻」又作「洪」。鴻,大鳥也,洪、《釋詁》云「大也」,二字均戶工切,九部,是音同而義近,古多通用。

(3) 然以堯舜之盛,猶加三考

按:〈堯典〉云:「三載考績,三考黜陟幽明。」此云「猶加三考者」,即躁括〈堯典〉之辭。

- 6. 乃上書曰:「·····將以弘時雍之化,顯勉進之功也。」(〈朱浮傳〉) 按:〈堯典〉云:「黎民於變時雍。」此云「時雍之化」者,乃引〈堯典〉之文。
- 7. 長水校樊鯈言於帝曰:「唐堯大聖,兆人獲所,尚優遊四凶之獄,厭服海內之心,使天下咸知,然後殛罰。……」(〈朱浮傳〉)

按:〈堯典〉云:「流共工于幽州、放驩兜于崇山、簋三苗于三危、殛鯀于羽山、四罪而天下咸服。」此所云者,即檃括〈堯典〉之辭也。此云堯大聖而殛罰,知東漢時以此入〈堯典〉,可見今〈堯典〉「愼徽五典」以下分出爲〈舜典〉者 大誤。

8. 永平中,有人單辭告浮事者。(〈朱浮傳〉)

按:〈呂刑〉曰:「明清于單辭。」此云「單辭」者,即引〈呂刑〉之文。單辭者、 一偏之言也。經言單辭,又言兩辭,單兩相對,故曰:一偏之言。猶《論語‧顏 淵》篇:「片言可以折獄者」之「片言」也。

9. 帝聞之乃歎曰:「『知人則哲,惟帝難之』,信哉斯言。」(〈虞延傳〉) 按:〈皋陶謨〉曰:「禹曰:『吁,咸若時,惟帝其難之。知人則哲,能官人。』」 此云「知人則哲,惟帝難之」者,即引〈皋陶謨〉文也。

《史記‧夏本紀》曰:「禹曰:『吁,皆若是,惟帝其難之,知人則智,能官人。安民則惠,黎民懷之。』」《漢書‧武帝紀》元狩元年詔曰:「朕聞咎繇對禹曰:『在知人,知人則哲,惟帝難之。』《論衡‧定賢》篇:「《書》曰:『知人則哲,惟帝難之。』」又〈答佞〉篇:「《書》曰:『知人則哲,惟帝惟之。』」《白虎通‧封公侯》篇:「《書》曰:『惟帝其難之。』」《鹽鐵論‧論訓》篇:「皋陶對舜在知人,惟帝難之。」《漢書‧五行志》:「曰:『知人則哲,能官人。』」《漢書‧武帝紀》、《白虎通》、《論衡》、《後漢書》以「知人則哲」一句置於「惟帝難之」之前,與今本《尚書》異,然《史記》則與今本同,史公用歐陽之說,《後漢》顯宗亦受《歐陽尚書》(陳喬樅曰:「桓榮傳言榮授明帝《尚書》,是顧宗習《歐陽尚書》。」)則顯宗所本,當同《史記》,不應有此大異,是知古人引語不盡嚴謹,諸條皆以「知人爲難」爲義,故倒其文以示其義之所在,非三家經文有異序也。

又:《漢書·武帝紀》、《論衡》、《鹽鐵論》、《後漢書》作「惟帝難之」、《白虎通》作「惟帝其難之」、《史記》亦有「其」字、皮錫瑞以爲有「其」字,爲三家異文。按《漢書》、《白虎通》,均班固所錄,一人之手,或有或無,而《史記》歐陽家與今本《尚書》同,則是本有「其」字,其或無之者,行文之便,蓋「知人則哲,惟帝難之」,句四字成偶,故去「其」字,而《白虎通》引單句則有之,且古人引語不嚴、故或有或無,不可謂三家異文,皮說非是。

《漢書·五行傳》引作「知人則恝」與「哲」異,師古注曰:「悊、智也。能知其材則能官之,所以爲智也。」《說文》二篇上云:「哲,知也。以口折聲。悊、哲或以心。」段注云:「《韻會》引《說文》『古以爲哲字』,按心部云:『悊、敬也。』疑敬是本義,以爲哲,是假借。」。考之《史記》作「智」,《說文》釋哲爲知,《爾雅·釋言》作「智也」,知、智通用;《史記》以訓字代經字,作「哲」,顯宗同,《漢書·武帝紀》亦作哲,今本《尚書》亦作哲,傳云「哲,智也」,是今古經文本作哲也,許慎作《說文》時,哲與悊已慣性通用,心部有悊字,訓曰敬,口部哲下出悊字爲或體可證矣。哲與悊皆從折聲,古音必同,故可通借,段注是也。

10. 論曰:「……主無絕天之舋。」(〈周章傳〉)

按:此云「絕天」者,即檃括〈今文泰誓〉「自絕于天」者也。考《史記·周本 絕》:「武王乃作大誓,告爾眾庶:『今殷王紂,乃用其婦人之言,自絕于天,毀 壞其三正,離逷其王父母弟;乃斷棄其先祖之樂,乃爲淫聲,用變亂正聲;怡 說婦人。故今予發,維共行天罰。勉哉夫子!不可再,不可三。』《漢書·谷永傳》:「《書》曰:『迺用婦人之言,自絕于天,四方之逋逃多罪,是宗是長,是信是使。』師古曰:「今文〈周書·泰誓〉之辭。」荀悅《前漢記·孝昭皇帝紀》:「《書》曰:『殷王紂,自絕于天。』」(卷十六)《史記·周本記》所述武王作大誓事,在武帝未以前,其時〈今文泰誓〉未出,則《史記》所本乃先秦所遺說〈泰誓〉之言;《漢書·谷永傳》、《前漢紀》引《書》,在〈今文泰誓〉已得之後,歐陽、夏侯三家已收入《尚書》,則所引《書》曰者,當爲〈今文泰誓〉也。此范曄所云「絕天」者,即「自絕于天」也,其所引亦本〈今文泰誓〉。(詳參第二章第2.條〉。今本《尚書·泰誓》曰:「今商王受,狎侮五常,荒怠弗敬,自絕于天,結怨于民。」亦據〈今文泰誓〉而僞作也。

- 11. 統乃上疏曰:「······刑罰在衷,無取輕重,是以五帝有流、殛、放、殺之 誅,三王有大辟,刻肌之法。······文帝寬惠柔克。·····」(〈梁統傳〉)
 - (1) 五帝有流、殛、放、殺之誅

按:〈堯典〉云:「流共工于幽州,放驩兜于崇山,竄三苗于三危,殛鯀于羽山。」此云「流、殛、放、殺」者,即躁括〈堯典〉之文。此引作「殺」者,考《孟子·萬章》上:「萬章曰:『舜流共工於幽州,放驩兜于崇山,殺三苗于三危,殛鯀于羽山。』、《史記·五帝本紀》:「遷三苗於三危。」、《大戴禮·五帝德》篇:「殺三苗于三危。」共工言流,驩兜言放,縣言殛,皆誅責之義,並非死罪;《史記》以「遷」字訓之,則其非死殺之義可見。《孟子》、《大戴記》引〈堯典〉文,亦作殺,與此文同。段玉裁云:「〈堯典〉竄三苗于三危,與言流、言放、言殛一例,謂放之令自匿,故《孟子》作『殺三苗』,即《左傳》『黎蔡叔』之黎,業爲正字,竄、殺爲同音假借。」(見《說文·六部》寫字下注)又《古文尚書撰異》云:「《孟子·萬章》篇寫作殺,殺非殺戮,即竄之假借字。古無去聲,竄、讀如綴。《左氏·昭公元年傳》曰『周公殺管叔而蔡蔡叔』,陸德明曰『蔡,《說文》作桑』。按《說文》七篇『黎、穩槃散之也。』私列、桑割二切。經典竄、蔡、殺、雞同音通用,皆謂流放之也。」考竄、蔡、殺、雞四字同在十五部,古疊韻相通,《孟子》、《戴記》作殺者,均當以桑爲本字,《左傳》之蔡,今本之竄,亦是同音假借也。此引作「殺」者,亦音同通借也。

(2) 文帝寬惠柔克

按:〈皋陶謨〉云:「安民則惠。」又云:「敬敷五殺、在寬。」又〈洪範〉云「高

明柔克。」上云「寬惠柔克」者,即櫽括〈皋陶謨〉、〈洪範〉之文。

12. 統對曰:「聞聖帝明王,制立刑罰,故雖堯、舜,猶誅四凶。經曰:『天 討有罪,五刑五庸哉。』又曰:『爰制百姓于刑之衷。』……」(〈梁統傳〉) (1)故雖堯舜,猶誅四凶

按:〈堯典〉云:「流共工于幽州,放驩兜于崇山,窳三苗于三危,殛鯀于羽山,四罪而天下咸服。」此云「堯、舜猶誅四凶」者,乃櫽括〈堯典〉之辭。

(2)經曰:「天討有罪,五刑五庸哉。」

按:〈皋陶謨〉云:「天討有罪,五刑五用哉。」此云經曰云云,正引〈皋陶謨〉之文。此引作「庸」者,考《史記·夏本紀》:「天討有罪,五刑五用哉。」《漢書·刑法志》:「《書》云:『天秩有禮,天討有罪』。故聖人因天秩而制五禮,因天討而作五刑。大刑用甲兵,其次用斧鉞,中刑用刀鋸,其次用鑽鑿,薄刑用鞭打;大者陳諸原野,小者致之市朝。其所繇來者上矣。」《潛夫論·述教》篇:「《書》稱『天命有德,五服五章。天討有罪,五刑五用。』《後漢書·應劭傳》:「《尚書》稱『天秩有禮,五服五章哉。天討有罪,五刑五用哉。』《史記》、《漢書》、《後漢書·應劭傳》、《潛夫論》皆作「用」,唯此獨作「庸」,蓋三家之異文也。

(3) 又曰:「爰制百姓于刑之衷。」

按:〈呂刑〉云:「士制百姓于刑之中,以教祇德。」此云「爰制百姓于刑之衷」,即引〈呂刑〉之文。此引作「爰」者,僞孔傳云:「皋陶作士,制百官於刑之中。」,《後漢書‧楊賜傳》云:「三后成功,惟殷於民。皋陶不與焉,蓋吝之也。」楊賜世授歐陽今文之學,其言此經皋陶不與,則其本不作「士」也。推而言之,則今文作「爰」字矣。梁統上對,所用亦必爲立官之學也。段玉裁《撰異》云:「作爰作衷者,《今文尚書》也。作士作中者,《古文尚書》也。未必僞孔擅改,《孔傳》未必不本馬、鄭、王。」而陳喬樅《今文尚書經說考》、王鳴盛《尚書後案》均以僞孔改而強解之,未有明證,不知孰是。又梁統下引《論語·子路》篇孔子曰「『刑罰不衷,則人無所曆手足』。衷之爲言,不輕不重之謂也。」考《論語·子路》篇作「中」,而梁統以「不輕不重」解「衷」,則是以中解衷,是其所見之本作「中」,今作「衷」者,同音通用故也。然則上引〈呂刑〉文作「衷」,蓋亦音同通用,其所本亦作「中」,非今古文之異。段氏以「衷」爲今文,未允。

13. 「……惠加姦軌。」(〈梁統傳〉)

按:〈堯典〉云:「蠻夷猾夏,寇賊姦宄。」此云「姦軌」者,即引〈堯典〉之 文。考《左傳·成公十七年》魚長矯云:「臣聞亂在外爲姦,在內爲軌;御姦以 德,御軌以刑。」《釋文》:「軌,本又作宄。」《尚書大傳》云:「蠻夷猾夏,寇 賊奸宄,則責之司馬。」《史記・五帝本紀》:「舜曰:『皋陶,彎夷猾夏,寂賊 姦軌。』《漢書・王莽傳》:「莽下書蠻夷猾夏、寇賊姦宄。」《漢書・刑法志》: 「命以蠻夷猾夏,寇賊姦軌。」《潛夫論‧姓氏》篇:「舜曰:『蠻夷猾夏,寂賊 姦宄。』」《史記・集解》引鄭注云:「強取爲寇,殺人爲賊,由內爲姦,起外爲 軌。」《呂氏春秋・君守》篇高誘注:「〈虞書〉曰:『皋陶,蠻夷猾夏,寇賊姦 宄,汝作士。」」《說文》七篇下云:「宄,姦也,外為盜,內爲宄。从一九聲。 讀若軌。豕、翆、古文宄。」《說文敘》云:「其稱《易》孟氏、《書》孔氏、《詩》 毛氏,《禮》、《周官》、《春秋左氏》、《論語》、《孝經》,皆古文也。」又云:「魯 恭王壞孔子宅而得《禮記》、《尙書》、《春秋》、《論語》、《孝經》,又北平侯張蒼 獻《春秋左氏傳》。」王國維以爲許氏實據所見之壁中諸經(見《觀堂集林・説 文所謂古文説》),且敘中明言古文左氏之淵源,今《說文》云「內爲宄」,與《左 傳》「在內爲軌」合,且《釋文》云「軌本又作宄」,是《左傳》本作「宄」也。 由是推之古文作「宄」可知矣。史公作「軌」、蓋《歐陽尚書》也。今《大傳》 作「宄」,三家今文皆出伏生,而有作「宄」、有作「軌」者,蓋伏生傳《尚書》 時,皆口授之,宄、軌皆作九聲,古音相同,故相通借也。《潛夫論》作「宄」, 或用大夏侯本也。鄭康成作「軌」,兼採今文說也。此云「姦軌」者,則用《今 文尚書》也。

又:《大傳》作「奸」,他條皆作「姦」。《說文》云「奸,犯婬也。从女干聲。」 「姦, 厶也。从三女。古文姦从旱心。」(大徐本作从旱聲)。奸、姦三字同屬 見紐古音在十四部,且姦之古文思,从旱並非會意,當依大徐本作旱聲,旱从 干聲,與奸从干聲同音,二字同義近,故亦通用也。

- 14. 「······今遭值陛下神聖之運,親統萬機,羣物得所。」(〈梁統傳〉) 按:〈皋陶謨〉云:「兢兢業業,一日二日萬幾。」此云「萬機」,正引〈皋陶謨〉 文。引作「機」者,蓋漢、魏《尚書》本然,與今本作「幾」不同。(詳見第二章第22.條之(2))
- 15. 「……五帝、三王所以同致康也。」(〈梁統傳〉)

按:〈康誥〉云:「若保赤子,惟民其康。」〈皋陶謨〉云:「惟幾惟康,其弼直。」 又云:「庶事康哉。」皆指政治安定,民生康樂之意。此云「致康」,即引〈康 誥〉、〈皋陶謨〉之文。

16. 乃詣闕上書曰:「······昔舜、禹相戒,無若丹朱;周公戒成王,無如殷王 紂·····」(〈梁統傳〉)

按:〈皋陶謨〉云:「無若丹朱傲,惟慢遊是好。」此云「舜、禹相戒,無若丹朱,者,乃躁括〈皋陶謨〉之辭。

又:〈無逸〉云:「無若殷王受之迷亂,酗于酒德哉。」此云「無如殷王紂」者,即櫽括〈無逸〉之文。引作「如」者,以訓詁方代經也。又引作「紂」者,用《今文尚書》也。古文則作「受」。段玉裁《古文尚書撰異》云:「凡《古文尚書》受字,今文皆作紂,古文不言紂,今文不言受。」考之《漢書‧劉向傳》,《論衡‧譴告》篇均作「紂」,段說是也。

17. 論曰:「……雖輿粟盈門、何救阻飢之戹。」(〈梁統傳〉)

按:〈堯典〉云:「帝曰:『棄,黎民阻飢,汝后稷,播時百穀。』」此云「阻飢」 者,即引〈堯典〉之文。考《史記・五帝本紀》:「帝曰:『棄,黎民始飢,汝后 稷,播時百穀。』」《史記‧周本紀》:「帝曰:『弃,黎民始饑,爾后稷,播時百 穀。』」徐廣曰:「《今文尚書》云『祖饑』,故作始饑;祖,始也。」《漢書・食 貨志》:「舜命后稷,以黎民祖饑,是爲政首。」孟康曰:「袓,始也;黎民始飢, 命棄爲稷官也。古文言阻。」《詩・周頌・思文》鄭箋:「黎民阻饑。」《正義》 引鄭注:「俎讀曰阻,阻,戹也。時讀曰蒔。始者洪水時,眾民戹于饑,女居稷 官,播蒔百穀以救活之」《詩・釋文》引馬云:「祖,始也。」《書古文訓》作「俎 飢」。段玉裁《古文尚書撰異》云:「初疑當是讀如俎,謂其音同俎耳,既思阻非 難識之字,鄭君何必比方爲音如懖之讀如聒乎?蓋壁中故書作俎,故鄭云『俎讀 曰阻,阻、戹也。』學者既改經文作阻,則注又不可通,乃又倒之云『阻讀曰俎』。」 段氏如此推論,合乎情理。然則壁中書本當作「俎飢」,鄭注古文從之,解作阻, 訓戹;史公用《歐陽尙書》、班固習《小夏侯尙書》,皆作「祖飢」,而訓祖爲始, 用《爾雅》之義,則《今文尚書》作「祖」可知矣。徐廣云「《今文尚書》云『祖 飢」」者,是也。馬融云「祖、始也」,參用今文家之說。俎,阻,祖,三字均從 「且」聲,古音相同,故多互借。今本亦作「阻」者,乃襲鄭玄之說。此云「阻 飢之戹」者,文字與義訓皆用鄭玄之學。

18. 純奏上宜封禪,曰:「……《書》曰:『歲二月,東巡狩,至于岱宗』,則 封禪之義也。」(〈張純傳〉)

按:〈堯典〉云:「歲二月,東巡狩,至于岱宗,柴。」此云引《書》曰云云, 正引〈堯典〉之文。

19.「……宜及嘉時,遵唐帝之典,繼孝武之業,以二月東巡狩,封于岱宗……」 (〈張純傳〉)

按:〈堯典〉云:「歲二月,東巡狩,至于岱宗,柴。」此云,以二月東巡狩, 封于岱宗」者,蓋磉括〈堯典〉之文也。此引文曰「唐帝之典」,即〈堯典〉,可 知漢時此文仍在〈堯典〉之內,今偽孔本以〈堯典〉愼微五典以下分出爲〈舜 典〉者,非也。

20. 興聞而說囂曰:「·······及武王即位·八百諸侯不謀同會·皆曰『紂可伐矣』。 武王以未知天命,還兵待時。」(〈鄭興傳〉)

按:此云武王會諸侯及還兵待時事,乃驟括〈今文泰誓〉之辭也。(詳見第三章 第二條)

21. 興因上疏曰:「……堯知縣之不可用而用之者,是屈己之明,因人之心也。」 (〈鄭興傳〉)

按:〈堯典〉云:「帝曰:『咨,四岳。湯湯洪水方割,蕩蕩懷山襄陵,浩浩滔天,下民其咨。有能俾乂。』愈曰:『於,鯀哉。』帝曰:『吁,咈哉。方命圯族。』 岳曰:『异哉。試可,乃已。』帝曰:『往欽哉。』」此云「堯知鯀之不可用而用 之者」,蓋嗓括〈堯典〉之辭也。

22. 「……自爾以來,率多寒日,此亦急咎之罰。……今陛下高明而羣臣惶 促,宜留柔剋之政,垂意〈洪範〉之法。」(〈鄭興傳〉)

按:〈洪範〉云:「日咎徵……急,恆寒若。」此云「急咎之罰」者,即躁括〈洪範〉之文。〈洪範〉又云:「沈潛剛克,高明柔克。」此云「柔剋之政」者,即躁括〈洪範〉之辭。引作「剋」者,陳喬樅《今文尚書經說考》云:「《尚書》釋文引馬云『克,勝也。勝誼乃剋之』,訓見《釋詁》。剋字蓋亦三家之異文。」陳說可從。

23. 升退而奏曰:「臣聞主不稽古,無以承天。……」(〈范升傳〉)

按:〈堯典〉云:「曰若稽古帝堯。」此云「稽古」者,引〈堯典〉之文也。

24. 元聞之,乃詣闕上疏曰:「……臣愚以為若先帝所行而後主必行者,則盤 庚不當遷于殷,周公不當營洛邑。」(〈陳元傳〉)

按:〈盤庚〉云:「盤庚遷于殷、民不適有居。」此云「盤庚不當遷于殷」者, 乃櫽括〈磐庚〉之文也。

又:〈洛誥序〉云:「召公既相宅,周公往營成周,使來告卜。」此云「周公不 當營洛邑」者,蓋櫽括〈洛誥序〉義也。(詳參第三章第四五條之(3))

- 25. 元上疏曰:「……是以文王有日昊之勞。……」(〈陳元傳〉) 按:〈無逸〉云:「自朝日至日中昊,不遑暇食。」此云「日昊之勞」者,蓋檃 括〈無逸〉之辭也。
- 26. 帝曰:「俞,往,汝諧。」(〈極榮傳〉) 按:〈堯典〉云:「帝曰:『俞,往哉,汝諧。』」此云「俞,往,汝諧」者,正引用〈堯典〉之文。引無「哉」字者,行文之便耳。
- 27. **詔策緄曰:「蠻夷猾夏,久不討攝……**」(〈馮磊傳〉) 按:〈堯典〉云:「蠻夷猾夏,寇賊姦宄。」此云「蠻夷猾夏」者,正引〈堯典〉 之文也。
- 28. 論曰:「寇攘寖橫……並宣力勤慮,以勞定功。」(〈楊嶷傳〉)
 - (1) 寇攘寖橫

按:〈康誥〉曰:「凡民自得罪,寇攘姦宄,殺越人于貨。」〈費誓〉:「無敢寇攘, 踰垣牆,窺馬牛。」此云「寇攘寖橫」,蓋引〈康誥〉〈費誓〉之辭。

(2) 宣力勤慮

按:〈皋陶謨〉云:「予欲宣力四方,汝爲。」此云「宣力勤慮」即引〈皋陶謨〉之文。皮錫瑞《今文尚書攷證》曰:「《史記》曰:『臣作朕股肱耳目,予欲左右有民,女輔之。』無『予欲宣力四方、汝爲』句,蓋史公省文。漢〈夏勤策文〉曰:『宣力四表』,蔡邕〈司空文烈侯楊公碑〉曰:『帝欲宣力四方,公則翼之。』是《今文尚書》有此八字也。」皮說有可議者,史公引〈皋陶謨〉文,其下尚有「予欲觀古人之象,日月星辰,作文繡服色,女明之。」二段文字相連屬,不可謂之省文,史公省文如「山龍華蟲作會,宗彝火紛米黼黻옮繡,以五采彰

施于五色,作服」一句,省約爲「作文繡服色」,史公之省約如此,故無由獨省 「予欲宣力四方,汝爲」句。陳喬樅以史公時《尚書》惟歐陽之學,雖從安國 問故,然亦多用歐陽氏說,如是推之,則無此八字者,其爲歐陽之學歟?蔡邕 用夏侯之學,或取於古文而有此八字,未可知也。

- 29. 侍中賈逵因上書曰:「······懼非克讓之風·····」(〈劉愷傳〉) 按:〈堯典〉云:「欽、明、文、思、安安,允恭克讓。」此云「克讓」者,乃 引〈堯典〉之文。
- 30. 愷獨議曰:「……今刺史一州之表,二千石千里之師,職在辯章百姓,宣 美風俗。……」(〈劉煌傳〉)

按:〈堯典〉云:「九族既睦,平章百姓。」此云「辯章百姓」者,即引〈堯典〉之文。考《癸辛雜識前集》引《尚書大傳》云:「辨章百姓,百姓昭明。」《詩·小雅·采菽正義》「〈堯典〉平章百姓,《書傳》作辨章。」班固〈典引〉曰:「惇睦辨章之化。」《白虎通·姓名》篇:「《尚書》曰『平章百姓。』」《史記·五帝本紀·索隱》之言,知史公本作「便」,史公用歐陽之說,則《歐陽尚書》作「便」矣。李賢注引鄭玄注作「辯」,鄭注用《今文尚書》也。惠棟《九經古義》云:「平章百姓,《史記》作便章,《尚書大傳》作辯章。按下文平秩字,伏生作便,鄭玄作辯,《說文》曰:『光,辨別也。讀若辨。』古文作不,與平相似。亏部曰:『古文平作中。』孔氏襲古文,誤以予爲平,訓爲和平,失之。辨與便相同音,故《史記》又作便。」惠氏之說,既成定論。今本之作平者,乃因平字之古文,與光字之篆文形近,衛包誤隸故也。又今文「辨」「辯」與古文之「光」爲古今字,而《史記》之作「便」爲同音借字也。今此引作「辯」者,蓋用《夏侯尚書》也。

- 31. 《尚書》陳忠上疏薦愷曰:「臣聞三公上則台階,下象山岳,股肱元首,鼎足居職;協和陰陽,調訓五品,考功量才,以序庶僚,遭烈風不迷,遇迅雨不惑,位莫重焉。」(〈劉愷傳〉)
 - (1) 股肱元首

按:〈皋陶謨〉云:「乃歌曰:『股肱喜哉,元首起哉,百工熙哉。』」此云「股 肱元首」者,即檃括〈皋陶謨〉之辭。

(2)調訓五品

按:〈堯典〉云:「百姓不親、五品不遜。」此云「調訓五品」者,即櫽括〈堯

- 典〉之辭也。引作「訓」者,蓋用《今文尚書》。
- (3) 遭烈風不迷,遇迅雨不惑

按:〈堯典〉云:「納于大麓,烈風雷雨弗迷。」此云「遭烈風而不迷,遇迅雨而不惑」者,蓋檃括〈堯典〉之辭也。此上云「三公上則台階,下象山岳」,是其言三公之事也;大小夏侯《尚書》說「大麓」皆以爲三公位,謂「總錄萬機」(說見第二章第七三條);則此所云「三公上則台,下象山岳」「遭烈風不迷,遇迅雨不惑」者,亦爲《夏侯尚書》說也。

32. 「……《尚書》曰『上刑挾輕、下刑挾重』,如今使臧吏禁錮子孫,以輕從重,懼及善人,非先王詳刑之意也。」(〈劉愷傳〉)

按:〈呂刑〉云:「上刑適輕下服,下刑適重上服。」此引《尚書》云者,蓋引〈呂刑〉文也。其引與今本不同者,蓋古人引文不盡嚴謹故也。此引作「挾」者,用《今文尚書》也。段玉裁《古文尚書撰異》云:「愷所用《今文尚書》也。以策字隸多爲筴例之,適之爲挾,恐亦類此。」段說是也。

又:〈呂刑〉云:「有邦有土,告汝祥刑。」此云「先王詳刑之意」者,即檃括 〈呂刑〉之辭。此引作「詳」者,古文今文本如是,今作「祥」者,後人所改。 (詳見第二章第16.條之(2))

33. 彪上言曰:「昔成王之為孺子,出則周公、邵公、太史佚,入則大顛,閎 夭,南宮括,散宜生。」(〈班彪傳〉)

按:〈君奭序〉云:「召公爲保,周公爲師,相成王爲左右。」此云「出則周公,邵公」者,即隱括〈君奭序〉之辭也。

又:〈君奭〉篇云:「惟文王尚克修我有夏,亦惟有若虢叔、有若閔夭、有若散宜生、有若泰頗、有若南宫括。」又曰:「武王惟茲四人,尚迪有禄。」此云「入則大頗,閔夭、南宫括、散宜生」者,蓋檃括〈君奭〉之辭。此引五人中獨缺虢叔,僞孔傳云:「武王蹈有天祿,虢叔先死,故曰四人。」由此文缺虢叔考之,孔傳之說,亦有所本。此引作「大顚」者,其文本如此,作泰顚者,後世所改,此猶古之〈大誓〉,後作〈太誓〉、至漢則作〈泰誓〉矣。

34. **時固始弱冠,奏記說蒼曰:「……據高明之埶……**」(〈班園傳〉) **按:**〈洪範〉云:「無虐縈獨而畏高明。」此云「高明之埶」者,即檃括〈洪範〉之文。

35. 「……以輔高明……信日昊之聽。」(〈班固傳〉)

按:〈洪範〉云:「沈潛剛克,高明柔克。」此云「高明」者,即引〈洪範〉之文也。

又:〈無逸〉云:「自朝于日中昊,不遑暇食。」此云「日昊之聽」者,即檃括〈無逸〉之文。

36. 班**固《兩都賦》:「……是故橫被**六合。**……**」(〈班固傳〉)

按:〈堯典〉云:「曰放勳、欽、明、文、思、安安,允恭克讓,光被四表。」 此引「橫被六合」者,蓋檃括〈堯典〉文。此引作「橫」者,蓋三家之異文。 班固習《夏侯尚書》,夏侯與古文多作「光」,此作「橫」者,旁採《歐陽尚書》 也。(參見第二章第八條)

37. 「······奮布衣以登皇極。」(〈班固傳〉)

按:〈洪範〉云:「五、皇極。皇建其有極。」此云「皇極」者,引〈洪範〉之 文也。

- 38. 「……襲行天罰,應天順人,斯乃湯、武之所以昭王業也。」(〈班固傳〉) 按:〈牧誓〉云:「今予發,惟恭行天之罰。」此云「襲行天罰」者,即引〈牧 誓〉之文。此引作「龔」者,乃三家之異文也。古文則本作「共」,至衛包改作 「恭」。(詳見第三章第 48.條)。又〈湯誓〉云:「爾尙輔予一人,致天之罰,予 其大資汝。」此湯亦行天之罰,故以「龔行天罰」兩括湯、武也。
- 39. 「······遷都改邑,有殷宗中興之則焉;即土之中,有周成隆平之制焉。」 (〈班固傳〉)

按:〈盤庚〉上云:「盤庚遷于殷。」又曰:「先王有服,恪謹天命,茲猶不常寧,不常厥邑,于今五邦。」又曰:「天其永我命于茲新邑,紹復先王之大業, 医綏四方。」此云「遷都改邑,有殷宗中興之則」者,即檃括〈盤庚〉上之文辭也。又:〈召誥〉云:「王來紹上帝,自服于土中。」此云「即土之中」者,即檃括〈召誥〉之辭也。

40. 「······登靈臺,考休徵。·····」(〈班固傳〉)

按:〈洪範〉云:「曰休徵:曰肅,時雨若;曰乂,時暘若;曰哲,時燠若;曰 謀,時寒若;曰聖,時風若。」此云「考休徵」者、蓋櫽括〈洪範〉之辭也。 41. 「……因相與嗟歎玄德,讜言弘說,咸含和而吐氣。」(〈班固傳〉)

按:〈皋陶謨〉云:「禹拜昌言。曰:俞。」此云「讜言」者,即引〈皋陶謨〉 之文也。考《史記・夏本紀》:「帝舜謂禹曰:『汝亦昌言。』《論衡・貴驗》篇: 「禹拜昌言。」《孟子·公孫丑》篇「禹聞善言則拜」趙岐注云:「《尚書》曰: 『禹拜讜言。』」此引作「讜言」,與《今本尚書》作「昌言」不同者;段玉裁 《古文尚書撰異》云:「《古文尚書》作昌,《今文尚書》作黨。僞孔傳釋昌爲 善,〈益稷〉釋文昌丁浪反,本亦作讜,當蕩反。引李登聲類曰『讜言,善言 也」,孟子趙注引《尚書》曰『禹拜讖言』,此《今文尚書》作讖證也。班固〈西 都賦〉云『讜言宏說』,李善注引字林『讜言,善言也,音黨』。孟堅亦用《今 文尚書》耳。讜,《逸周書》作黨。〈祭公解〉『拜稽首黨言』。盧氏召弓曰『黨、 讖、古字通。《荀子・非相》篇「博而黨正」、註謂直言也。又見〈張平子〉、〈劉 寬〉二碑』。玉裁謂〈平子碑〉『黨言允諧』,《劉寬碑》前云『朝廷忠讜』,後 云『對策嘉讜』,可見漢人黨讜通用,蓋占只作黨,後人或加言旁,是以許君 不收,而李登、呂忱乃收之。古昌、黨音同,如閶闔,〈子雲賦〉作闑闔;鼓 聲不過閶闔,即鼜字可證。此古文作昌,今文作黨,音同義同也。《說文》曰 『昌,美言也。从日从日』,與字林讜字訓同。然則昌,本字;黨,假借字也。」 段氏以爲作昌者古文,作黨、讜者今文,三字音同,而昌爲本字,黨爲假字, 確爲的論。然亦有可補充者,陳喬樅《今文尚書經說考》云「以愚考之,作讜 作黨者、蓋大小夏侯之本也;其《歐陽尚書》但作昌字。觀《史記・夏本紀》 云『帝舜謂禹曰「汝亦昌言」,作昌字,可澄《歐陽尚書》之同於古文者也。』 考班習用《小夏侯尚書》,故此引文作讚言;又《論衡》之於《尚書》用歐陽 之說。(見陳喬樅《今文尚書經説考》「納于大麓」條),而《論衡》亦作「昌 言」與《史記》同,益見《歐陽尚書》作「昌言」,與古文同也。陳氏之說可 補段氏之未及矣。

- 42. 辟雍詩:「……皤皤國老,迺父迺兄。」(〈班固傳〉)
 - 按:〈秦誓〉云:「尚猷詢茲黃髮,則罔所愆。番番良士,旅力既愆,我尚有之。」 此云「皤皤」者,即引〈秦誓〉之文。此引作「皤」者,用本字;今本《尚書》 作「番,乃省借字也。(詳見本章第4.條之(2))
- 43. 靈臺詩:「······帝勤時登,爰考休徵。······百穀湊湊,庶卉蕃蕪。······」 (〈班固傳〉)

(1) 爰考休徵

按:〈洪範〉云:「日休徵: 日肅,時雨若; 日乂,時暘若; 日哲,時燠若; 日謀,時寒若; 日聖,時風若。」此云「休徵」,即躁括〈洪範〉之文。

(2) 庶卉蕃蕪

按:〈洪範〉云:「八庶徵: 日雨、日暘、日燠、日風、日時。五者來備,各以其敘,庶草蕃廡。」此云「庶卉蕃蕪」者,乃櫽括〈洪範〉之辭也。考《史記·宋世家》:「庶草蘇廡。」《漢書·谷永傳》:「五徵時序,庶史蕃滋。」《說文·無字》云:「霖,豐也。从林爽。或說規模字,从大壯,數之積也。林者木之多也。世與庶同意。《商書》曰:『庶草繇霖。』「縣」與「蕃」,同爲唇音十四部,古二字多通用,蕃爲本字,《說文》云:「蕃,艸茂也。」。段玉裁《古文尚書撰異》云:「《爾雅·釋詁》『苞、蕪、茂、豐也』,《釋文》曰『蕪,古作森』。按許說本《爾雅》、《爾雅》古本作森是也。隸變森作無,以爲有無字,遂改《爾雅》之霖、茂从艸作蕪。〈鴻範〉之錄無从广作廡,皆非本字。」孔傳曰:「廡,豐也。」許書引〈商書〉作森,是其古文本字當「森」,今作廡字爲假借。此引「蕪」字,爲後造形聲字。史公引書與古文同,是歐陽字作「錄廡」,此引「蕃蕪」,乃《夏侯尚書》也。

44. 〈典引〉篇:「……陶唐舍胤而禪有虞,虞亦命夏后,稷、契熙載,越成 湯、武。股肱既周,天乃歸功元首,將授漢劉。俾其承三季之荒末,值 元龍之災孽,懸象暗而恆文乖,彝倫斁而舊章缺。故先命玄聖,使綴學 立制,宏亮洪業,表相祖宗,贊揚迪哲,備哉燦爛,真神明之式也。……」 (〈班固傳〉)

(1) 陶唐舍胤而禪有虞

按:〈堯典〉云:「曰:『疇咨,若時登庸。』放齊曰:『胤子朱啓明。』帝曰:『吁! 囂訟可乎。』」此云「陶唐舍胤子而禪有虞」者,即隱括〈堯典〉之辭。

(2)契稷熙載

按:〈堯典〉云:「舜曰:『咨四岳、有能奮庸,熙帝之載,使宅百掇,亮采惠疇!』」 又曰:「帝曰:『棄,黎民阻飢,汝后稷,播時百穀。』帝曰:『契,百姓不親, 五品不遜,汝作司徒,敬敷五教,在寬。』」此云「稷、契熙載」者,蓋躁括〈堯 典〉之辭也。

(3) 股肱既周,天乃歸功元首

按:〈皋陶謨〉曰:「乃賡歌曰:『元首明哉!股肱良哉!庶事康熙!』」此云「股

肱既周,天乃歸功元首」者,即檃括〈皋陶謨〉之辭。

(4) 彝倫斁而舊章缺

按:〈洪範〉云:「帝乃震怒,不畀〈洪範〉九疇,彝倫攸斁。」此云「彝倫斁」 者,即隱括〈洪範〉之文。

(5) 贊揚迪哲

按:〈無逸〉云:「嗚呼!自殷王中宗、及高宗、及祖甲、及我周文王,茲四人 迪哲。」此云「贊揚迪哲」者,躁括〈無逸〉之文。

45. 「……然後欽若上下,恭揖羣后,正位度宗,有于德不台淵穆之讓,靡 號師矢敦奮為之容。蓋以膺當天之正統,受克讓之歸運。……」(〈班固傳〉) (1) 欽若上下

按:〈堯典〉云:「欽若昊天。」又曰:「格于上下」此云「欽若上下」者,乃檃括〈堯典〉之文。

(2)正位度宗

按:〈顧命〉云:「延入翼室,恤宅宗。」此云「度宗」者,即引〈顧命〉之文。此引作「度」者,考李賢注引《尚書》曰:「『延入翼室,恤度宗。』度、居也;宗尊也。」李賢所引,蓋襲取蔡邕〈典引〉注爲之,蔡氏丹書石經用小夏侯本,而班固亦習小夏侯,故同作「度」也。段玉裁《古文尚書撰異》云:「凡《古文尚書》宅字,《今文尚書》皆作度。考〈堯典〉「宅嵎夷」「宅南交」「宅西」「宅朔方」「三危既宅」「五流有宅」「五宅三居」諸「宅」字,《史記》、《周禮》鄭注引《今文尚書》,皆作「度」,(詳見第五章183條),段氏之說是也。

(3)有于德不台淵穆之讓

按:〈堯典〉云:「舜讓于德,弗嗣。」此云:「有于德不台淵穆之讓」者,蓋躁括〈堯典〉之文也。考《史記·五帝本紀》:「舜讓于德、不懌。」徐廣:「音亦,《今文尚書》作不怡,怡,懌也。」《史記·自敘》曰:「唐堯遜位,虞舜不台。」《索隱》曰:「台音怡,悅也。」《史記·自敘》:「惠之早實,諸呂不台。」徐廣《音義》曰:「怡,懌也。」《漢書·司馬遷傳》〈遷報任少卿書〉曰:「主上爲之食不甘味,聽朝不怡。」《史記·夏本紀》注引鄭玄注〈禹貢〉「祇台德先」云:「其敬悅天子之德既先。」《隸釋》載〈魏公卿上尊號〉云:「讓德不嗣。」裴松之《三國志》注引《甲子魏王上書》曰:「猶執謙讓于德不嗣。」《文選》〈典引〉李善注引《尚書》曰:「舜讓于德,不台。《漢書·音義》章昭曰:『古文台爲嗣。』」此文李賢注引「前書曰:『舜讓于德不台。』《音義》曰:『台讀若嗣。』」

《史記・自敘》作「不台」,司馬貞、徐廣均解作「怡」「懌」,而〈夏本紀〉引鄭注「台」亦作「悅」,則「台」之爲「怡悅」,蓋古訓也。〈五帝本紀〉作「懌」,蓋以訓詁字代經字也。徐廣曰:「《今文尚書》作不怡」,李善注引《漢書・音義》曰:「古文台爲嗣。」皆可證《今文尚書》作「台」「怡」,而《古文尚書》作「嗣」也。江聲《尚書集注音疏》云「然則古《尚書》實作不台,其作弗嗣者,亂經者也。」據《漢書・音義》,《隸釋》載文及裴松之《三國志》注,皆可證古文實作「嗣」、江氏之說非是。嗣,从口囲司聲;嗣之古文作氧,亦從辛司(司)聲。辭之籀文作嗣,其與嗣皆从司聲。又辭於金文或作辞,从辛台聲,與台、怡同。伯康設「夙夜無刮」,即詩之「夙夜無斁」,梓材「和懌」之懌,《釋文》又作「斁」,然則台、怡、懌、斁、嗣、嗣、皆同音,故相通叚也。台、司均屬一部。《公羊》「治兵」作「祠兵」,韓詩「嗣音」作「詒音」,此台司爲二字同音通借之證。

(4)受克讓之歸運

按:〈堯典〉云:「允恭克讓。」此云「克讓」者,蓋引〈堯典〉之文。

46. 「……乘其命賜彤孤黃戚之威,用討韋、顧、黎、崇之不格。至乎三五華夏,京遷鎬、亳,遂自北面,虎離其師,革滅天邑。……」(〈班固傳〉)按:〈西伯戡黎〉云:「西伯既戡黎。」此云「用討韋顧黎崇之不格」者,即隱括〈西伯戡黎〉之辭。

又:〈牧誓〉云:「勗哉夫子。尚桓桓,如虎、如貔、如熊、如羆,于商郊。」 此云「虎離其師」者,乃檃括〈牧誓〉之辭。其作「離」者,蓋《今文尚書》 也。(詳參第二章第11.條之(2))

又:〈多士〉云:「予一人惟聽用德,肆予敢求爾于天邑商。」此云「天邑」者,即引〈多士〉之文。

- 47. 「……然後宣二祖之重光,襲四宗之緝熙。神靈日燭,光被六幽,仁風翔乎海表,威靈行於鬼區,匿亡迴而不泯,微胡瑣而不頤。故夫顯定三才昭登之績,匪堯不興;鋪聞遺策在下之訓,匪漢不弘。」(〈班固傳〉)
 - (1) 宣二祖之重光

按:〈顧命〉曰:「昔君文王、武王,宣重光。」此云「宣二祖之重光」者,蓋 躁括〈堯典〉之文。

(2)光被六幽

按:〈堯典〉云:「允恭克讓,光被四表。」此云「光被六幽」者,即檃括〈堯典〉文也。

(3) 仁風翔乎海表

按:〈立政〉云:「以陟禹之迹,方行天下,至于海表,罔有不服。」此云「海表」者,乃引〈立政〉之文。

(4) 顯定三才昭登之績,匪堯不興;鋪聞遺策在下之訓,匪漢不弘

按:〈文侯之命〉云:「丕顯文武,克愼明德,昭升于上,敷聞在下。」此云「昭登之績」「鋪聞在下」者,即隱括〈文侯之命〉之文。考《史記·晉世家》:「昭登于上,布聞在下。」《後漢書·東平憲王傳》曰:「傅聞在下。」蔡邕〈太尉汝南李公碑〉:「懿鑠之美,昭登于上。」蔡邕〈太尉楊公碑〉:「敷聞于下,昭升于上。」蔡邕《〈典引〉注》:「《尚書》曰:『昭登于上。』」史公用《歐陽尚書》,班固用《小夏侯尚書》,蔡邕習《小夏侯尚書》,而所引皆作「登」,段玉裁《古文尚書撰異》云:「此《今文尚書》也。如升鼎耳而雊,《史記》、《漢書》皆作登。凡古文作升,凡今文作登。」登,都膝切;升,識蒸切,古音同屬端紐六部,而其義亦近似,故相通用。〈楊公碑〉作「升」者,蓋後人據《今本尚書》改之。又《史記》作「布聞」,用訓詁字代經字也。《後漢書》作「傅聞」者、〈禹貢〉「禹敷土」、〈洪範〉「用敷錫厥民」「皇極之敷言」、《史記》俱作「傳」;〈堯典〉「敷奏以言」、〈皋陶謨〉「敷納以言」、《漢書·文帝》、〈宣帝〉、〈成帝紀〉,俱作「傅」,可知作「傅聞」者爲《今文尚書》矣,亦可見史公之本作「傅」也。此引作「鋪聞」者,亦三家之異文。「傅」「敷」「鋪」同从甫聲,古音相同通用;作「傅」者假借字也。

48. 「……兢兢業業……」(〈班固傳〉)

按:〈皋陶謨〉云:「兢兢業業,一日二日萬幾。」此云「兢兢業業」者,即引 〈皋陶謨〉文。

49. 「······躬奉天經、惇睦辯章之化洽,巡靖黎蒸,懷保鰥寡之惠浹。」(〈班 固傳〉)

按:〈堯典〉云:「克明俊德,以親九族,九族既睦,平章百姓。」此云「惇睦辯章之化」者,乃檃括〈堯典〉之文也。此引作「辯章」者,蓋《今文尚書》也。(詳見本章 41.條)

又:〈無逸〉云:「文王卑服,即康功田功。微柔懿恭,懷保小民,惠鮮鰥寡。」

此云「懷保鰥寡之惠」者,乃檃括〈無逸〉之文。

- 50. 「······是以來儀集羽族於觀魏,內角馴毛宗於外囿。」(〈班固傳〉) 按:〈皋陶謨〉云:「簫韶九成,鳳皇來儀。」此云「來儀」者,即引〈皋陶謨〉 文。
- 51. 「······昔姬有素雉、朱鳥、玄秬、黃**鍪之事耳**。」(〈班固傳〉)

按:此云「姬有朱烏」之事,蓋櫽括〈今文泰誓〉之辭。考《尚書大傳》:「武 王伐紂,觀兵于盟津,有火流於王屋,化爲赤烏,三足。」《史記‧周本紀》:「既 渡,有火自上復于下,至于王屋,流爲烏,其色赤,其聲魄云。」《史記・封禪 書》: 「周得火德,有赤鳥之符。」《漢書・董仲舒傳》對策曰: 「《書》曰: 『白 魚入于王舟,有火復于王屋,流爲鳥。』」《漢書·劉輔傳》:「昔武王周公,承 順天地,以享魚、鳥之端。」師古曰:「事見《今文尚書》。」《春秋繁露・同類 相動》篇云:「《尚書傳》:『周將興之時,有火赤鳥銜穀之種,而集王屋之上者。』 《論衡·講瑞》篇:「武王之時,火流爲鳥,云其色赤。」荀悅《前漢記‧孝武 皇帝記》:「《書》曰:『白魚入于王舟,有火復於王屋,流爲赤鳥。』」《尚書・ 泰誓序》引馬融〈書序〉云:「〈泰誓〉云:『八百諸侯不召自來,不期同時,不 謀同辭。火復于上,至於王屋,流爲雕,五至以穀俱來。』《詩・周頌・思文》 鄭箋:「武王渡孟津,白魚躍入于舟,出涘以燎,後五日,火流爲鳥,五至以穀 自來。」《正義》:「武王渡孟津至以穀俱來,皆《尚書》文。」《禮記・檀弓上》 〈正義〉;「《尚書・泰誓》:火流爲烏,王動色變。」《墨子・非攻下》云:「赤 鳥銜珪,降周之岐社。」《呂氏春秋・名類》篇云:「及文王之時,天先見火, 赤鳥銜丹書,集于周社。」是先秦時已有「火流赤鳥」之說,蓋皆本乎先秦所 行說〈泰誓〉之書也。漢代載籍及〈今文泰誓〉,亦本此書。《史記》、《春秋繁 露》及《大傳》,蓋本先秦說〈泰誓〉之書,以其在武帝末以前也。《漢書》引 · 黄氏〈對策〉稱「《書》曰」者,蓋班固所改,據《春秋繁露》可知之。《漢書》、 《論衡》、《前漢紀》、《周頌・思文箋》、《禮記・檀弓上・正義》、《尙書泰誓序》 引馬融序等,皆在武帝末以後,所據當係〈今文泰誓〉也。

52. 「······若然受之,宜亦勤恁旅力,以充厥道,啟恭館之金縢,御東序之 秘寶,以流其占。」(〈班固傳〉)

按:〈秦誓〉云:「番番良士,旅力既愆,我尚有之。」此云「旅力」者,即引 〈秦誓〉之文。

條及第三章 49.條)

又:〈金縢〉云:「王與大夫盡弁,以啓金縢之書。」此云「啓恭館之金縢」者, 即櫽括〈金縢〉之文。

又:〈顧命〉云:「大玉、夷玉、天球、河圖在東序。」此云「御東序之秘寶」者,蓋櫽括〈顧命〉之辭也。

- 53. 「……既成羣后之讜辭,又悉經五繇之碩慮。……」(〈班固傳〉) 按:〈皋陶謨〉云:「禹拜昌言。」又曰:「來禹,汝亦昌言。」此云「讜辭」者, 乃檃括〈皋陶謨〉之辭也。此引作「讜辭」者,作「讜」乃《夏侯尚書》。(詳 見本章41.條)。辭即言也。
- 54. 「······汪汪乎丕天之大律,其疇能亘之哉?」(〈班固傳〉) 按:此云「丕天之大律」者,蓋引〈今文泰誓〉之文也。考《漢書·郊祀志》: 「〈太誓〉曰:『正稽古立功立事,可台永年,丕天之大律。』」師古曰:「〈今文泰誓〉周書也。」本文李賢注引《今文尚書·太誓》篇曰:「立功立事,可以永年,丕天之大律。」所引與《漢書·郊祀志》同,此引「丕天之大律」,即《漢書》所引〈太誓〉之辭也。班固引文在武帝末之後,其時〈今文泰誓〉已出,歐陽、夏侯已收入《尚書》中,則此所引蓋據〈今文泰誓〉也。(詳參第二章 2.
- 55. 上疏曰:「《書》曰:『臣無作威作福,其害于而家,凶于而國。』」(〈第五 倫傳〉)

按:〈洪範〉云:「臣之有作福作威玉食,其害于而家,凶于而國。」此引《書》 曰云云,即〈洪範〉之文也。此引先威後福者,蓋《今文尚書》也。(詳見第三章 14.條)。又此引無「玉食」者,蓋約引之辭也。

56. 曰:「·····陛下即位,躬天然之德,體晏晏之姿,以寬弘臨下。」(〈第五 倫傳〉)

按:〈堯典〉云:「欽、明、文、思、安安。」此云「晏晏之姿」,即引〈堯典〉 之文。此引作「晏」者,蓋《今文尚書》也。(詳見第二章 71.條之(3))

57. 「……不宜遇加喜怒,以明在寬。」(〈第五倫傳〉) 按:〈堯典〉云:「百姓不親,五品不遜,汝作司徒,敬敷五教,在寬。」此云 「以明在寬」者,即檃括〈堯典〉之文也。 58. ·····意以為從禽廢政,常當車陳諫般樂遊田之事,天子即時還宮。〈〈鐘離 意傳〉〉

按:〈無逸〉云:「文王不敢盤于遊田,以庶邦惟正之供。」此云「般樂遊田」即引〈無逸〉之文。考《國語・楚語》左史倚相引〈周書〉曰:「惟政之共」晏子《諫下》篇云:「昔文王不敢盤遊於田,故國易而民安。」《漢書・谷永傳》:「自今嗣王其母淫于酒,毋劮于遊田,維正之共。」漢石經殘字:「酒毋劮于遊田,維口口共。」張衡〈西京賦〉:「盤于游田。」《後漢書・郅鄲傳》:「昔文王不敢槃于游田,以萬人爲憂。」又〈陳蕃傳〉:「周公戒成王,無槃于遊田。」諸史書及石經均作「盤(槃)于遊(游)田」,則晏子作「盤遊於田」有誤,皮錫瑞以爲「疑後人妄改之」是也。此引作「般樂」,諸書多作盤,作槃,《說文》八篇下云:「般,辟也。象舟之旋。从舟从殳。殳令舟旋者也。」段注云:「《論語》包氏注足躩如盤辟見也,盤當作般;般辟,漢人語,謂退縮旋轉之見也。《大射儀賓辟注》曰:辟,逡遁不敢當盛。〈釋言〉曰:般,還也。還者,今之環字,旋也。荀爽注《易》曰:盤桓者動而退也,般之本義如是,引伸爲般遊般樂。」則此作般,用其本字也。盤、槃,《說文》六篇上云:「槃,承槃也,从木般聲。盤,籀文從皿。」二字爲一字之異體則作盤、槃者,假借字。三字皆从般聲,故可假借通用也。

又:《說文》七篇云:「游,旌旗之流也。放汓聲。淫,古文游。」段注云:「从 走者,流行之義也。从孚者,汓省聲也。俗作遊者,合二篆爲一字。」依段說 則字當从游,从遊者,俗所改。

「從禽廢政」之政,即「惟正之供」之正。僞孔傳曰:「則當以正道供待之故。」下又曰:「用萬民當惟正身以供待之故。」則其義爲「正當」,不與「政」同。《國語·楚語》作「政」,《漢書》作「正」;陳喬樅《今文尚書攷證》云:「政、正古相通用,《谷永傳》引下文維正之共,亦作正字,是作正者《今文尚書》,作政者,《古文尚書》也。《周禮·凌人注》曰:『故書正作政』,是其驗矣。」又曰:僞孔傳『惟正之供』上有庶邦三字,江聲曰:『惟政之共』,謂文王敬共於政事。據《國語》引〈周書〉云云,則不得有『以庶邦』三字,此僞孔傳所增也。」

總考上述,則此作般用本字也;作政,解作「政事」,合於虞《古文尚書》, 而與僞孔傳大異。

59. 意復上疏曰:「……願陛下垂聖德,揆萬機。」(〈鐘離意傳〉)

按:〈皋陶謨〉云:「兢兢業業、一日二日萬幾。」此云「揆萬機」者,即檃括 〈皋陶謨〉之辭也。此引作「機」者,蓋漢魏《尚書》本作此,與今本作「幾」 者異。(詳見第二章 22.條之(2))

60. 乃上疏諫曰:「陛下至孝烝烝,恩愛隆深。……昔周公懷聖人之德,有致 太平之功,然後王曰叔王,加以錫幣。」(〈宋意傳〉)

(1) 陛下至孝烝烝

按:〈堯典〉云:「岳曰:『瞽子。父頑、母嚚、象傲、克諧以孝,烝烝义,不格 姦。』此云「至孝烝烝」者,即檃括〈堯典〉之文也。此引以「烝烝」絕句者, 蓋漢、魏《尚書》之本然,今本以「烝烝义」爲句,釋爲使「進進以善治」者, 乃孔傳誤讀也。(詳見第二章 26.條)

(2) 然後王曰叔父,加以錫幣

又:〈召誥〉云:「太保乃以邦冢君,出取幣,乃復入,錫周公。」此云周公之事,蓋檃括〈召誥〉之辭也。考宋意傳父業,習《大夏侯尚書》,則此引周公之事爲大夏侯今文之說。《尚書正義》引鄭玄注云:「召公見眾殷之民大作,周公德隆功成,有反政之期,而欲顯之,因大教天下。故以諸侯出取幣使戒成王立于位,以其命賜周公。」鄭君所云與宋意大夏侯說合,則鄭君於此用今文說也。

- 61. 蒼即上書諫曰:「臣聞時令,盛春農事,不聚眾興功。傳曰:『田獵不宿, 食飲不享,出入不節,則木不曲直。』此失春令者也。」(〈光武十王列傳〉) 按:《尚書·洪範五行傳》曰:「田獵不宿,飲食不享,出入不節,奪人農時, 及有姦謀,則木不曲直。」《續漢書·五行志》引亦同,則此所引「傳曰」者, 蓋《尚書·洪範五行傳》之辭也。
- 62. 策曰:「······出作蕃輔,克慎明德,率禮不越,傅聞在下。」(〈光武十王 列傳〉)

按:〈文侯之命〉云:「丕顯文武,克慎明德,昭升于上,敷聞在下。」此云「克慎明德」「傅聞在下」者,即引〈文侯之命〉之辭。此引作「傅聞」者,用《今文尚書》也。

63. 太學生劉陶等數千人詣闕上書訟穆曰:「……天下有識,皆以穆同勤禹、 稷,而被共、縣之戾。……」(〈朱穆傳〉)

按:(皋陶謨)云:「禹拜曰:『都、帝,予何言,予思日孜孜。』又曰:「暨稷

播奏,庶艱食鮮食,懋遷有無化居,烝民乃粒,萬邦作乂。」此云「同勤禹、 稷」者,蓋櫽括〈皋陶謨〉之辭。

又:〈堯典〉云:「流共工于幽州,放驩兜于崇山,竄三苗于三危,殛鯀于羽山。」 此于「共、鯀之戾」者,即躁括〈堯典〉之文。

64. 論曰:「朱穆見比周傷義,偏黨毀俗。」(〈朱穆傳〉)

按:〈洪範〉云:「無偏無黨,王道蕩蕩,無黨無偏,王道平平。」此云「偏黨 毀俗」者,躁括〈洪範〉之文也。

65. 和帝未親萬機。(〈樂恢傳〉)

按:〈皋陶謨〉曰:「兢兢業業,一日二日萬幾。」此云「未親萬機」者,即引〈皋陶謨〉之辭。此作「機」者,蓋漢魏原本;今本作「幾」,孔傳改之。(詳見第二章二二條之(2))

66. 敞奏記曰:「……明公履晏晏之純德。」(〈何敞傳〉)

按:〈堯典〉云:「欽、明、文、思、安安。」此云「晏晏」者,即引〈堯典〉之文。此引作晏者,《今文尚書》也。(詳見第二章 71.條之(3))本傳云敞六世祖比干學《尚書》於朝錯,朝錯即西漢文帝時太常掌故,往受伏生《尚書》者也。則何氏傳《今文尚書》矣。何敞習家學,用今文,此作「晏晏」即其明徵。

67. 「……是以夏禹玄圭,周公束帛。」(〈何敝傳〉)

按:〈禹貢〉云:「禹錫玄圭,告厥成功。」此云「夏禹玄圭」者,即櫽括〈禹 貢〉之文也。

又:〈召誥〉云:「太保乃以庶邦冢君,出取幣,乃復入,錫周公。」此云「周公束帛」者,蓋櫽括〈召誥〉之辭也。

68. **敞上疏諫曰:「……陛下履晏晏之姿。……」**(〈何敝傳〉) 按:〈堯典〉云:「欽、明、文、思,安安。」此云「晏晏」者,即引〈堯典〉 之文。此引作「晏」者,用《今文尚書》也。(詳見第二章 71.條之(3))

69. **禹上言:「方諒闇密靜之時,不宜依常有事於苑囿**。」(〈張禹傳〉) **按:**〈無逸〉云:「其在高宗,時舊勞于外,爰暨小人,作其即位,乃或亮陰, 三年不言。」又〈堯典〉云:「帝乃殂落,百姓如喪考妣,三載,四海遏密八音。」 此云「諒闇密靜之時」者,蓋隱括〈無逸〉、〈堯典〉之文也。此以「諒闇」「密靜」同舉,則是以「諒闇」作居喪解,其作「諒闇」者,《今文尚書》也。(詳見第二章 69.條)

70. 「……陛下體蒸蒸之至孝,親省方藥……」((張禹傳))

按:〈堯典〉云:「克諧以孝,烝烝乂、不格姦。」此云「蒸蒸之至孝」者,則 櫽括〈堯典〉之文也。此引作「蒸蒸之至孝」,是以「以孝蒸蒸」句,與僞孔古 大作「克諧以孝,烝烝乂」句讀不同,蓋作「以孝蒸蒸」絕句,乃漢魏《尚書》 本如此;今僞古文誤讀,失之。(詳見第二章 26.條)

71. 廣復與敞、虔上書駁之,曰:「······《書》載稽疑,謀及卿士。」(〈胡廣傳〉)

按:〈洪範〉云:「七稽疑。」又曰:「汝則有大疑,謀及乃心,謀及卿士,謀及庶人,謀及卜筮。」此云「《書》載稽疑,謀及卿士」者,蓋檃括〈洪範〉之辭也。

- 72. 尚書史敞等薦廣曰:「······『明試以功』,典謨所美;『五服五章』,天秩 所作······」(〈胡廣傳〉)
 - (1)「明試以功」, 典謨所美

按:〈堯典〉云:「敷奏以言,明試以功,車服以庸。」又〈皋陶謨〉云:「敷納以言,明庶以功,車服以庸。」此云「明試以功,典謨所美」者,蓋引〈堯典〉、〈皋陶謨〉文也。考《春秋·傳公二十七年》《左傳》云:「趙衰曰:『〈夏書〉曰:賦納以言,明試以功,車服以用。君其試之。』《續漢書·輿服志》:「《書》曰:『明試以功,車服以用。』夫禮服之興也,所以報功章德,尊仁尚賢。」王符《潛夫論・考續篇》云:「《書》曰:『賦納以言,明試以功,車服以庸,誰能不讓,誰能不敬應,此堯之所以養黎民而致時雍也。』《左氏傳》引〈夏書〉,作「明試以功」,杜預注曰:「明試以功,攷其事也。」則左氏所引作「試」、《續漢志》及王符《潛夫論》引亦同作「明試」,此引「明試以功」,以〈典〉〈謨〉同稱,則亦作「明試」,與左氏同。左氏古文而漢儒多用今文,然同作「明試」,是見古文今文同也。今本作「明庶」者,蓋僞孔本改之也。日本山并鼎七《經孟子考文》曰:「足利古本庶作試」,足證作「明庶」者誤也。(2) 五服五章,天秩所作

按:〈皋陶謨〉云:「天秩有禮,自我五禮有庸哉!同寅協恭和衷哉!天命有德,

五服五章哉!」此云「五服五章,天秩所作」者,蓋櫽括〈皋陶謨〉之文。考《漢書·王嘉傳》:「《書》云:『天命有德,五服五章哉。』《後漢書·應劭議》曰:『《尚書》稱天秩有禮,五服五章哉,天討有罪,五刑五用哉。』」而《潛夫論·述赦》篇:「《書》稱天命有德,五服五章;天討有罪,五刑五用。」此引文以「五服五章」與「天秩」連屬,《後漢書·應劭傳》同,似其文作「天秩有禮,五服五章」者,然考之《漢書》、《潛夫論》所引,均與今本《尚書》同序,則此引文不常有此大異,蓋約而引之者,非其序如此也。

73. 居處仄陋,以耕學為業。(〈袁閎傳〉)

按:〈堯典〉云:「明明揚側陋。」此云「仄陋」者,引〈堯典〉之文也。古今文《尚書》皆有作「仄」者,今本《尚書》作「側」,乃衛包所改定。仄、側古同音多通作。〈說見第三章 19.條〉

74. 詔報曰:「經云:『身雖在外,乃心不離王室。』」(〈孫酺傳〉)

按:〈康王之誥〉云:「今予一二伯父,尚胥暨顧,綏爾先公之臣,服于先王,雖爾身在外,乃心罔不在王室。」此云經之者,蓋即檃括〈康王之誥〉之文也。考《漢書·谷永傳》:「經曰:『雖爾身在外,乃心無不在王室。』《後漢書》荀彧勸操曰:『雖禦難於外,乃心無不在王室。』〈谷永〉、〈荀彧〉引文,均作「無不在」,與今本《尚書》作「罔不在」異,蓋漢儒多用今文,谷永引經,必爲立官之本,則作「無不在」者,《今文尚書》也。無與罔二字同屬明紐,無屬五部,网在十部對轉通用,此猶亡之與無古字多通用也。今肅宗詔作「不離」者,肅宗受《歐陽尚書》,其引文義同而文異者,蓋雖稱經云云,然乃略引其辭,非歐陽經如此也。

- 75. 乃上疏曰:「······故唐堯著典,『魯文肆赦』;周公作戒,『勿誤庶獄』;伯夷之典,『惟敬五刑,以成三德』,由此言之,聖賢之政,以刑罰為首。」(〈陳寵傳〉)
 - (1) 唐堯著典「眚災肆赦」

按:〈堯典〉云:「眚災肆赦,怙終賊刑,欽哉欽哉,惟刑之恤哉。」此云「眚 灾肆赦」者,即引〈堯典〉之文。今本《尚書》以此分爲〈舜典〉者,今據此 稱「唐堯著典」,知漢時仍屬之〈堯典〉,今分在〈舜典〉者,僞孔本之大謬也。 (2)周公作戒,「勿誤庶獄」

又:〈立政〉云:「今文子文孫,孺子王矣,其勿誤于庶獄。」此云「勿誤庶獄」

者,即引〈立政〉之文也。此引無「于」字者,蓋行文之便耳。

(3)伯夷之典,「惟敬五刑,以成三德」

又:〈呂刑〉云:「伯夷降典,折民惟刑。」又曰:「雖畏勿畏,雖休勿休,惟敬 五刑,以成三德。」此云「伯夷之典」「惟敬五刑,以成三德」者即引〈呂刑〉 文也。

76. 「······數昭**羣僚**,弘崇**晏晏·····**」(〈陳寵傳〉)

按:〈堯典〉云:「欽、明、文、思、安安。」此云「晏晏」者,即引〈堯典〉 之文。其作「晏晏」者,蓋《今文尚書》也。(詳見第二章 71.條之(3))

77. 「……或因公行私,逞縱威福。……」(〈陳寵傳〉)

按:〈洪範〉云:「臣之有作福作威玉食,其害于而家,凶于而國。」此云「威福」者,即躁括〈洪範〉之辭也。此引先威後福者,蓋《今文尚書》也。(詳見第三章 14.條)

78. 「……方今聖德充基,假于上下。……」(〈陳寵傳〉)

按:〈堯典〉云:「允恭克讓,光被四表,格于上下。」此云「假于上下」者,即引〈堯典〉之文。此引作「假」者,《今文尚書》也。(詳見第二章 12.條之(4))

79. 「……革百載之失,建永年之功。」(〈陳寵傳〉)

按:《漢書·郊祀志》引〈今文太誓〉曰:「正稽古立功立事,可以永年,丕天之大律。」此云「永年之功」者,蓋驟括〈今文泰誓〉之辭也。(詳見第三章 49、條)

80. 寵又鉤校律令,溢於〈甫刑〉者除之。(〈陳寵傳〉)

按:〈呂刑〉云:「五刑之屬三千。」此云「律令溢於〈甫刑〉者」,即櫽括〈呂刑〉三千之義也。此引作「〈甫刑〉」者,用《今文尚書》也。(就見第三章 5.條)

81. 曰:「臣聞禮經三百,威儀三千,故〈甫刑〉大辟二百,五刑之屬三千。」 (〈陳寵傳〉)

按:〈呂刑〉云:「大辟之罰,其屬二百。五刑之屬三千。」此云「〈甫刑〉大辟 二百,五刑之屬三千」者,即隱括〈呂刑〉文也。此引稱〈甫刑〉者,《今文尚 書》也。(詳見第三章 5.條) 82. 忠自以世典刑法,用心務在寬詳。初父寵在延尉,上陳漢法溢於〈甫刑〉 者,未施行。(〈陳忠傳〉)

(1) 用心務在實詳

按:〈堯典〉云:「敬敷五教,在寬。」又〈呂刑〉云:「王曰:『吁,來,有邦有土,告爾祥刑。』」又:「受王嘉師,監于茲祥刑。」此云「用心務在寬詳」,選括〈堯典〉、〈呂刑〉之文。考《周禮・大宰職注》:「《書》曰:『度作詳刑以詰四方。』」又〈大司寇注〉:「《書》曰:『王旄荒,度作詳刑以詰四方。』」《正義》注皆作「詳審」《漢書敘傳》:「季世不詳,背本爭未。」師古注:「不詳謂不盡用刑之理。〈周書〉曰:『告爾詳刑』。」《後漢書・劉愷傳》曰:「非先王詳刑之意也。」李賢注:「《尚書》曰:『有邦有土,告爾詳刑。』鄭玄注云:『詳審察之也。』」王仲宣〈從軍詩〉:「司典告詳刑。」李善注引《尚書》『王曰:有邦有土,告爾詳刑。』段玉裁《古文尚書撰異》云:「合數條觀之,知古文今文,鄭本孔本,皆作从言之詳,顏籍李善之注可證也。古祥、詳多通用,蓋偽孔本亦作詳而讀爲祥,後經改作祥,如鳥讀爲島,後經改作島,非也。又按《史記、周本紀》作祥者,淺人所改也。」段說是也。而詳祥古多通用。易履卦「視履考詳」,《釋文》:「祥本亦作詳。」《荀子・成相篇》:「百家之說誠不詳。」注:「詳或爲祥。」此二字古通之證。今僞孔傳云:「告汝以善用刑之道」,以善訓詳,此讀詳爲祥也。後世遂改詳爲祥,並據改《史記》,段氏之說是也。

此作詳,據〈劉愷傳〉李賢注當作「詳審察之」義,且下文云「盜賊並起,郡縣更相飾匿莫肯糾發,忠獨以爲憂,上疏陳」云云者,可證也,則用義同鄭玄而與僞孔訓「善」不同。

(2)上除漢法溢於〈甫刑〉者

按:〈呂刑〉云:「墨罰之屬千,剕罰之屬五百,宮罰之屬三百,大辟之罰,其屬二百:五刑之屬三千。」此云「溢於〈甫刑〉者」,即檃括〈呂刑〉之義。而此稱〈甫刑〉者與僞孔本異,是用同漢儒及鄭玄之說。(詳見第三章 5.條)

83. 上疏曰:「……《書》曰:『小不可不殺。』」(〈陳忠傳〉)

按:〈康誥〉云:「人有小罪非眚,乃惟終,自作不典,式爾,有厥罪小,乃不可不殺。」此稱《書》曰,所引即爲〈康誥〉之辭也。此引無「乃」字,又「小」字上無「有厥罪」者,蓋臻括其文也。

84. 「……庶有讜言,以承天誡。」(〈陳忠傳〉)

按:〈皋陶謨〉云:「禹拜昌言。」此云「讚言」者,即引〈皋陶謨〉文也。其作「讚」者,乃《夏侯尚書》也。(詳見本章 41.條)

85. 忠上疏曰:「臣聞〈洪範〉五事,一曰貌,貌以恭,恭作肅,貌傷則狂, 而致常雨。」(〈陳忠傳〉)

按:〈洪範〉云:「二、五事:一曰貌、二曰言、三曰視、四曰聽、五曰思。貌曰恭,言曰從,視曰明,聽曰聰,思曰睿。恭作肅,從作义,明作哲,聰作謀, 睿作聖。」又《洪範五行傳》之:「一曰貌。貌之不恭,是謂不肅,厥咎狂,厥 罰常雨。」此云「〈洪範〉五事一曰貌」云云者,蓋檃括〈洪範〉及〈五行傳〉之辭也。

- 86. 上疏諫曰:「······上順國典,下防威福。」(〈陳忠傳〉) 按:〈洪範〉云:「臣無有作福,無有作威,無有玉食。」此云「下防威福」者, 乃檃括〈洪範〉之文也。其引先威後福者,用《今文尚書》也。(詳見第三章 14. 條)
- 87. 論曰:「·······忠能承風,亦庶乎明慎用刑而不留獄。」(〈陳忠傳〉) 按:〈康誥〉曰:「惟乃丕顯考文王,克明往愼罰。」此引「明愼用刑」句,乃 約取〈康誥〉之文。
- 88. 昭上書請超曰:「……恐開姦宄之源,生逆亂之心。……」(〈班超傳〉) 按:〈堯典〉云:「蠻夷猾夏,寇賊姦宄。」此云「姦宄」者,正引〈堯典〉之 文。此引作「姦宄」與《今本尚書》同,而與《史記》、《漢書·刑法志》、〈食 貨志〉作「軌」不同者,史公用歐陽,班固《漢書》用小夏侯,皆作「軌」,則 此引作「宄」者,必《大夏侯尚書》而與古文同。班固用《小夏侯尚書》(見《漢 書·《尚書》說考徵》),昭爲其妹,習亦當同,此或偶用之耳。
- 89. **乃上疏曰:「……陛下聖明,德被四表……**」(〈楊終傳〉) **按**:〈堯典〉云:「允恭克讓,光被四表。」此云「德被四表」者,檃括〈堯典〉 之文也。
- 90. 「……昔殷民近遷洛邑,且猶怨望。」(〈李法傳〉) 按:〈盤庚序〉云:「盤庚五遷,將治亳殷,民咨胥怨。」此云「殷民近遷洛邑, 且猶怨望」者,即櫽括書〈序〉之辭也。

91. 「……陛下誠仁思問洽,以親九族…。」(〈翟酺傳〉)

按:〈堯典〉云:「克明俊德,以親九族。」此云「以親九族」者,正引〈堯典〉 之文也。

92. 於是興學校,舉仄陋。(〈應奉傳〉)

按:〈堯典〉云:「明明揚側陋。」此云「舉仄陋」者,即引〈堯典〉之文。作舉者,以詁訓字代經字;作仄者,古側、仄音同通作。(說見第三章 19.條)

93. 尚書陳忠以罪疑從輕,議活次、玉。(〈應劭傳〉)

按:〈呂刑〉云:「五刑之疑有赦,五罰之疑有赦。……墨辟疑赦,其罰百鍰, 閱實其罪。劓辟疑赦,其罰惟倍,閱實其罪。剕辟疑赦,其罰倍差,閱實其罪。 宮辟疑赦,其罰六百鍰,閱實其罪。大辟疑赦,其罰千鍰,閱實其罪。」墨、 劓、剕、宫、大辟,皆重罪也,疑則舍此重罪而從輕罰。此云「罪疑從輕」,即 躁括〈呂刑〉之義也。今本《僞孔尚書》〈大禹謨〉之「罪疑惟輕,功疑惟重」 者,殆或據《後漢書》而僞。

94. 其議曰:「《尚書》稱天秩有禮,五服五章哉,天討有罪,五刑五用哉!」(〈應劭傳〉)

按:〈皋陶謨〉云:「天秩有禮,自我五禮有庸哉!同寅協恭和衷哉!天命有德, 五服五章哉!天討有罪,五刑五用哉!」此云「《尚書》稱」者,蓋躁括〈皋陶 謨〉之文也。(詳見本章 72.條之(2))

95. 「……夫時化則刑重,時亂則刑輕。(書》曰:『刑罰時輕時重』,此之謂也。」(〈應劭傳〉)

按:〈呂刑〉云:「輕重諸罰有權,刑罰世輕世重。」此引《書》曰者,正引〈呂刑〉之文也。考《荀子·正論》篇:「故治則刑重,亂則刑輕,犯治之罪固重,犯亂之罪固輕。《書》曰:『刑罰世輕世重。』此之謂也。」《漢書·刑法志》:「故治則刑重,亂則刑輕,犯治之罪固重,犯亂之罪固輕也。《書》云:『刑罰世輕世重。』此之謂也。」《周禮·大司寇》鄭注云:「周則變焉,所謂刑罰世輕世重者也。」《漢書·刑法志》所引,本諸《荀子·正論》篇,而應劭之文,亦出《荀子》,而《荀子》、《漢書》皆作「世」,惟應劭獨作「時」者,蓋唐人避諱改之「時」「世」同義,其本亦作「世」,鄭君引亦作世,則今古文同也。

96. 「……雖未足綱紀國體,宣治時雍,庶幾觀察,增關聖德。惟因萬機之餘暇,游意省覽焉。」(〈應劭傳〉)

按:〈堯典〉云:「黎民於變時雍。」此云「時雍」者,即引〈堯典〉之文也。 又:〈皋陶謨〉云:「兢兢業業,一日二日萬幾。」此云「萬機之餘暇」者,乃 躁括〈皋陶謨〉之文。其引作「機」者,乃漢、魏《尚書》之本然。作「幾」 者乃僞孔改之。(詳見第二章 22.條之(2))

97. 延因上封事曰:「······故周公戒成王曰『其朋其朋』,言慎所與也。·····」(〈爰延傳〉)

按:〈洛誥〉曰:「孺子其朋,孺子其朋。其往。」此云「其朋其朋」者,蓋約引〈洛誥〉之文也。考《三國志·魏志》何晏奏曰:「周公戒成王曰『其朋其朋』,言慎所與也。」又〈蔣濟傳〉濟上疏曰:「昔大舜佐治,戒在比周;周公輔政,傾於其朋。」李賢注本文曰:「孺子其朋,孺子其朋,愼其往。」多一愼字。足利本、內野本、敦煌本二七四八並同。此本有愼字,故爰延申之曰「愼與也」。又《三國志·魏志》二條,亦有愼字,則此文本實有「愼」字,李賢引時尚有之,其後傳寫脫之。段玉裁以爲「此疑妄增」,過矣。

- 98. 論曰:「孫懿以高明見忌,而受欺於陰計。」(〈徐璆傳〉) 按:〈洪範〉云:「無虐縈獨而畏高明。」又曰:「高明見忌」者,即檃括〈洪範〉 之文。
- 99. 《潛夫論·貴忠》篇:「……《書》稱『天工人其代之』。王者法天而建官,故明主不敢以私授,忠臣不敢以虚受。」(〈王符傳〉) 按:〈皋陶謨〉云:「無曠庶官,天工人其代之。」此引《書》稱者,正引〈皋陶謨〉文。其下云「法天而建官」,是今文家之說也。(詳參第三章 1.條及第四章 1.條)
- 100. 〈浮侈篇〉:「……飢寒並至,則民安能無姦軌?姦軌繁多,則吏安能無 嚴酷?嚴酷數加,則下安能無愁怨?愁怨者多,則咎徵並臻。」(〈王符 傳〉)

按:〈堯典〉云:「蠻夷猾夏,寇賊姦宄。」此云「姦軌」者,即引〈堯典〉 之文也。其作「軌」者,蓋歐陽、小夏侯《尚書》也。(詳見本章 13.條) 又:〈洪範〉云:「曰咎徵:曰狂,恆而若;曰僭,恆陽若;曰豫,恆燠若; 日急,恆寒若;日蒙,恆風若。」此云「咎徵並臻」者,即檃括〈洪範〉之 辭也。

- 101. 〈愛日篇〉:「是以堯勑羲和,欽若昊天,敬授民時。」(〈王符傳〉) 按:〈堯典〉云:「乃命羲和,欽若昊天,曆象日月星辰,敬授人時。」此云 「堯勑羲和,欽若昊天,敬授民時」者,蓋檃括〈堯典〉之文也。其引作「民 時」者,《尚書》本作「民時」,唐時避諱始改作「人時」,唐以前皆作「民時」。 (就見第三章第59.條)
- 102. 〈述敘篇〉:「·······〈書》曰『文王作罰,刑茲無赦』」(〈王符傳〉) 按:〈康誥〉云:「乃其速由文王作罰,刑茲無赦。」此引《書》曰者,正引 〈康誥〉之文。
- 103.「······故經稱『天命有德·五服五章哉!天討有罪·五刑五用哉!』」(〈王 符傳〉)

按:〈皋陶謨〉云:「天命有德,五服五章哉;天討有罪,五刑五用哉。」此云「經稱」者,即〈皋陶謨〉之文。

104. 〈損益篇〉:「······故淺其根本,輕其恩義,猶尚假一日之尊,收士民之用,(〈仲長統傳〉)

按:〈呂刑〉云:「天齊于民,俾我,一日非終惟終,在人。」此云「假一日之尊,乃檃括〈呂刑〉之文也。此云「假」者,《今文尚書》也。至「一日」 絕句者,與楊賜所引用,當亦《今文尚書》也。(詳參第五章 27.條)

- 105. 「……身無半通青論之命,而竊三辰龍章之服。……」(〈仲長統傳〉) 按:〈皋陶謨〉云:「予欲觀古人之象,日月星辰、山、龍、華蟲,作會;宗 彝、藻、火、粉米、黼、黻,絺繡,以五采彰施于五色,作服,汝明。」此 云「三辰龍章之服」者,即檃括〈皋陶謨〉之辭也。
- 106. 「······今令五刑有品,輕重有數,科條有序,名實有正,非殺人逆亂鳥 獸之行甚重者,皆勿殺。嗣周氏之秘典,續呂侯之詳刑,此又宜復之 善者也。」(〈仲長統傳〉)

按:〈呂刑〉云:「五辭簡学,正于五刑。」又云:「上刑適輕下服,下刑適輕 上服,輕重諸罰有權。」此云「五刑有品,輕重有數」者,蓋櫽括〈呂刑〉 之辭。

又:〈呂刑〉云:「有邦有土,告爾祥刑。」此云「續呂侯之詳刑」者,即檃括〈呂刑〉之文。此引作「詳」者,蓋本作「詳」,後人據僞孔傳訓「善」改作「祥」。(詳見第二章一六條之(2))又此引稱「呂侯」,與漢儒稱作〈甫刑〉者不同,蓋偶用古文也。(詳見第三章五條)

107. 「……庶績不咸熙,未必不由此。」(〈仲長統傳〉)

按:〈堯典〉云:「允釐百工,庶績咸熙。」此云「庶績不咸熙」者,即引〈堯典〉之文。

108. 安帝詔曰:「······出入顛覆,風淫于家······其貶萇爵臨湖侯,朕無『則哲』之明·····」(〈孝明八王列傳〉)

按:〈皋陶謨〉云:「罔書夜頟頟,罔水行舟,朋淫于家,用殄厥世」。此云「風 淫于家」者,蓋引〈皋陶謨〉之文也。此引作「風」者,考《說文》鳳字下 云:「鳳,神鳥也。……从鳥凡聲。動古文鳳。象形。鳳飛群鳥從之以萬數, 故以爲朋黨字。」而甲骨文鳳字作變素,而其義多借作風字解。羅振玉《殷 城書挈考釋》曰:「干氏國維曰『卜辭中屢云「其溝大鳳」,即其溝大風。《周 禮‧大宗伯》風師作飌師,从權,而卜辭作鳳,二字甚相似。』予案此說是 也。考卜辭中諸鳳字誼均爲風、古金文不見風字、《周禮》之飌、乃卜辭中鳳 字之譌,蓋譌平爲疏,譌凡爲風耳。據此知古者假鳳爲風矣。」其說是也。《史 記.夏本紀》註引鄭玄云:「朋淫,淫門內。」鄭氏以「門內」訓「朋」,古 者以爲「同門曰朋」,鄭既以門內釋之,則其本作朋無疑矣。鄭玄注《古文尚 書》,其作朋者乃《古文尚書》也,且《說文》鳳字之古文亂,即朋字,益可 明「朋」爲《古文尚書》。今此文作「風淫」,古者多借鳳爲風,且鳳、風二 字均從凡聲,同音相通借,然則作「風淫」者,三家之異文也。蓋壁中經文 本或作「鬍」,伏生沿古讀作「風」,後世今文遂有隸定作風者;而孔安國則從 其經字之本形讀作朋,由是古文作朋,今文或作風也。許叔重解為字曰「或以 爲朋黨字」,亦據古文之說。此所謂「風淫」者,風即《左傳·僖公四年》「惟 是風馬牛不相及也」,費誓「牛馬其風」之風,凡禽畜雌雄情動相誘而亡佚者, 謂之風:風淫即男女相惑亂也,於義亦通。

又:〈皋陶謨〉云:「惟帝其難之。知人則哲,能官人。」此云「則哲之明」者,即檃括〈皋陶謨〉之文也。

第五章 《後漢書·傳》引《尚書》考辨(下)

1. 龜臨行,上疏曰:「·····焉可不日昊勞神,垂撫循之恩哉!唐堯親捨其子 以禪虞舜者,是欲民遭聖君,不令遇惡主也。」(〈陳龜傳〉)

按:〈無逸〉云:「自朝至于日中**昊**,不遑暇食。」此云「日**昊**勞神」者,乃躁括 〈無逸〉之文也。

又:〈堯典〉云:「帝曰:『疇咨,若時登庸?』放齊曰:『胤子朱啓明。』帝曰: 『吁!囂訟,可乎?』」此云「堯捨其子以禪慮舜」者,臻括〈堯典〉之辭也。

2. 「······聖德滂以橫被兮,黎庶愷以鼓舞。闢四門以博延兮,彼幽牧之我舉。」 (〈崔豳傳〉)

按:〈堯典〉云:「允恭克讓,光被四表。」此云「聖德滂以橫被兮」者,乃躁括 〈堯典〉之文。此作「橫被」者,蓋《歐陽尚書》也。(詳見第二章 7.條)

又:〈堯典〉云:「闢四門,明四月,達四聰。」此云「闢四門以博延」者,乃臻括〈堯典〉之文也。

- - (1) 竊神器之萬機

按:〈皋陶謨〉云:「兢兢業業,一日二日萬機。」此云「萬機」者,即引〈皋陶 謨〉文。此引作「機」者,乃《書》之本然,今作「幾」者,蓋僞孔改之。

(2) 亦號咷以詶咨

按:〈堯典〉云:「帝曰:『疇咨,若予采?』」此云「譸咨」者,即引〈堯典〉之文。《說文》:「疇,耕治之田也。从田 ②。象耕田溝詰詘也。」又「訓、詛

也。从言州聲。」二字同在三部舌音,同音通用;皆假借字也。《說文》二篇上云:「屬,誰也。从口置又聲。記,古文疇。」段注云:「按此篆疑有誤。白部云『 屬,詞也。从白 翟 聲』引〈唐書〉曰『帝曰 屬 咨』」與此音義大同,但其字从口 翟 聲足矣,不當兼从又聲,又聲在一部,非聲也。」段說字當作从口 翟 聲是也。屬即爲本字也。

按:〈皋陶謨〉:「洪水滔天,浩浩懷山襄陵,下民昏墊。」此云「人有昏墊之戹」者,即臻括〈皋陶謨〉之辭也。

又:〈堯典〉云:「帝曰:『疇咨,若予采?』」此云「疇咨之憂」者,蓋櫽括〈堯典〉之文也。

5. 「……德讓不修,則非忠也。」(〈崔顯傳〉) 按:〈皋陶謨〉云:「虞賓在位,墓后德讓。」此云「德讓」者,即引〈皋陶謨〉 文。

6. 「······**羣生得理**,庶績其凝。」(〈崔骃傳〉) 按:〈皋陶謨〉云:「百僚師師,百工惟時,撫于五辰,庶績其凝。」此云「庶績 其凝」者,即引〈皋陶謨〉之文。

- 7. **駰獻書誡之曰:「……竊見足下體淳淑之咨,躬高明之量。**」(〈崔顯傳〉) **按:**〈洪範〉云:「無虐縈獨而畏高明。」此云「高明之量」者,即檃括〈洪範〉 之文也。
- 8. 「······當堯舜之盛世,處光華之顯時。·····」(〈崔昭傳〉) 按:《通鑑前編》〈帝舜十五〉載引《尚書大傳》云:「於時俊乂百工,相和而歌 〈卿雲〉。帝乃倡之曰:『卿雲爛兮, 糺縵縵兮, 日月光華, 旦復旦兮。』」又李 賢注引《大傳》亦同,則此云「光華之顯時」者,蓋躁括《大傳》之辭也。
- 9. 「······《書》曰:『鑒于有殷。』可不慎哉。」(〈崔驅傳〉) 按:〈召誥〉云:「王敬作所不可不敬德,我不可不監于有夏,亦不可不監于有 殷。」此云《書》曰「鑒于有殷」者,即〈召誥〉之文也。此引作「鑒」者, 考《說文》「監,臨下也。」「鑑,大盆也。从金監聲。一曰鑑諸,可以取明水

於月。」《酒誥》云:「人無於水監,當於民監。」古人臨水以察形,則監者視察也;鑑即鏡也,所以察形見影;二字義近音同而相段。段注《說文鑑》下云:「《尚書》監字多有同鑒者。」又監下注云:「古字少而義晐,今字多而義別。監與鑒互相假。」其說是也。此作「鑒」者,或三家之異文。

10. 「……矜矜業業,無殆無荒。」(〈崔驅傳〉)

按:〈皋陶謨〉云:「兢兢業業,一日二日萬幾。」此云「矜矜業業」者,即引 〈皋陶謨〉之文也。此引作「矜矜」者,考「矜」字从今聲,古音在七部,而 矜字則入十二部,兢字古音在六部,矜、兢兢同屬見紐,六、七部旁輚相通也。 作「矜矜」者,或三家之異文。

11. 乃謂長史陳輝曰:「······若拒違天意,久曠神器,則將以無罪并辜元惡。」 (〈崔瑷傳〉)

按:〈康誥〉曰:「王曰:『封,元惡大憝,矧惟不孝不友。』」此云「元惡」者,即引〈康誥〉之文。

12. 「······故皋陶陳謨而唐虞以興,伊、箕作訓而殷周用隆。」(〈崔寔傳〉) 按:此云「皋陶陳謨」者,即〈皋陶謨〉也。

又:〈書序〉云:「成湯既沒,太甲元年,伊尹作伊訓。」又云:「武王勝殷,殺受,立武庚,以箕子歸,作〈洪範〉。」此云「伊、箕作訓」者,即檃括〈書序〉之辭。

- 13. 「……昔盤庚愍殷,遷都易民;周穆有闕,甫侯正刑。……」(〈崔寔傳〉) 按:〈盤庚〉中云:「盤庚作惟涉河,以民遷。」又曰:「今予將試以汝遷,安定 厥邦。」此云「盤庚愍殷,遷都易民」者,即櫽括〈盤庚中篇〉之文也。 又:〈呂刑序〉云:「呂命,王訓夏贖刑,作〈呂刑〉。」此云「周穆有闕,甫侯 正刑」者,蓋櫽括〈呂刑〉序文也。此引作「甫侯」者,用《今文尚書》也。(辞 見第三章 5.條)
- 14. 「······故嚴刑峻法,破姦軌之膽。」(〈崔寔傳〉) 按:〈堯典〉云:「蠻夷猾夏,寇賊姦宄。」此云「姦軌」者,即引〈堯典〉之 文。作「軌」者,歐陽、《小夏侯尚書》也。(詳見第四章 13.條)
- 15. 「……樂作而鳳皇儀,擊石而百獸舞。」(〈崔寔傳〉)

按:〈皋陶謨〉云:「下管鼗鼓,合止祝敔。笙鏞以閒,鳥獸蹌蹌。蕭韶九成,鳳皇來儀。夔曰:『於,予擊石拊石,百獸率舞,庶尹允諧。』」此云「樂作而鳳皇儀,擊石而百獸舞」者,乃躁括〈皋陶謨〉之辭也。

16. 「······若使擢登三事,協亮天工。」(〈徐釋傳〉)

按:〈堯典〉云:「帝曰:『咨汝一十有二人,欽哉,惟時亮天功。』」此云「協 亮天工」者,乃檃括〈堯典〉之文也。此作「天工」者,《今文尚書》也。〈詳 見第三章1,條〉

- 17. 震上疏曰:「……是以唐虞俊乂在官,四凶流放,天下咸服,以致雍熙, 方今九德未事,嬖倖充庭。……」(〈楊��傳〉)
 - (1) 唐虞俊乂在官

按:〈皋陶謨〉云:「九德咸事,俊乂在官。」此云「俊乂在官」者,即引〈皋陶謨〉之文。

考《史記·夏本紀》云:「九德咸事,俊乂在官。」又《漢書·谷永傳》永對曰:「經曰『九德咸事,俊艾在官,未有賢布於官而不治也。』《後漢書·楊賜傳》:「明愼庶官,俊乂在職。」《論衡·恢國》篇曰:「皇帝敦德,俊乂在官。」〈漢巴郡太守樊敏碑〉:「《書》載俊乂。」〈郎中郭君碑〉:「口兆俊艾。」史公、王充、楊震均習《歐陽尚書》,而皆作「乂」,是《歐陽尚書》作「乂」也。而〈谷永傳〉、〈郭君碑〉作「艾」,當爲《夏侯尚書》,要之爲三家異文也。(參見第三章 15.條)

(2)四凶流放,天下咸服

按:〈堯典〉云:「流共工于幽州,放驩兜于崇山,竄三苗于三危,殛鯀于羽山,四罪而天下咸服。」此云「四凶流放,天下咸服」,即隱括〈堯典〉之文。

(3) 以致雍熙

按:〈堯典〉云:「黎民於變時雍。」又云:「三載考續,三考黜陟幽明,庶績咸 熙。」此云「雍熙」者,乃檃括〈堯典〉之文也。

(4)九德未事,嬖幸充庭

按:〈皋陶謨〉云:「九德咸事,俊乂在官。」此云「九德未事,嬖倖充庭」者, 櫽括〈皋陶謨〉之文也。

18. 「……《書》誡牝鷄牡鳴。」(〈楊震傳〉)

按:〈牧誓〉云:「古人有言曰:『牝鷄無晨;牝鷄之晨,惟家之索。』」此云「《書》

誠牝鷄牡鳴」者,乃檃括〈牧誓〉之文。

19. 「……擬蹤往古,比德哲王。」((楊震傳))

按:〈康誥〉云:「往敷求于殷先哲王。」此云「哲王」者,蓋引〈康誥〉之文。

20. 「《書》曰:『僭恒陽若,臣無作威作福玉食。』(〈楊震傳〉)

按:〈洪範〉云:「曰憯恒暘若。」此云「僭恒陽若」者,即引(洪範)之文。 此作「陽」者,「陽」、「暘」皆从易聲,同音相通,而暘爲本字。

又:〈洪範〉曰:「臣無有作福作威玉食。」此云「臣無作威作福玉食」者,即引〈洪範〉之辭。此引文先威後福者,《今文尚書》也。(詳見第三章 14.條)。 又此引無「有」字,乃引文約省也。

21. 「……殷周哲王,小人詈詈,則還自敬德。」(〈楊震傳〉)

按:〈無逸〉云:「自殷王中宗,及高宗,及祖甲,及我周文王,茲四人迪哲。 厥或告之曰:『小人怨汝詈汝,則皇自敬德。』」此云「殷周哲王,小人怨詈, 則還自敬德」,即檃括〈無逸〉之文。

22. 「……況以先王法服而私出槃游。」(〈楊秉傳〉)

按:〈無逸〉云:「文王不敢盤于游田。」此云「槃游」者,躁括〈無逸〉之文也。此作「槃」者,盤、槃爲一字異體,故可通作。

23. 「……元惡大憝,終為國害。」(〈楊秉傳〉)

按:〈康誥〉云:「王曰:『封,元惡大憝,矧惟不孝不友。』」此云「元惡大憝」者,即引〈康誥〉之文也。

24. 秉復上疏曰:「臣聞先王建國,順天制官。……皋陶誠虞,在於官人。……」 (〈楊秉傳〉)

按:〈皋陶謨〉云:「天工人其代之。」此云「順天制官」者,即歐陽「天工人 代」之解也。

又:〈皋陶謨〉云:「咸若時,惟帝其難之,知人則哲,能官人」。此云「皋陶誠 虞,在於官人」者,即檃括〈皋陶謨〉之文。

25. 「……四佞放而眾服。」(〈楊秉傳〉)

按:〈堯典〉云:「流共工于幽州,放驩兜于崇山, 竄三苗于三危, 殛鯀于羽山,

括〈洪範〉之文也。

四罪而天下咸服。」此云「四佞放而眾服」者,即檃括〈堯典〉之辭也。

- 26. 賜上封事曰:「……休徵則五福應,咨徵則六極至。」(〈楊賜傳〉) 按:〈洪範〉云:「曰休徵:曰肅,時雨若;曰乂,時暘若;曰晢,時燠若;曰 謀,時寒若;曰聖,時風若。曰咎徵:曰狂,恒雨若;曰僭,恒暘若;曰豫,
 - 恒燠若;日急,恒寒若;日蒙,恒風若。」又云:「九五福:一日壽,二日富, 三日康寧,四日攸好德,五日考終命。六極:一日凶短折;二曰疾,三日憂, 四日貧,五曰惡,六曰弱。」此云「休徵則五福應,咎徵則六極至」者,乃櫽
- 27. 「 ······ 《尚書》曰: 『天齊乎人,假我一日。』是其明徵也。」(〈楊賜傳〉) 按: 〈呂刑〉云: 「今爾罔不由慰日勤,爾罔或戒不勤,天齊于民、俾我,一日 非終惟終,在人。」此引《尚書》曰者,即〈呂刑〉之文也。考《尚書正義・釋文》云: 「天齊于民絕句。馬云『齊,中也』,俾我絕句。俾,必爾反。馬本作矜;矜,哀也。」僞孔傳云: 「天整齊於下民,使我爲之; 一日所行非爲天所 終,惟爲天所終,在人所行。」李賢注云: 「我謂君也。天意欲整齊于人,必假於君也。今《尚書》文『假』作『俾』,俾、使也,義亦通。」

據《釋文》所引以較孔傳,則孔傳絕句乃據馬融《尚書》;李賢注則據僞孔傳也。《釋文》云「天齊于民絕句」,與楊賜所引同,是陸德明所見,此當爲《今文尚書》句讀,蔡沈《集傳》亦用之。〈仲長統傳〉〈損益篇〉云「猶尙假一日之尊」絕句亦同,則今文以「一日」絕句,字作「假」可見也。楊賜此引《尚書》,以明「王者心有所惟,意有所想,雖未形顏色,而五星以之推移,陰陽爲其變度」,其意以爲「天之與人,豈不符哉」,則所謂「天齊乎人」者,即「天與人齊同符應」;所謂「假我一日」者,即「在于王者一日中之思與行」,此說與馬融齊訓中,僞孔齊訓整頓皆異,蓋歐陽家之說也。

- 28. 「……夫皇極不建,則有蛇龍之孽。」((楊賜傳))
 - 按:《續漢書·五行志》引《洪範五行傳》云:「皇之不極,是謂不建,厥咎瞀, 厥罰常陰,厥極弱,時則有射妖,時則有龍蛇之孽。」此云「皇極不建,則有 蛇龍之孽」者,即檃括《洪範五行傳》之文。
- 29. 「······是以唐虞兢兢業業,周文日昊不暇,明慎庶官,俊乂在職,三載 考績,以觀厥成。」(〈楊賜傳〉)

(1) 唐虞兢兢業業

按:〈皋陶謨〉云:「兢兢業業,一日二日萬幾。」此云「唐虞兢兢業業」者, 即引〈皋陶謨〉文。

(2) 周文日星不暇

按:〈無逸〉云:「文王卑服,即康功田功,徽柔懿恭,懷保小民,惠鮮鰥寡, 自朝至于日中昊,不遑暇食。」此云「周文日昊不暇」者,即檃括〈無逸〉之 辭也。

(3)明慎庶官

按:〈康誥〉云:「惟乃丕顯考文王,克明德慎罰。」此云「明慎庶官」者,乃 臻括〈康誥〉之辭。

(4) 俊又在職

按:〈皋陶謨〉云:「九德咸事,俊乂在官。」此云「俊乂在職」者,躁括〈皋陶謨〉之文也。

(5)三載考績

按:〈堯典〉云:「三載考績,三考黜陟幽明。」此云「三載考績」者,即引〈堯 典〉之文。

30. 「……觀鷹犬之執,極槃遊之荒。」((楊賜傳))

按:〈無逸〉云:「文王不敢盤于遊田。」此云「極槃遊之荒」者,即檃括〈無逸〉之文也。作「槃」者,盤、槃爲一字之異體,故可通作。

31. 「……如驩兜,共工更相薦說。」(〈楊賜傳〉)

按:〈堯典〉云:「驪兜曰:『都,共工方鳩僝功。』」此云「驩兜,共工更相薦 說」者,即檃括〈堯典〉之文也。

32. 「……殆非所謂『若保赤子』之義。」(〈楊賜傳〉)

按:〈康誥〉云:「若保赤子,惟民其康义。」此云「若保赤子」者,即引〈康 誥〉之文。

33. 言曰:「三后成功,惟殷于民,皋陶不與焉,蓋吝之也。」(〈楊赐傳〉) 按:〈呂刑〉云:「乃命三后,恤功于民:伯夷降典,折民惟刑;禹平水土,主 名山川,稷降播種,農殖嘉穀。三后成功,惟殷于民。」此云「三后成功,惟 殷于民」者,即引〈呂刑〉文也。其下云「皋陶不與焉,蓋吝之也」,即《歐陽 尚書》說也。(參見第四章 12.條之(3))

34. 策曰:「……九德純備……禮設殊等,物有服章。」(〈楊赐傳〉)

按:〈皋陶謨〉云:「九德咸事。」此云「九德純備」者,即檃括〈皋陶謨〉文也。〈皋陶謨〉又云:「天秩有禮,自我五禮有庸哉!同寅協恭和衷哉!天命有德,五服五章哉。」此云「禮設殊等,物有服章」者,亦檃括〈皋陶謨〉之文。

- 35. 彪曰:「移都改制,天下大事,故盤庚五遷,殷民胥怨。」(〈楊彪傳〉) 按:〈書序〉云:「盤庚五遷,將治亳殷,民咨胥怨。」此云「盤庚五遷,殷民 胥怨」者,即檃括〈書序〉之文。
- 36. 「……〈周書〉父子兄弟罪不相及。」(〈楊彪傳〉)

按:《左傳·昭公二十年》菀何忌曰:「在〈康誥〉曰:『父子兄弟,罪不相及。』」 又《左傳·僖公三十三年》臼李曰:「〈康誥〉曰:『父不慈,子不祗,兄不友, 弟不恭,不相及也。』」此引〈周書〉云云者,蓋用《左傳》引〈康誥〉之辭。 《左傳》所引〈康誥〉,乃〈康誥〉之逸文也。(詳見第二章 36.條)

37. 「……諒闇已來二十八月……《書》不云乎『用德章厥善』。」(〈章帝八 王傳〉)

按:〈無逸〉云:「乃或亮陰,三年不言。」此云「諒闇」者,即引〈無逸〉之 文也。其作「諒闇」者,《今文尚書》也。

又:〈盤庚上〉云:「無有遠邇,用罪伐厥死,用德彰厥善。」此云「用德章厥善。者,即引〈盤庚上〉篇之文。此作章者,同音假借也。

38. 「······未見保傅九德之義。」(〈張皓傳〉)

按:〈皋陶謨〉云:「皋陶曰:『都,亦行有九德,亦言其人有德。乃言曰載采采。』 禹曰:『何?』皋陶曰:『寬而栗,柔而立,愿而恭,亂而敬,擾而毅,直而溫, 簡而廉,剛而塞,彊而義。』」此云「九德之義」者,即檃括〈皋陶謨〉之文義 也。

39. 「……不能敷揚五教。」(〈張綱傳〉)

按:〈堯典〉云:「百姓不親,五品不遜,汝作司徒,敬敷五教,在寬。」此云「敷揚五教」者,即檃括〈堯典〉之文也。

40、「······若喪考妣。」(〈張綱傳〉)

按:〈堯典〉云:「二十有八載,帝乃殂落,百姓如喪考妣。」此云「若喪考妣」 即引〈堯典〉之文也。如、若,雙聲同義通用。

41. 功曹張敞奏記諫曰:「五教在寬,著之經典。」(〈王暢傳〉)

按:〈堯典〉云:「百姓不親,五品不遜,汝作司徒,敬敷五教,在寬。」此云「五教在寬」者,即引〈堯典〉之文也。此引「五教」與「在寬」句讀連屬者,蓋《尚書》本作「敬敷五教,五教在寬」,重「五教」字。今本《尚書》不重者,後人奪之。(詳見第二章 27.條之(3))

42. 「……孳孳求姦,未若禮賢。」((王暢傳))

按:〈皋陶謨〉云:「予思日孜孜。」此云「孳孳求姦」者,即檃括〈皋陶謨〉 之文。作「孳」者,乃《今文尚書》。(詳見第三章 27.條)

43. ……鳥桓望風率服。(〈種暠傳〉)

按:〈堯典〉云:「蠻夷率服。」此云「率服」者,乃引〈堯典〉之文也。

44. 「……目不視鳴條之事。」(〈劉陶傳〉)

按:〈書序〉云:「伊尹相湯伐桀,升自陑,遂與桀戰于鳴條之野。」此云「鳴條之事」者,蓋躁括〈書序〉之文也。

45. 「……斯豈唐咨禹、稷,益典朕虞,……」(〈劉陶傳〉)

按:〈堯典〉云:「帝曰:『俞,咨禹;汝平水土,惟時懋哉。』」又曰:「帝曰: 『棄,黎民阻飢,汝后稷,播時百穀。』」又曰:「帝曰:『俞,咨益,汝作朕虞。』 此云「唐咨禹稷,益典朕虞」者,乃檃括〈堯典〉之文也。

46. 「……故武丁得傅說,以消鼎雉之災。」(〈劉陶傳〉)

按:〈書序〉云:「高宗夢得說,使百工營求諸野,得諸傅嚴。」又云:「高宗祭成湯,有飛雉升鼎耳而雊。」此云「武丁得傳說,以消鼎雉之災」者,蓋檃括〈書序〉之文也。武丁即高宗也。以鼎雉繫於高宗,乃漢人依〈書序〉爲說者,今人王國維〈高宗肜日說〉已明其非(見《觀堂集林》)。

47. 「……是以先王觀象育物,敬授民時。」(〈劉陶傳〉)

按:〈堯典〉云:「乃命羲、和,欽若昊天,曆象日月星辰,敬授人時。」此云

「觀象育物,敬授民時」者,乃櫽括〈堯典〉之辭也。今本作「人時」者,避 唐諱而改之,《尚書》本作「民時」也。

48. 「……得其人則五氏來備。」(〈李雲傳〉)

按:〈洪範〉云:「曰時五者來備,各以其敘,庶草蕃廡。」此云「五氏來備」者,即引〈洪範〉之文。

考《史記·宋世家》云「庶徵:曰雨、曰晹、曰奥、曰寒、曰風、曰時五者來備,各以其序,庶草鯀廡。」《後漢書·荀爽傳》云「嘉瑞降天,吉符出地,五韙咸備,各以其敘。」李賢注云:「韙,是也。《史記》曰:『庶徵:曰雨、曰 暍、曰燠、曰風、曰寒,五者來備,各以其序。』本條李注引《史記》作「五者來備」,與〈荀爽傳〉注「五是來備」不同,而二條句式與今本《史記》作「日時五者來備」又異,若本條注本作「五者」,則必云「曰時五者」,今不然,則「五者」當爲「五是」,作「者」乃後人所改。據李賢注二條,可證《史記》本作「五是來備」,今作「曰時五者來備」者,乃裴駰集解引僞孔傳云「五者各以時」與正文不相應;於是後人或增改「五是」爲「曰時五者」也。段玉裁《古文尚書撰異》云:「『曰時五者來備。凡六字,此《古文尚書》也。李雲、荀爽皆用《今文尚書》,非用《史記》也。『曰時五者來備』一句,時、是也。『曰是五者』今文約之云『五是』。氏者是之假借,韙者是之轉注也。』」段氏之說分析有理,可從。則此云「五氏來備」者,《今文尚書》也。

49. 「······及開東序金縢史官之言······」(〈劉瑜傳〉)

按:〈顧命〉云:「大玉、夷玉、天球、河圖在東序。」又〈金縢〉云:「公歸, 乃納冊于金縢之匱中。」又曰:「王與大夫盡弁,以啓金縢之書。」此云「開東 序金縢史官之言」者,即檃括〈顧命〉、〈金縢〉之辭也。

- 50. 「……《鴻範傳》曰:『厥極弱,時則有蛇龍之孽。』」(〈謝弼傳〉) 按:《洪範五行傳》云「皇之不極,是謂不建,厥咎瞀,厥罰常陰,厥極弱,時 則有射妖,時則有龍蛇之孽。」此引《鴻範傳》云云者,即《洪範五行傳》文 也。
- 51. 「……《書》云:『父子兄弟,罪不相及。』」(〈謝弼傳〉) 按:《左昭二十年傳》引〈康誥〉曰:「父子兄弟,罪不相及。」又《左僖三十 三年傳》引〈康誥〉曰:「父不慈,子不祗,兄不友,弟不恭,不相及也。」此

稱《書》云者,蓋引《左傳》引〈康誥〉之語。《左傳》所引〈康誥〉,蓋〈康 誥〉逸文。(詳見第二章 36.條)

52. 「……願陛下仰慕有慮蒸蒸之化……」(〈謝弼傳〉)

按:〈堯典〉云:「瞽子,父頑,母嚚,象傲,克諧以孝,烝烝乂,不格姦。」 此云「有虞蒸蒸之化」者,即檃括〈堯典〉之文。此引作「蒸蒸」者,蒸與烝 同音通用,亦三家之異文也。(詳見第二章 26.條)

53. 「······唯司空劉寵斷斷守善。······」(〈謝弼傳〉)

按:〈秦誓〉云:「如有一介臣,斷斷猗,無他技。」此云「斷斷守善」者,即 櫽括〈秦誓〉之文也。

54. 贊曰:「鄧不明辟。」(〈謝弼傳〉)

按:〈洛誥〉云:「朕復子明辟。」此云「鄧不明辟」者,即引〈洛誥〉之文也。

55. 「……是故虞舜升朝,先除四凶。……陛下宜思虞舜四罪之舉,速行佞 讒放殛之誅。」(〈傅燮傳〉)

按:〈堯典〉云:「流共工于幽州,放驩兜于崇山,竄三苗于三危,殛鯀于羽山,四罪而天下咸服。」此云「虞舜升朝,先除四凶」,又云「虞舜四罪之舉」、「放殛之誅」者,皆躁括〈堯典〉之文也。

56. 遂乃研覈陰陽,妙盡璇機之正,作渾天儀。(〈張衡傳〉)

按:〈堯典〉云:「在璿璣玉衡,以齊七政。」此引〈堯典〉之文也。此引作璇 機者,璿、璇爲一字異體,故可通作;今本作璣者,乃涉上璿字玉旁而誤,字 本作木旁之機也。(說見第二章 54.係)

又:考《尚書大傳》云:「旋機者何也?傳曰:旋者還也。機者幾也,微也。其變幾微而所動者大,謂之旋機。是故旋機謂之北極。」鄭注云:「轉運者爲機,持正者爲衡;璿機玉衡,渾天儀也,皆以玉爲之。」《漢書·律曆志》:「衡,平也,其在天也,佐助旋機,斟酌建指,以齊七政。」〈漢堯廟碑〉曰:「據旋機之政。」〈周公禮殿記〉:「旋機離常。」《史記·五帝本紀》:「在璇璣玉衡,以齊七政。」鄭康成注《大傳》曰:「渾儀中軸爲旋機,外規爲玉衡。」《大傳》作旋,《漢書》、漢碑同,是今文本當作旋字。史公時《尚書》唯有歐陽,歐陽傳自伏生,當與《大傳》同,則《史記》亦當作「旋」也。鄭玄作璿者,蓋其

依馬融之說,以爲渾天儀,以玉爲之,故从玉旁,馬、鄭注《古文尚書》,則此 必爲《古文尚書》無疑矣。然康成注《大傳》,有作旋者,兼取今文,故有轉運 之義,而其解尚用渾天之說也。

偽孔傳曰:「機衡,王者正天文之器,可運轉者。」是文義俱用鄭康成之說 也。今此引作璇機,與上陰陽對舉,是指星名而言,不與渾天之說同也。

57. 「……立功之事,式昭德音。」(〈張衡傳〉)

按:《漢書·郊祀志》引〈泰誓〉曰:「正稽古立功立事,可以永年,丕天之大律。」此云「立功之事」者,即引〈今文泰誓〉也。(詳見第三章 49.條)

按:〈書序〉云「咎單作明居。」〈君奭〉云:「巫咸乂王家。」此云「咎單、巫 咸,寔守王家」者,乃櫽括〈書序〉、〈君奭〉之辭。

- 59. 衡因上疏諫曰:「伏惟陛下宣哲克明……故能一貫萬機,靡所疑惑,百揆 允當,庶績咸熙。」(〈張衡傳〉)
 - (1)宣哲克明

按:〈堯典〉云:「克明俊德。」此云「宣哲克明」者,乃檃括〈堯典〉之文。

(2) 一貫萬機

按:〈皋陶謨〉云:「兢兢業業,一日二日萬幾。」此云「萬機」者,即引〈皋陶謨〉文。此作「機」者,乃《尚書》之本然,僞孔本改作「幾」,故不同。

(3)百揆允當

按:〈堯典〉云:「納于百揆,百揆時敘。」此云「百揆允當」者,乃躁括〈堯典〉之文。

(4) 庶績咸熙

按:〈堯典〉云:「三載考績,三考黜陟幽明,庶績咸熙。」此云「庶績咸熙」, 正引〈堯典〉之文。

60. 「……頃年雨常不足,思求所失,則〈洪範〉所謂『僭恒陽若』者也。 懼羣臣奢侈,昏踰典式,自下逼上,用速咎徵。」(〈張衡傳〉)

按:〈洪範〉曰:「曰咎徵:曰狂恒雨若;曰僭恒陽若。」此云〈洪範〉云云及 咎徵之事,即櫽括〈洪範〉之辭也。

- 61. 「〈洪範〉曰:『臣有作威作福玉食,害于而家,凶于而國。』」(〈張衡傳〉) 按:〈洪範〉云:「臣之有作福作威玉食,其害于而家,凶于而國。」此云〈洪 範〉曰者,正引其文。此引先威後福者,乃《今文尚書》也。(詳見第三章 14. 條)。又此引臣字下無「之」字,害字上無「其」字者,蓋行為約者之便爾。
- 62. 「······《尚書》堯使鯀理洪水,九載續用不成,鯀則殛死,禹乃嗣與。」 (〈張衡傳〉)

按:〈堯典〉云:「帝曰:『咨四岳,湯湯洪水方割,蕩蕩懷山襄陵,浩浩滔天,下民其咨,有能俾乂?』愈曰:『於,鯀哉。』帝曰:『吁,咈哉!方命圮族。』岳曰:『异哉!試可,乃已。』帝曰:『往欽哉。』九載續用弗成。」此云「堯使縣理洪水,九載續用不成」者,乃櫽括〈堯典〉之文也。

又:〈洪範〉云:「帝乃震怒,不畀〈洪範〉九疇,彝倫攸斁,鯀則殛死,禹乃嗣與。」此云「鯀則殛死,禹乃嗣興」者,正引〈洪範〉之文。

63. 「……幽獨守此仄陋兮……」((張衡傳))

按:〈堯典〉云:「明明揚側陋。」此云「仄陋」者,乃引〈堯典〉之文。其引作「仄」者,「仄」、「側」同音,漢時已多通用也。(詳見第三章 19.條)

64. 「……且獲讟于羣弟兮, 啟金縢而乃信。……」(〈張衡傳〉)

按:〈金縢〉云:「武王既喪,管叔及其羣弟,乃流言於國,曰:『公將不利於孺子。』」又云:「王與大夫盡弁,以啓金縢之書,乃得周公所自以爲功代武王之說。二公及王乃問諸史,與百執事。對曰:『信。噫,公命,我勿敢言。』」此云「且獲讟于羣弟兮,啓金縢而乃信」者,即檃括〈金縢〉之辭也。

65. 「……彼天監之孔明兮,用棐忱而佑仁。」(〈張衡傳〉)

按:〈高宗肜日〉云:「惟天監下民,典厥義,降年有永有不永。」此云「彼天 監之孔明」者,乃躁括〈高宗肜日〉之辭。又〈康誥〉云:「天畏棐忱,民情大 可見。」此云「用棐忱而佑仁」者,即檃括〈康誥〉之文。

66. 「······**台繇邁而種德兮,·····**」(〈張衡傳〉)

按:今本《尚書·大禹謨》云:「皋陶邁種德,德乃降。」孔傳云:「皋陶布行 其德,下洽於民。」考《左莊公八年傳》云:「夏,師及齊師圍處,處降於齊 師。仲慶父請伐齊師。公曰:『不可。我實不德,齊師何罪,罪我之由。〈夏書〉 曰:「皋陶邁種德」,德乃降。姑務修德以待時乎。』」杜預注「皋陶邁種德」一句云:「〈夏書〉,逸書也。」注「德乃降」一句曰:「言苟有德乃爲人所降服也。」察乎杜注所謂逸書,乃亡逸之書,非謂逸於二十九篇外之十六篇也。此所謂逸書乃亡於秦漢之際,杜預未知所屬何篇,故云逸書。杜預以爲「德乃降」一句爲莊公釋「邁種德」之語,非〈夏書〉逸文。而僞孔本襲取《左傳》之辭,並「德乃降」一句,以入今本《大禹謨》文中,實僞作之明證。(詳見閔若據《尚書古文疏證》)然則此云「咎繇邁而種德兮」者,即引《左傳》所引〈夏書〉之文也。又此引作「咎繇」者,《說文》が部「鼎,眾與詞也。从が自聲。〈虞書〉曰:『鼎咎繇』。禁、古文鼎。」據《說文》以「幫」爲古文,則所引〈虞書〉「鬼咎繇」當爲今文也。《史記》作「皋陶」,是《歐陽尚書》作皋陶也。《漢書·百官公卿表》作「咎繇」,班固習《小夏侯尚書》,然則作「咎繇」者,爲《夏侯尚書》也。咎、皋同在三部見紐,繇、陶亦同在三部疊韻,故通用也。

67. 「······故『**戛擊鳴球』,載於虞謨。**」(〈馬融傳〉)

按:〈皋陶謨〉云:「夔曰:『戛擊鳴球,搏拊琴瑟以詠,祖考來格。』」此云「戛擊鳴球,載於虞謨」者,乃引〈皋陶謨〉之文。此稱虞謨者,蓋〈皋陶謨〉在〈虞書〉也。今僞孔傳本此句在所謂〈益稷〉篇中,乃因僞孔本《尚書》強析原〈皋陶謨〉之後半而別爲〈益稷〉篇故也;漢之時未爲分判,故此句以虞謨稱之。

68. 「……重以皇太后體唐堯親九族篤睦之德,陛下履有虞烝烝之孝。……」 (〈馬融傳〉)

按:〈堯典〉云:「克明俊德,以親九族,九族既睦,平章百姓。」此云「唐堯親九族篤睦之德」者,即檃括〈堯典〉之文也。

又:〈堯典〉云:「師錫帝曰:『有鰥在下,曰虞舜。』,帝曰:『俞,予聞。何如?』岳曰:『瞽子。父頑,母囂,象傲。克諧以孝,烝烝乂,不格姦。』」此云「有虞烝烝之孝」者,即櫽括〈堯典〉之文也。

69. 「……譬猶鍾山之玉,泗濱之石,累珪璧不為之盈,採浮磐不為之索。」 (〈蔡邕傳〉)

按:〈禹貢〉曰:「泗濱浮磐。」此云「泗濱之石」、「採浮磐不爲之索」者,蓋 躁括〈禹貢〉之文。 70. 「……舒之足以光四表。」(〈蔡邕傳〉)

按:〈堯典〉云:「允恭克讓,光被四表。」此云「光四表」者,即檃括〈堯典〉 之文。

71. 邕上封事曰:「……雖周成遇風,訊諸執事。」(〈蔡邕傳〉)

按:〈金縢〉云:「秋大熟。未獲。天大雷電以風。禾盡偃,大木斯拔,邦人大恐。王與大夫盡弁,以啓金縢之書,乃得周公所自以爲功代武王之說。二公及王,乃問諸史,與百執事。」此云「周成遇風,訊諸執事」者,即檃括〈金縢〉之文也。

72. 「……《鴻範傳》云:『政悖德隱,厥風發屋折木。』((蔡邕傳))

按:《漢書·五行志》云:「周道敝,孔子述《春秋》,則乾坤之陰陽,效〈洪範〉之咎徵,天人之道,粲然著矣。漢興,承秦滅學之後,景武之世,董仲舒治《公羊春秋》,始推陰陽,爲儒者宗。宣元以後,劉向治《穀梁春秋》,數其禍福,傳以〈洪範〉,與仲舒錯。至向子歆治《左氏傳》,其《春秋》意亦已乖矣;言〈五行傳〉又頗不同。是以攬仲舒,別向、歆,傳載眭孟、夏侯勝、京房、谷永、李尋之徒,所陳行事,訖於王莽,舉十二世,以傅春秋,著於篇。」是鑽研〈洪範〉五行者多矣,然其文言者著述,多所亡佚,不可詳考。今此云《鴻範傳》者,未知爲何家之說。

- 73. 「……蜺墜鷄化,皆婦人干政之所致也。」(〈蔡邕傳〉)
 - 按:〈牧誓〉云:「古人有言曰:『牝鷄無晨。牝鷄之晨,惟家之索。』今商王受,惟婦言是用。」此云「鷄化」者,即檃括〈牧誓〉之文也。
- 74. 「……臣願陛下忍而絕之,思惟萬機。……」(〈蔡邕傳〉) 按:〈皋陶謨〉云:「兢兢業業,一日二日萬幾。」此云「萬機」者,即引〈皋 陶謨〉之文。引作「機」者,蓋《尚書》之本然,今本《尚書》作「幾」,乃偽 孔之意也。(詳見第二章 22.條之(2))
- 75. 上疏陳事曰:「臣聞柔遠和邇,莫大寧人;寧人之務,莫重用賢;用賢之道,必存考黜。是以皋陶對禹,貴在知人。安人則惠,黎民懷之。」(〈左 雄傳〉)
 - (1) 柔遠和邇

按:〈堯典〉云:「食哉惟時,柔遠能邇,惇德允元,以難任人,蠻夷率服。」 此云「柔遠和邇」者,蓋引〈堯典〉之文。引作「和邇」者,行文稍變其辭耳。 (2)必存考點

按:〈堯典〉云:「三載考績,三考黜陟幽明。」此云「必存考黜」者,即檃括 〈堯典〉之文也。

(3) 皋陶對禹貴在知人,安人則惠,黎民懷之

按:〈皋陶謨〉云:「皋陶曰:「都,在知人,在安民。」又曰:「知人則哲,能官人;安民則惠,黎民懷之。」此云「皋陶對禹,貴在知人」者,乃檃括〈皋陶謨〉之辭;而云「安人則惠,黎民懷之」者,即直引其文也。引作「安人」者,行文對仗而改之也。

76. 「……至於文、景,天下康乂,誠由玄清寬柔,克慎官人故也。降及宣帝,興於仄陋……」(〈左韓傳〉)

按:〈康誥〉云:「若保赤子,惟民其康乂。」此云「康乂」者,即引〈康誥〉 之文也。

又:〈皋陶謨〉云:「惟帝其難之,知人則哲,能官人。」此云「克慎官人」者, 躁括〈皋陶謨〉之辭也。

又:〈堯典〉云:「明明揚側陋。」此云「興於仄陋」考,即檃括〈堯典〉之文。 引作「仄」者,漢時「側」、「仄」通用。(詳見第三章 19.條)

77. 「······故能降來儀之瑞。」(〈左雄傳〉)

按:〈皋陶謨〉云:「簫韶九成,鳳皇來儀。」此云「來儀之瑞」者,櫽括〈皋 陶謨〉之文也。

78. 「猶古之諸侯,拜爵王庭,輿服有庸。」(〈左雄傳〉)

按:〈堯典〉、〈皋陶謨〉皆曰:「車服以庸。」此云「輿服有庸」者,蓋櫽括〈堯典〉、〈皋陶謨〉之文也。

79. 下策問曰:「······五品不訓,王澤未流······」(〈周舉傳〉) 按:〈堯典〉云:「百姓不親,五品不遜。」此云「五品不訓」者,即引〈堯典〉 之文。此作「訓」者,乃《今文尚書》也。(詳見第三章 7.條)

80. 舉對曰:「……昔武王入殷,出傾宮之女。」(〈周舉傳〉)

按:《尚書大傳》云:「遂入殷,封比干之墓,表商容之閭,發鉅橋之粟,散鹿臺之財,歸傾宮之女。」此云「武王入殷,出傾宮之女」者,乃爨括《大傳》 文也。

81. 「……夫五品不訓,責在司徒。」(〈周舉傳〉)

按:〈堯典〉云:「百姓不親,五品不遜,汝作司徒,敬敷五教,在寬。」此云「五品不訓,責在司徒」者,隱括〈堯典〉之辭也。此引作「訓」者,《今文尚書》也。(詳見第三章 7.條)

82. 「言事者多云,昔周公攝天子事,及薨,成王欲以公禮葬之,天為動變。 及更葬以天子之禮,即有反風之應。」(〈周舉傳〉)

按:《尚書大傳》云:「周公死,成王欲葬之於成周,天乃雷雨以風,禾盡偃, 大木斯拔,國人大恐。王乃葬周公於畢,示不敢臣也。」則此引周公成王之事, 蓋據《大傳》之辭而檃括之也。考《論衡・感類》篇云:「〈金縢〉曰:『秋, 大熟。天乃雷電以風,禾盡偃,大木斯拔,邦人大恐。』當此之時,周公死。 儒者說之以爲成王狐疑于周公,欲以天子禮葬公,公,人臣也;欲以人臣禮葬 公,公有王功;狐疑于葬周公之間,天大雷雨,動怒示變,以彰聖功。古文家 以武王崩,周公居攝,管蔡流言,王意狐疑周公,周公奔楚,故天雨雷以悟成 王。夫一雷一雨之變,或以爲葬疑,或以爲信纔,二家未可審。」然則東漢時, 大雷雨以風之變,蓋有二說,古文家以爲周公時未卒而奔楚,今文家以爲周公 已死之後。《白虎通‧喪服》篇云:「養從生,葬從死。周公以王禮葬何?以爲 周公踐祚理政,與天同志,展興周道,顯天度數,萬物咸得,休氣充塞,原天 之意,子愛周公,與文武無異,故以王禮葬,使得郊祀。《尚書》曰:『今天動 威,以彰周公之德。』下言禮亦宜之。」又《後漢書‧張奐傳》奐上疏云:「昔 周公葬不如禮,天乃動威。」《漢書·儒林傳》谷永上疏曰:「昔周公薨,成王 葬以變禮,以當天心。」又〈梅福傳〉福上書曰:「昔成王以諸侯禮葬周公而 皇天動威,雷雨著災。」《白虎通》爲班固所錄,班氏習《小夏侯尚書》,張奐 師事太尉朱寵,學《歐陽尚書》,並約牟氏章句,則用《歐陽尚書》也,二者 均以風雨之變在周公卒葬之時;又谷永、梅福諸儒,所說盡同,是今文家之說 如是。《尚書正義》引鄭玄《尚書注》云:「明年將踐祚,周公欲代之攝政,羣 叔流言,周公辟之,居東都,時成王年十三也。居東二年,成王收捕周公之屬 黨,時成王年十四也。明年秋,大熟,遭風雷之變,時周公居東三年,成王年

十五。迎周公反,則居攝之元年也。」鄭玄此說,與今文諸儒所說不同,而與 《論衡》謂之古文家者同,鄭康成注古文,蓋此即古文家之說也。鄭玄此說, 殆必有所本,惜古書亡佚,無從援證。李鼎祚《周易集解》於〈蒙〉初六說「桎 梏」引干寶云「此成王始覺周公至誠之象,將正四國之罪,宜釋周公之黨。」 與鄭說合,此亦或據古文家說也。

此周舉之對,亦用今文之說,與《大傳》同。然舉之父防,師事徐州刺史蓋豫,受《古文尚書》,舉傳父業,當亦通《古文尚書》,而對風雷動變,改葬周公之問,與今文同者,蓋舉雖或通古文,然於朝廷對策疏諫,固依立官之《尚書》說爲宜也。今本孔傳云:「周公以成王未悟,故留東未還。改過自新,遺使者迎之,亦國家禮有德之宜。」此乃襲古文家說爲之也。

- 83. 「……《書》曰:『僭恒暘若。』」(〈周舉傳〉) 按:〈洪範〉云:「僭,恒暘若。」此稱《書》曰者,正〈洪範〉之文也。
- 84. 「……昔在前世,求賢如渴,封墓軾閭,以光賢哲。……」(〈周舉傳〉) 按:《尚書大傳》云:「遂入殷。封比干之墓,表商容之閭。」此云「封墓軾閭」 者,蓋檃括《大傳》之文也。
- 85. 「……出入京輦,有欽哉之績,……」(〈周舉傳〉) 按:〈堯典〉云:「咨汝二十有二人,欽哉。」此云「欽哉之績」者,即檃括〈堯典〉之辭也。
- 86. 「······雖《詩》詠成湯之不怠遑,《書》美文王之不暇食,誠不能加。」 (〈黃瓊傳〉)

按:〈無逸〉云:「自朝至于日中臭,不遑暇食。」此云「《書》美文王之不暇食」者,即檃括〈無逸〉之文義也。

- 87. 琬奉手對曰:「蠻夷猾夏,責在司空。」(〈黃琬傳〉) 按:〈堯典〉云:「蠻夷猾夏,寇賊姦宄。」此云「蠻夷猾夏」者,即引〈堯典〉 之文也。
- 88. 「昔周公營洛邑以寧姬。……」(〈黃琬傳〉) 按:〈書序〉云:「召公既相宅,周公往營成周,使來告卜,作〈洛誥〉。」此云 「周公營洛邑以寧姫」者,驟括〈書序〉之文義也。

- 89. 「……〈堯典〉曰:『釐降二女媯汭,嬪于虞。』」(〈荀爽傳〉) 按:〈堯典〉云:「釐降二女嬀汭,嬪于虞。」此云〈堯典〉曰者,正引此文。
- 90. 「……五韙咸備,各以其敘矣。」(〈前爽傳〉)

按:〈洪範〉云:「八庶徵: 曰雨, 曰陽, 曰燠, 曰寒, 曰風。曰時, 五者來備, 各以其敘, 庶草蕃廡。」此云「五韙來備, 各以其敘」, 即引〈洪範〉之文也。此引作「五韙來備」者, 蓋用《今文尚書》,「韙」即「是」之轉注字。《古文尚書》作「曰時五者來備。」(詳見本章 48.條)

91. 「……故問公之戒曰:『不知稼穑之艱難,不聞小人之勞,惟耽樂之從, 時亦罔或克壽。』是其明戒。……」(〈荀爽傳〉)

按:〈無逸〉云:「不知稼穡之艱難,不聞小人之勞,惟耽樂之從,自時厥後,亦罔或克壽。」此云周公之戒者,正引〈無逸〉之文,蓋〈無逸〉乃周公戒成王之辭也。考《漢書·鄭崇傳》:「……故周公著戒曰『惟王不知艱難,躭樂是從,時亦罔有克壽。』」《論衡·語增》篇:「經曰:『惟湛樂是從,時亦罔或克壽。』」《中論・天壽》篇:「自時厥後,立王生則逸,不知稼穡之艱難,不知小人之勞苦,惟耽樂是從,自時厥後,亦罔或克壽。」〈鄭崇傳〉、〈荀爽傳〉、《論衡·語增》篇引文,「亦罔或克壽」句上皆僅有「時」字,無「自時厥後」句,此當爲《今文尚書》也。《漢書》引作「罔有克壽」,而〈荀爽傳〉及《論衡》作「罔或克壽」者,考《史記》「不或亂政」作「不有亂政」、「乃或亮陰」作「乃有亮陰」,皆古文作「或」,史公作「有」,史公用歐陽《今文尚書》,則今文當作「有」,〈荀爽傳〉、《論衡》作「或」字,疑是後人改之。又《論衡》作「湛」,當爲三家異文。《中論》作「不知小人之勞苦」,疑涉上文而誤也。

92. 「……〈洪範〉云:『惟辟作威,惟辟作福,惟辟玉食。』凡此三者,君 所獨行而臣不得同也。今臣僭君服,下食上珍,所謂『害于而家,凶于 而國』者也。……」(〈荀爽傳〉)

按:〈洪範〉云:「惟辟作威,惟辟作福,惟辟玉食。臣無有作福作威玉食。臣 之有作福作威玉食,其害于而家,凶于而國。」此稱〈洪範〉云云者,即引〈洪 範〉之文。又云「臣憯君服,下食上珍」者,躁括之辭也。此引文先威後福者, 蓋《今文尚書》如此也。(詳見第三章 14.條)

93. 「……雖使契布五教,皋陶作士,政不行焉。……」(〈荀悦傳〉)

按:〈堯典〉云:「帝曰:『契,百姓不親,五品不遜,汝作司徒,敬敷五教,在 寬。』帝曰:『皋陶,蠻夷猾夏,寇賊姦宄,汝作士。』……」此云「契布五教, 皋陶作士」者,即檃括〈堯典〉之文也。此引作「布五教」者,以訓詁字代經 字也。

94. 「……釐降二女,陶唐之典。……」(〈荀悦傳〉)

按:〈堯典〉云:「釐降二女嬀汭,嬪于虞。」此云「釐降二女」者,即引〈堯典〉之文也。

95. 贊曰:「……太丘奧廣,模我藝倫。」((陳紀傳))

按:〈洪範〉云:「我不知其彝倫攸叙。」**又:**「帝乃震怒,不畀洪範九疇,彝倫攸斁。」此云「彝倫」者,即引〈洪範〉之文。

96. 「然夕惕孳孳……」(〈李固傳〉)

按:〈皋陶謨〉云:「予惟日孜孜。」此云「孳孳」者,即引〈皋陶謨〉文。作 孜者古文也。作孳者今文。(詳見第三章 27.條)

97. 「……又宜止槃遊,專心庶政。……」(〈李固傳〉)

按:〈無逸〉云:「文王不敢盤于遊田,以庶邦惟正之供。」此云「宜止槃遊,專心庶政」者,即檃括〈無逸〉之文也。引作「槃」者,盤、槃爲一字之異體,皆般字之叚借字也。(詳見第四章 58.條)又此「庶政」之政,即「惟正」之正,政、正古多通用。僞孔傳以「正道」訓「正」,乃誤解矣。(詳見第四章 58.條)

98. 「臣聞君不稽古,無以承天;臣不述舊,無以奉君。昔堯殂之後,舜仰慕三年……」(〈李固傳〉)

按:〈堯典〉云:「曰若稽古帝堯。」此云「稽古」者,引〈堯典〉之文也。鄭玄注〈堯典〉云:「稽,同也。古,天也。言能同天而行者帝堯。」此李固曰「不稽古,無以承天」,在鄭注之前,蓋鄭注之說,前亦有所本者也。

又:〈堯典〉云:「帝乃殂落,百姓如喪考妣,三載,四海遏密八音。」此云「堯 明之後,舜仰慕三年」者,隱括〈堯典〉之辭也。

- 99. 「……作威作福,莫固之甚。臣聞台輔之位,實和陰陽,琁機不平,寇 賊姦軌,則責在太尉。……」(〈李国傳〉)
 - (1)作威作福

按:〈洪範〉云:「臣無有作福作威玉食。」此云「作威作福」者,即引〈洪範〉 之文。此引先威後福者,蓋《今文尚書》如此。(詳見第三章 14.條)

(2) 琁機不平

按:〈堯典〉云:「在璿璣玉衡,以齊七政。」此云「琁璣」者,即引〈堯典〉 之文。引作「琁璣」者,琁、璿一字之異體,又可作璇。今本《尚書》作「璣」 者,从玉旁,乃後人涉上璿字之玉旁而誤也。(詳見第二章 54.條)

(3)寇賊姦軌

按:〈堯典〉云:「蠻夷猾夏,寇賊姦宄。」此云「寇賊姦軌」者,即引〈堯典〉 之文。引作「軌」者,《今文尚書》也。(詳見第四章 13.條)

100. 「……陛下隆於友于,不忍遏絕。……」((史弼傳))

按:《論語·爲政》篇:「子曰:『《書》云「孝乎惟孝,友于兄弟」』。」此云「友于」者,即引《論語》所引之《書》篇也。蓋《論語》所引爲《尚書》 逸文,未知何篇。今僞孔本襲取以入〈君陳篇〉。

101. **論曰:「……吳季英親人畏傷,發言烝烝。**」((史弼傳))

按:〈堯典〉云:「克諧以孝,烝烝乂,不格姦。」此云「烝烝」者,即引〈堯典〉之文也。此以「烝烝」絕句,與僞孔古文異,蓋漢魏時句讀本如是也。(詳見第二章 26.條)

102. 「 … 《書》陳『謀及庶人』。」(〈盧植傳〉)

按:〈洪範〉云:「汝則有大疑,謀乃及心,謀及卿士,謀及庶人,謀及卜筮。」 此稱「《書》陳謀及庶人」者,即〈洪範〉之文也。

103. 「臣聞《五行傳》『日晦而月見謂之朓,王侯其舒。』」(〈盧植傳〉) 按:《尚書大傳》云:「晦而月見西方謂之朓。朓則侯王其荼。」此云〈五行傳〉云云者,即引《洪範五行傳》之辭。其文有小異者,引文不嚴謹故也。此引作「舒」、《大傳》作「荼」,即今本《尚書》之「豫」也。《尚書正義》云:「鄭、王本豫作舒。鄭云『舉遲也』,王肅云『舒,隋也』。」鄭注《大傳》云:「荼,緩也。」則鄭本作舒,其注《大傳》仍其文曰「緩也」,實荼即舒也。考豫、舒二字皆从予聲,古同音通用;而予、余古同屬定紐五部,古書亦多通作。豫、舒、荼三字古同音通用也。段玉裁《古文尚書撰異》云:「是《今文尚書》皆作舒,舒與急爲反對之詞,此經當從鄭王本。僞孔作豫、訓 逸豫,義稍隔。」段說是也。

104. 「……宜依黜陟,以章能否,縱不九載,可滿三歲。」(〈盧植傳〉)

按:〈堯典〉云:「三載考績,三考黜陟幽明,庶績咸熙。」此云「官依黜陟, 以章能否」者,即檃括〈堯典〉之文也。考《尚書大傳》云:「《書》曰:『三 載考績,三考黜陟幽明。』,其訓曰:三歲而小考者,正職而行事也;九歲而 大考者,黜無職而賞有功也。」《白虎通‧考黜》篇云:「所以三載一考績何? 三年有成,故於是賞有功黜不肖。《尙書》曰:『三載考績,三考黜陟。』何 以知始考輒黜之?《尚書》曰:『三年一考,少黜以地。』《書》所言三考黜 者,謂爵土異也。」《白虎通》為班固所錄,以「三考黜陟」為句,《漢書‧ 食貨志》同,又《史記》云「三歲一考功,三考絀陟」,亦以「黜陟」爲句。 (詳見第二章 1.條)是歐陽、《小夏侯尚書》句讀相同,則其說亦不異。《史 記》云「三歲一考功」與《白虎通》云「始考輒黜之」說法正同,是二者皆 以爲三年即考其功績,有所黜陟也。而《大傳》則以爲三歲之考,乃正職而 行事、並無黜陟之事、二說不同。《漢書・谷永傳》引《書》句讀與《大傳》 同,而谷永用今文,則必爲《大夏侯尚書》也。今盧植云「官依黜陟,以童 能否」,「能否」即「幽明」,是其所本當為「三考黜陟幽明」,與《大傳》、《大 夏侯》同;而彼云「縱不九載,可滿三歲」,義亦與《大傳》同,然則盧植所 用乃《大夏侯尚書》也。本傳云盧植與鄭玄俱事馬融,能誦古今學,今此上 書,即用立官之學,亦彼通今文之證也。

105. 「……威福之來,咸歸權倖。……」(〈皇甫規傳〉)

按:〈洪範〉云:「惟辟作福,惟辟作威,惟辟玉食。」此云「威福」者,即引〈洪範〉之文。此引先威後福者,《今文尚書》如此。(詳見第三章 14.條)

106. 「……昔周公葬不如禮,天乃動威。」(〈張奐傳〉)

按:《尚書大傳》云:「周公死。成王欲葬之於成周。天乃雷雨以風,禾盡偃, 大木斯拔。國人大恐。王乃葬公於畢,示不敢臣也。」此云「周公葬不如禮, 天乃動威」者,即檃括《大傳》之辭也。此云天動威在周公已死之後,是今 文家之說也。(說見本章 82.條)

107. 「……撫養百姓,同之赤子。」(〈陳蕃傳〉)

按:〈康誥〉云:「若保赤子,惟民其康乂。」此云「撫養百姓,同之赤子」

者,躁括〈康誥〉之辭也。

- 108. 「······故皋陶戒舜,『無教逸遊』,周公戒成王,『無槃于遊田』。」(〈陳 蕃傳〉)
 - (1)故皋陶戒舜「無教逸遊」

按:〈皋陶謨〉云:「無教逸欲有邦。」此云「無教逸遊」者,即檃括〈皋陶謨〉之辭也。考《史記·夏本紀》:「毋教邪淫奇謀。」《漢書·王嘉傳》:「臣聞咎繇戒帝舜『亡敖佚欲有國。兢兢業業,一日二日萬機。』」袁宏《後漢紀》:「陳蕃上書云:『皋陶誠舜曰:『無敢遊佚。』」史公、陳蕃作「教」,王嘉作「敖」,蓋作「敖」者乃三家異文也。《後漢紀》引作「敢」,殆「教」字之誤。又此引作「逸遊」者,乃檃括之辭也。

(2) 周公戒成王,「無槃于遊田」

按:〈無逸〉云:「文王不敢盤于遊田。」此云「無槃于遊田」者,乃檃括〈無逸〉之文也。其引作「槃」者,蓋槃、盤爲一字之異體,故可通作。

109. 「……齊七政,訓五典,……」(〈陳蕃傳〉)

按:〈堯典〉云:「在璿璣玉衡,以齊七政。」此云「齊七政」者,即引〈堯典〉之文。

又:〈堯典〉云:「百姓不親,五品不遜。」此云「訓五典」者,即櫽括〈堯典〉之辭。五典即五品。此引遜作「訓」者,用《今文尚書》也。(詳見第三章 7.條)

110. 「……君為元首,臣為股肱。」(〈陳蕃傳〉)

按:〈皋陶謨〉云:「元首明哉!股肱良哉!庶事康哉!」此云「君爲元首, 臣爲股肱」者,即檃括〈皋陶謨〉之文也。

111. 「昔武王克殷,表閭封墓。」((陳蕃傳))

按:《尚書大傳》云:「遂入殷,封比干之墓,表商容之閭。」此云「表閭封墓」者,即檃括《大傳》之辭也。

112. 論曰:「……則哲之鑒,惟帝所難。」(〈郭太傳〉)

按:〈皋陶謨〉云:「禹曰:『吁!咸若時,惟帝其難之。知人則哲,能官人。』」 此云「則哲之鑒,惟帝所難」者,即引〈皋陶謨〉之辭也。此引「則哲」在「惟 帝所難」前,蓋其行文之便耳。(參見第四章 9.條)

113. 「如此則咎徵可消。」(〈竇武傳〉)

按:〈洪範〉云:「日咎徵:日狂,恒雨若;日僭,恒暘若;日豫,烜燠若; 日急,恒寒若;日蒙,恒風若。」此云「咎徵」者,即引〈洪範〉之辭。

114. 袁紹勸進便於此決之,至于再三。(〈何進傳〉)

按:〈多方〉云:「我惟時其教告之,我惟時其戰要囚之,至于再、至于三,乃有不用我降爾命,我乃其大罰殛之。」此云「于至再三」者,引〈多方〉之辭也。皮錫瑞《今文尚書考證》云:「今文再下無于至字,三下無乃字。《漢書·文三王傳》,廷尉賞、大鴻臚由移書梁王傅、相、中尉曰:『《書》曰:「至于再三,有不用我降爾命。」』。師古曰:『此《周書·多方》篇之辭也。言我教汝,至于再三,汝不能用,則我下罰黜汝命也』。段玉裁說:『按此少至于字、乃字,蓋《今文尚書》本然。』,錫瑞按:《論衡·譴告》篇曰:『管、蔡篡畔,周公告教之,至于再三。』與《漢書》合。」今本作「至于再,至于三」,乃本《古文尚書》,作「至于再三」則《今文尚書》如此,皮說是也。此引作「至于再三」與今文同,而與僞孔本異。〈隋志〉以爲東晉時,歐陽大小夏侯均亡,而《晉書·束哲傳》云東晉仍有鄭氏及孔氏古文,則此引今文如此,其或據鄭氏乎。

115. 贊曰:「……惟女惟弟,來儀柴房。」(〈何進傳〉)

按:〈皋陶謨〉云:「簫韶九成,鳳皇來儀。」此云「來儀」者,引〈皋陶謨〉 之辭也。

116. 「況今德政赫赫,股肱惟良。」(〈鄭太傳〉)

按:〈皋陶謨〉云:「元首明哉!股肱良哉。」此云「股肱惟良」者,乃檃括〈皋陶謨〉之文也。

117. 「是太甲之思庸。」(〈孔融傳〉)

按:〈書序〉云:「太甲既立,不明,伊尹放諸桐。三年,復歸于亳,思庸。」 此云「太甲之思庸」者,即檃括〈書序〉之辭。

118. 「蓋聞唐虞之朝,有克讓之臣。」(〈孔融傳〉)

按:〈堯典〉云:「禹拜稽首,讓于稷、契,暨皋陶。」又曰:「垂拜稽首,讓于殳斯暨伯與。」又曰:「益拜稽首讓于朱虎、熊羆。」又曰:「伯拜稽首,讓

于夔、龍。」又曰:「舜讓于德,弗嗣。」此云「唐虞之朝,有克讓之臣」者, 即臻括〈堯典〉之文也。

119. 「……雖禦難於外,乃心無不在王室。」(〈荀彧傳〉)

按:〈康王之誥〉云:「雖爾身在外,乃心罔不在王室。」此云「乃心無不在王室」者,即引〈康王之誥〉之文也。引作「無」者,亡無音近同相通用也。

120. 論曰:「……而舍格天之大業。」(〈朱儁傳〉)

按:〈君奭〉云:「〈君奭〉,我聞在昔,成湯既受命,時則有若伊尹,格干皇天。」 此云「格夭大業」者,即引〈君奭〉之文。考《史記・燕召公世家》:「〈君奭〉 不說周公,周公乃稱湯時有伊尹假于皇天。」《漢書・王莽傳》:「咸有聖德,假 於皇天。」《論衡・感類》篇:「周公曰:『伊尹格于皇天。』」〈漢博陵太守孔彪 碑〉:「伊尹之休,格于皇天。」《漢司空文烈侯公碑》:「勛假皇天。」《三國志・ 魏志武帝紀》潘勛作策命魏公曰:「伊尹格于皇天,周公光於四海。」《史記》 作「假」,史公用《歐陽尚書》者:《漢書》作「假」,班固習《夏侯尚書》者; 〈楊公碑〉作「假」,蔡邕亦習《夏侯尚書》者;然則三家今文皆作「假」也。 又今本《尚書》之格字,兩漢諸儒引用多作「假」,是作「假」者爲《今文尚書》 無疑矣。皮錫瑞《今文尚書考證》云:「〈孔彪碑〉云『伊尹之休,格于皇天』。…… 《三國志》潘勛作策命魏公曰:『伊尹格于皇天』,亦皆作格,是兩漢今文家亦 假、格並用,非皆傳寫爲譌;〈孔彪碑〉今尚存,乃塙實可據者。」段玉裁《古 文尚書撰異》云:「《今文尚書》無作『格』者。」《後漢書・賈逵傳》云:「肅 宗立,降意儒術,特好《古文尚書》,《左氏傳》。」則東漢時《古文尚書》已然 大行,杜、衛、賈、馬、鄭諸大儒輩出,故漢碑用「格」字,非必今文家所用, 《三國志》作「格」亦然,且鄭康成以後,各家師法多混而不分。由是言之, 皮氏之說未允,段說可從。又此引作「格」者,即用《古文尚書》也。(詳參第 二章 12.條之(2))

- 121. 「·······昔太甲既立不明,昌邑罪過千餘,故有廢立之事。」(〈董卓傳〉) 按:〈書序〉云「太甲既立,不明,伊尹放諸桐。」此云「太甲既立不明」者, 即引〈書序〉之文也。
- 122. **論曰:「……故得蹈藉彝倫,毀裂畿服。」**(〈董卓傳〉) **按:**〈洪範〉云:「帝乃震怒,不畀〈洪範〉九疇,彝倫攸斁。」此云「蹈藉彝

倫」者,即引〈洪範〉之文也。

123. 贊曰:「……董卓滔天,干逆三才。」(〈董卓傳〉)

按:〈堯典〉云:「帝曰:『吁,靜言庸違,象恭滔天。』此云「滔天」者,乃引〈堯典〉之辭也。盧文弨札記云:「堯謂共工象恭滔天,孔傳說甚牽強,後來釋書者皆未詳,或以爲脫誤,或以爲衍文,唯《管城碩記》當塗徐位山解曰:『《竹書紀年》堯帝十九年命共工治河,六十一年命崇伯鯀治河,則縣未命以前四十一年中,治河者皆共工也。時帝問誰順予事?而驩兜美共工之僝功,帝謂其貌若恭順,而洪水仍致滔天,與下文浩浩滔滔同一義。』」錢大昕《潛研堂集》問:「〈堯典〉象恭滔天,宋儒疑滔天二字因下文洪水滔天相似而誤,然乎?曰:《史記・夏本紀》引此文作『似恭漫天』與傳訓滔爲漫合,《漢書・王尊傳》亦有『靖言庸違,象龔滔天』之語,可證《尚書》古本皆作滔天無可疑者,《詩》『天降滔德』,毛公亦訓爲漫,滔天猥言慢上也。《史記》于洪水滔天不易其字,而此獨爲漫,文同義別,孔傳均訓爲漫矣。」夫共工治水,亦見《淮南》、《國語》、徐氏據《竹書》爲解,《竹書》爲作,不可據也,兩漢諸儒均未作此解,可見滔天之訓「漫天」,實爲古誼;且上言「靜言庸違」,下言「象恭滔天」,皆指個人心性表現而言,不可以「洪水滔天」解之,錢氏之說可信,而徐說不可從也。

124. 「……若大事克捷,罪人斯得。……」(〈公孫瓚傳〉)

按:〈金縢〉云:「周公居東二年,則罪人斯得。」此云「罪人斯得」者,即引 〈金縢〉之文。

- 125. 論曰:「自帝室王公之胄,皆生長脂腴,不知稼穡。」(〈公孫瓚傳〉) 按:〈無逸〉云:「自時厥後,立王生則逸;生則逸,不知稼穡之艱難,不聞小 人之勞。」此櫽括〈無逸〉之文也。劉逢禄《尚書古今文集解》云:「生則逸, 《中論》引不重出。」考之《漢石經復原圖》(見展萬里〈漢石經《尚書》殘 字集證〉),「生則逸」亦不重出,是今文本不重出之證。此云「生長脂腴」者, 即所謂「生則逸」,則此引亦不重「生則逸」也。然此乃櫽括之辭,不可緣定。
- 126. 「以臣頗有一介之節。」(〈袁紹傳〉) 按:〈秦誓〉云:「如有一介臣,斷斷猗,無他技。」此云「一介之節」者,即 櫽括〈秦誓〉之文也。

127. 「……竦劔翼室。」(〈袁紹傳〉)

按:〈顧命〉云:「延入翼室。」此云「翼室」者,蓋引〈顧命〉之文也。

128. 「……臣雖小人,志守一介。」(〈袁紹傳〉)

按:〈秦誓〉云:「如有一介臣,斷斷猗,無他技。」此云「志守一介」者,即 躁括〈秦誓〉之文。

129. 「 威福由己 ,」(〈袁紹傳〉)

按:〈洪範〉云:「惟辟作福,惟辟作威,惟辟玉食。」此云「威福由己」者, 蓋躁括〈洪範〉之辭也。此引先威後福者,用《今文尚書》也。(詳見第三章 14.條)

130. 「·······使王室震蕩,彝倫攸斁。」(〈袁譚傳〉)

按:〈洪範〉云:「帝乃震怒,不畀〈洪範〉九疇,彝倫攸斁。」此云「彝倫攸 斁」者,即引〈洪範〉之文。

131. 「……昆弟之嫌,未若重華之於象傲。」(〈袁譚傳〉)

按:〈堯典〉云:「瞽子。父頑,母嚚,象傲。克諧以孝,烝烝乂,不格姦。」 此云「重華之於象傲」者,躁括〈堯典〉之義。

132. 「……伏惟將軍至孝蒸蒸。」(〈袁譚傳〉)

按:〈堯典〉云:「克諧以孝,烝烝义,不格姦。」此云「至孝蒸蒸」者,即檃括〈堯典〉之文。此引以「至孝」、「蒸蒸」連屬為句,與《今文尚書》句讀不同,漢人句讀皆如此,今本《尚書》乃偽孔誤讀者也。(詳見第二章 26.條)。 又此作「蒸」者,同音通借也。

133. 贊曰:「……闚圖訊鼎,禋天類社。」(〈劉表傳〉)

按:〈堯典〉云:「肆類于上帝,禋于六宗。」此云「禋天類社」者,即檃括〈堯典〉之文也。考孫星衍《尚書古今文注疏》:「今《尚書》夏侯、歐陽說『類,祭天名也,以事類祭之,奈何大位在南方,就南郊祭之是也』。古《尚書》說非時祭天謂之類,言以事類告也。」又曰:「許氏謹案《周禮》郊天無言類者,知類非常祭,從古《尚書》說,鄭氏無駁。案:非時祭天謂之類者有二,攝位其一也。〈王制〉云:『天子將出征,類乎上帝』,《詩・皇矣》云:『是類是碼。』《爾雅》、鄭箋亦同如此。〈釋天〉云:『師祭也。』」此作「類社」,明非今文

家說也。又鄭玄《周禮·肆師》:「凡師甸用牲于社宗」注云:「社,軍社也。」 又《周禮·大司寇》「涖戮于社」注:「社謂社主在者也。」則與《禮記·王制》 及《詩·皇矣箋》、《爾雅》合,則此「類社」是用鄭康成《古文家說》,是興 師祭社之義也。

又:《尚書》「禋于六宗」之義,眾說紛紜。伏生《大傳》云:「萬物非天不生, 非地不載,非春不動,非夏不長,非秋不收,非冬不藏;禋于六宗,此之謂也。」 《漢書‧郊祀志》引歐陽、大小夏侯說「六宗者,上不謂天,下不謂地,旁不 謂四方,在六者之間,助陰陽變化,實一而名六,聲聞之師曰:『六宗,明堂 六帝也。』劉昭注《後漢志》引賈逵曰:「六宗謂日宗、月宗、星宗、岱宗、 河宗、海宗。」〈堯典釋文〉引馬融曰:「禋,精意之享也。萬物非天不覆,非 地不載,非春不生,非夏不長,非秋不收,非冬不藏,此其謂六也。」《儀禮 通解續》「因事之祭」引《大傳》鄭注云:「馬氏以爲六宗謂日、月、星辰、泰 山、河、海也。」(與《釋文》引異,然同屬古文家。)《周禮·大宗伯疏》引 鄭玄云:「禋,煙也。取其氣達升報于陽也。六宗禋與祭天同名,則六者皆天 神,謂星、辰、司中、司命、風伯、雨師也。」《大傳》鄭注:「月令天子祈來 年于天宗,如此則六宗近謂天神,以《周禮》差之,則爲星、辰、司中、司命、 風師、雨師也。」王肅云:「禋,絜祀也。」(見釋文。)偽孔傳曰:「精意以 享謂之禋。宗,尊也。所尊祭者其祀有六,謂四時也、寒暑也、日也、月也、 星也、水旱也。」綜考諸說,今文家伏生、歐陽、大小夏侯、馬融爲一系;古 文家賈逵、馬融爲一系;鄭玄自爲一說。是馬融游走於古今文之間,鄭玄則混 合眾說,自成新說。僞孔傳之六宗,實引〈祭法〉之說。此云「禋天」,則是 用鄭康成「六者皆天神」之說,與僞孔不同。

134. **贊曰:「……既云天工,亦資人亮。」**(〈劉表傳〉)

按:〈皋陶謨〉云:「無曠庶官,天工人其代之。」〈堯典〉云:「惟時亮天功。」 此云「既云天工,亦資人亮」者,即檃括〈堯典〉、〈皋陶謨〉之文也。此引作 「天工」,是二者均作「天工」,此乃《今文尚書》也。(說見第四章1條)

135. 「……成湯討桀,稱『有夏多罪』。」(〈袁術傳〉)

按:〈湯誓〉云:「非台小子,敢行稱亂,有夏多罪,天命殛之。」此云「有夏 多罪」者,正引〈湯誓〉之文。〈湯誓〉即商湯伐夏桀之辭也。

136. 然建武、永平之間, 吏事深刻, 亟以謠言單辭, 轉易守長。(〈循吏列傳〉)

按:〈呂刑〉曰:「今天相民,作配在下,明清于單辭。民之亂,罔不中聽獄之 兩辭。」此云「單辭」者,則引〈呂刑〉之文也。

137. 景乃商度地勢,鑿山阜,破砥績。」(〈循吏列傳〉)

按:〈禹貢〉云:「和夷底績。」又曰:「原隰底績。」又曰:「覃懷底績。」又曰:「愿柱析城。」此云「破砥績」者,引〈禹貢〉之文也。皮錫瑞《今文尚書考證》云:「今文作底柱,一作砥柱。《史記》作砥柱,《漢志》作底柱,師古曰:『底柱在陝縣東北,山在河中,形若柱也。……』《水經・山澤》篇:『砥柱在河東大陽縣。』」考《說文·九篇上》:「底,柔石也。以厂氐聲。砥,或从石。」段注云:「柔石,石之精細者,鄭注〈禹貢〉曰:『厲磨刀刄之石也,精者曰砥。……』」按,底者,砥之正字,後人乃謂砥爲正字,底與砥異用,強爲分別之過也。底之引申之義爲致也、至也、平也,有假借者字爲之者,如〈周頌〉「耆定爾功」,傳曰『耆,致也』是也。」二字皆从氐聲,而「厂」與「石」,其義不異,故二者可以互用,段說爲是。爲孔傳「底」字皆訓「致」,是用引申義,而於「底柱」則無訓,蓋此作專名用。《史記》及鄭玄注作「砥」,而此引作「砥績」,或是用鄭玄之說也,與今本《尚書》作「底」不同。

138. 《尚書》朱穆上疏,稱矩等良輔,及言殷湯、高宗不罪臣下之義。(〈循 東列傳〉)

按:今《後漢書·朱穆傳》,未載其文。李賢注引《尚書·湯誥》曰:「余一人有罪,無以爾萬方,萬方有罪,在余一人。」又引〈說命〉下:「一夫之不獲,則曰時予之辜。」考殷湯不罪臣下之義,其見者在《論語·堯曰》篇。其辭曰:「予小子履,敢用玄牡,敢昭告于皇皇后帝,有罪不敢赦,帝臣不蔽,簡在帝心。朕躬有罪,無以萬方,萬方有罪,罪在朕躬。」《集解》:「孔曰:《墨子》引〈湯誓〉,其辭若此。」然此實爲湯禱兩之辭也。《墨子·兼愛》篇下引〈湯說〉曰:「惟予小子履,敢用玄牡,告於上天后曰:『今天大旱,即當朕身,履未知得罪于上下,有善不敢蔽,有罪不敢赦,簡在帝心;萬方有罪,即當朕身, 朕身有罪,無及萬方。』」《國語·周語》引〈湯誓〉曰:「余一人有罪,無以萬夫,萬夫有罪,在余一人。」與此文相類,是正《尚書·湯誓》逸文,然此誓與〈書序〉云「遂與桀戰于鳴條之野,作〈湯誓〉」者不同(見許師《先秦 典籍引書考》十八章第一節第十二條)。

又:《尚書·無逸》篇云:「周公曰:嗚呼,自殷王中宗、及高宗及祖甲及我周

文王,茲四人迪哲,厥或告之曰:『小人怨汝詈汝』,則皇自敬德。厥愆,曰: 『朕之愆』,允若時,不啻不敢含怒。」是高宗不罪臣下,反求諸己身之明據; 漢時無今之《僞古文尚書》,故范曄所引者乃《論語》引〈湯說〉及〈無逸篇〉 之義也,注引僞〈湯誥〉及僞孔本〈說命下〉爲說,未允也。

139. 專事威斷,滅族姦軌。(〈酷吏列傳〉)

按:〈堯典〉云:「蠻夷猾夏,寇賊姦宄。」此云「姦軌」者,即引〈堯典〉之 文也。此作「軌」者,用《今文尚書》,與僞孔本作「宄」不同。(說見第四章 13.條)

140. 論曰:「······輿夫斷斷守道之吏,何工否之殊乎!」(〈酷吏列傳〉) 按:〈秦誓〉云:「如有一介臣,斷斷猗,無他技。」此云「斷斷守道」者,即 引〈秦誓〉之文也。

141. 鄧后以女主臨政,而萬機殷遠。(〈宦者列傳〉)

按:此引〈皋陶謨〉之文也。〈皋陶謨〉云:「兢兢業業,一日二日萬幾。」此 引作「機」者,乃漢魏相傳之本如是,與僞孔古文不同。(詳見第二章 22.條之 (2))

142. 雖忠良懷憤,時或奮發,而言出禍從,旋見孥戮。(〈宦者列傳〉)

按:〈甘誓〉云:「用命,賞于祖,弗用命戮于社,予則弩戮汝。」又〈湯誓〉云:「爾不从誓言,予則孥戮汝,罔有攸赦。」此云「孥戮」者,即引〈甘誓〉、〈湯誓〉之文。考《史記・夏本紀》:「予則帑僇女。」《周禮・司厲》鄭司農云:「謂坐爲盜賊而爲奴者,輸于罪隸、春人、藁人之官也。由是觀之,今之爲奴婢,古之罪人也。故《書》曰:『予則奴戮女。』」《漢書・王莽傳》:「莽曰:『秦置奴婢之市,與牛馬同蘭,《書》曰:「予則奴戮女。」唯不用命者被此辜矣。』」《詩・小雅・常隸》「樂爾妻帑」,傳曰:「帑,子也」,《正義》曰:「《左傳》曰:秦伯歸其帑,《書》曰:『予則帑戮女』,皆是子也。」《尚書正義》引鄭注〈湯誓〉云:「大罪不止其身,又孥戮其子孫,《周禮》云:其奴,男人入于罪隸,女子入于春。」《三國志・毛玠傳》:「鍾繇詰玠曰:『自古聖帝明王,罪及妻子。《書》云:「左不共左,右不共右,予則孥戮女。」』段玉裁《古文尚書撰異》云:「古奴婢妻帑字皆作奴,故鄭司農釋《尚書》之奴爲奴婢,假令如今本《尚書》作孥,則司農何至釋爲奴婢,故知孥是俗字,衛包所

改,《尚書》原文只作奴也。」又曰:「唐初孔傳本或作帑,《尚書》六書之假借,至衛包收作孥,則斷不可從。古時字少同一奴子,而或訓奴婢,或訓子息,皆一字可包眾說,後人因孔傳訓子,則改奴爲帑爲孥。」又曰:「〈王莽傳〉所用者《今文尚書》說也,先鄭注〈司厲〉引《尚書》亦用今文說,《漢書》〈季布・欒布傳〉贊曰「奴僇苟活」,亦是用今文說,其字則古文今文皆作奴也。又按《漢書·文帝紀》『盡除收奴律令』,應劭曰『奴,子也,秦法一人有罪,并其室家,今除此律』,師古曰:『奴讀與帑同,假借字也。』玉裁按此可證古字作奴不作帑,今本既依顏說改正文之奴爲帑,又將注中奴帑字互改而不可通矣。又按《匡謬正俗》說奴戮一條,經文本作奴,不作孥可證。」又曰:「《史記》作帑,淺人所改。」段氏之說,至爲詳盡,可從。

今《說文》無「孥」字,疑孥字乃涉奴訓子,二字合一而誤。《正義》引鄭玄說作孥,然引《周禮》作奴(孔廣森《尚書注》十卷正作奴,可證),是作孥者,後人所改也。此引作「孥戮」,與僞孔同,蓋亦爲後人竄改也。

又:《墨子·明鬼下》篇引〈禹誓〉(即與今本《尚書》中〈甘誓〉文字大致相同,當是同一文本而諸子解讀不同,故命名亦因之而異爾。),無「予則學僇汝」句,而《史記》則有之,蓋此句實爲秦時法家爲實連坐之法,而以私意羼入,以成其說,古人皆以爲帝王之刑不如此之嚴也。《左傳》引〈康誥〉云:「父子兄弟,不相及也。」又〈費誓〉作於季世,亦止云「汝則有常刑」、「汝則有大刑」,可見古文獻中當無連累子孫之刑法之說也。

143. 雖袁紹龔行,芟夷無餘。(〈宦者列傳〉)

按:〈牧誓〉云:「今予發惟恭行天之罰。」又〈甘誓〉云:「天用勦絕其命, 今予惟恭行天之罰。」此云「龔行」者,即引〈甘誓〉、〈牧誓〉之文也。此引 作「龔」者,爲三家之異文。(說見第三章 48.條)

144. 魏武因之,遂遷龜鼎。(〈宦者列傳〉)

按:〈大誥〉曰:「寧王遺我大寶龜。」此云「龜鼎」之龜,即用〈大誥〉之義 也。

145. 及太后崩,安帝始親萬機。(〈宦者列傳〉)

按:〈皋陶謨〉云:「兢兢業業,一日二日萬幾。」此云「萬機」者,引〈皋陶 謨〉之文也。此作「機」與漢、魏相傳之本同,而與偽孔本異。(詳見第二章 22.條之(2)) 146. 「……故舜有臣五人而天下理。」(〈宦者列傳〉)

按:〈堯典〉云:「帝曰:『俞咨禹。汝平水上,惟時懋哉。』」又曰:「棄,黎 民阻飢,汝后稷,播時百穀。」又曰:「契,百姓不親,五品不遜,汝作司徒, 敬敷五教,在寬。」又曰:「皋陶,蠻夷猾夏,寇賊姦宄,汝作士,五刑有服, 五服三就,五流有宅,五宅三居,惟明克允。」又曰:「俞,咨伯,汝作秩宗, 夙夜惟夷,直哉惟清。」此云「舜有臣五人而天下理」者,蓋檃括〈堯典〉之 文也。

147. 「……昔高宗以雉雊之變,故獲中興之功。」(〈宦者列傳〉)

按:《尚書大傳》云:「武丁祭成湯。有飛雉升鼎耳而雊。武丁問諸祖己。祖己 曰:『雉者野鳥也,不當升鼎。今升鼎者,欲爲用也。遠方將有來朝者乎?』 故武丁內反諸己,以思先王之道。三年,編髮重譯來朝者六國。」此云「高宗 以雉雊之變,故獲中興之功」者,即櫽括《大傳》之辭也。

- 148. 論曰:「······非直苟咨凶德,止於暴橫而已。」(〈宦者列傳〉) 按:〈盤庚下〉云:「用降我凶德。」〈多方〉云:「爾尚不忌于凶德。」此云「凶 德」者,即引《尚書·盤庚》、〈多方〉之文也。
- 149. 贊曰:「……況乃巷職,遠參天機,舞文巧態,作惠作威,凶家害國, 夫豈異歸。」(〈宦者列傳〉)

按:〈洪範〉云:「臣之有作福作威玉食,其害于而家,凶于而國。」此云「作惠作威,凶家害國」者,乃檃括〈洪範〉之文也。此所謂「作惠」者即「作福」也,是先福後威,用《古文尚書》,與鄭玄注及今本《尚書》同。(說見第三章14.條)

150. 「……陛下聖德欽明,同符二祖,勞謙戹運,三年乃讙。」(〈儒林列傳〉) (1) 陛下聖德欽明

按:〈堯典〉云:「欽、明、文、思、安安。」此云「聖德欽明」者,即躁括 〈堯典〉之文。

(2) 三年乃讙

按:〈無逸〉云:「乃或亮陰,三年不言。其惟不言,言乃雍。」此云「三年 乃讙」者,檃括〈無逸〉之辭也。此引作「讙」者,考《史記·魯世家》:「乃 有亮閨,三年不言,言乃讙。」《集解》引鄭注云:「讙,喜悅也。」《史記· 殷本紀》:「殷道既衰,武丁修改行德,天下咸驩,殷道復興。」《禮記·坊記子》曰:「高宗云:『三年其惟不言,言乃讙。』」鄭注:「謹當爲歡聲之誤也。其既言天下皆歡喜樂其政教也。」《禮記·檀弓》篇:「子張問曰:『高宗三年不言,言乃讙。』」鄭注:「謹,喜說也。言乃喜說,則臣民望其言久矣。」〈商頌·詩譜〉曰:「乃或諒閣,三年不言,言乃雍。」《尚書正義》引鄭注云:「其不言之時,時有所言,則羣臣皆和諧。」《史記》《禮記》同作「謹」,史公用《歐陽尚書》,而《禮記》傳自夏侯始昌,戴氏亦今文之學,與《尚書》同一師承,故用字多與《今文尚書》合,則作「謹」者,乃《今文尚書》也。鄭康成注《禮記·坊記》、《檀弓》二篇,皆訓歡喜、喜悅,是就《禮記》本文「謹」字作訓,而用今文說訓之。而鄭氏《詩譜》作「雍」,《正義》引鄭注訓爲「和諧」,與今文之「謹」不同,蓋必爲《古文尚書》也。鄭玄兼通古今,其注《大傳》悉用今文家說,注古文則多用古文家學也。《殷本紀》作「驩」,乃同音通借字。〈魯世家〉《集解》所引,當爲〈檀弓〉注之文。

151. 「······昔般庚去奢·行儉於亳;成周之隆,乃即中洛。遭時制都,不常 厥邑。」(〈文苑傳〉)

按:〈書序〉云:「盤庚五遷,將治亳殷。」又曰:「成王在豐,欲宅洛邑。使 召公相宅。」又云:「召公既相宅,周公往營成周。」此杜篤云遷都之事者, 即環括〈書序〉之辭。此引作「般庚」者,熹平石經亦作「般庚」,是《今文 尚書》作「般」。般、盤乃同音通借也。

又:〈盤庚上〉云:「先王有服,恪謹天命,茲猶不常寧,不常厥邑,于今五邦。」此云「不常厥邑」者,即引〈盤庚上〉之文。

- 152. 「……夫癰州本帝皇所育業,〈禹賈〉所載,厥田惟上。」(〈文苑傳〉) 按:〈禹貢〉云:「黑水西河惟雍州。」又曰:「厥土惟黃壤,厥田惟上上。」 此云「癰州」,而稱〈禹貢〉「厥田惟上」者,即引〈禹貢〉之文也。此引作 「厥田惟上」,少一上字者,行文之便矣。
- 153. 「……朔南暨聲, 諸夏是和。……」(〈文苑傳〉) 按:〈禹貢〉云:「朔南暨聲教。」此云「朔南暨聲」者,即引〈禹貢〉之文。 此引少「教」字者,行文便爾。

154. 「肇十有二,是為贍腴。……」(〈文苑傳〉)

按:〈堯典〉云:「肇十有二州。」此云「肇十有二」者,即引〈堯典〉之文也。

155. 「……受命於皇上。」(〈文苑傳〉)

按:〈召誥〉云:「皇天上帝,改厥元子茲大國殷之命。惟王受命,無疆惟休,亦無疆惟恤。」此云「受命於皇上」者,即檃括〈召誥〉之辭也。

156. 「**虓怒之旅**,如虎如螭。」(〈文苑傳〉)

按:〈牧誓〉云:「如虎如貔,如熊如羆。」此云「如虎如縭」者,即引〈牧誓〉之文。作螭者,蓋用《今文尚書》也。(詳見第二章 11.條之(2))

157. 「……蓋夫燔魚剸蛇……」(〈文苑傳〉)

按:李賢注引〈今文泰誓〉云:「太子發升舟,中流,白魚入於王舟,王跪取出,以燎。」鄭注云:「燔魚以祭,變禮也。」此云「燔魚」者,即檃括〈今文泰誓〉之辭。(詳見第二章 2.條)

158. 迪志詩:「……日月逾邁,豈云旋復!哀我經營,旅力靡及。」(〈文苑 傳〉)

按:〈秦誓〉云:「我心之憂,日月逾邁。」又曰:「番番良士,旅力既愆。」 此云「日月逾邁」、「旅力」者,皆引〈秦誓〉之文。

159. 「……爰作股肱,萬邦是紀。」(〈文苑傳〉)

按:〈皋陶謨〉云:「帝曰:『臣作朕股肱耳目。』」此云「爰作股肱」者,即 躁括〈皋陶謨〉之文也。

160. 「······漢之中葉,俊乂式序。」((文苑傳))

按:〈皋陶謨〉云:「九德咸事,俊乂在官。」此云「俊乂式序」者,驟括〈皋陶謨〉之辭也。

161. 「······農夫不怠,越有黍稷。·····₁(〈主苑傳〉)

按:〈盤庚上〉云:「乃不畏戎毒于遠邇,惰農自安,不昏作勞,不服田畝,越其罔有黍稷。」此云「農夫不怠,越有黍稷」者,即檃括〈盤庚上篇〉之文也。

162. 「·····惟家之索,牝鷄之晨。」(〈文苑傳〉)

按:〈牧誓〉云:「古人有言曰:『牝鷄無晨。牝鷄之晨,惟家之索。』」此云「惟家之索,牝鷄之晨」者,即檃括〈牧誓〉之文。此引二句倒序,乃行文之便耳。

163. 「……暴辛惑婦,拒諫自孤。」(〈文苑傳〉)

按:〈牧誓〉云:「今商王受,惟婦言是用。」又〈西伯戡黎〉曰:「王曰:『嗚呼!我生不有命在天。』」是受惑于妲己婦言而拒祖伊之諫也。此云「暴卒惑婦,拒諫自孤」者,乃櫽括〈牧誓〉、〈西伯戡黎〉之辭也。

164. 「……甲子昧爽。……」(〈文苑傳〉)

按:〈牧誓〉云:「時甲子昧爽,王朝至于商郊牧野,乃誓。」此云「甲子昧爽」者,即引〈牧誓〉之文。

165. 「……佞諂日熾,剛克消亡。」(〈文苑傳〉)

按:〈洪範〉云:「沈潛剛克,高明柔克。」此云「剛克」者,即引〈洪範〉 之辭也。

- 166. 「······〈夏書〉曰:『念茲在茲。』庶事恕施,忠智之謂也。」(〈文苑傳〉) 按:《左襄二十一年傳》引〈夏書〉云:「念茲在茲,釋茲在茲,名茲在茲, 允出茲在茲,惟帝念功。」此云〈夏書〉云云者,蓋引《左傳》所引〈夏書〉 之文也。杜預注云「逸書」,蓋其篇亡於秦漢之際,杜云逸書者是也。今本《尚 書》〈大禹謨〉亦有是文,乃襲取《左傳》所引爲之。
- 167. 「 ······· 悟稼穡之艱難。」(〈文苑傳〉) 按:〈無逸〉云:「君子其〈無逸〉。先知稼穡之艱難,乃逸。」此云「俉稼穡之艱難」者,乃檃括〈無逸〉之文。
- 168. 「······舉英奇於仄陋。·····」(〈文苑傳〉) 按:〈堯典〉云:「明明揚側陋。」此云「舉英奇於仄陋」者,蓋檃括〈堯典〉 之辭。作「仄」者,同音通用。(詳見第三章 19.條)
- 169. 「君明哲以知人,官隨任而處能。百揆時敘,庶績咸熙。諸侯慕義,不 召同期。」(〈文苑傳〉)

(1) 君明哲以知人,官隨任而處能

按:〈皋陶謨〉云:「知人則哲,能官人。」此云「君明哲以知人,官隨任而 處能」者,躁括〈皋陶謨〉之文也。

(2) 百揆時敘, 庶績咸熙

按:〈堯典〉云:「納于百揆,百揆時敘。」又云:「三考黜陟幽明,庶績咸熙。」 此云「百揆時敘」、「庶績咸熙」者,皆引〈堯典〉之文。

(3)諸侯慕義,不召同期

按:〈尚書正義泰誓序〉引馬融〈書序〉曰:「〈大誓〉云:『八百諸侯不召自來,不期同時,不謀同辭。』」馬融所引乃〈今文泰誓〉也。此引「諸侯慕義,不召同期」者,蓋櫽括〈今文泰誓〉之辭。(詳見第二章 2.條)

170. 「……明其果毅,尚其桓桓。」(〈文苑傳〉)

按:〈牧誓〉云:「勗哉夫子,尚桓桓。」此云「尚其桓桓」者,即引〈牧誓〉 之文。

171. 「臣聞洪水橫流,帝思俾乂。」(〈丈苑傳〉)

按:〈堯典〉云:「帝曰:『咨,四岳,湯湯洪水方割,蕩蕩懷山襄陵,浩浩滔天,下民其咨,有能俾乂?』」此云「洪水橫流,帝思俾又」者,即檃括〈堯典〉之辭。

172. 「……疇咨熙載,羣士響臻。」((文苑傳))

按:〈堯典〉云:「帝曰:『疇咨,若時登庸?』」又曰:「帝曰:『疇咨,若予 采?』」又云:「舜曰:『咨四岳,有能舊庸熙帝之載?』」此云「疇咨熙載」, 即櫽括〈堯典〉之文。

173. 「……遭遇戹運,勞謙日昊。」(〈文苑傳〉)

按:〈無逸〉云:「自朝至于日中昊,不遑暇食。」此云「勞謙日昊」者,即 櫽括〈無逸〉之文也。

174. 「……足以昭近署之多士,增四門之穆穆。」(〈文苑傳〉)

按:〈堯典〉云:「賓于四門,四門穆穆。」此云「四門之穆穆」者,即引〈堯典〉之文。又《尚書》有〈多士〉篇,其中即有「多士」一詞多見。

175. 箕子之術。(〈方術列傳〉)

按:〈洪範〉云:「惟十有三祀,王訪于箕子,王乃言曰:『嗚呼、箕子;惟天陰騭下民,相協厥居,我不知其彝倫攸敘。』箕子乃言曰:『我聞在昔,鯀陘洪水,汨陳其五行,帝乃震怒,不畀洪範九疇,彝倫攸斁,縣則殛死,禹乃嗣興,天乃錫禹洪範九疇,彝倫攸敘。』」箕子之術者,即箕子陳言武王洪範九疇之術也。

176. 「臣聞堯登稷、契,政隆太平。」(〈方術列傳〉)

按:〈堯典〉云:「帝曰:『棄,黎民阻飢,汝后稷,播時百穀。』帝曰:『契,百姓不親,五品不遜,汝作司徒,敬敷五教,在寬。』帝曰:『皋陶,蠻夷猾夏,寇賊姦宄,汝作士,五刑有服,五服三就,五流有宅,五宅三居,惟明克允。』」此云「堯登稷、契」、「舜用皋陶」者,即檃括〈堯典〉之文也。此〈堯典〉文之帝,皆指舜,而曰堯登者,蓋稷、契皆舊臣,舜仍其任故也,亦行文之便爾。

177.「出自東州·厥土塗泥。而英姿挺特·奇偉秀出·才兼四科·行包九德。」 (〈方術列傳〉)

按:〈禹貢〉云:「淮海惟揚州······厥土惟塗泥。」此云「厥土塗泥」者,即 骤括〈禹貢〉之文。

又:〈皋陶謨〉云:「亦行有九德。」此云「行包九德」者,即檃括〈皋陶謨〉 之文也。

178. 「上令三辰順軌於歷象,下使五品咸訓于嘉時,必致休徵克昌之慶。」 (〈方術列傳〉)

按:〈堯典〉云:「欽若昊天,曆象日月星辰。」此云「三辰順軌於歷象」者, 躁括〈堯典〉之文也。

又:〈堯典〉云:「百姓不親,五品不遜。」此云「五品咸訓」者,亦檃括〈堯典〉之文。此引作「訓」者,《今文尚書》也。

又:〈洪範〉云:「日休徵:日肅,時雨若;日乂,時暘若;日哲,時燠若; 日謀,時寒若;日聖,時風若。」此云「致休徵」者,即檃括〈洪範〉之文。

179. 是時白虹貫日,檀因上便宜三事,陳其咎徵。(〈方術列傳〉)

按:〈洪範〉云:「日咎徵、日狂,恒雨若;曰僭,恒暘若;曰豫,恒燠若;曰 急,恒寒若;曰蒙,恒風若。」此云「咎徵」者,乃櫽括〈洪範〉之文也。 180. 「······致來儀之鳳矣。」(〈逸民列傳〉)

按:〈皋陶謨〉云:「簫韶九成,鳳皇來儀。」此云「致來儀之鳳」者,躁括 〈皋陶謨〉之文也。

181. 《詩》《書》之言女德尚矣。(〈列女傳〉)

按:〈牧誓〉云:「古人言曰:『牝鷄無晨,牝鷄之晨,惟家之索。』」此云「詩書之言女德」者,檃括〈牧誓〉之義也。

182. 「……隆唐虞之政,闢四門而開四聰。」(〈列女傳〉)

按:〈堯典〉云:「闢四門,明四目,達四聰。」此云「闢四門而開四聰」者,即引〈堯典〉之文。此引作「開」者,蓋用《夏侯尚書》也。(詳見第三章29.條)

183. 昔堯命羲仲宅嵎夷,曰暘谷,蓋日之所出也。(〈東夷列傳〉)

按:〈堯典〉云:「分命羲仲,宅嵎夷,曰暘谷。」此云「堯命羲仲宅嵎夷,曰暘谷」者,即檃括〈堯典〉之文也。段玉裁《古文尚書撰異》云:「宅《今文尚書》作度。《周禮》注引『度西曰柳穀』,此鄭引《今文尚書》也。然則『宅嵎夷』、『宅南交』、『宅朔方』今文皆本作度矣。楊雄《方言》曰:『度,尻也。東濟海岱之間或曰度』,與《今文尚書》合。考『三危既宅』、《夏本紀》作『既度』、『是降北宅土』、《風俗通義》作『度土』、『五流有宅、五宅三居』,〈五帝本紀〉作『有度』、『五度』,然則凡《古文尚書》皆作宅,凡《今文尚書》皆作度。〈五帝本紀〉『居郁夷』,『居南交』,『居西土』、『居北方』,皆作居者,以訓詁字代之也。……《尚書正義》卷二夏侯、歐陽等書『宅嵎鐵』字作『宅』者,蓋誤依古文《尚書》。」「度」字《說文》三篇下云:「法制也。从又庶省聲。」七篇下云:「宅,人所託尻也。从一七聲。」度字爲定紐,古音在五部,宅字在澄紐,古聲在定紐,古韻在五部,二字古音相同,故可通借,而宅爲本字也。段氏言「宅」古文、「度」今文是也。

段氏又云:「嵎夷、《古文尚書》作堣夷、《今文尚書》今禺銕。《說文》十三篇土部曰:『堣夷在冀州陽谷,立春日日值之而出,从土禺聲。《尚書》曰『宅嵎夷』玉裁按此許用《古文尚書》也。惟從土與從山異,蓋《古文尚書》字本從土,轉寫誤從山。』」又「《說文》九篇山部暘字下曰『嵎銕,暘谷也』,玉裁按此用《今文尚書》也。嵎本是禺,或增山旁耳。《史記·夏本紀·索隱》曰『嵎夷』《今文尚書》及〈帝命驗〉並作「禺鐵」,《尚書·堯典·釋文》曰

『《尚書·考靈曜》及《史記》作「禺銕」』,《尚書正義》卷二曰『夏侯等書「宅 嵎夷」爲「宅嵎鐵」』,玉裁按『嵎鐵』即「禺銕」,銕者古文鐵字,鐵者鐵之 譌體也。……凡緯書皆出於漢人之手,故〈考靈曜〉、〈帝命驗〉皆用《今文尚 書》。《釋文》引《史記》作『禺銕』,今《史記》作『郁夷』,乃禺銕之別本。 郁在尤侯入聲,禺在侯部平聲。《釋文》之《史記》二字疑《說文》二字之誤, 謂山暘字下所云也。或陸氏所據《史記》與張守節司馬貞本不同。」段氏以郁、 禺乃同部陰聲入聲之轉,故相通。然則夏侯書作「禺銕」,史公多用歐陽說作 「郁夷」,古文作「堣夷」矣。

段氏又云:「《古文尚書》作暘、《今文尚書》作崵。《說文》七篇日部曰『暘, 日出也。从日易聲。〈虞書〉曰「曰暘谷」』,此與土部『宅堣夷』相屬稱《古 文尚書》也。九篇山部崵字下曰『一曰嵎銕,崵谷也』,此稱《今文尚書》也。 以嵎銕今文,則知相屬之崵谷今文無疑。」段論是也。又《史記・索隱》曰「《史 記》舊本作湯谷,今並依《尙書》字」。是《史記》本作「湯谷」,司馬貞據唐 《尚書》改之。作「湯谷」者、《史記》之外、《淮南子》云「日出湯谷、浴于 咸池」。《楚辭・天問》曰「出自湯谷」,王逸注云「言日出東方湯谷之中」,《論 衡·說日》篇曰:「〈禹貢〉《山海經》言日有十,在海外東方,有湯谷」、《說 文》云「叒,日初出東方湯谷所登摶桑叒木」、皆作湯、與《史記》同。然則 作「崵」者夏侯,作「湯」者歐陽歟?《說文》崵字云「首崵山在遼西」,《史 記・索隱》云「按《今文尙書》及〈帝命驗〉竝作禺鐵在遼西」則今文說以爲 地在遼西。《說文》暘字云「日出也」,又為下云「日初出東方湯谷」,則暘谷 當在日出東方之地矣;然《說文》堣字下云「堣夷,冀州睗谷」,而遼西正在 冀州,冀州在北方,則又與日出東方不同;江聲疑本作「青州」,作「冀州」 者乃後人所改。《釋文》引馬融曰「嵎,海隅也;夷,萊夷也。暘谷,海隅之 地名。」此是以〈禹貢〉青州「嵎夷既略」、「萊夷作牧」解之也,則馬融說與 《說文》日出東方湯谷合。《史記》作「郁夷」、「湯谷」,章太炎先生曰「按毛 詩『周道倭遲』,韓詩作「郁」,知此郁夷即「倭夷」,倭夷即今之日本,古之 扶桑也,湯谷又在日初出東方之處,是則史公說亦以爲在東方日出處也。《後 漢書・儒林傳》曰「林同郡賈達爲之作訓,馬融作傳,鄭玄注解。」則馬融當 爲古文家說矣,《史記》說同馬氏,蓋或从孔安國問故而得之;《說文》暘字叒 字之說亦古文說也;惟堣下之「冀州暘谷」又同今文之遼西,江聲疑作青州, 其或然也。今此引《書》在〈東夷列傳〉,且篇首云「〈王制〉曰『東方曰夷』」, 又云「蓋日之所出也」,則是用古文家之說也。偽孔傳云「東表之地稱嵎夷;

喝,明也,日出於谷而天下明,故稱暘谷。」則亦用古文說。

又:《尚書正義》曰:「庸生、賈、馬之等,惟傳孔學經文三十三篇,鄭與三家同以爲古文,而鄭承其後,所注皆同賈逵、馬融之學,題曰《古文尚書》,篇與夏侯等同,而經字多異。夏侯等書『宅嵎夷』爲『宅嵎鐵』,『昧谷』曰『柳谷』……是鄭注不同也。」閻若璩《尚書古文疏證》第二十三條以爲上爲夏侯等書,下爲鄭玄所據,如此則鄭於此用今文;段玉裁《古文尚書撰異》以爲上爲鄭所據,下爲夏侯等書,如此則鄭玄用古文;二說相反,然《周禮》縫人注引「度西曰柳穀」賈疏云:「是濟南伏生書傳文。」,夏侯歐陽皆出伏生,則作「柳谷」、「柳穀」;是夏侯等書在下也。由是知作「宅嵎鐵」爲夏侯等書,「宅嵎夷」爲鄭所據,則鄭玄於此亦用古文,段說是也。今此引《尚書》之文,文字與訓義均用《古文尚書》;僞孔亦同,蓋同本古文也。

- 184. **贊曰:「宅是嵎夷,曰乃暘谷。**」(〈東夷列傳〉) 按:〈堯典〉云:「分命羲仲,宅嵎夷,曰暘谷。」此贊曰云云,即引〈堯典〉 之文。(詳見本章 183 條)
- 185. 其在唐虞、與之要質,故曰要服。(〈南蠻西南夷列傳〉)

按:〈禹貢〉云:「五百里要服,三百里夷,二百里蔡。」此云「與之要質,故口要服」者,即解〈禹貢〉要服之義也。考《史記集解》引馬融曰:「蔡,法也;受王者刑法而已。」《釋文》引馬云「夷,易也」。《漢書·地理志》師古注曰:「要,以文教要束之也;夷,易也,言行平易之法也。三百里皆同。蔡,法也,遵刑法而已,二百里皆同。」《詩·齊譜正義》引鄭玄曰:「要服於周爲蠻服,其此當夷服,在四千里之內。」《尚書正義》引鄭注曰:「蔡之言殺,減殺其賦。」僞孔傳曰:「綏服外五百里,要束以文教」又曰:「守平常之教,事王者而已。」又曰:「蔡,法也。法三百里而差簡。」此與顏師古同,而師古用馬說,則其明用馬融之說。此云「與之要質,故曰要服」者,與僞孔傳所謂「要束以文教」不同。而此引文在〈南蠻西南夷列傳〉,與康成所言「要服於周爲蠻服」同義,則此當用鄭玄之說也。

186. 武陵太守上書,以蠻夷率服,可比漢人,增其租賦。(〈南蠻西南夷列傳〉) 按:〈堯典〉云:「食哉惟時,柔遠能邇,惇德允元,而難任人,蠻夷率服。」 此云「蠻夷率服」者,即引〈堯典〉文也。《史記》曰:「命十二牧論帝德行, 厚德遠佞人則蠻夷率服。」《漢書,景武昭宣元成功臣表敘》曰:「昔《書》稱 蠻夷帥服,許其慕諸夏也。」皮錫瑞《今文尚書考證》曰:「案《儀禮‧聘禮》 『使者朝服帥眾介夕』。鄭注『古文帥皆作率,帥大夫以八』,鄭注古文帥爲率, 則今文多作帥可知。《毛詩》『率時農夫』,《韓詩》作『帥時農夫』,毛用古文, 韓用今文,亦其證。」皮說是也。史公作率,與古文同,班固《漢書》作帥, 是今文小夏侯作「帥」也。鄭玄注古文必作「率」矣。僞孔號稱古文,作「率」; 此亦引作「率」,蓋亦同古文鄭氏說也。「帥」與「率」古音同在十五部,故可 通用,二字皆假借字也。

187. 西羌之本,出自三苗,姜姓之別也,其國近南岳,及舜流四凶,徒之三 危,河關之西南羌地是也。(〈西羌傳〉)

按:〈堯典〉云:「流共工于幽州,放驩兜于崇山,窳三苗之三危,殛鯀于羽山,四罪而天下咸服。」此云流四凶,徙之三苗者,乃檃括〈堯典〉之文也。此引作「徙之三苗」者,以訓詁字代之也。本字當作「糳」。(詳見第四章 10.條之(1))

考《史記集解》引馬融曰:「三危,西裔也。」又《尙書·堯典釋文》云:「馬、王云:『國名也,縉雲氏之後,爲諸侯,蓋饕餮也。』」《尙書正義》曰:「鄭玄俱引《左傳》之文,乃云『命驩兜舉共工,則驩兜爲渾敦也;共工爲窮奇也,縣爲檮杌也,而三苗爲饕餮亦可知。』」今僞孔傳云:「三苗,國名。縉雲氏之後爲諸侯,號饕餮。三危,西裔。」則知僞孔傳所據者,乃馬融之說也。又:僞孔傳云:「殛、竄、放、流皆誅也。」《正義疏》云:「孔傳竄三苗爲誅也,其身無復官爵。」而《尙書正義》於「分北三苗」下云:「鄭玄以爲流四凶者,卿爲伯,子、大夫爲男,降其位耳,猶爲國名,故以三苗爲西裔諸侯。」此可見僞孔傳說與鄭說大異。《尙書正義・禹貢》「三苗丕敘」下引鄭玄引《地記書》云:「三危之山,在鳥鼠之西,南當岷山,則在積石之西南。」又《禹貢釋文》引馬融曰:「析支在河關西。」今范曄云三危在河關之西南羌地,又云「濱於賜支,賜支即〈禹貢〉之析支」,正與鄭云「鳥竄之西,南當岷山,則在積石之西南」同地,然則范氏用鄭玄說可知矣。

188. 賜支者,〈禹貢〉所謂析支者也。(〈西羌傳〉)

按:此引〈禹貢〉文也。〈禹貢〉云:「崑崙、析支、渠搜、西戎即敘。」「賜」、 「析」二字,同屬心紐,古音在十六部,二字古音同,故可相通。

189. 及武王伐商, 羌、髳率師會于牧野。(〈西羌傳〉)

按:〈牧誓〉云:「時甲子昧爽,王朝至于商郊牧野,乃誓。……及庸、蜀、羌、髳、微、盧、彭、濮人。」此云「武王伐商,羌、髳率師會于牧野」者,引〈牧智〉之文也。考《史記》曰:「武王朝至于商郊牧野,乃誓。」《說文》土部坶字云:「〈周書〉武王與紂戰于坶野。」《大雅·大明》鄭箋云:「《書·牧誓》曰:『時甲子昧爽,武王朝至於商郊牧野。』段玉裁《古文尚書撰異》:「《詩·大明》『矢于牧野』《正義》曰『〈牧誓〉云「至于商郊牧野,乃誓」』,〈書序〉注云『牧野,紂南郊地名,《禮記》及《詩》作晦野,古字耳。』玉裁按此十七字皆鄭注也。其下文云『今文本又不同者』《正義》謂今本《詩》與《禮記》也。此可證鄭本《尚書》作牧不作母。許君《說文》土部坶字下云『朝歌南七十里地』,引『〈周書〉武王與紂戰于坶野』,此乃壁中原文,子國以今文字讀之改爲牧。」今所見本今古文家皆作「牧」,段說是也。二字皆屬明紐,古音在三部,音同故通用。僞孔傳云:「至牧地而誓眾。」又曰:「紂近郊三十里地名牧」則訓義與許不同。此引作「牧野」則依相傳之本耳。

190. 「……〈禹貢〉雍州之域,厥田惟上。」(〈西羌傳〉)

按:〈禹貢〉云:「黑水西河惟雍州。……厥土黄壤,厥田惟上上。」此云「雍州之域,厥田惟上」者,即〈禹貢〉之文也。此引少一「上」字者,行文之便耳。

191. 贊曰: 逷矣西胡, 天之外區。(〈西域傳〉)

按:〈牧誓〉云:「王左杖黄鉞,右秉白旄以麾曰:『逖矣西土之人。』」此云「逷矣西胡」者,檃括〈牧誓〉之文也。考《史記》曰:「曰:『遠矣,西土之人』。」《爾雅·釋故》:「逷,遠也。」郭注:「《書》曰:逷矣,西土之人。」《北齊書·文苑傳》顏之推〈觀我生賦〉曰:「逷西土之有眾。」《文選·李善注》兩引《書》皆作逷,是唐初本尚作「逷」,衛包據《說文》「逖」爲今字,「逷」爲古文改之。二字古音同在透細十六部,音同通用。

192. 「《書》戒猾夏。」(〈鳥桓鮮卑列傳〉)

按:〈堯典〉云:「蠻夷猾夏,寇賊姦宄。」此云「《書》戒猾夏」者,引〈堯典〉之文也。

第六章 結 論

東漢一代,承西漢之緒,經學昌明;《尚書》之學益盛,蓋《尚書》爲古聖王賢 臣治政之語;典謨誥誓,莫非君臣所必讀者;是以研習《尚書》之學者,代爲帝師, 尊崇極致。故皇帝詔令,群臣奏議,莫不援經引義,以爲依據。今就《後漢書》九 十篇中引《尚書》之情狀,總理如下,以見其大概焉。

(一) 范曄撰《後漢書》、《尚書》用鄭玄之學

范蔚宗嘗謂「贊自是吾文傑思,殆無一字空設」,「欲因就卷內發論,以正一代 得失」,是論贊之文,乃蔚宗學識所在;今考其論贊引《尚書》者,用鄭康成之說, 且其祖范甯教援必以鄭學,家學相傳,是知所撰《後漢書》亦用鄭說也。(詳見導論)

(二)《後漢書》載諸儒引《書》文字,從其原本師說

蔚宗刪削眾家,獨成《後漢》,所錄前儒引《書》文,多從其原本師說,不改經字。如〈皇后紀〉云:

太后諒闇既終。

其於〈魯肅傳〉記恭上疏之辭曰:

盡諒陰三年。

范氏作「諒闇」,魯恭作「諒陰」,是不改也。

(三)《後漢書》所引各家《尚書》之數

東漢諸儒引書,多用立官今文三家之文;然其文不載某用某家之說。然東漢古 文寖盛,范氏亦用鄭玄之學,多古文家言;是《後漢書》所引,三家及古文均有之。

1. 《古文尚書》

皇甫嵩《朱儁列傳》論曰:「而舍格天之大業,蹈匹夫之小諒。」此云「格天」者,即引〈君奭〉「伊尹格于皇天」之文。此引作格者,即爲《古文尚書》也。又〈杜

林傳〉云:「周之五刑,不過三千。」此即引〈呂刑〉五刑三千之說。杜林傳古文, 則此必古文說也。

2. 《歐陽尚書》

《後漢書》中,授《歐陽尚書》之儒,所引皆歐陽一家之說。如〈楊震傳〉, 震因地震,上疏曰:「《書》曰:『僭恒陽若,臣無作威作福玉食。』」此必爲歐陽 家之文。

3. 《大夏侯尚書》

《後漢書》中,以《大夏侯尙書》教授者,所引皆《大夏侯尙書》。如〈宋意傳〉 意上疏諫曰:「陛下至孝烝烝,恩愛隆深。」此云「至孝烝烝」者,即引〈堯典〉「以 孝,烝烝乂」也。宋意習《大夏侯尙書》(見等言),此必爲大夏侯之說。

4. 《小夏侯尚書》

《後漢書》中,習《小夏侯尚書》者,所引當爲小夏侯之說。如〈班固傳〉〈典引〉云:「股肱既周,天乃歸功元首。」此乃用〈皋陶謨〉「元首明哉,股肱良哉」之辭。班固習《小夏侯尚書》,則此用小夏侯之學。

(四)《後漢書》引《尚書》稱名

《後漢書》中引《尙書》稱名不一,有如下諸式。

1. 稱引篇名

《後漢書》引《尚書》,有稱引篇名者,如〈陳忠傳〉忠上疏曰:「臣聞〈洪範〉 五事,一曰貌,貌以恭,恭作肅。」

2. 稱《書》曰

《後漢書》引《尙書》,或稱《書》曰。如〈張純傳〉純奏上宜封禪曰:「《書》曰:『歲二月,東巡狩,至于岱宗,柴。』,則封禪之義也。」

3. 稱經日

《後漢書》引《尚書》,或稱經曰。如〈梁充傳〉統對曰:「聞聖帝明王,制立刑罰;故雖堯舜之盛,猶誅四凶。經曰:『天討有罰,五刑五庸哉。』,又曰:『爰制百姓于刑之中。』」

4. 引《書》不舉篇名,不稱經曰、《書》曰

《後漢書》引《尚書》,或直引其句,不舉篇名,不稱《書》曰、經曰者。如〈李雲傳〉曰:「臣聞皇后天下母,德配坤靈得其人則五氏來備,不得其人則地動搖宮。」此「五氏來備」即〈洪範〉「曰時五者來備,各以其敘」也。

5. 躁括文義

《後漢書》引《尙書》,或用櫽括之辭。如〈鄧禹傳〉禹上言曰:「方諒闇密靜之時。」此即櫽括〈無逸〉「乃或諒陰」及〈堯典〉「四海遏密八音」者也。

(五)《後漢書》引《尚書》文句

《後漢書》引《尚書》文句,多引用原文,然亦有增減文字,改易辭句者。

1. 用原文

《後漢書》引《尚書》原文,其例非少。如《章帝八王傳》梁太后下詔曰:「……《書》不云平:『用德章厥善。』」此即〈磐庚〉之文也。

2. 引文增字

《後漢書》引《尚書》,有於原文略加數字,以助文氣者。如〈班固傳‧典引〉云:「汪汪乎丕天之大律。」《漢書‧郊祀志》引〈泰誓〉曰:「正稽古立功立事,可以永年,丕天之大律。」此則多「汪汪乎」三字,以增其氣。

3. 引文省字

《後漢書》中引《尙書》文,有省字者。如〈陳忠傳〉忠上疏曰:「是用明者慎微,智者識幾。」《書》曰:「小不可不殺。」〈康誥〉云:「有厥罪,小乃不可不殺。」此引文少「乃」字。又〈申屠剛傳〉云:「伏念本朝躬聖德,舉義兵,龔行天罰。」〈甘誓〉云「今予惟恭行天之罰」,〈牧誓〉云「今予發惟恭行天之罰」,此引少「之」字,以順文氣。

4. 變易文辭

《後漢書》引《尙書》文,時有稍變其文者。如〈陳忠傳〉忠上疏薦愷曰:「股肱元首,鼎足居職,協和陰陽,調訓五品。」此云「調訓五品」,即引〈堯典〉「五品不遜」而稍變易之。又崔琦〈外戚箴〉云:「惟家之索,牝雞之晨。」此引〈牧誓〉「牝雞之晨,惟家之索」而倒易其文。

(六)《後漢書》引《尚書》之作用

《後漢書》中載東漢諸儒引書者甚多,范曄論贊,亦多引用,考其作用,凡有數端。

1. 歌功頌德

《後漢書》引《尚書》以歌功頌德者極多。如〈光武紀〉群臣因復奏曰:「受命之符,人應爲大;萬里合信,不議同情,周之白魚,曷足比焉。」此即檃括〈今文泰誓〉之辭以頌光武之德也。

2. 褒貶人物

《後漢書》引《尙書》文,時亦以爲褒貶人物之用。如〈肅宗・章帝紀〉論曰:

「章帝素知人厭明帝之苛切:……割裂明都,以崇建周親。平伐簡賦,而人賴其慶。 又體之以忠恕、文之以禮樂。故乃蕃輔克諧,群后德讓。」此褒章帝也。

又〈宦者列傳〉贊曰:「任失無小,過用則違。況乃巷職,遠參天機。舞文巧態, 作惠作威,凶家害國,夫豈異歸。」此貶宦者之亂政也。

3. 勉諭諷勸

東漢君臣相勸勉者,莫不援引《尚書》文爲之。《後漢書》載之頗多。如〈梁統傳〉汝南哀者詣闕上書曰:「……昔舜、禹相戒,無若丹朱;周公戒成王,無如殷王 紂。」此所以諷戒桓帝也。

又〈顯宗·孝明帝紀〉明帝詔曰:「……有司其勉順時氣,勸督農桑,去其螟蜮, 以及蝥賊;詳刑慎罰,明察單辭,夙夜匪懈,以稱朕意。」此明帝勉諭臣下也。

4. 說明古制

《後漢書》引《尙書》者,亦有以說明古制。如〈張純傳〉純奏上宜封禪曰:「《書》曰:『歲二月,東巡狩,至于岱宗,柴。』,則封禪之義也。」此借以明古封禪之制也。

5. 改革之據

古人上言改革時政,多援引經書以爲依據;《後漢書》載東漢諸儒進言改革時弊者,援引《尙書》極多。如〈陳寵傳〉寵鈞校律令條法,溢於〈甫刑〉者除之,曰:「臣聞禮經三百,威儀三千;故〈甫刑〉大辟二百,五刑之屬三千。禮之所去,刑之所取,失禮則入刑,相爲表裏者也。今律令死刑六百一十,耐罪千六百九十八,贖罪以下二千六百八十一,溢於〈甫刑〉者千九百八十九,其四百一十大辟,千五百耐罪,七十九贖罪。《春秋保乾圖》曰:『王者三百年一蠲法。』漢興以來三百二年,憲令稍增,科條無限。又律有三家,其說各異,宜令三公、廷尉平定律令,應經合義,可使大辟二百,而耐罪、贖罪二千八百,并爲三千,悉刪除其餘令,與禮相應,以易萬人視聽,以致刑措之美,傳之無窮。」此即引〈甫刑〉三千之數據,以求削減律令科條也。

(七)《後漢書》未引《偽古文尚書》

《後漢書》著成於宋元嘉之時,而其中引《尙書》之文極多,然通考全書所引《尙書》文句,除〈董卓傳〉「刳肝斮趾之性」,「崑岡之火,自茲而焚」二句,有似《僞古文尙書》之外,他皆略未引及;而「刳肝」「崑岡」二句,經考辨知其非出於《僞孔古文尙書》(見等言),然則《後漢書》於《僞孔古文尙書》,實未引及。復以《後漢書》引《尙書》文之分篇情況,〈堯典〉與今之〈舜典〉合一,〈皋陶謨〉與

今之〈益稷〉合一,與漢、魏時今文二十九篇之數正同,而與今本僞孔古文相錯(亦 見等言),由是益可證《後漢書》未引《僞古文尚書》矣。以此知之,范曄著《後漢 書》時,《僞孔古文尚書》實未出世也。

附錄 司馬彪《續漢志》引《尙書》考辨

1. 〈虞書〉曰:「律和聲。」(〈律曆志〉)

按:〈堯典〉云:「詩言志,歌永言,聲依永,律和聲。」此云〈虞書〉曰者,即引〈堯典〉之文也。

2. ······朕以不德,奉承大業,夙夜祗畏,不敢荒寧,予末小子······。(〈律曆 志〉)

按:〈無逸〉云:「嚴恭寅畏,天命自度,治民祇懼,不敢荒寧。」此云「夙夜祇 畏,不敢荒寧」者,即隱括〈無逸〉之辭。

又:〈顧命〉云:「王再拜與。答曰:『眇眇予末小子。』」此云「予末小子」,即引〈顧命〉之文。

3. ……夫庶徵休咎,五事之應。(〈律曆志〉)

按:〈洪範〉云:「八、庶徵:曰雨、曰暘、曰燠、曰寒、曰風、曰時,五者來備,各以其敘,庶草蕃廡。一極備凶,一極亡凶。曰休徵:曰肅,時雨若;曰乂,時陽若;曰晢,時燠若;曰謀,時寒若;曰聖,時風若。曰咎徵:曰狂,恒雨若;曰僭,恒暘若;曰豫,恒燠若;曰急,恒寒若;曰蒙,恒風若。」又曰:「二、五事:一曰貌,二曰言,三曰視,四曰聽,五曰思。貌曰恭,言曰從,視曰明,聽曰聰,思曰睿。恭作肅,從作乂,明作哲,聰作謀,睿作聖。」此云「庶徵休咎,五事之應」者,櫽括〈洪範〉之辭也。

4. 《書》曰:「惟先假王正厥事。」又曰:「歲二月,東巡狩,至岱宗,柴。 望秩于山川。遂覲東后。叶時月,正日。」祖堯岱宗,同律度量,考在璣 衡,以正曆象。(〈律曆志〉)

(1)《書》曰:「惟先假王正厥事。」

按:〈高宗肜日〉云:「祖己曰:『惟先格王正厥事。』」此稱《書》曰云云者,即引〈高宗肜日〉之文。此引作「假」者,用《今文尚書》也。(說見第二章 12.條(4))

(2)又曰:「歲二月,東巡狩,至于岱宗,柴。望秩于山川,肆覲東后。協時、 月,正日。」

按:此所云「又曰」,承上《書》曰,正引〈堯典〉之文。此引作「狩」者,乃《今文尚書》(見二章 38 條)。「至岱宗」無「于」字者,引文不嚴故也。「遂覲東后」作「遂」者,《夏小正傳》云「肆,遂也。」江聲《尚書集注音疏》云:「肆有遂誼。」然則作「遂」者乃以訓詁字代經字也。又作「叶」者《說文》十三篇下云「協,同眾之龢也。从劦十。叶,古文協。从口十。」段注云:「字見《周禮》大史協事注曰『故事協作叶』。杜子春之『叶,協也』」然則協、叶一字之異體,故相通作也。

(3)同律度量

按:〈堯典〉云:「同律度量衡,修五體、五玉。」此云「同律度量」者,即引〈堯典〉文。

(4)考在璣衡,以正曆象

按:〈堯典〉云:「在璿璣玉衡,以齊七政。」又曰:「欽若昊天,曆象日月星辰。」 此云「考在璣衡,以正曆象」者,即檃括〈堯典〉之文。此引作「璣」者,與漢 魏至唐初本作「機」者不同,而同今本《尚書》者,皆後人改之。(說見第二章 54.條)

5. ……冀百君子越有民,同心敬授,儻獲咸熙。(〈律曆志〉)

按:〈召誥〉云:「予小臣,敢以王之讎民百君子越友民,保受王威命明德。」此云「百君子越有民」者,即引〈召誥〉之辭。此引作「有民」者,蓋《今文尚書》。 考〈牧誓〉「友邦」,《史記》作「有國」,此作「有」者亦類之。僞孔傳解作「友愛民者」,甚不辭,友當解作有無之有,猶〈呂刑〉之「有邦有土」之有,文義乃順。有、友古音同在一部,故可通作。

又:〈堯典〉云:「三歲考續,三考黜陟幽明,庶績咸熙。」此云「儻獲咸熙」者,即引〈堯典〉之文也。

6. 〈洪範〉「日月之行,則有冬夏。」(〈律曆志〉)

按:〈洪範〉云:「日月之行,則有冬有夏。」此云〈洪範〉云云者,即引其文。 此引少一有字者,引文不嚴與行文之便耳。

7. 不稽先代,違於帝典。((律曆志))

按:〈堯典〉云:「曰若稽古帝堯。」此云「不稽先代,違於帝典」者,即臻括〈堯典〉之義也。此以「不稽先代」釋「稽古」,是以「順考古道而行之」同義。考陳壽之《三國志・少帝紀》云:「高貴鄉公幸大學,講《尚書》。帝問曰:『鄭玄云「稽古同天,言堯同于天也」,王肅云「堯順考古道而行之」,二義不同,何者爲是?』博士庾峻對曰:『先儒所執,各有乖異,臣不足以定之:然〈洪範〉三人占從二人之言,賈、馬及肅皆以爲順考古道,以〈洪範〉言之,肅義爲長。』」又《尚書正義・堯典》云:「鄭玄信緯,訓稽爲同,訓古爲天,言能順天而行之,與之同功。」緯書之說爲今文之學,則鄭玄同天之說乃用今文家說也;賈,馬皆古文家,則「順考古道」爲古文說矣。又考《後漢書·范升傳》曰「臣聞主不稽古,無以承天」,說同鄭玄,考范升爲建武博士,時尚書令韓歆欲爲〈費氏易〉、《左氏春秋》之博士,升獨持不可之議,是非好古學者也,然則「稽古同天」之說爲今文家言,為有證據。

8. 刑犴以錯, 五是以備。(〈律曆志〉)

按:〈洪範〉云:「八、庶徵: 曰雨、曰陽、曰燠、曰寒、曰風,曰時五者來備, 各以其敘,庶草蕃廡。」此云「五是以備」者,即引〈洪範〉之文也。此作「五 是」者,蓋《今文尚書》作「五是來備」,《古文尚書》作「曰時五者來備」,二 者不同。(說見第五章 48.條)

9. 昔堯命羲和、曆象日月星辰;舜叶時、月,正日。(〈律曆志〉)

按:〈堯典〉云:「乃命羲和,欽若昊天,曆象日月星辰,敬授人時。」此云「堯命羲和,曆象日月星辰」者,即引〈堯典〉之文。〈堯典〉又云:「協時、月,正日。」此云「舜叶時、月,正日」者,即引〈堯典〉之文也。此引作「叶」者,協、叶一字異體也(見《說文》)。

10. 戒以「蠻夷猾夏、寇賊姦宄・」(〈律曆志〉)

按:〈堯典〉云:「蠻夷猾夏,寇賊姦宄。」此戒以云云者,正引〈堯典〉之文也。

11. 然協曆正紀,欽若昊天。(〈律曆志〉)

按:〈堯典〉云:「乃命羲和,欽若昊天,曆象日月星辰。」又云:「協時、月, 正日。」此云「協曆正紀,欽若昊天」者,即櫽括〈堯典〉之文。

12. 承聖帝之命,欽若昊天,典曆象三辰,以授民事,立閏定時,以成歲功, 義和其隆也。(〈律曆志〉)

按:〈堯典〉云:「乃命羲和,欽若昊天,曆象日月星辰,敬授人時。」又云:「咨汝羲暨和,朞三百有六旬有六日,以閏月定四時成歲。」此云「羲和其隆」者,即檃括〈堯典〉之文。

13. 夏后之時,羲和淫湎,廢時亂日,胤乃征之。(〈律曆志〉) 按:〈書序〉云:「羲和湎淫,廢時亂日,胤往征之。」此云「羲和淫湎,廢時 亂日,胤乃征之」者,即櫽括其文。

14. 紂作淫虐,喪其甲子,武王誅之。(〈律曆志〉)

按:〈牧誓〉云:「時甲子昧爽,王朝至于商郊牧野,乃誓。」又曰:「今商王受,惟婦言是用,昏弃厥肆祀,弗答;昏弃厥遺王父、母弟,不迪;乃惟四方之多罪逋逃,是崇是長,是信是使,是以爲大夫卿士,俾暴虐于百姓,以姦宄于商邑。今予發恭行天之罰。」此云「紂作淫虐,喪其甲子,武王誅之」者,即檃括〈牧誓〉之義也。

15. 不豫。(〈禮儀志〉)

按:〈金縢〉云:「王有疾,弗豫。」此云「不豫」者,即引〈金縢〉之文。此作「不豫」者,弗、不古同重唇入聲,聲音相近,古書亦多通作。

16. 秀猶固辭,至于再,至于三。(〈祭祀志〉)

按:〈多方〉云:「我惟時其教告之,我惟時其戰要囚之,至于再,至于三。」 此云「至于再,至于三」者,即引〈多方〉之文。

17. 皇帝東巡狩,至于岱宗,柴;望秩於山川,班于羣神,遂覲東后。(〈祭祀 志〉)

按:〈堯典〉云:「歲二月東巡守,至于岱宗,柴;望秩于山川,肆覲東后。」 又曰:「肆類于上帝,禋于六宗,望于山川,徧于羣神。」此云「東巡狩,至于 岱宗,柴;望秩於山川,班于羣神,遂覲東后」者,即引〈堯典〉之文也。此

以「班于羣神」置於東巡狩事之下,似本有是句者,此涉上文「禋于六宗,望 于山川,徧于墓神」句而誤合爲一。考〈堯典〉上文稱「禋于六宗,望于山川, 徧于墓神」,其「望于山川」,今文或作「望秩于山川」者(説見第二章 5.條) 與東巡狩事下句同,故此刻石文或取其句連屬於此,以廣其義,此實合並成章, 非有異文也。《詩‧周頌‧鄭箋》曰:「《書》曰『歲二月,東巡狩,至于岱宗, 柴;望秩于山川,徧于羣神。』於東巡狩事下交有「徧于羣神」句,陳喬樅謂 「據光武泰山刻石亦有『班于墓神』四字,與鄭所引《尚書》文合,是《今文 尚書》本有此句也。」今考〈光武紀〉云「王莽天鳳中,乃之長安,受《尚書》, 略通大義」;《後漢書・張酺傳》云「酺少從充受《尙書》,能傳其業。又事太常 桓榮。」注引《東觀記》曰「充與光武同門學」,則光武與張充爲同學,所習當 同;酺傳充業,而又事桓榮,榮乃習《歐陽尚書》者也(見本傳),然則所傳祖 學與榮當相同,即歐陽之學,如此則光武所習亦歐陽學矣。今《續漢志・律曆 志》元和二年詔(章帝)引此文,無「班于羣神」句,章帝受書于桓郁,郁乃 桓榮子,所傳亦《歐陽尙書》也,引文無「班于羣神」四字,是本無此四字也。 且鄭玄注《古文尚書》,雖兼採古今文之說,而其注《大傳》、《書緯》,則用《今 文尚書》,今鄭箋引《書》非今文之注,所引非《今文尚書》,其引文作「徧」 與今文作「班」、「辯」異(詳見下),是引文明非《今文尚書》之證也,陳氏之 說未允。《周頌正義》云「《書》二月不言徧于墓神。此一句衍文,定本集注皆 有此一句,是由二文相涉,後人遂增之耳」,其言爲是。

又:此引作「班」者,考《史記・五帝本紀》云「遂類于上帝,禋于六宗,望于山川,辯于羣神」,徐廣曰「辯音班」,《正義》曰「辯音遍,謂遍祭羣神也」,楊雄〈太常箴〉曰「稱秩元祀,班于羣神」,漢樊毅〈修西嶽廟記〉曰「乃利祀典,辨于羣神」。惠棟《九經古義》云:「《史記》作辯,漢樊毅〈脩西嶽廟記〉云辯于羣神,〈儀禮・鄉飲酒禮〉云『眾賓辯』,鄭康成云『今文辯皆作徧』,是辯爲古文,徧爲今文也。」段玉裁《古文尚書撰異》云:「蓋今文家辯讀班,相傳如此。惠氏定字《左傳補注》云『〈王莽傳〉辨社諸侯,義作班。《左氏襄公廿五年傳》云男女以班,劉炫說哀元年蔡人男女以辨,與此同』。玉裁謂襄廿五年之男女以班,眾男女別而纍,而哀元年之男女以辨,更此同』。玉裁謂襄廿五年之男女以班,眾男女別而纍,而哀元年之男女以辨,更此同』。玉裁謂襄廿五年之男女以班,眾男女別而纍,而哀元年之男女以辨,更此同』。玉裁謂襄廿五年之男女以班,眾男女別而纍,而哀元年之男女以辨,更此同』。玉裁謂襄廿五年之男女以班,眾男女別而纍,而哀元年之男女以辨,與此同』。玉裁謂襄廿五年之男女以班,眾男女別而纍,而哀元年之男女以辨,其事一也。班別辨一聲之轉。〈士虞禮〉『明日以其班祔』,鄭康成說古文班爲辨。玉裁以爲今古文皆作辨,實有躓于山陵之失,且所謂「古文班爲辨」未必與《尚書》相涉也。惠氏據《鄉飲酒注》「今文辯皆作編」,即斷辯爲古文,徧爲今文,亦欠詳審;《鄉飲

酒》云「每一人獻則薦諸其席,眾賓辯有脯醢」,鄭注云「亦每一獻薦於其位,位在下。今文辯皆作徧」,考之經文注文,此所謂「今文辯皆作徧」者,乃釋其義,謂今經文作辯者皆當作徧解,否則鄭注于「辯」字無釋矣,且其謂「每一人」,是宜解作「徧」,其義乃順。《詩·時邁序·正義》、《史記·五帝本紀》注引鄭注云「徧以尊卑次秩祭之」,鄭注《古文尚書》,今注如此,則其據本作徧當可信,是徧爲古文也,惠氏以徧爲今文未允。徧、辯、辨,皆幫紐,古音同在十一部,班字亦幫紐,古音在十四部,十二、十四音近,同屬舌尖鼻音,故四字古多通用,徧爲古文,辯辨班乃三家異文也。

19. 罪人斯得。黎庶得居爾田,安爾宅。(〈祭祀志〉)

按:〈金縢〉云:「周居東二年,則罪人斯得。」此云「罪人斯得」者,即引〈金縢〉之文。

又:〈多方〉云:「今爾尚宅爾宅, 畋爾田。」此云「居爾田, 安爾宅」者,即 躁括〈多方〉之義也。

20. 同律度量衡。修五禮,五玉,三帛,二牲,一死。贄。(〈祭祀志〉)

按:〈堯典〉云:「同律度量衡,修五禮,五玉,三帛,二牲,一死,贄。」此云「同律度量衡。修五禮,五玉,三帛,二牲,一死,贄」者,即引〈堯典〉之文。考《史記·五帝本紀》作「二生、一死、摯。」〈封禪書〉引《尚書》曰:「三帛、二牲、一死、贄。」《漢書·郊祀志》曰:「三帛、二牲、一死爲贄。」考《史記》一作「生」一作「牲」,《漢書》作「牲」,班固習小夏侯今文、史公亦用歐陽今文之說,則今文本作「牲」字,歐陽夏侯同,《五帝紀》作「生」者,恐後人改耳;今此作「牲」,用《今文尚書》也。

又:〈五帝本紀〉作「擊」,〈封禪書〉作「贄」,〈帝紀・正義〉云:「摯音至。摯,執也。鄭玄云『贄之言至,所以自致也。』」《釋文》曰:「贄本又作摯。」《說文》十二篇女部曰:「墊,至也。从女執聲。〈商書〉曰『大命不勢』。讀若摯同。一曰〈虞書〉雉墊。」段玉裁《古文尚書撰異》云:「〈虞書〉雉墊即〈堯典〉云一死摯也。此與土部堋字下文法正同。大命墊,其字之本義也,雉墊則引伸假借也。故引〈虞書〉在〈商書〉之後,中以讀若摯同,一曰隔之。《古文尚書》〈商書〉皆不作墊而作摯者,安國以今文讀之,既改從今文矣。」則壁中字本作「墊」,安國讀之改作「摯」。段氏又曰:「贄者後出之俗字,故定從摯。《說文》小徐本曰『从手執聲』,則知作贄者誤也。」段說可從。今之作「贄」

者,本當作「摯」也。鄭玄以至言摯,蓋得古文義矣。

21. 乾乾日昊,不敢荒寧。(〈祭祀志〉)

按:〈無逸〉云:「自朝至于日中昊,不遑暇食。」此云「日昊」者,即引〈無逸〉文也。〈無逸〉又云:「治民祗懼,不敢荒寧。」此云「不敢荒寧」者,亦引〈無逸〉之文。

22. 安帝即位,元初六年,以《尚書》歐陽家說,謂六宗者,在天地四方之中,為上下四方之宗。以元始中故事,謂六宗《易》六子之氣,日、月、雷公、風伯、山、澤者為非是。(〈祭祀志〉)

按:〈堯典〉云:「禋于六宗。」此所謂歐陽家說者,即歐陽解六宗之說也。六宗之說紛紜,詳見第五章 133 條。此所謂元始故事者,即西漢平帝之事也。時王莽秉權,其言說大行於廊廟;劉昭注引《李氏家書》曰:「及王莽謂六宗,易六子也。」則此謂「六宗《易》六子之氣」者,即王莽之說也。又注引劉歆云「六宗謂水、火、雷、風、山、澤」,引賈逵曰「六宗謂日宗、月宗、星宗、岱宗、海宗、河宗也」,此云日、月、雷公、風伯、山、澤者,即泛指古文諸家異說也。

23. 而堯時棄為后稷,亦植百穀。(〈祭祀志〉)

按:〈堯典〉云:「棄,黎百阻飢,汝后稷,播時百穀。」此云「堯時棄爲后稷, 亦植百穀」者,即櫽括〈堯典〉之義。

24. 論曰: ……言天地者莫大於《易》,《易》無六宗在中之象。若信為天地四方所宗,是至大也,而比太社,又為所失,難以為誠矣。(〈祭祀志〉)按:〈堯典〉云:「禋于六宗。」此所論六宗者,即〈堯典〉之六宗也。此論乃針對附錄 22.條安帝之事而言。《漢書·郊祀志》引歐陽、大小夏侯解六宗之說曰:「六宗上不謂天,下不謂地,傍不謂四方,在六者之間,助陰陽變化者也。」安帝據《歐陽尚書》說謂六宗者,在天地四方之中,爲上下四方之宗,與《漢書·郊祀志》正同。今司馬彪云「若信爲天地四方之宗,是至大也,而比太社,又爲所失」,則其不从今文三家之說明矣。彼引《易》無六宗在中之象,以《易經》爲據,則其說似本王莽之論(詳見附錄 22.條)。下贊曰「天地禋郊」,以屬天地禋,則本伏生馬融「非天不覆,非地不載」之說也。(詳見第五章 133 條)

- 25. 贊曰:天地禋郊,宗廟享祀,咸秩無文,山川具止。(〈祭祀志〉)
 - 按:〈堯典〉云:「肆類于上帝,禋于六宗,望于山川,徧于羣神。」又〈洛誥〉云:「惇宗將禮,稱秩元祀,咸秩無文。」此贊曰云云者,即檃括〈堯典〉、〈洛 誥〉之文也。
- 26. 唐虞之時, 義仲, 和仲。(〈天文志〉)按:〈堯典〉云:「乃命義和,欽若昊天。」又曰:「分命義仲, 宅嵎夷。」又曰:

「分命和仲, 宅西。」此云「唐虞之時, 羲仲、和仲」者, 即檃括〈堯典〉之 文也。

27. 〈五行傳〉曰:「田獵不宿,飲食不享,出入不節,奪民農時,及有姦謀,則木不曲直。」謂木失其性而為災也。又曰:「貌之不恭,是謂不肅。厥咎狂,厥罰恒雨,厥極惡。時則有服妖,時則有龜孽,時則有鷄禍,時則有下體生上之痾,時則有青貴、青祥,惟金沴木。」說云:「氣之相傷謂之沴。」(〈五行志〉)

按:此引〈五行傳〉者,即《洪範五行傳》也。田獵不宿至木不曲直一段,即解五行中之「木曰曲直」、「曲直作酸」也。其下所引,則爲五事之「貌」、「貌曰恭」、「恭作肅」與庶徵之雨,休徵之肅,咎徵之狂之關係,及不恭之妖祥也。注引鄭注云:「貌曰木,木主春,春氣生,生氣失則踰其節,故常雨也。」則鄭注《大傳》文所本作「常雨」,今此引作「恒雨」,蓋據經文「恒雨若」爲之,且恒常義同,古亦多相通作,且漢文帝名恆,漢代著作多加避諱,改作常,如恒山亦稱常山是也。

- 28. 〈五行傳〉曰:「好攻戰,輕百姓,飾城郭,侵邊境,則金不从革。」謂金失其性而為災也。又曰:「言之不从,是謂不义。厥咎僭,厥罰恒陽,厥極憂。時則有詩妖,時則有介蟲之孽,時則有犬禍,時則有口舌之痾,時則有白眚、白祥,惟木沴金。」(〈五行志〉)
 - 按:此引即《洪範五行傳》也。好攻戰至金不从革者,釋《洪範》五行之金,「金 日從革」、「從革作辛」諸句也。其下所引者,則爲解《洪範》五事之言,「言日 從」、「從作乂」與庶徵之場,休徵之乂,咎徵之僭之關係及其不至之妖祥也。
- 29. 〈五行傳〉曰:「棄法律,逐功臣,殺太子,以妾為妻,則火不炎上。」 謂火失其性而為災也。又曰:「視之不明,是謂不悊。厥咎舒,厥罰常燠,

厥極疾。時則有草妖,時則有嬴蟲之孽,時則有羊禍,時則有赤眚、赤祥,惟水沴火。」嬴蟲,《劉歆傳》以為羽蟲。(〈五行志〉)

按:此引《洪範五行傳》也。棄法律至火不炎上者,釋《洪範》五行之火,「火 日炎上」、「炎上作苦」諸句也。又下引文至惟水沴火者,乃解五事之視,「視曰 明」、「明作哲」與庶徵之燠,休徵之哲,咎徵之豫之關係及不明之妖祥也。〈洪 範〉云:「明作哲。」此云「視之不明,是謂不悲」,作「悲」者,段玉裁《古 文尚書撰異》云:「《說文》七篇日部『哲、昭哲,明也。从日折聲』。二篇口部 『哲,知也。从口折聲』。十篇心部『悊,敬也。从心折聲』。三字各有所屬本 義,而經傳多相假借。」考《說文》哲下云「悊、哲或从心」,則哲、悊於漢時 已通用。哲,僞孔傳云「照了」,是所據本作哲,《史記·宋世家》云「明作智」, 則史公所據本作「哲」或作「悊」也。《詩·小雅·小旻正義》引鄭玄云:「哲, 讀爲悊。」又曰:「君視明則臣照悊也。」則鄭本作哲。今僞孔本作哲,據鄭古 文本也。哲、哲、悊三字皆折聲,古音相同,故相通作。

又:〈洪範〉咎徵曰「曰豫,恒燠若」,此作「舒」者,考《史記·宋世家》作「舒,常奥若」,《漢書·五行志》作「舒,恒奥若」,皆作舒,與此同;段玉裁《古文尚書撰異》云:「舒,僞孔本作豫,鄭王本作舒。鄭云『舉遲也』;王云『舒、惰也』合之。《大傳》作茶,《宋世家》、〈五行志〉、《漢紀》、《何休公羊注》、《論衡》作舒。茶亦舒也;是《今文尚書》皆作舒。舒與急爲反對之詞,此經當從鄭、王本。僞孔作豫,訓逸豫,義稍隔。」據段說則今古文皆作舒也;茶、舒、豫三字,古音同爲定紐五部,同音故可通作,段說是也。

又:此云「嬴蟲,《劉歆傳》以爲羽蟲」者,考《春秋繁露·五行順逆》篇云:「如人君惑於讒邪,內離骨內,外疏忠臣,至殺世子,誅殺不辜,逐忠臣,以妾爲妻,棄法令,婦妾爲政,賜子不當,則民病;血壅腫,目不明,咎及於火,則大旱,必有火災;摘巢探縠,咎及羽蟲,則蜚鳥不爲,冬應不來,梟鶚羣鳴,鳳凰高翔。」然則劉歆說〈五行傳〉以爲羽蟲者,蓋亦有所本也。司馬彪於此段後亦引嬴蟲而多記羽蟲之孽,是亦據董、劉之說,以廣記異。

30. 〈五行傳〉曰:「簡宗廟,不禱祀,逆天時,則水不潤下。」謂水失其性而為災也。又曰:「聽之不聰,是謂不謀。厥咎急,厥罰恒寒,厥極貧。時則有鼓妖,時則有魚孽,時則有豕禍,時則有耳痾,時則有黑眚;黑祥,惟火沴水。」魚孽,《劉歆傳》以為介蟲之孽,謂蝗屬。(〈五行志〉)按:此引《洪範五行傳》也。簡宗廟至水不潤下者,釋五行之水,「水曰潤下」、

「潤下作鹹」諸句也。聽之不聰至惟火沴水者,乃釋五事之聰,與庶徵之寒, 休徵之謀,咎徵之急,六極之貧之關係及其不至之妖祥也。又引《劉歆傳》以 爲介蟲之孽,謂蝗屬,而其後記有巨魚出及蝗災之事,是兩取之以爲錄也。

31. 〈五行傳〉曰:「治宮室,飾臺榭,內淫亂,犯親戚,侮父兄,則稼穑不成。」謂土失其性而為災也。又曰:「思心不容,是謂不聖。厥咎霿,厥罰恒風,厥極凶短折。時則有脂夜之妖,時則有華孽,時則有牛禍,時則有心腹之痾,時則有黃眚、黃祥,惟金木水火沴土。」華孽,《劉歆傳》為嬴蟲之孽,謂螟屬也。(〈五行志〉)

按:此引《洪範五行傳》也。治宮室至稼穡不成,乃釋經中五行之土,「土爰 稼穡」、「稼穡作甘」諸句。其下引文則釋五事之思,「思曰睿」、「睿作聖」與 庶徵之風,休徵之聖,咎徵之蒙,六極之凶短折之關係及不至之妖祥也。〈洪 範〉云:「五曰思。」又曰:「思曰睿。」此引文作「思心」,多心字者,段玉 裁《古文尚書撰異》云:「《占文尚書》『五曰思』,《今文尚書》作『五曰思心』。 《尚書大傳》《鴻範五行傳》:『長事一日貌,貌之不恭,是謂不肅;次二事曰 言,言之不从,是謂不乂;次三事曰視,視之不明,是謂不焎;次四事曰聽, 聽之不聰,是謂不謀;次五事曰思心,思心之不容(今本改云「五事曰心維思, 思之不容」),是謂不聖,此一證也。』又曰:『禦思心于有尤。』此二證也。《大 傳》注云:『凡貌、言、視、聽、思心(今刻本無此二字,《文獻通考》有), 一事失,則逆人之心。』又曰:『包貌、言、視、聽而載之以思心者。』又曰: 『若思心不通。』又曰:『思心曰土。』又曰:『瞀與思心之咎同耳。』又曰: 『六事:貌、言、視、聽、思心、王極也。』此三證也。《漢書・藝文志》曰: 『貌、言、視、聽、思心失,而五行之序亂。』此四證也。〈五行志〉曰:『經 曰:「五曰思心(今本無心),思心(今本無心)曰容。」』傳曰:『思心之不容, 是謂不聖。思心者,心思慮也。(此釋思心甚明,今本改云思之不容)。容,寬 也。』此五證也。高誘注《戰國策》引〈五行傳〉曰:『思心之不容,是謂不 聖。』此六證也。荀悅〈孝惠皇帝紀〉:『五日思心(今本無心),土爲思心, 思心曰容,容作聖(今本譌作「土爲思,思曰心,心曰叡,叡作聖。」)』此七 證也。孝昭皇帝曰:『思心霿亂之應。』此八證也。司馬紹統《五行志》曰:『思 心之不容,是謂不聖。』此九證也。惟《今文尚書》作『五曰思心,思心曰容』, 而後伏生《鴻範五行傳》因之,各家言〈五行傳〉者又因之。學者不知有思心, 往往妄爲刪改。」段說是也。

又:此引作容,與今本作睿異者,考《史記·宋世家》引與今本《尚書》同作 「睿」,《漢書・五行志》引作「思曰睿」,皮錫瑞《今文尚書考證》曰:「《漢書・ 五行志》引經曰『思日睿』,又引傳曰『思心之不睿,是謂不聖,思心者,心思 慮也。容,寬也。孔子曰「居上不寬,吾何以觀之哉」,言上不寬大包容臣下, 則不能居聖位。』以寬訓容,明是容字;今本作睿誤。據志文引傳作睿誤,知 前引經作『思心曰睿』亦誤。應劭注曰:『睿,通也。古文作睿。』正言古文作 睿,與今文作容異;今本《漢書》與注皆誤作睿,非容非睿,義不可通。據《漢 志》作容誤,知《史記》作睿亦誤,史公雖於〈洪範〉多古文說,其字不當作 睿也。《今文尚書》當作『思心曰容』,《鴻範五行傳》曰『次五事曰思心,思心 之不容,是謂不聖』,鄭注曰:『容當爲睿。睿,通也。聖者包貌、言、視、聽 而載之以思心者,通以待之。君思心不通,則是非不能心明其事也。思心曰土。 志論皆言君不寬容則地動,玄或疑焉;今四行來沴,土地乃動,臣下之相帥, 爲畔逆之象,君一火通於事所致也;以爲不寬容,亦皆爲陰勝陽,臣強君之異。』 據鄭注則《大傳》容,鄭以爲當作睿。志論從今文作容,不寬容則地動;鄭從 古文作睿,不睿通則地動,其義甚明。」皮說是也。今本《尚書》作「睿」者, 即取鄭玄之說,而《史記》作睿爲後人所改也。又考〈秦誓〉云:「其心休休焉 其如有容。」《論語》云:「君子尊賢而容眾,嘉善而矜不能;我之大賢與,於 人何所不容。」《說文》曰:「思,容也。」老子曰:「容乃公,公乃王。」是古 文言思心者,貴其能容,伏生《大傳》以下言〈五行傳〉者皆作容,正合古誼。 錢大昕《十駕齋養新錄思》曰容條下云:「〈洪範〉一篇多韻語。貌曰恭,言曰 從,視曰明,聽曰聰,思曰容五句皆韻。」據此兩端而言之,則作容者實較勝; 鄭康成破容爲睿,未必爲古文,乃自立一家之言耳。睿、容二字,蓋形近而譌 混,《漢書・五行志》作蓉,非睿非容,即爲明證。

又:〈洪範〉曰:「曰蒙,恒風若。」此引作「霧」者,考《史記·宋世家》作霧,《漢書·五行志》作霧。《說文》十一篇下云:「霧,地气飛天不應曰霧。从雨敄聲。雾,籀文霧省。」又霧下云:「天氣下地不應曰霧;霧,晦也。从雨矟聲。」《說文》瞀云:「氐目謹視也。从目敄聲。」《釋天疏》引鄭注云「雾,聲近蒙」,《尚書正義》引鄭玄云:「蒙,見冒亂也。」《文獻通考》引鄭注云:「霧,冒也。君臣心有不明,則相蒙冒矣。」《正義》引王肅云:「蒙,瞽蒙。」諸書引文,或作霧、雾、霧、或作瞀,惟鄭玄、王肅言蒙;霧爲霧之俗字,雰爲籀文霧,而霿與霧義近音同,皆天候之事;據《爾雅·釋天疏》等引鄭注,即鄭本作零,而以音近蒙而訓爲蒙冒,是讀霁爲蒙也;王肅亦同。揆諸經文上

四事狂、曆、豫、急,皆指人事,人事行而天候應,然則鄭本作雺,讀雺爲蒙,以人事解之,實有見也。如此則古文本作霧、雺,作豬,瞀者乃同音義近相通作,然皆假借字也。今本《尚書》作蒙,據鄭、王之訓詁字改經字耳。

32. 〈五行傳〉曰:「皇之不極,是謂不建。厥咎眊,厥罰恒陰,厥極弱。時則有射妖,時則有龍蛇之孽,時則有馬禍,時則有下人伐上之痾,時則有日月亂行,星辰逆行。」皇,君也。極,中也。眊,不明也。(〈五行志〉)按:此引《洪範五行傳》也。此段乃言皇極不建之應,及所生之妖祥也。〈洪範〉云:「五、皇極。皇建其有極。」此云「皇之不極」,字與今本同。劉昭注引鄭玄云:「王,君也。……王極象天。……射,王極之度……屬王極。」皆作「王」,則鄭注所據本作「王」也。僞孔傳云:「大中之道,大立其有中。」以大訓皇,與鄭注訓君不同。司馬彪以皇訓君,與鄭注同,其下記事云:「又帝(安帝)獨有一子,以爲太子,信讒廢之,是皇不中。」是其所謂皇極,皇建其有極者,乃立君當中人之義也。考之〈洪範〉經云「天子作民父母,以爲天下王」,王既爲民父母,爲世之則,爲天下王,其立必中賢聖,然後能之;由是言之,皇訓爲君,於義爲長。〈馬融傳〉對策曰:「大中之道,在天爲北辰,在地爲人君。」則僞孔傳云「大中之道」者,乃襲取馬融之義也。

又:此曰「厥咎眊」,鄭注云:「瞀與思心之咎同耳。」則鄭本作「瞀」字;又云與思心之咎同,則瞀與雾(〈洪範〉之蒙)義相近同也(見前條)。《字林》曰:「目少精曰眊。」目少精則視不明,視不明則行亂,故鄭注曰:「眊,亂也。君臣不立,則上下亂矣。」夫思心爲五事之主;思心曰土,土爲五行之主;君爲天下之主,故鄭云「瞀與思心之咎同」也。又鄭注云:「故《傳》曰眊。」陳壽祺云:「鄭注引劉子駿〈五行傳〉以眊釋瞀是也。」又云:「《續漢志》引此注脫子駿二字,今從《文獻通考》。」據陳說則注當作「故《子駿傳》曰眊」,然則劉子駿(劉歆)傳作眊也。此作眊者,或據劉歆本,其於前多引劉歆之說,亦爲佐證。

又:劉昭引鄭注云:「夏侯勝說『伐』宜爲『代』,書亦或作『代』。」又曰:「天 於不中之人,恒耆其味,厚其毒,增以爲病,將以開賢代之。」然則伏生《大 傳》有作伐,亦有作代字者,夏侯勝說伐宜爲代,鄭注從之,是鄭取大夏侯之 說也。今《漢書·夏侯勝傳》作「伐」,或彼謹守本經,不易其字,唯解作代耳。

33. 贊曰:「皇極惟建,五事剋端,罰咎入診,逆亂浸干……」(〈五行志〉)

按:此贊曰云云者,即檃括《洪範五行傳》之辭也。(詳見〈五行志〉諸條。)

34. 武功:永平八年復。有太一山,本終南。垂山,本敦物。(〈郡國志〉)

按:〈禹貢〉云:「雍州:弱水既西,涇屬渭汭,漆沮既從,灃水攸同;荊岐既 旅,終南惇物,至于鳥鼠。原隰厎績,至于豬野。」此云「終南敦物」者,即 〈禹貢〉之「終南惇物」也。考《史記・夏本紀》云:「終南敦物,至于鳥鼠。」 《集解》引鄭玄曰:「〈地理志〉終南敦物,皆在右扶風武功也。」《漢書·地理 志》云:「終南惇物,至于鳥鼠。」又於〈右扶風武功〉云:「太壹山,古文以 爲終南;垂山,古文以爲敦物;皆在縣東。」皮錫瑞《今文尚書考證》云:「班 氏特舉古文之說,則今文說當與古文不同,今文說蓋不以惇物爲山名。〈漢無極 山碑〉曰:『有終南之惇物,岱宗之松楊,越之槿口條蕩。』洪适謂『以惇物爲 終南所產,與松篠同科;此歐陽、夏侯之說』;程大昌本之謂『終南產物殷阜, 故稱惇物,非別有一山』。考〈東方朔傳〉曰:『夫南山,天下之阻也;其地從 汧龍以東,商雒以西;其山出玉石金銀銅鐵,豫章、檀、柘異類之物,不可勝 原;此百工所取給,萬民所仰也。』是終南之饒物產,至漢猶然。此文與下『原 隰厎績,至于豬野』對文,惇物正與厎績相對。《史記集解》鄭玄曰『〈地理志〉 終南敦物,皆在右扶風武功也』,《水經》『終南山,惇物山,在扶風武功縣西南』, 皆與今文不合。」皮說可信。然則鄭玄注《書》用古文說,班固本用小夏侯今 文說,故於右扶風特注曰古文云云,《水經,山澤》篇以終南、惇物爲山名,亦 古文說:今僞孔傳云「三山名」,即取古文說也。此云「太一山,本終南;垂山, 本敦物」者,亦用古文說也。

又:〈夏本紀〉作「敦」、《漢書》述〈禹貢〉作「惇」、而云古文作「敦物」、段玉裁《古文尚書撰異》云:「志於武功山下云『古文敦物』,而述〈禹貢〉作惇者,淺人所改。」考〈無極山碑〉作惇,則知《尚書》一本作「惇」也;《說文》十篇下云:「惶(惇),厚也。从心覃聲。」三篇下云:「毂,怒也、詆也。一曰誰、何也。从支覃聲」惇敦並从蓽聲,故多通作。今文家其不作山名解者,蓋其字既作惇,解爲豐厚,乃就其字之本義爲說,故與古文不同,然則今文家必作惇矣;〈地理志〉作惇,乃班固守小夏侯本字,是以於右扶風中言「敦物」,特標古文以別之,是古文作敦,今文作惇可知也,段說以爲淺人所改,是不知古今文說之所以不同者,以其字不同故也,其說未允。〈無極山碑〉作惇,即爲今文家作惇之明證。《史記》作敦,或得之于孔安國者也。今本《尚書》作「惇」,而爲山名,非古非今,其謬大矣。此云「垂山,本敦物」作敦者,蓋彼既同古

文說,故其字因之作敦也。

- 35. 《書》曰:「明試以功,車服以庸。」(〈與服志〉) 按:〈堯典〉云:「敷奏以言,明試以功,車服以庸。」此稱《書》曰者,即引 〈堯典〉之文。
- 36. 日、月、星辰,山、龍、華蟲,作績;宗彝、藻、火、粉米、黼、黻, 編繡,以五采章施于五色,作服。(〈與服志〉)

按:〈皋陶謨〉云:「予欲觀古人之象,日、月、星辰、山、龍、華蟲,作會; 宗彝、藻、火、粉米、黼、黻,絺繡,以五采彰施于五色,作服,汝明。」此 所云云者,正引〈皋陶謨〉之文也。考《隋書・禮儀志》大業元年虞世基奏近 代故實依《尚書大傳》「山龍,純青;華蟲,純黃;作繪宗彝,純黑;藻,純白; 火,純赤,以此相間而爲五采。」《說文》繪字下云:「繪,會五采繡也。从系 |會聲。〈虞書〉曰:『山龍,華蟲,作繪。』《周禮・司服注》云:「《書》曰:『予 欲觀古人之象,日、月、星辰、山、龍、華蟲,作繢;宗彝、藻、火、粉米、 黼、黻,希繡。』此古天子冕服十二章。希讀爲黹,或作絺,字之誤也。」《春 秋左氏傳》 昭公廿五年傳正義曰:「鄭玄讀會爲續,謂畫也,絺爲黹,謂刺也。」 《文選‧景福殿賦》曰:「命共工使作繢,明五采之彰施。」《尚書,釋文》曰: 「會,馬鄭本作繪。胡對反。」《尚書正義》曰:「鄭玄云:『謂有日月星辰之章, 設日月書於衣服旌旗也。』」又曰:「鄭玄云『會讀爲繪,宗彝謂宗廟之鬱鬯樽 也。故虞夏以上,蓋取虎彝、蜼彝而已;粉米,白米也。絺譖爲黹,黹,紩也。 自日月至黼黻凡十二章;天子以飾祭服。凡畫者爲繪,刺者爲繡;此繡與繪各 有六,衣用繪,裳用繡。』」察乎上述諸條,知經文本作「繪」,據《說文》引 〈虞書〉可知;鄭玄本亦作繪;何以明之?《左傳正義》引鄭玄云「讀會爲績」, 與《尙書正義》引作「會讀爲繪」不同;鄭玄既以「繪」訓書(《尚書正義》), 而衣用繪畫,而裳用刺繡,畫與繡二字顯然有別,《說文》訓繪曰「會五采繡」, 是繡,不應用於衣,而《說文》繢字云「織餘也。一曰畫也。从系貴聲。」是 畫義當用繢字,故云「繪讀爲繢」,讀爲者易其字也;故當從《左傳正義》所引 作「讀繪爲繢」,今《左傳正義》引作會,乃後人所改,而《尚書正義》改之尤 甚;故知鄭本當亦作繪。今本《尙書》之「會」,本亦作「繪」,以其用鄭玄之 衣畫裳繡,則字當同鄭本,且孔傳云「會五采也」,與《說文》繪訓同,故其字 當爲繪,刪《說文》之「繡」字者,乃因用鄭玄衣用畫之義,故去之。《周禮・

司服》鄭注及〈景福殿賦〉引作「績」者,乃因其所易之字爲文故也。陳喬樅 以爲鄭玄《周禮注》所稱《書》是據《今文尚書》,亦三家之異文者,未審。《尚 書大傳》作「繪」,則今文亦作「繪」也。今此引作「續」者,亦據易字而爲之, 《續漢志》下云「乘輿備章,日月星辰十二章;三公,諸侯用山龍九章,九卿 以下用華蟲七章,皆備五采……」,是同鄭玄說之明證。

又:《說文》璪字下引〈虞書〉曰「璪、火、黺,米」,又黹部黺下云「袞衣;山龍華蟲。黺,畫粉也,从黹从粉省。衛宏說。」又系部絲下云「繡文如聚細米也」,許叔重於黺下明稱衛宏說,則其爲古文必矣;然則今本作「藻」、「粉」壁中古文作「璪」、「黺」也。又鄭注絺作希者,段玉裁《古文尚書撰異》云:「《尚書正義》引鄭注云『希讀爲黹,黹,紩也』,此與《周禮》注合;鄭本《尚書》作希繡,與《周官》希冕字同。」又曰:「今《說文》無希字,而絺稀晞睎豨莃郗等字皆以希爲聲,以〈虞夏書〉希繡,《周官》希冕斷之,則希者古文帶字也,从巾,所紩也,从爻,象繡文也,俗借爲稀少字;鄭君讀希爲黹,是以今字易古文。」然則古文本當作希,段說可從;今本作絺者,即鄭注云字之誤也。

又:據鄭注言十二章,日一、月二、星辰三、山四、龍五、華蟲六,此六者續之於衣也;宗彝七、藻八、火九、粉米十,黼十一、黻十二,此六者,繡之於裳也。然據《大傳》引以五色分,不以續繡;以山龍爲一,華蟲爲一,作繪宗彝爲一、藻爲一、火爲一,上無日月星,下缺粉米黼黻;二說不同。陳道祥《禮書》引鄭注云:「華蟲,五色之蟲而以爲黃,璪,水艸蒼色而以爲白,玄或疑焉。」是鄭氏不从《大傳》之說也。

37. 贊曰:車輅各庸。(〈與服志〉)

按:〈皋陶謨〉云:「賦納以言,明庶以功,車服以庸。」此云「車輅各庸」者, 即檃括〈皋陶謨〉之文。

重要參考書目

甲、經學之屬

-- 、--般類

- 1. 《毛詩正義》、毛亨傳、鄭玄箋、孔穎達正義,東昇出版事業公司。
- 2. 《儀禮注疏》、鄭玄注、賈公彥疏,東昇出版事業公司。
- 3. 《周易正義》,王弼、康伯注、孔穎達正義,東昇出版事業公司。
- 4. 《禮記正義》,鄭玄注、孔穎達正義,東昇出版事業公司。
- 5. 《春秋左傳正義》,杜預集解、孔穎達正義,東昇出版事業公司。
- 6. 《論語注疏》,何晏集解、邢昺疏,東昇出版事業公司。
- 7. 《孟子注疏》, 趙歧注, 東昇出版事業公司。
- 8. 《爾雅注疏》,郭璞注,邢昺疏,東昇出版事業公司。
- 9. 《九經古義》, 惠楝(皇清經解正編), 漢京文化事業有限公司。
- 10. 《經義述闡》,王引之(皇清經解正編),漢京文化事業有限公司。
- 11. 《群經平議》,俞樾(皇清經解續編),漢京文化事業有限公司。
- 12. 《漢碑引經考》,皮錫瑞,文海出版社。

二、《尚書》類

- 1. 《尚書正義》,舊題孔安國傳、孔穎達正義,東昇出版事業公司。
- 2. 《書集傳》, 蔡沈 (通志堂經解), 漢京文化事業有限公司。
- 3. 《尚書考異》,梅鷟(四庫珍本九集),商務印書館。
- 4. 《古文尚書考》,惠楝(皇清經解正編),漢京文化事業有限公司。
- 5. 《尚書集注音疏》,江聲(皇清經解正編),漢京文化事業有限公司。
- 6. 《尚書後案》,王鳴盛(皇清經解正編),漢京文化事業有限公司。
- 7. 《古文尚書撰異》,段玉裁(皇清經解正編),漢京文化事業有限公司。

- 8. 《尚書今古文注疏》,孫聲衍(皇清經解正編),漢京文化事業有限公司。
- 9. 《尚書大傳輯校》, 伏勝撰,鄭玄注、陳壽祺輯校(皇清經解續編),漢京文化事業有限公司。
- 10. 《尚書餘論》,丁晏(皇清經解續編),漢京文化事業有限公司。
- 11. 《今文尚書經説考》,陳喬樅(皇清經解續編),漢京文化事業有限公司。
- 12. 《尚書歐陽夏侯遺説考》,陳喬樅(皇清經解續編),漢京文化事業有限公司。
- 13. 《今文尚書敍錄》,陳喬樅(皇清經解續編),漢京文化事業有限公司。
- 14. 《晚書訂疑》,程廷祚(皇清經解續編),漢京文化事業有限公司。
- 15. 《尚書今古文集解》,劉逢祿(皇清經解續編),漢京文化事業有限公司。
- 16. 《今文尚書考證》,皮錫瑞 (師伏堂刊本),藝文印書館。
- 17. 《尚書古注便讀》,朱駿聲,廣文書局。
- 18. 《清儒書經彙解》,鼎文書局。
- 19. 《尚書新證》,于省吾,藝文印書館。
- 20. 《尚書釋義》, 屈萬里, 華岡出版部。
- 21. 〈漢石經《尚書》殘字集證〉, 屈萬里, 中央研究院歷史語言研究所專刊之四十九。
- 22. 《尚書異文彙錄》, 屈萬里, 聯經出版事業公司。
- 23. 《尚書集釋》, 屈萬里, 聯經出版事業公司。
- 24. 《閻毛古文《尚書》公案》,戴君仁,國立編譯館。
- 25. 〈先秦典籍引《尚書》考〉,許師錟輝,(自印本)。
- 26. 《尚書鄭氏學》,陳品卿,(自印本)。
- 27. 《尚書異文集證》,朱延獻,中華書局。
- 28. 《漢書《尚書》説考徵》,駱文琦,(自印本)。

三、文字小學類

- 1. 《說文解字注》,許慎撰、段玉裁注,黎明文化事業公司。
- 2. 《廣韻》,陳彭年等重修,聯貫出版社。
- 3. 《説文通訓定聲》,朱駿聲,藝文印書館。
- 4. 《經籍纂詁》, 阮元譔集, 偉成出版社。
- 5. 《三代吉金文存》,羅振玉撰,文華出版公司。

乙、史部之屬

一、一般類

- 1. 《史記集解》,司馬遷撰、裴駰集解,藝文印書館。
- 2. 《漢書補注》,班固撰、顏師古注、王先謙補注,藝文印書館。
- 3. 《晉書》,房喬等撰,鼎文書局。

- 4. 《宋書》,沈約等撰,鼎文書局。
- 5. 《史通通釋》,劉知幾撰,浦起龍釋,里仁書局。
- 6. 《十七史商権》,王鳴盛,廣文書局。
- 7. 《二十二史剳記》, 趙翼, 商務印書館。
- 8. 《二十五史述要》,楊家駱,鼎文書局。

二、《後漢書》類

- 1. 《後漢書集解》,范曄、司馬彪著,李賢注,王先謙集解,藝文印書館。
- 2. 《後漢書附東觀漢記七家後漢書》,范曄、司馬彪著,鼎文書局。

丙、子部之屬

- 1. 《墨子閒話》, 舊題墨子撰, 孫詒讓閒話, 河洛圖書出版社。
- 2. 《山海經校注》,舊題大禹、伯益記,袁珂注,里仁書局。
- 3. 《春秋繁露》,董仲舒撰,中華書局。

丁、雜著之屬

- I. 《經學歷史》, 皮錫瑞, 河洛圖書出版社。
- 2. 《觀堂集林》,王國維,河洛圖書出版社。
- 3. 《兩漢經學今古文平議》, 錢穆, 三民書局。
- 4. 《國學概論》,程發軔,正中書局。
- 5. 《六十年來之國學》,程發朝主編,正中書局。

戊、論文之屬

- 1. 〈尚書源流考〉劉師培(劉申叔先生遺書),大新書局。
- 2. 〈與吳承仕論《尚書》古今文書〉,章太炎,《華國月刊》二卷七、七期。
- 3. 〈尚書傳孔王異同考〉,吳承仕,《華國月刊》二卷七、十期。
- 4. 〈古文尚書作者研究〉, 戴君仁,《孔孟學報》第一期。
- 5. 〈〈今文泰誓〉疏證〉,許師錟輝,高郵高仲華先生秩華誕特刊。
- 6. 〈尚書流衍述要〉,李振興,《孔孟學報》四十一期。
- 7. 〈《史記》引《尚書》文考釋〉, 黄盛雄,《台中師專學報》第七期。
- 8. 《尚書研究論集》,劉德漢等撰,黎明文化事業公司。